

হায়াতুস সাহাবিয়াত

মহিলা সাহাবীগণের জীবনাদর্শ

মাওলানা সাঈদ আনসারী রহ.

মাওলানা আব্দুস সালাম নদভী রহ.



মহিলা সাহাবীয়াগণের জীবনাদর্শ

[হায়াতুস সাহাবিয়াত-এর বঙ্গানুবাদ]

মূল

মাওলানা সায়ীদ আনসারী (রহ.)

মাওলানা আবদুস সালাম নদভী (রহ.)

অনুবাদ

মাওলানা আবদুল ওয়াহহাব (রহ.)

প্রতিষ্ঠাতা : নাদিয়াতুল কুরআন (কুরআন শিক্ষাবোর্ড বাংলাদেশ)

নাদিয়াতুল কুরআন প্রকাশনী

ইসলামী টাওয়ার, ১১ বাংলাবাজার, ঢাকা-১১০০

মোবাইল : ০১৯৭৫-০০৯৮২৪, ০১৭৫৩-১৮০৫৫৫



https://t.me/islaMic_fdf

মহিলা সাহাবীয়াগণের জীবনাদর্শ

মূল : মাওলানা সায়ীদ আনসারী (রহ.)
মাওলানা আবদুস সালাম নদভী (রহ.)

প্রকাশক : মাওলানা মাহমুদুল হাসান (বড় হুজুর)
মহাপরিচালক, নাদিয়াতুল কুরআন শিক্ষাবোর্ড
প্রতিষ্ঠাতা, নাদিয়াতুল কুরআন প্রকাশনী

গ্রন্থস্বত্ব : প্রকাশক কর্তৃক সংরক্ষিত

প্রকাশকাল : ১৯৯০ ইং

মুদ্রণ : নাদিয়াতুল কুরআন প্রিন্টার্স
বাংলাবাজার, ঢাকা-১১০০, মোবা : ০১৭৫৩-১৮০৫৫৫

মূল্য : ২৪০ টাকা মাত্র



আমার শ্রদ্ধার/ স্নেহের :.....

..... কে

প্রকৃত্যানা উপহার দিলাম।

উপহার দাতা :.....

ঠিকানা :.....

তারিখ :.....

প্রকাশকের কথা

‘নাদিয়াতুল কুরআন’ বাংলাদেশে অত্যন্ত সুপরিচিত দ্বীনি তাবলীগধর্মী একটি প্রকাশন-সংস্থার নাম। এই সংস্থার তরফ থেকে ইতিপূর্বে আমরা অনেক ইসলামী গ্রন্থ প্রকাশ করেছি; কিন্তু এবার আমাদের উদ্যোগ সম্পূর্ণ ভিন্ন। মাওলানা সায়ীদ আনসারী ও মাওলানা আব্দুস সালাম নদভী বিরচিত বিখ্যাত ‘হায়াতুস সাহাবীয়াত’ শীর্ষক উর্দু গ্রন্থটির বঙ্গানুবাদ আমরা প্রকাশ করতে পেরে নিজেদেরকে খুবই সৌভাগ্যবান মনে করছি এবং সেই সূত্রে পরম করুণাময় মহান আল্লাহর নিকট শুকরিয়া জ্ঞাপন করছি।

মাওলানা সায়ীদ আনসারী ও মাওলানা আব্দুস সালাম নদভী দু’জনেই উর্দু ভাষার খ্যাতিমান লেখক, ঐতিহাসিক এবং ইসলাম বিষয়ে অসংখ্য আধুনিক নির্ভরযোগ্য গ্রন্থ প্রণেতা। মহিলা সাহাবীদের মহান জীবন ও জীবনাদর্শ বিষয়ে এই গ্রন্থের মত নির্ভরযোগ্য, সুলিখিত ও তথ্যপূর্ণ কিতাব উর্দু ভাষায় কেন-আরবী ভাষায়ও খুব বেশি লেখা হয়নি। এই রকম অসাধারণ একটি গ্রন্থ আপনাদের গোচরে আনার সৌভাগ্যে আমাদের গৌরবের সীমা নেই। আপনারা, অর্থাৎ বাংলাদেশের সকল স্তরের বিপুল মুসলিম পাঠক সম্প্রদায় যদি আমাদের এই গ্রন্থকে স্বাগত করেন, তবেই আমাদের শ্রম সার্থক বলে বিবেচনা করবো।

নানান ঝামেলা ও ব্যস্ততার কারণে যদি অসাবধানতা বশতঃ ভুল-ভ্রান্তি থেকে যায়, তার জন্য দুঃখিত এবং আপনাদের মূল্যবান উপদেশ ও সহযোগিতায় পরবর্তীতে সংশোধনের আশা রাখি।

এই গ্রন্থ প্রকাশনার সঙ্গে সংযুক্ত কম্পোজকর্মী, প্রেসম্যান এবং অন্যান্য সকলকে শুভেচ্ছা জানাই।

এই গ্রন্থ প্রকাশের ক্ষেত্রে সর্বাধিক কৃতিত্ব যার-তার সঙ্গে আমার যে সম্পর্ক, তাতে কৃতজ্ঞতা বা ধন্যবাদ-জ্ঞাপন ধৃষ্টতাতুল্য বিধায় তা থেকে বিরত থাকলাম।

সবশেষে আল্লাহর অশেষ শুকরিয়া জ্ঞাপন করি।

মাওলানা মাহমুদুল হাছান

সূচীপত্র

বিষয়	পৃষ্ঠা	বিষয়	পৃষ্ঠা
পূর্বকথন	১১	হযরত হাফসা (রাযিঃ)	৪৭
ধর্মীয় ক্ষেত্রে অবদান	১৩	বিবাহ, ইসলাম গ্রহণ, হিজরত ও	
রাজনৈতিক অবদান	১৫	দ্বিতীয় বিবাহ	৪৭
জ্ঞানের ক্ষেত্রে অবদান	১৬	সন্তান-সন্ততি	৪৮
সম্পাদকের কথা	২১	মহত্ত্ব ও মহিমা	৪৮
মহানবী সাল্লাল্লাহু আলাইহি		দরিদ্র-জননী হযরত যয়নব (রাযিঃ)	৫১
ওয়াসাল্লাম-এর পবিত্র পত্নীগণ	২৩	হযরত উম্মে সালমা (রাযিঃ)	৫২
হযরত খাদীজা (রাযিঃ)	২৩	বিবাহ, ইসলাম গ্রহণ, হাবশায় হিজরত	
ব্যবসা	২৩	মদীনায় হিজরত	৫২
মহানবী সাল্লাল্লাহু আলাইহি		আবু সালমার মৃত্যু, দ্বিতীয় বিবাহ এবং	
ওয়াসাল্লাম-এর সাথে খাদীজা (রাযিঃ)-		পারিবারিক অবস্থা	৫৩
এর বিবাহ	২৪	সাধারণ অবস্থা	৫৬
ইসলাম গ্রহণ	২৪	সন্তান-সন্ততি	৬০
মৃত্যু	২৮	যয়নবঃ অবয়ব সংগঠন	৬০
সন্তান-সন্ততি	২৯	হযরত যয়নব বিনতে জাহাশ (রাযিঃ)	৬৫
মর্যাদা ও কীর্তিমালা	২৯	অবয়ন সংগঠন, মহত্ত্ব ও মহিমা	
হযরত সাওদা (রাযিঃ)	৩২	চরিত্র-বৈশিষ্ট্য	৭০
বিবাহ, ইসলাম গ্রহণ, নবীপত্নী হিসাবে		হযরত জুআয়রা (রাযিঃ)	৭২
সাওদা	৩২	অবয়ব সংগঠন, মহত্ত্ব ও মহিমা	
সাধারণ অবস্থা	৩৩	চরিত্র-বৈশিষ্ট্য	৭৪
মৃত্যু	৩৩	হযরত উম্মে হাবিবা (রাযিঃ)	৭৫
সন্তান-সন্ততি, অবয়ব সংগঠন		বিবাহ, ইসলাম গ্রহণ, দ্বিতীয় বিবাহ	৭৫
মর্যাদা ও মহিমা, চরিত্র	৩৪	সন্তান-সন্ততি, অবয়ব-সংগঠন	৭৭
হযরত আয়েশা (রাযিঃ)	৩৬	মহত্ত্ব ও মহিমা, চরিত্র-বৈশিষ্ট্য	৭৭
বিবাহ	৩৬	হযরত ময়মুনা (রাযিঃ)	৭৮
সাধারণ অবস্থা	৩৭	মহত্ত্ব ও মহিমা	৭৯
ইন্তেকাল, সন্তান-সন্ততি,		হযরত সাফিয়া (রাযিঃ)	৮০
অবয়ব-সংগঠন, মহত্ত্ব ও মহিমা	৪১	বিবাহ	৮১
চরিত্র ও স্বভাব	৪৬	সাধারণ অবস্থা	৮১

বিষয়	পৃষ্ঠা	বিষয়	পৃষ্ঠা
মহত্ত্ব ও মহিমা, চরিত্র-বৈশিষ্ট্য	৮২	হিজরত এবং সাধারণ অবস্থা	১০৩
মহানবী সাল্লাল্লাহু আলাইহি		সন্তান-সন্ততি, চরিত্র-বৈশিষ্ট্য	১০৪
ওয়াসাল্লাম-এর পবিত্র কন্যাগণ	৮৫	হযরত উম্মুল ফযল (রাযিঃ)	১০৪
হযরত যয়নব (রাযিঃ)	৮৫	নাম ও বংশ পরিচয়, বিবাহ, ইসলাম	
বিবাহ, সাধারণ অবস্থা	৮৫	গ্রহণ ও সাধারণ অবস্থা	১০৪
সন্তান-সন্ততি	৮৬	সন্তান-সন্ততি, গুণাবলী ও বৈশিষ্ট্য	১০৫
চরিত্র-বৈশিষ্ট্য	৮৭	চরিত্র-বৈশিষ্ট্য	১০৫
হযরত রোকেয়া (রাযিঃ)	৮৭	হযরত উম্মে রুমান (রাযিঃ)	১০৫
বিবাহ, ইসলাম ও সাধারণ অবস্থা	৮৭	নাম ও বংশ পরিচয়, বিবাহ ইসলাম	
সন্তান-সন্ততি, অবয়ব-সংগঠন	৮৮	গ্রহণ, হিজরত ও সাধারণ অবস্থা	১০৬
হযরত উম্মে কুলসুম (রাযিঃ)	৮৮	সন্তান-সন্ততি	১০৭
হযরত ফাতেমা (রাযিঃ)	৮৯	হযরত সুমায়্যা (রাযিঃ)	১০৭
পিতৃহীনতার দাগ	৯১	নাম ও বংশ পরিচয়, বিবাহ ও ইসলাম	
সন্তান-সন্ততি	৯৩	গ্রহণ	১০৭
অবয়ব	৯৩	হযরত উম্মে সুলাইম (রাযিঃ)	১০৮
গুণাবলী ও বৈশিষ্ট্য	৯৪	নাম ও বংশ পরিচয়, বিবাহ ও ইসলাম	
সাধারণ মহিলা সাহাবীগণ		গ্রহণ	১০৮
হযরত উমামা (রাযিঃ)	৯৮	সাধারণ অবস্থা	১০৮
নাম ও বংশ পরিচয়, সাধারণ অবস্থা		সন্তান-সন্ততি	১১০
বিবাহ	৯৮	গুণাবলী ও বৈশিষ্ট্য	১১০
সন্তান-সন্ততি	৯৯	চরিত্র-বৈশিষ্ট্য	১১০
হযরত সুফিয়া (রাযিঃ)	৯৯	হযরত উম্মে উমারা (রাযিঃ)	১১২
বিবাহ, ইসলাম গ্রহণ	৯৯	নাম ও বংশ পরিচয়, ইসলাম গ্রহণ ও	
সাধারণ অবস্থা	৯৯	যুদ্ধ	১১২
হযরত উম্মে আইমন (রাযিঃ)	১০১	সন্তান-সন্ততি	১১৩
বিবাহ, ইসলাম গ্রহণ	১০১	মর্যাদা ও মহত্ত্ব	১১৩
সাধারণ অবস্থা	১০১	হযরত উম্মে আতিয়া (রাযিঃ)	১১৪
সন্তান-সন্ততি	১০২	নাম ও বংশ পরিচয়, বিবাহ, ইসলাম	
গুণাবলী ও বৈশিষ্ট্য চরিত্র	১০২	গ্রহণ, যুদ্ধ ও সাধারণ অবস্থা	১১৪
হযরত ফাতিমা বিনতে আসাদ (রাযিঃ)	১০৩	মর্যাদা ও মহত্ত্ব, চরিত্র-বৈশিষ্ট্য	১১৫
নাম ও বংশ পরিচয়	১০৩	হযরত রুবাই বিনতে মুআওয়াজ	
বিবাহ, ইসলাম গ্রহণ	১০৩	বিন আফরা (রাযিঃ)	১১৫

বিষয়	পৃষ্ঠা	বিষয়	পৃষ্ঠা
নাম ও বংশ পরিচয়	১১৫	ইসলাম গ্রহণ ও সাধারণ অবস্থা	১৩১
ইসলাম গ্রহণ	১১৫	সন্তান-সন্ততি	১৩২
সাধারণ অবস্থা	১১৫	মর্যাদা ও মহত্ব ও চরিত্র-বৈশিষ্ট্য	১৩২
মৃত্যু	১১৬	হযরত য়য়নব বিনতে আবি মুয়াবিয়া (রাযিঃ)	১৩৩
সন্তান-সন্ততি, মর্যাদা ও মহত্ব, চরিত্র-বৈশিষ্ট্য	১১৬	নাম ও বংশ পরিচয়, বিবাহ ও সাধারণ অবস্থা	১৩৩
হযরত উম্মে হানি (রাযিঃ)	১১৭	সন্তান-সন্ততি	১৩৩
নাম ও বংশ পরিচয়, বিবাহ, ইসলাম গ্রহণ ও মৃত্যু	১১৭	মর্যাদা ও মহত্ব চরিত্র-বৈশিষ্ট্য	১৩৩
সন্তান-সন্ততি, মর্যাদা ও মহত্ব	১১৭	হযরত আসমা বিনতে এজিদ (রাযিঃ)	১৩৪
চরিত্র-বৈশিষ্ট্য	১১৮	নাম ও বংশ পরিচয়, ইসলাম গ্রহণ	১৩৪
হযরত ফাতেমা বিনতে খাতাব (রাযিঃ)	১১৮	সাধারণ অবস্থা	১৩৫
নাম ও বংশ পরিচয়, বিবাহ ও ইসলাম গ্রহণ	১১৮	মর্যাদা ও মহত্ব, চরিত্র-বৈশিষ্ট্য	১৩৬
হিজরত ও সন্তান-সন্ততি	১১৯	হযরত উম্মে দারদা (রাযিঃ)	১৩৬
হযরত আসমা বিনতে উমাইস (রাযিঃ)	১১৯	নাম ও বংশ পরিচয় মর্যাদা	১৩৬
নাম ও বংশ পরিচয়, বিবাহ, ইসলাম গ্রহণ ও সাধারণ অবস্থা	১১৯	মহত্ব ও চরিত্র বৈশিষ্ট্য	১৩৭
সন্তান-সন্ততি	১২০	হযরত উম্মে হাকিম (রাযিঃ)	১৩৭
মর্যাদা ও মহত্ব	১২২	নাম ও বংশ পরিচয়, বিবাহ ও সাধারণ অবস্থা	১৩৭
হযরত আসমা বিনতে আবি বকর (রাযিঃ)	১২২	অবস্থা	১৩৮
নাম, বংশ পরিচয় ও বিবাহ	১২৩	হযরত খানসা (রাযিঃ)	১৩৮
ইসলাম গ্রহণ ও সাধারণ অবস্থা	১২৩	নাম ও বংশ পরিচয়, বিবাহ, ইসলাম গ্রহণ ও সাধারণ অবস্থা	১৩৭
সন্তান-সন্ততি ও অবয়ব-কাঠামো	১২৬	সন্তান-সন্ততি, মর্যাদা ও মহত্ব	১৩৯
মর্যাদা ও ও মহত্ব	১২৬	হযরত উম্মে হারাম (রাযিঃ)	১৪০
চরিত্র-বৈশিষ্ট্য	১২৬	নাম ও বংশ পরিচয়	১৪০
হযরত ফাতিমা বিনতে কায়েস (রাযিঃ)	১২৯	বিবাহ, সাধারণ অবস্থা এবং মৃত্যু	১৪০
নাম ও বংশ পরিচয়, বিবাহ, ইসলাম গ্রহণ ও সাধারণ অবস্থা	১২৯	সন্তান-সন্ততি, মর্যাদা ও মহত্ব	১৪১
মর্যাদা ও মহত্ব	১৩০	হযরত উম্মে ওয়ায়কা বিনতে আব্দুল্লাহ (রাযিঃ)	১৪১
হযরত শিফা বিনতে আব্দুল্লাহ (রাযিঃ)	১৩১	নাম ও বংশ পরিচয়, ইসলাম গ্রহণ	১৪১
নাম ও বংশ পরিচয়, বিবাহ	১৩১	যুদ্ধ বিগ্রহ ও শাহাদত	১৪১

বিষয়	পৃষ্ঠা	বিষয়	পৃষ্ঠা
হযরত হিন্দ (রাযিঃ)	১৪২	দ্বিতীয় খণ্ড	১৫০
নাম ও বংশ পরিচয়, বিবাহ, সাধারণ		ভূমিকা	১৫১
অবস্থা	১৪২	ইসলামের ঘোষণা	১৫১
ইসলাম গ্রহণ	১৪৩	সংকটে সহিষ্ণুতা	১৫২
যুদ্ধ বিগ্রহ	১৪৪	আত্মীয়তার সম্পর্ক- ছেদ	১৫২
সন্তান-সন্ততি ও চরিত্র- বৈশিষ্ট্য	১৪৪	আকাইদ বা প্রত্যাবলী	১৫৩
হযরত উম্মে কুলসুম বিনতে উকবা (রাযিঃ)	১৪৫	শিরক থেকে দূরে	১৫৩
নাম ও বংশ পরিচয়, ইসলাম গ্রহণ		মহানবীর সাল্লাল্লাহু আলাইহি	
হিজরত	১৪৫	ওয়াসাল্লাম -এর নবুয়াতে পূর্ণ বিশ্বাস	১৫৪
বিবাহ, সন্তান-সন্ততি, মর্যাদা ও মহত্ত্ব	১৪৬	ইবাদতসমূহ	১৫৫
হযরত যয়নব বিনতে আবি সালামা (রাযিঃ)	১৪৬	প্রসঙ্গ নামায	১৫৫
নাম ও বংশ পরিচয়, সাধারণ অবস্থা		জুমার নামায, ইশরাকের নামায	১৫৫
বিবাহ	১৪৬	তাহাজ্জুদের নামায	১৫৫
মর্যাদা ও মহত্ত্ব	১৪৭	যাকাত সদকার অধ্যায়	১৫৬
হযরত উম্মে আবি হুরাইরা (রাযিঃ)	১৪৭	দরিদ্রের প্রয়োজনানুগ সাহায্য	১৫৭
নাম ও বংশ পরিচয়, ইসলাম গ্রহণ	১৪৭	রোযার অধ্যায়	১৫৭
সন্তান-সন্ততি	১৪৭	নফল রোযাঃ মৃতদের জন্যেও রোযা	১৫৭
হযরত খাওলা বিনতে হাকিম (রাযিঃ)	১৪৮	ই'তেকাফ	১৫৮
নাম ও বংশ পরিচয়, বিবাহ, সাধারণ	১৪৮	হজ্জু-প্রসঙ্গ	১৫৮
অবস্থা, মর্যাদা ও মহত্ত্ব, চরিত্র- বৈশিষ্ট্য	১৪৮	মাতা-পিতার পক্ষে হজ্জু, ওমরা করা	১৫৯
হযরত হামনা বিনতে জাহাশ (রাযিঃ)	১৪৮	জিহাদ প্রসঙ্গে	১৫৯
নাম ও বংশ পরিচয়, বিবাহ, ইসলাম গ্রহণ, সাধারণ অবস্থা সন্তান-সন্ততি	১৪৮	শাহাদত বরণের আগ্রহ	১৫৯
		কুরআনের প্রতি আমল	১৬০
		শরীয়ত নিষিদ্ধ কাজ থেকে বিরত থাকা	১৬১
		বাদ্যযন্ত্র-থেকে বিরত থাকা	১৬১
		সন্দেহ মূলক কর্ম থেকে দূরে থাকা	১৬১
		ধর্মীয় জীবনের বিভিন্নরূপ	১৬২
		পবিত্র স্থানসমূহের দর্শন	১৬২
		শপথ পূরণে সততা	১৬২
		নবীপ্রেম-মহানবী সাল্লাল্লাহু আলাইহি	
		ওয়াসাল্লাম এর স্মৃতি-সংরক্ষণ	১৬৩

বিষয়	পৃষ্ঠা	বিষয়	পৃষ্ঠা
মহানবী সাল্লাল্লাহু আলাইহি ওয়াসাল্লাম		মাতা-পিতার সহযোগিতা	১৭৭
এর সহযোগিতা, মহানবী (সাঃ)-এর		এতিমদের লালন পালন	১৭৭
সেবা	১৬৪	এতিমদের মালামাল সংরক্ষণ	১৭৮
নাতে রাসূল ও মহানবী সাল্লাল্লাহু		বাচ্চাদের প্রতিপালন	১৭৮
আলাইহি ওয়াসাল্লাম নির্দেশাবলীর		স্বামীর ধন-সম্পদ সংরক্ষণ	১৭৮
আনুগত্য	১৬৬	স্বামীর সন্তোষ বিধান	১৭৯
মহানবী সাল্লাল্লাহু আলাইহি ওয়াসাল্লাম		স্বামীর প্রতি ভালবাসা	১৮০
-এর সন্তোষ	১৬৬	স্বামীর সেবা	১৮০
নবীজীর কাছে নিজেদের সমর্পণ	১৬৭	সামাজিক জীবনপদ্ধতি	১৮১
মহানবী সাল্লাল্লাহু আলাইহি		দারিদ্র ও পোশাক	১৮১
ওয়াসাল্লামকে আমন্ত্রণ	১৬৮	পর্দা	১৮২
মহানবী সাল্লাল্লাহু আলাইহি		ব্যবহারিক লেন-দেন	১৮৩
ওয়াসাল্লাম-এর প্রতি অনুরাগ	১৬৮	কর্জ আদায়ের ধারণা	১৮৩
চরিত্র-বৈশিষ্ট্য	১৬৯	উত্তরাধিকার বন্টনে সততা	১৮৪
করুণাশীল স্বভাবধর্ম, ত্যাগ	১৫৯	ধর্মীয় অবদান	১৮৪
বদান্যতা	১৬৯	ইসলাম প্রচার	১৮৪
প্রতিপক্ষ থেকে প্রতিশোধ না নেয়া	১৭০	নও মুসলিমদের লালন-পালন	১৮৫
অতিথি আপ্যায়ন	১৭১	মুজাহিদদের সেবা	১৮৫
ধৈর্য ও স্থিরতা	১৭১	মসজিদের কাজ	১৮৬
বীরত্ব	১৭২	বিদআতের নিরাকরণ	১৮৭
হৃদয়ের সজীবতা	১৭৩	আত্মসমীক্ষা	১৮৭
পবিত্রতা ও শুদ্ধতা	১৭৩	মানব চরিত্র-নির্মাণে ভূমিকা	১৮৮
সামাজিক সদাচার	১৭৪	বাজিখেলা নিরোধ	১৮৮
মহৎ আচরণ	১৭৪	মদ্যপানের বিরুদ্ধতায়	১৮৮
উপটোকন	১৭৪	কৃত্রিম চুলের ব্যবহারে নিষেধারোপ	১৮৯
ভৃত্যদের সঙ্গে ব্যবহার ও পারস্পরিক		জ্ঞান চর্চার ক্ষেত্রেও অবদান	১৮৯
সহযোগিতা	১৭৫	দ্বীনের রহস্য-সম্পর্কিত জ্ঞান	১৯৫
গুশ্রুবা	১৭৫	ইসলামী আইন শাস্ত্র	২০২
শোকপালন ও সান্ত্বনা দান	১৭৬	উপসংহার	২০৪
বাৎসল্যবোধ ও সন্তানের প্রতি মমত্ব	১৭৬		
ভাই-বোনের প্রতি ভালবাসা	১৭৭		

عَلَّمَ الْكِتَابَ



https://t.me/islaMic_fdf

মহিলা সাহাবীগণের জীবনাদর্শ

পূর্বকথন

পৃথিবীর ও মহাজাগতিক নভোমণ্ডলের সবাই সেই মহান সত্তার পবিত্রতা বর্ণনা করে, যিনি সকল সার্বভৌমত্বের অধিকর্তা, পবিত্র, মহাপরাক্রমশালী ও বিচারক; সেই সত্তা যিনি নিরক্ষর লোকালয়ে তাদের মধ্য থেকে পাঠিয়েছেন সেই রাসূল, যিনি তাঁদেরকে আল্লাহর ঐশী বাণী পাঠ করে শোনান, তাদেরকে অমলিন পবিত্রতায় শুদ্ধ করেন, তাদেরকে কুরআনের শিক্ষা দেন, বিজ্ঞানের শিক্ষা দেন—যদিও তারা এর আগে দিবালোকপ্রতিম স্পষ্ট ভ্রষ্টতায় মজ্জমান ছিল। (আল কুরআন)

ইসলামের একক অন্বিষ্ট ছিল সমগ্র পৃথিবীকে একই ভূখণ্ডের উপর নিয়ে আসা, তার রাজত্বে উঁচু ও নীচু, রাজা ও প্রজা, ধনী ও দরিদ্র, জ্ঞানী ও মুর্থ, পুরুষ ও রমণী—সবাই একই গুরুত্বে গৃহীত হত— ফলতঃ ইসলাম নিজের শিক্ষাসমূহ, নির্দেশাবলী এবং আইনসমূহের মাধ্যমে সমগ্র পৃথিবীকে সাম্য ও সমতার বাণী শুনিয়েছে এবং এরই পরিণামে ধর্ম, চরিত্র, সভ্যতা ও রাজনীতির চেহারা আমূল বদলে যায়— আর এর মধ্যে সেই নবাত্মা তরঙ্গিত হল, যাকে সৃষ্টি করা ইসলাম তার একটি অনিবার্য করণীয় হিসেবে চিহ্নিত করে নিয়েছিল।

ইসলামের পূর্বে পৃথিবী যেটুকু উন্নতি করেছে, তা শুধুমাত্র একটি প্রজাতির (পুরুষের) চরিত্রনৈতিক ও মানসিক শক্তি সামর্থ্যের বিস্ময় ছিল; মিশর, বাবল, ইরান, গ্রীস এবং ভারতবর্ষ প্রভৃতি বিভিন্ন মহৎ সভ্যতার বাগান-মালিক ছিল, কিন্তু সে সবে কবোঞ্চ-প্রজাতির (মহিলা জাতির) পানি সরবরাহের মত কোন অংশগ্রহণ ছিল না; ইসলাম এসে এই দুই প্রজাতির (পুরুষ ও মহিলা) যুগ্ম প্রচেষ্টাকে অগ্রগতির সাধিকা-শক্তির অন্তর্গত করে নিয়েছে, এ জন্যেই যখন তার সভ্যতা- বাগানে বসন্ত এল তো একটি নূতন রং ও গন্ধ সৃষ্টি হয়ে গেল।

নারীকে পৃথিবী যে দৃষ্টিকোণ থেকে অবলোকন করেছে, তা বিভিন্ন দেশে বিভিন্ন রকম ছিল। প্রাচ্যে নারী পবিত্র আঁচলের চিহ্ন, রোমে নারীকে ঘরের আসবাবপত্র মনে করে, গ্রীস তাকে শয়তান বলে, তওরাত তাকে চিরকালীন অভিশাপের অভিকেন্দ্র মনে করেছে, চার্চ তাকে মানবতা-বাগানের কাঁটা হিসেবে মনে করে, ইউরোপ তাকে খোদা অথবা খোদার সমতুল্য মনে করে। কিন্তু ইসলামের দৃষ্টিকোণ এই সব থেকে স্বতন্ত্র। ইসলামে নারী প্রভাতপ্রতিম-চরিত্রের মোহন-মধুর সৌগন্ধময় সমীরণ এবং চেহারা-প্রতিম মানবিকতার মহার্থ প্রসাধন ছিল।

বুখারী শরীফের গ্রন্থকার মহোদয় ফারুক (রাযিঃ)-এর একটি বাণী নকল করেছেন। সেটি হচ্ছে, ওমর (রাযিঃ) বলেছেনঃ মক্কায় আমরা নারীদের অত্যন্ত নিকৃষ্ট মনে করতাম, মদীনায় তুলনামূলকভাবে তাদের সম্মান ছিল, কিন্তু যখন ইসলাম এল এবং আল্লাহ তা'আলা তাদের সম্পর্কে আয়াত অবতীর্ণ করলেন, তখন আমরা তাদের সম্মান ও মর্যাদা বিষয়ে সচেতন হলাম। (সহীহ বুখারী, প্রথম খন্ড-পৃঃ ৮৬৯)

অন্ধকার আরবের কন্যা-নিধন-প্রথার উপর দৃষ্টিপাত করে নবীজীর এই বাণীর উপর :

يا انجشة رويدك بالقوارير

(আনজশা! দেখ, এগুলো দামী আলমাস) মনোযোগ দিলে হযরত ওমরের উপযুক্ত কথার মৌল সত্য বোধগম্য হবে।

ইসলাম নারীদের জন্যে কিছু অধিকার নির্দিষ্ট করে দিয়ে দায়িত্ব নিঃশেষ করেনি, বরং ইসলাম নারীকে পুরুষের সমপর্যায়ী হিসাবে চিহ্নিত করেছে এবং তাকে বহমান সভ্যতার পূর্ণতা বিধানকারী হিসাবে অভিষিক্ত করেছে। বুখারী শরীফে আছে :

الرجل راع على اهله وهو مسئول والمرأة راعية على بيت زوجها وهي مسئولية-

অর্থাৎ ‘পুরুষকে তার পুরো পরিবার-পরিজন স্বজন-আত্মীয়জনের পরিচালক হিসেবে নির্ধারণ করা হয়েছে এবং এই বিষয়ে তাকে জবাবদিহি করতে হবে; আর নারীকে তার স্বামীর সংসারের পরিচালিকা করা হয়েছে এবং সে সে বিষয়ে জিজ্ঞাসিত হবে।’

(সহীহ বুখারী, দ্বিতীয় খণ্ড-পৃঃ ৮৩)

ইবনে মাজাহ শরীফে আছে :

ليس تملكون منهن شيئاً غير ذلك الا ان يأتين بفاحشة مبينة

অর্থাৎ ‘নারীর উপর তোমাদের বিশেষ কিছু ব্যাপার ছাড়া অন্য কোন অধিকার নেই, কিন্তু যদি তারা পাপালগ্ন হয় (তাহলে সেটি স্বতন্ত্র)।’

এরই উপর ভিত্তি করে ইসলামে নারীর যে মর্যাদা প্রতিষ্ঠিত হল, তা পরিণামের দিক থেকে অন্যান্য বহুবিধ জাতি ও সম্প্রদায় থেকে পৃথক ছিল। সমগ্র পৃথিবী আপন জাতিগত ইতিহাসের উপর উল্লাসবোধ করে এবং সঙ্গতভাবেই করে; কিন্তু যদি তাদের প্রশ্ন করা হয় যে, এই বিগত ও অতিক্রান্ত উপাখ্যানমালায় কবোম্ব-প্রজাতির (মহিলা জাতির) চেষ্টা প্রচেষ্টার কতটুকু অংশগ্রহণ ছিল? তখন মুহূর্তেই চারপাশ স্তব্ধতায় স্তম্ভিত হয়ে যাবে এবং গর্ব ও অহমিকায় তাবৎ চীৎকার ঠাণ্ডা হয়ে পড়ে থাকবে।

গ্রীস, সন্দেহ নেই ربايع النوع কে উপস্থিত করতে সক্ষম, ভারতবর্ষ বিভিন্ন সতী-সান্থী দেবীর নাম উচ্চারণ করতে পারে, ইউরোপের ‘Golden Date’ কিছু সংখ্যক যুদ্ধ-প্রবণ মহিলাকে জনসমক্ষে উপস্থিত করতে পারে কিন্তু তাদের কারণে পৃথিবী কি কোন উন্নতি করেছিল? অথবা সভ্যতা এক ইঞ্চি অগ্রসর হয়েছিল? ইতিহাস এসবের উত্তরে ‘না’ বলে থাকে।

জাতিগত ইতিহাসকে বাদ দিয়ে যদি পৃথিবীর সাম্প্রদায়িক ইতিহাসকে অধ্যয়ন করা হয়, তখনও পরিষ্কার দেখা যাবে সেই ইতিহাসের পাতাগুলোও এই কোমল প্রজাতির মহৎ কীর্তিমালা ছাড়াই খালি পড়ে আছে। মিশর এই ধারায় হয়তো আসিয়া বিনতে মযাহেমকে উপস্থিত করবে, তওরাত হারুনের বোন মরিয়মকে উপস্থিত করবে,

নাসারারা মরিয়ম আয়রাকে পেশ করবে। এইসব মহিলাদের সম্প্রদায়গত মহত্ত্ব এবং বিরাটত্ব শিরোধার্য্য, কিন্তু এইসব পবিত্র নারীদের সম্প্রদায়গত অথবা সংস্কারগত কীর্তি, ইতিহাসও কি তা স্মরণ রেখেছে?

কিন্তু ইসলাম যেসব পর্দানশীন মহিলাকে আপন আবেগ-আশ্রয়ে ঠাঁই দিয়েছে, তারা পৃথিবীতে অনেক বড় বড় কাজ আনুজাম দিয়েছে, সে কথা ইতিহাসের পৃষ্ঠায় উজ্জ্বল বিধৃত হয়ে আছে; কিন্তু বর্তমান গ্রন্থটি যেহেতু বিশেষভাবে মহিলা সাহাবীগণের জীবনকে নিয়েই, সেজন্যে এখানে আমরা সে সব কীর্তিমালাই কেবল উপস্থিত করবো, যেগুলো তাদের সঙ্গে ওতপ্রোতভাবে জড়িত। কেননা এটিই ছিল কোমল প্রজাতির উত্তরকালীন প্রগতির ক্ষেত্রে প্রথম পদক্ষেপ।

মহিলা সাহাবীগণের কীর্তি সভ্যতার সমস্ত শিরোনামে বিভক্ত, আমরা সে সব একত্র করে এ জায়গায় সংক্ষেপে সমবেত করছি :

ধর্মীয় ক্ষেত্রে অবদান

সম্প্রদায়ের কল্যাণের ক্ষেত্রে সবচেয়ে বড় ভূমিকা পাই জিহাদের, আর মহিলা সাহাবীগণ যে প্রেরণা ও প্রণোদনা, যে শুদ্ধতা ও একাগ্রতা এবং যে প্রত্যয় ও প্রমিতিতে এই মহান কাজটি সম্পন্ন করেছেন, তার দ্বিতীয় দৃষ্টান্ত মেলা মুশকিল। ওহুদ যুদ্ধে কাফিররা যখন আক্রমণ করল, নবীজীর সাথে তখন থেকে গেল সামান্য কয়েকজন নিবেদিত-প্রাণ আলোর মানুষ, উম্মে আম্মারা (রাযিঃ) তখন নবীজীর বুক-বরাবর আগলে দাড়িয়ে গেলেন, কাফিররা নবীজীর দিকে অগ্রসর হরে তিনি তীর-তলোয়ার দিয়ে তাদের বাধা দিতেন, ইবনে কুমিয়্যা যখন আকস্মিক নবীজীর কাছে পৌছে গেল তখন উম্মে আম্মারা (রাযিঃ) এগিয়ে গিয়ে তাকে রুখে দাঁড়ালেন-কাঁধে জখম খেলেন এবং গর্ত হয়ে গেল-তিনি তাকে তলোয়ার দিয়ে আঘাত করলেন, কিন্তু সে লোহার যুদ্ধ-পোশাক পরে ছিল, সেজন্যে আঘাতে কোন কাজ হল না।

(ইবনে হিশাম, পৃঃ ৮৪)

মুসায়লামার যুদ্ধে তিনি এমন বীর্যময়তা নিয়ে মুকাবিলা করেছেন যে, সত্তর জনকে আহত করে ফেললেন এবং তার একহাত কেটে গেল। (ইবনে সা'আদ, অষ্টম খণ্ড-পৃঃ ৩০৪) খন্দকের যুদ্ধে হযরত সুফিয়া (রাযিঃ) যে বীরত্ব নিয়ে এক ইহুদীকে হত্যা করলেন এবং ইহুদীদের আক্রমণ রুখবার যে কৌশল অবলম্বন করেন, তা স্বতঃই অত্যন্ত চাঞ্চল্যকর।

(যুরকানী, দ্বিতীয় খণ্ড-পৃঃ ১২৯)

হোনাইনের যুদ্ধে উম্মে সুলাইমের খঞ্জর নিয়ে বেরোনো আজ অবধি কিংবদন্তি।

(সহীহ মুসলিম, দ্বিতীয় খণ্ড-পৃঃ ১০৩)

ফারুকী খিলাফতে সংঘটিত ইয়ারমুক যুদ্ধে হযরত আসমা বিনতে আবু বকর (রাযিঃ), হযরত উম্মে আব্বান (রাযিঃ), উম্মে হাকিম (রাযিঃ), হযরত খাওলা (রাযিঃ), হিন্দ (রাযিঃ) এবং উম্মুল মু'মিনিন হযরত জোয়ায়রা (রাযিঃ) অত্যন্ত বীরত্বের সঙ্গে যুদ্ধ

করেন; আর আনসার গোত্রের আসমা বিনতে এজিদ (রাযিঃ) তো তাঁবু থেকে ন'জন রোমীয় সৈন্যকে হত্যা করেছিলেন। (আল-ইসাবা ফি তময়িজিস সাহাবা, অষ্টম খণ্ড-পৃঃ ১৩) স্থলভাগের যুদ্ধেই কেবল নয় সামুদ্রিক যুদ্ধসমূহেও মহিলা সাহাবীগণ অংশগ্রহণ করেছেন। আটাশ হিজরীতে কাবরস উপদ্বীপে আক্রমণ হলে উম্মে হারাম (রাযিঃ) তাতে অংশ নেন। (বুখারী শরীফ, দ্বিতীয় খণ্ড-পৃঃ ২৫২)

রণাঙ্গনে এসব ছাড়া মহিলা সাহাবীগণ অন্যবিধ কাজও করতেন। পানি খাওয়ানো, আহতদের ব্যান্ডেজ করা, নিহত এবং আহতদেরকে যুদ্ধ-ময়দান থেকে সরিয়ে নেয়া, চরকা অর্থাৎ সুতো-সেলাইয়ের কাজ, তীর তুলে দেয়া, খাওয়া-দাওয়ার ব্যবস্থা করা, পাকের কাজ, কবর খোঁড়ার কাজ, সৈনিকদের উৎসাহ ও অনুপ্রেরণা-দান ইত্যাদি। যেমন হযরত আয়েশা (রাযিঃ) ওহোদ-যুদ্ধে মশক ভরে ভরে আহতদের পানি পান করিয়েছিলেন। উম্মে সুলাইম (রাযিঃ) এবং আনসারের কয়েকজন মহিলা আহতদের গুশ্ফা করতেন এবং এই উদ্দেশ্যের জন্যে তিনি সবসময় রাসূলুল্লাহ সাল্লাল্লাহু আলাইহি ওয়াসাল্লাম-এর সাথে যুদ্ধে অংশগ্রহণ করতেন। (বুখারী শরীফ, দ্বিতীয় খণ্ড/আবু দাউদ শরীফ, ১ম খণ্ড-পৃঃ ২৫২)

রুবাই বিনতে মুয়াওয়াজ (রাযিঃ) প্রভৃতি মহিলা সাহাবীগণ আহত মুজাহিদ এবং শহীদদেরকে বধ্যভূমি থেকে সরিয়ে মদীনায পৌছিয়েছিলেন। (বুখারী শরীফ)

উম্মে যিয়াদ (রাযিঃ) এবং অন্যান্য পাঁচজন মহিলা খায়বারের যুদ্ধে চরকা কেটে মুসলমানদের সহযোগিতা করেছিল, তারা তীর উঠিয়ে দিতেন এবং ছাতু খাওয়াতেন। (আবু দাউদ শরীফ, প্রথম খণ্ড-পৃঃ ২৭০)

উম্মে আতিয়া (রাযিঃ) সাতটি যুদ্ধে সাহাবীদের জন্যে খাবার পাক করেছিল

(মুসলিম শরীফ, দ্বিতীয় খণ্ড-পৃঃ ১০৫)

আগওয়াস اغواث এবং এমারস امارت প্রভৃতি যুদ্ধে যেগুলো ফারুকী খিলাফত কালে সংঘটিত—মহিলারা এবং বালকরা কবর তৈরির কাজ করে এবং ইয়ারমুক যুদ্ধে যখন মুসলমানরা পিছু সরে আসতে আসতে একেবারে হারম-এর তাঁবু পর্যন্ত চলে এল তখন হিন্দ (রাযিঃ), খাওলা (রাযিঃ) সকলে প্রেরণাময় কবিতা আবৃত্তি করে মুসলমানদের পৌরুষ জাগ্রত করেন। (তারিখে তাবারী, ষষ্ঠ খণ্ড-পৃঃ ২৩০৭/উসুদুল গাবা, পঞ্চম খণ্ড-পৃঃ ৫৬৩) ইসলাম প্রচারও ধর্মের একটি বড় সেবা, মহিলা সাহাবীগণ এক্ষেত্রে বিশেষ ভূমিকা গ্রহণ করেন। যেমন হযরত ফাতেমা (রাযিঃ)-এর আস্থানে তাঁর ভাই ওমর (রাযিঃ) ইসলাম গ্রহণ করেন। (উসুদুল গাবা, পঞ্চম খণ্ড-পৃঃ ৫১৯)

উম্মে সুলাইমের উৎসাহে আবু তালহা (রাযিঃ) ইসলামের আস্তানায় মস্তক আনত করেন। (আল ইসাবা ফি তময়িজিস সাহাবা, অষ্টম খণ্ড-পৃঃ ১০৬)

হযরত ইকরামা (রাযিঃ) স্বপত্নী উম্মে হাকিমের (রাযিঃ) বোঝানোর কারণে ইসলাম গ্রহণ করেন এবং উম্মে সুরাইক দওসিয়া (রাযিঃ)-এর কারণে কুরাইশ রমণীদের মধ্যে ইসলাম বিস্তৃত হয়—খুবই গোপনীয়ভাবে তিনি এই কাজ করতেন।

(মুয়াত্তা মালেক, কিতাবুন নিকাহ/উসুদুল গাবা, পঞ্চম খণ্ড-পৃঃ ৫৯৪)

ইসলামের সংরক্ষণও একটি গুরুত্বপূর্ণ কাজ। অসংখ্য মহিলা সাহাবীদের মধ্যে হযরত আয়েশা (রাযিঃ) এই কাজ বেশী করে সম্পন্ন করেন। পঁয়ত্রিশ হিজরীতে হযরত উসমান (রাযিঃ) যখন শহীদ হন এবং ধর্মীয় শৃংখলা অকিন্যস্ত হয় তখন তিনি সংস্কারের ডাক দেন, সেই ডাকে মক্কা-বসরার অনেকেই সাড়া দেয়।

নামাযের ইমামতিও একটি গুরুত্বপূর্ণ কাজ। বিভিন্ন মহিলা সাহাবী ও মহিলাদের সমাবেশের মধ্যে সম্পন্ন করেছেন। যেমন হযরত আয়েশা (রাযিঃ) হযরত উম্মে সালমা (রাযিঃ), উম্মে ওরকা বিনতে আবদুল্লাহ এবং সারিদা বিনতে কুমামা মহিলাদের নামাযে ইমামতি করতেন। উম্মে ওরকা (রাযিঃ)-এর নৈশিষ্ঠি ছিল এই যে, তিনি তাঁর গৃহকে নামাযের স্থান করে নিয়েছিলেন। যেখানে সবসময় তিনি ইমামতি করতেন এবং আযান দিতেন।

(ইমাম শাফেয়ী কিতাবুল উম্ম, প্রথম খণ্ড-পৃঃ ১৪৫/উনুদুল গাবা, পঞ্চম খণ্ড, পৃঃ ২৭৪ ও পৃঃ ৪৮৯)
[মহিলার পেছনে মহিলার নামায আদায় বৈধ আছে, কিন্তু হানাকী মাযহাব মতে তা ক্রটিযুক্ত।]

রাজনৈতিক অবদান

মহিলা সাহাবীগণ বিভিন্ন রাজনৈতিক ভূমিকায় অবতীর্ণ হয়েছেন। যেমন হযরত শিফা বিনতে আবদুল্লাহ (রাযিঃ) এত উত্তম বিবেচক ছিলেন যে, হযরত ওমর (রাযিঃ) পর্বন্ত তাঁর বিবেচনাকে স্বাগত জানাতেন এবং তাঁর কাছ থেকে পরামর্শ গ্রহণ করতেন।

(উনুদুল গাবা, পঞ্চম খণ্ড-পৃঃ ৪৮৭)

হযরত ওমর (রাযিঃ) কোন কোন সময় বাজারের ব্যবস্থাপনাও তার হাতে সমর্পণ করেছেন।

(আল-ইসাব ফি তাময়িজিস সাহাবা, অষ্টম খণ্ড-পৃঃ ৩২)

হিজরতের পূর্বে কুরাইশরা যখন নবীগৃহ অবরোধ করতে চাইল তখন রকিকা বিনতে সায়ফী, যিনি ছিলেন আবদুল মুত্তালিবের ভাইঝি-মহানবী সাল্লাল্লাহু আলাইহি ওয়াসাল্লামকে এই গোপন সংকল্প সম্পর্কে অবহিত করেন। তাঁর কাছ থেকে এই অভিপ্রায়ের কথা জেনে নবীজী হযরত আলী (রাযিঃ)কে বিছানায় রেখে মদীনা অভিযুখে রওয়ানা হয়ে যান।

(তাবকাতে ইবনে সাআদ, অষ্টম খণ্ড-পৃঃ ৩৫)

মহিলাদের রাজনীতিক স্বাধিকার ও স্বাধীনতা এত বেশী বিস্তৃত যে, তারা শত্রুদেরকে আশ্রয় দিতে পারে এবং ইমাম তার নিরাপত্তাকে বহাল রাখতে পারে। আবু দাউদ শরীফে আছেঃ মক্কা বিজয়ের সময় উম্মে হানী (রাযিঃ) এক বিধর্মীকে আশ্রয় দিলে মহানবী সাল্লাল্লাহু আলাইহি ওয়াসাল্লাম বলেছিল :

قد أجرنا من أجرة وامننا من امننا

‘তুমি যাকে আশ্রয় দিয়েছ অথবা যাকে নিরাপত্তা দিয়েছ আমরাও তার আশ্রয় এবং নিরাপত্তা বিধান করেছি।’

(আবু দাউদ শরীফ, প্রথম খণ্ড-পৃঃ ২৭৪)

জ্ঞানের ক্ষেত্রে অবদান

ইসলামী জ্ঞান-বিজ্ঞান অর্থাৎ আবৃত্তি, তাফসীর, হাদীছ, ফিকাহ, ফরায়েয ইত্যাদি বিষয়ে বহু মহিলা সাহাবী পূর্ব দক্ষতা রাখতেন। হযরত আয়েশা (রাযিঃ), হযরত হাফসা (রাযিঃ), হযরত উম্মে সালমা (রাযিঃ) এবং উম্মে ওরকা (রাযিঃ) পুরো কুরআনুল কারীম মুখস্থ করেছিলেন। (ইবনে হাজার আসকালানী, ফতহুল বারী, নবম খণ্ড-পৃঃ ৪৭)

হিন্দ বিনতে উসাইদ (রাযিঃ), উম্মে হিশাম (রাযিঃ), রায়েতা বিনতে হাইআন (রাযিঃ) এবং উম্মে সাআদ বিনতে সাআদ (রাযিঃ) কুরআনুল কারীমের কিছু কিছু অংশ মুখস্থ করেছিলেন; উম্মে সাআদ (রাযিঃ) কুরআনুল কারীমের শিক্ষাও দিতেন।

(উসদুল গাবা, পঞ্চম খণ্ড-পৃঃ ৫৮৬)

তাফসীর শাস্ত্রে হযরত আয়েশা (রাযিঃ)-এর অবিসংবাদিত অধিকার ছিল। মুসলিম শরীফের শেষাংশে তাঁর তাফসীরের একটি বড় অংশ উদ্ধৃত হয়েছে।

হাদীছের ক্ষেত্রে সাধারণত: মহানবী সাল্লাল্লাহু আলাইহি ওয়াসাল্লাম-এর পবিত্র পত্নীরা এবং বিশেষভাবে হযরত আয়েশা (রাযিঃ) এবং উম্মে সালমা (রাযিঃ) সকল মহিলা সাহাবীর চেয়ে বিশিষ্ট ছিল। (তাবাকাতে ইবনে সা'আদ, দ্বিতীয় খণ্ড-পৃঃ ১২৬)

হযরত আয়েশা (রাযিঃ) ২২১০ হাদীছ বর্ণনা করেছেন। হযরত উম্মে সালমা (রাযিঃ) ৩৭৮টি হাদীছ বর্ণনা করেছেন। এঁদের ছাড়া হযরত উম্মে আতিয়া (রাযিঃ) এবং আসমা বিনতে আবি বকর (রাযিঃ), উম্মে হানী (রাযিঃ) এবং ফাতেমা বিনতে কায়েস (রাযিঃ)ও অনেক হাদীছ বর্ণনা করেছেন।

ফিকাহতে হযরত আয়েশা (রাযিঃ)-এর ফতোয়া এত বেশী আছে যে, তা দিয়ে কয়েক খণ্ডের কয়েকটি গ্রন্থ তৈরি হতে পারে। (ই'লামুল মু'মিনীনঃ ইবনে কিয়ম, প্রথম খণ্ড-পৃঃ ১৩)

হযরত উম্মে সালমার ফতোয়া দিয়ে একটি ক্ষুদ্র পুস্তিকা প্রস্তুত করা যেতে পারে। হযরত সুফিয়া (রাযিঃ), হাফসা (রাযিঃ), উম্মে হাবিবা (রাযিঃ), জুয়াইরা (রাযিঃ), ময়মুনা (রাযিঃ), ফাতেমা (রাযিঃ), উম্মে গুরায়ক (রাযিঃ), উম্মে আতিয়া (রাযিঃ), আসমা বিনতে আবি বকর (রাযিঃ), লায়লা বিনতে কায়েস (রাযিঃ), খাওলা (রাযিঃ), উম্মুদ-দারওয়া (রাযিঃ), আতিকা বিনতে জায়েদ (রাযিঃ), সাহলা বিনতে সুহাইল (রাযিঃ), ফাতেমা বিনতে কায়িশ (রাযিঃ), যয়নব বিনতে আবু সালমা (রাযিঃ), উম্মে আইমন (রাযিঃ), উম্মে ইউসুফ (রাযিঃ), উম্মে সালমা (রাযিঃ)-এদের ফতোয়াসমূহ একটি সংক্ষিপ্ত গ্রন্থ প্রকরণে সন্নিবেশিত হতে পারে।

ফরাযিয় শাস্ত্রে হযরত আয়েশা (রাযিঃ)-এর বিশেষ দক্ষতা ছিল। অনেক বড় বড় সাহাবা তাঁর কাছ থেকে ফরাযিয় বিষয়ে নানা মীমাংসা ও মন্তব্য জেনে নিতেন।

(তাবাকাতে ইবনে সাদঃ ইবনে সাদ, দ্বিতীয় খণ্ড-পৃঃ ১২৬)

ইসলামী জ্ঞান-বিজ্ঞান ছাড়া অন্যবিধ বিষয়েও মহিলা সাহাবীগণ অধিকার রাখতেন। যেমন রহস্য-বিজ্ঞানে হযরত উম্মে সালমা (রাযিঃ)-এর প্রগাঢ় পাণ্ডিত্য ছিল।

(মুসনাদে আহমদ বিন হাম্বল)

বক্তৃতা ও উপস্থাপনায় আসমা বিনতে সেকন (রাযিঃ)-এর বিশেষ খ্যাতি ছিল।

(আল-ইসাৰা ফি তময়িজিস সাহাবা, অষ্টম খণ্ড-পৃঃ ১২)

স্বপ্ন রহস্য মীমাংসায় হযরত আসমা বিনতে উমাইস (রাযিঃ) বিখ্যাত ছিলেন।

(আস-ইসাৰা ফি তময়িজিস সাহাবাঃ ইবনে হাজার আসকালানী, অষ্টম খণ্ড-পৃঃ ৯)

চিকিৎসা বিদ্যায় রফিদা আসলামিয়া (রাযিঃ), উম্মে মু'তাজ (রাযিঃ), উম্মে কাবশা (রাযিঃ), হামনা বিনতে জাহশ (রাযিঃ), মাআজাহ (রাযিঃ), লায়লা (রাযিঃ), উমায়মা (রাযিঃ), উম্মে জিয়াদ (রাযিঃ), রুবাই বিনতে মুআওয়াজ (রাযিঃ), উম্মে আতিয়া (রাযিঃ), উম্মে সুলাইম (রাযিঃ), এঁদের বিশেষ দক্ষতা ছিল। মসজিদে নববীর পাশে রাফিদা (রাযিঃ)-এর তাঁবু ছিল, তাতে তাঁর সার্জারি ঘরও ছিল।

(তাবাকাতে ইবনে সা'আদ, অষ্টম খণ্ড-পৃঃ ২১৩)

কবিতার ক্ষেত্রে খানসা (রাযিঃ), সাঅদা (রাযিঃ), সুফিয়া (রাযিঃ), আতিকা (রাযিঃ), ইমামা মুরিদিয়া (রাযিঃ), হিন্দ বিনতে হারিস (রাযিঃ), জয়নব বিনতে আওয়াম (রাযিঃ), আতিকা বিনতে যায়িদ (রাযিঃ), হিন্দ বিনতে আসাসা (রাযিঃ), উম্মে আইমন (রাযিঃ), কানিলা (রাযিঃ), কাবশা বিনতে রাফিঅ (রাযিঃ), মায়মুনা বলভিয়া (রাযিঃ), নাম (রাযিঃ), রুকিয়া (রাযিঃ) বেশী বিখ্যাত। খানসা (রাযিঃ)-এর মত কবির তুলনা এখনো অন্য কোন মহিলায় দুর্লভ্য। তাঁর বিখ্যাত 'দিওয়ান' (কাব্য-সংগ্রহ) প্রকাশিত হয়ে গেছে।

(উসুদুল গাবা, পঞ্চম খণ্ড-পৃঃ ৩৯৮)

কর্ম-সম্পর্কিত যোগ্যতা: অর্থাৎ বুননকর্ম ও করণবিদ্যা। এর মধ্যে আছে চাষবাস, লিপিকলা, ব্যবসা, সেলাইকর্ম প্রভৃতি। উসুদুল গাবা এবং মুসনাদে আহমদ বিন হাম্বলের বিভিন্ন বর্ণনা থেকে প্রমাণিত হয় যে, মহিলা সাহাবীগণ সাধারণতঃ কাপড় বুনতেন, যা দিয়ে তাঁর এবং তাঁর সন্তান-সন্ততিদের হয়ে যেত।

(মুসনাদে আহমদ বিন হাম্বলঃ ইমাম আহমদ বিন হাম্বল, ৫ম খণ্ড-পৃঃ ১৬৬)

চাষবাস সমস্ত মহিলা সাহাবী করতেন না, বরং চাষবাস ছিল মদীনা অথবা অন্যান্য সবুজ-শ্যামল অঞ্চলের বাসিন্দাদের সাথে সংশ্লিষ্ট। মদীনায় সাধারণতঃ আনসারের মহিলারা চাষবাসের কাজ করতেন। দেশত্যাগী মুহাজির মহিলাদের মধ্যে হযরত আসমা (রাযিঃ)-এর এ ব্যাপারে যুক্ততা ছিল।

(বুখারী শরীফ, দ্বিতীয় খণ্ড-পৃঃ ৭৮৬)

বহু মহিলা সাহাবী লিখতে জানতেন। শিফা বিনতে আব্দুল্লাহ (রাযিঃ)-এর এ বিষয়ে বিশেষ খ্যাতি ও পরিচিতি ছিল। তিনি অন্ধকার যুগেও লিখন-পঠন বিদ্যা আয়ত্ত করে নিয়েছিল। শিফা (রাযিঃ) ছাড়া হযরত হাফসা (রাযিঃ), হযরত উম্মে কুলসুম (রাযিঃ) এবং করিমা বিনতে মিকদাদ (রাযিঃ)ও লিখতে জানতেন। হযরত আয়েশা (রাযিঃ), হযরত উম্মে সালমা (রাযিঃ) পড়তে জানতেন যদিও লিখতে জানতেন না।

(ফতহুল বুলদানঃ আল্লামা বালাজরি, পৃঃ ৪৮৮ ও ৪৭৮)

মহিলা সাহাবীগণের মধ্যে কয়েকজন ব্যবসাও করতেন। হযরত খাদিজা (রাযিঃ)-এর বাণিজ্য খুব বিস্তৃতভাবে সিরিয়ার সাথে ছিল।

(ইসাৰা ফি তময়িজিস সাহাবা, ইবনে হাজার আসকালানীঃ অষ্টম খণ্ড-পৃঃ ৬১)

হযরত খাওলা (রাযিঃ), মালিকা (রাযিঃ), সকিফা (রাযিঃ) এবং মাখরাবা (রাযিঃ) আতর-সুগন্ধির ব্যবসা করতেন। (উসুদুল দাবাঃ পঞ্চম খণ্ড, পৃঃ ৪৩২ পৃঃ ৫৪৮)

সেলাইকর্ম তো সাধারণ ছিল, যেমন হযরত ফাতেমা বিনতে শাবয়াহ (রাযিঃ)-এর জীবন থেকে তার সূত্র সন্ধান চলে।

বিবাহ এবং অন্যবিধ আনন্দ প্রধান অনুষ্ঠানসমূহে আনসারী বালিকারা গান গাইতো, বরং কখনো কখনো বিয়ে এবং আনন্দোৎসবে নবীজীর সামনেও তারা কবিতা-গান করেছে। ফরিদা বিনতে মুআওয়াজ-এর হাদীছ থেকে জানা যায় যে, নবীজী তার অনুমতি দিয়েছিলেন। মদীনায় আরনব (রাযিঃ) নামে এক মহিলা ছিল, মহানবী সাল্লাল্লাহু আলাইহি ওয়াসাল্লাম-এর অনুমতিক্রমে হযরত আয়েশা (রাযিঃ) তাঁকে আনসারীদের বিবাহসমূহে গান গাইবার জন্য প্রেরণ করেছিলেন। আরনব (রাযিঃ)-এর জীবনের রেখালেখ্য 'ইসাবা' গ্রন্থে এসেছে। (উসুদুল গাবা, অষ্টম খণ্ড-পৃঃ ৪)

মহানবী সাল্লাল্লাহু আলাইহি ওয়াসাল্লাম-এর পবিত্র পত্নীগণের মধ্যে উম্মে সালমা (রাযিঃ) নিপুণ কণ্ঠে কুরআন পড়তেন এবং ঠিক নবীজীর উচ্চারণ-প্যাটার্ণে পড়তে পারতেন। (মুসনাদে আহমদ-ইমাম আহমদ বিন হাম্বলঃ ষষ্ঠ খণ্ড, পৃঃ ৩০০ ও পৃঃ ৩০২)

এসব কৃতিত্ব ছাড়াও মহিলা সাহাবীগণ অন্যবিধ কাজও জানতেন। যেমন হযরত সওদা (রাযিঃ) তায়িফের চামড়াসমূহ ঠিক করতেন এবং চর্ম ছেঁটে ব্যবহার উপযোগী করে তুলবার কাজ করতেন। (উসুদুল গাবা, আল্লামা ইবনুল আসীরঃ পঞ্চম খণ্ড-পৃঃ ৪৪০)

হযরত জয়নব (রাযিঃ)ও হস্তনিপুণ শিল্পী ছিল। উপরের এই বিবরণের পর এবার আমরা এই গ্রন্থের প্রসঙ্গে ফিরে আসব।

নির্বাচন এবং বিন্যাস

এই গ্রন্থ মহিলা সাহাবীগণের জীবনালেখ্য কেন্দ্রিক এবং এটি 'সিয়ারুস্ সাহাবা' গ্রন্থের শেষ খণ্ড। মহিলা সাহাবীগণের জীবন প্রসঙ্গিত যদিও কিছু বিশিষ্ট গ্রন্থ বিরচিত হয়েছে। যেমন ইবনুল আসির (মৃঃ ৬৩০ হিজরী) 'তারিখুন নিসা' শিরোনামে একটি গ্রন্থ রচনা করেন, যা এখন বিলুপ্ত। (উসুদুল গাবা; আল্লামা ইবনুল আসীর, পঞ্চম খণ্ড-পৃঃ ৪৬৫) এছাড়া 'আসমাউর রিজাল' শিরোনামাক্রিত সমস্ত গ্রন্থে মহিলা সাহাবীগণের বিষয়টি ভালভাবে উল্লিখিত হয়েছে। যেমন ইবনে মন্দাহ (মৃঃ ৩৯৫ হিজরী), আবু নইম (মৃঃ ৪০৩ হিজরী) কাজী ইবনে আব্দুল বার (মৃঃ ৪৬৩ হিজরী) এবং আবু মূসা ইসফাহানী (মৃঃ ৫৮১ হিঃ) নিজেদের গ্রন্থাবলীতে এঁদের জীবন নিয়ে লিখেছেন।

কাজী ইবনে আবদিল বার-এর গ্রন্থের নাম 'আল-ইসতিয়াব'-এর মধ্যে ৩৯৮ জন মহিলা সাহাবীর জীবন-কথা পর্যালোচিত হয়েছে, যার মধ্যে পুনরাবৃত্তি আছে। 'আল ইসাবা' গ্রন্থে বর্ণিত হয়েছে যে, 'ইসতিয়াব' গ্রন্থের নামকরণের কারণ এরকমঃ কাজী সাহেব নিজের ধারণায় সমস্ত সাহাবীকে সমীকৃত করে নিয়েছিলেন- অথচ যদি পুরুষ সাহাবীগণের ছেড়ে শুধু মহিলা সাহাবীগণকে নেয়া নয়, তবু এ ধারণা ঠিক ঠেকে না।

আল্লামা ওয়াকেরদীর লিপিকার মুহাম্মদ বিন সা‘আদের রচিত এবং তৃতীয় শতকের প্রথমার্ধে লিখিত ‘তাবাকাত’ গ্রন্থে ছ’শো সাইত্রিশ জন মহিলার জীবনী আলোচিত হয়েছে— যার মধ্যে তিরানব্বই জন মহিলা সাহাবী নন। ইবনে সাদ তাঁর গ্রন্থের অষ্টম খণ্ড স্বতন্ত্র ভাবে মহিলাদের জীবন কথায় ব্যয় করেছেন।

কাজী ইবনে আবদিল বার-এর পর আল্লামা ইবনে আসীর (জায়ুরী মৃঃ ৬৩০ হিঃ) ‘উসুদুল গাবা’ শিরোনামে এক প্রকাণ্ড গ্রন্থ রচনা করেন, যেখানে মহিলাদের জীবন-বিষয়ে একটি অংশ নির্দিষ্ট ছিল। এই গ্রন্থে একহাজার বাইশজন সাহাবীর নাম উল্লেখিত হয়েছে, যার মধ্যে পুনরাবৃত্তি ছাড়া ছিয়াত্তর জন অজ্ঞাত মহিলাও উপস্থাপিত হয়েছে।

নবম শতকে হাফিজ ইবনে হাজার আসকালানী (মৃঃ ৮৫২ হিঃ) ‘আসমাউর রিজাল’ বা জীবনী-কোষ বিষয়ে দু’টো বৃহদায়তন গ্রন্থ রচনা করেনঃ ‘তাহজিবুত তাহযীব’ ‘আল ইসাবা ফি তময়িজিস-সাহাবা’। ‘তাহযীবুত তাহযীব’ দ্বাদশ খণ্ডের একটি অংশ মহিলাদের জীবনী নিয়ে, যার মধ্যে তিনশ বাইশজন মহিলা উল্লেখিত ও আলোচিত হয়েছেন। তন্মধ্যে পুনরাবৃত্তি নামও এসেছে, তবেয়ী মহিলাদের উল্লেখও অবশ্য ‘ইসাবা’ অষ্টম খণ্ড বিশেষভাবে মহিলা সাহাবীগণের জীবন সংক্রান্ত-যার মধ্যে পনের শ’ পঁয়তাল্লিশ জন মহিলার উল্লেখ করেছেন, পুনরাবৃত্তিও তাতে আছে, উপনামও সন্নিবেশিত হয়েছে। ‘ইসাবা’য় সবচেয়ে অধিক সংখ্যক মহিলা সাহাবী উল্লেখিত হয়েছে। [এই সংখ্যা অনুমান নির্ভর]

তবুও এসব গ্রন্থসমূহে কিছু বৈশিষ্ট্য পরস্পর প্রবিষ্ট

ক. প্রথম কথা হচ্ছে জীবনী কোষ (আসমাউর রিজাল) রচয়িতাদের উদ্দেশ্য থাকে শুধুমাত্র একত্রিত করা; এটি তাদের উদ্দেশ্যের অন্তর্গত হয় না যে, যেসব ঘটনা হস্তগত হয়েছে তা থেকে কোন জরুরী ঐতিহাসিক মীমাংসা বেরিয়ে আসে, কি আসে না। কেননা এটি তাঁদের মূল বিষয়ের বাহিরে।

খ. দ্বিতীয়তঃ বেশী করে তাদের এমন সব নাম লিখতে হয়, যাদের জীবনাবস্থা অন্য কোন উপায়ে একেবারেই জ্ঞাত হওয়া যায় না— এগুলো হচ্ছে সেসব নাম, যা স্মৃতি-চারণের সূত্রে কোন হাদীছে এসে গেছে।

গ. তৃতীয়তঃ কোন জায়গায় তাঁরা শুধু উপনাম অথবা উপাধি লিখে দেন, কারণ তার চেয়ে বেশী তাঁরা জ্ঞাত হননি।

ঘ. কখনো একেবারে অস্পষ্ট উল্লেখ করেন; যেমন (একজন মহিলা)-এই বলে তার সাথে একটি ঘটনা লিখে দেন, এর চেয়ে বেশী তাঁদের জানা থাকে না।

ঙ. সাধারণতঃ যে সব মহিলাদের জীবনাবস্থা প্রথমে লেখা হয়, তাদের উপনাম এবং উপাধি দু’বার উল্লেখ করেন, ফলতঃ পুনরাবৃত্তির সৃষ্টি হয়।

এসব ছাড়া এ ধরনের গ্রন্থসমূহে আরেকটি ব্যাপার এরকম যে, এই সব গ্রন্থসমূহে কোন বিশেষ বিন্যাস অবলম্বিত নয়, ‘তাহযীবুত তাহযীব’-এ তাবেয়ীদের জীবনাবস্থাও এসে পড়েছে। অবশ্য ‘তাবকাতে ইবনে সাআদ’ এই ত্রুটি-শনাক্তির বাইরে, তাবকাতে বিন্যাস-পদ্ধতি অনুসৃত হয়েছে। প্রথমে মহানবী সাল্লাল্লাহু আলাইহি ওয়াসাল্লাম-এর কন্যাদের, ফুফুদের এবং পবিত্র পত্নীদের জীবনালেখ্য, এর পরে এসেছে কুরাইশদের এবং সাধারণ

মুহাজির মহিলাদের জীবনী বর্ণনা। এরপর আনসারী মহিলাদের, যার মধ্যে প্রতিটি বংশের উল্লেখ আলাদা আলাদা। শেষে সেই সব মহিলাগণ উল্লিখিত, যারা নবীজী সান্নাধ্যাত্ত আলাইহি ওয়াসাল্লাম ছাড়া তাঁর পবিত্র পত্নীগণ থেকে হাদীছ বর্ণনা করেছেন এবং এই অংশ মহিলা-সাহাবীগণ থেকে একেবারে পৃথক ও আলাদা।

এতে সন্দেহ নেই যে, মহিলা সাহাবীগণের একত্রিত করা এবং তাঁদের জীবন-চরিত্রের বিন্যাসের ক্ষেত্রে এর চেয়ে উত্তম কোন পদ্ধতি হতে পারে না। কিন্তু বর্তমান কালে জীবনীগ্রন্থ প্রণয়নের ক্ষেত্রে যে উৎকর্ষ সাধিত হয়েছে, সেদিক থেকে এই সব গ্রন্থগুলো অপরিপাক ছিল। এ ছাড়াও মুসলমানদের বর্তমান অধঃপতন এই সব গ্রন্থসমূহকে নতুন প্রকরণে উপস্থিত করার দাবীদার ছিল। এরই ভিত্তিতে আমরা পূর্বোক্ত জীবন চরিত-এর পাশাপাশি সিহাহ সিহাহ এবং মসনদে আহমদ বিন হাম্মল অধ্যয়ন করে প্রয়োজনীয় জ্ঞাতব্য সংযোজন করেছি এবং পরিপূর্ণ নতুন আঙ্গিকে মহিলা সাহাবীগণের জীবনালেখ্য বিন্যস্ত করেছি।

‘আসমাউর রিজাল’ বা জীবনী-কোষ গ্রন্থমালায় জীবনের প্রশংসনীয় ও ভাল গুণাগুণের প্রতিই কেবল জোর দেয়া হয়— আমরা এটা ছেড়ে তাঁদের ধর্মীয়, রাজনীতিক, শৈক্ষিক এবং চরিত্র-নৈতিক কৃতিত্বের উপর দৃষ্টি দিয়েছি বেশী, এবং তাকে বেশী বিস্তৃত করে লিখেছি। কেননা এগুলো (অর্থাৎ ধর্মীয়-রাজনৈতিক, শিক্ষাগত ও চরিত্রগত কৃতিসমূহ) এমন জিনিস, যা একটি মৃত জাতির শরীরে জীবনের স্পন্দন জাগাতে পারে। এই দৃষ্টিকোণ-ব্যবহারের ফলে এই গ্রন্থে মহিলা সাহাবীগণের সংখ্যা স্বভাবতই কমে গেছে এবং আমাদের নির্বাচনের পরিধিও বেশ খানিকটা সীমিত হয়ে গেছে এই গ্রন্থে পঁয়তাল্লিশ জন মহিলা সাহাবীর জীবনালেখ্য আছে, যা উপরে বর্ণিত শর্তসমূহকে অঙ্গীকার করে লিখিত হয়েছে। ফলতঃ এই গ্রন্থ জীবনী-কোষ বা ‘আসমাউর রিজাল’-এর আওতায় না গিয়ে, হয়ে উঠেছে মহিলা সাহাবীগণের ইতিহাস, যার মধ্যে তাঁদের পূর্ণতা-পরিপূর্ণতার সৌন্দর্যগুলো অনুপুংখ নজরে আসে। ঘটনা নির্বাচন ও উপস্থাপনার ক্ষেত্রে বিশেষ পরিমিতি ও সংযম দৃষ্টিতে রাখা হয়েছে এবং ঘটনাকে বর্ণনা এবং বক্তব্যের মূল্যায়ন নিয়ে বিচার করে নেয়া হয়েছে। ফলতঃ বহু ঘটনা, যা সাধারণ গ্রন্থসমূহ অবিরল উদ্ধৃত— এ গ্রন্থে তা অনুপস্থিত। এই গ্রন্থ পাঠকরা মহিলা সাহাবীগণের জীবন-চরিত পাঠ করতে গিয়ে এমন কিছু বর্ণনার মুখোমুখি হবেন, যা ইসলামী ফিকহের সাথে অনৈক্য পোষণ করে— সে কারণেই একটি কথা পরিষ্কার থাকা জরুরী যে, এই গ্রন্থ একটি জীবনীমূলক গ্রন্থ এবং এটির উদ্দেশ্য হচ্ছেঃ সেই পবিত্র দলটির জীবনের নকশা যেন আমাদের সামনে উঠে আসে— ফিকহ বিষয়ক কোন ব্যাখ্যা বা বিশ্লেষণ এবং বিভিন্ন বর্ণিত হাদীছের পারস্পরিক সাদৃশ্য সন্ধান কিংবা ঐক্য বিধান এই বিষয়ের অন্তর্ভুক্ত নয়। কাজেই বিতর্কমূলক ফিকহের মাসআলার ক্ষেত্রে এই গ্রন্থকে নিজের পন্থা অবলম্বনের জন্য প্রামাণ্য বিবেচনা করা ঠিক হবে না^১।

টিকা ১. এই ধরনের বর্ণনায় পাঠকদের সুবিধার জন্য টিকা জুড়ে দেয়া হয়েছে নীচে; এবং এইসব সম্ভব বরং খুবই সম্ভব যে লেখার ক্ষেত্রে আমার কিছু ত্রুটি থেকে গেছে। কিন্তু মানুষ এর চেয়ে বেশী কি আর করতে পারে। আল্লাহ বলেছেন—لا يكلف الله نفسا الا وسعها— অর্থাৎ মহান আল্লাহ কাউকে তার সাধ্যাতীত কোন কষ্ট দেন না। —মাওলানা সাঈদ আনসারীঃ আজমগড়, দারুল মুহাম্মেদীন।)

শুরু, করুণানিধান মহান আল্লাহর নামে

সম্পাদকের কথ্য

মহিলা সাহাবীগণের জীবনাদর্শ

বিনীত কৃতজ্ঞতা সেই আল্লাহর যিনি প্রতিপালক সমগ্র পৃথিবীর, দরুদ ও সালাম তাঁর প্রেরিত মানব মুহাম্মদ সাল্লাল্লাহু আলাইহি ওয়াসাল্লাম-এর প্রতি, আর তাঁর সাহাবীদের প্রতি, সকলের প্রতি। মহিলাদের শিক্ষাদান এবং প্রতিপালনের বিষয়ে নীতি-নৈতিক দিক থেকে কেউ-ই বিতর্ক করেন না, কথা যা কিছু তা হচ্ছে বর্তমান যুগের শিক্ষা ও প্রতিপালনে পরিপুষ্ট হয়ে বর্তমান প্রজন্মের একটি মুসলিম রমণী ধর্ম, চরিত্র এবং সামাজিকতার প্রাচীন নীতিসমূহ অনুসরণ করতে সক্ষম হবে, নাকি হবে না? অন্য ভাষায়ঃ প্রাচীন ইসলামী মূল্যবোধসমূহ রক্ষা করতে পারবে, নাকি পারবে না? মহিলা-শিক্ষা বিষয়ে যেসব লোক তর্ক করেন, তারা এই সন্দেহটিকে নিজেদের পক্ষের প্রমাণ হিসেবে উপস্থিত করেন এবং বর্তমানকালের শিক্ষিত পুরুষরা যাঁরা ধর্মীয়, চারিত্রিক এবং সামাজিক নমুনা বা আদর্শ নির্মাণ করেছেন, তা থেকেও এই সন্দেহের ভিত্তি দৃঢ় হয় এবং অন্য জাতির শিক্ষিতা মহিলারাও আমাদের রমণীদের জন্য কোন উত্তম আদর্শ নির্ধারণ করেননি। কিন্তু ইসলামের প্রাচীন ইতিহাস আমাদের সামনে মুসলিম রমণীর চমৎকার এবং আসল আদর্শ উপস্থিত করে। আজ যখন সময় বদলে যাচ্ছে, ইউরোপীয় সভ্যতা ও সামাজিক জীবন সম্পর্কে আমাদের নব্য-শিক্ষিত সম্প্রদায়ও বিরক্তি প্রকাশ করছেন, যদি আমাদের রমণীদের সামনে ইসলামের বিশিষ্ট এবং মহোত্তম মহিলাদের নমুনা পেশ করা যায়, তাহলে তাদের প্রাকৃতিক কোমল প্রবৃত্তি তা থেকে আরো গভীর প্রভাবিত হবে এবং বর্তমানকালের অপপ্রভাবসম্প্রাপ্তী জিনিস থেকে বীতশ্রদ্ধ হয়ে বিশুদ্ধ ইসলামী চরিত্র, ইসলামী সমাজ এবং ইসলামী সভ্যতার আদর্শ হয়ে যাবে।

ইসলামের প্রতিটি যুগে যদিও মহিলাগণ বিভিন্ন দিক থেকে বিশিষ্টতা অর্জন করেছেন; কিন্তু মহানবী সাল্লাল্লাহু আলাইহি ওয়াসাল্লাম-এর পবিত্রা পত্নী, সন্ততি এবং বড় বড় মহিলা সাহাবীর পবিত্র জীবনে এইসব বিশিষ্টতার সমীভবন ঘটেছে এবং আমাদের রমণীকূলের জন্য তাঁদেরই ধর্মীয়, চারিত্রিক, সামাজিক এবং শৈক্ষিক কৃতিসমূহ উত্তম আদর্শ হতে পারে এবং বর্তমান সময়ের সমস্ত সামাজিক এবং সাংস্কৃতিক অবক্ষয় থেকে তাদেরকে পবিত্র রাখতে পারে।

টিকা

১. বর্তমান-অনুদিত গ্রন্থের শেষাংশে মরহুম মাওলানা আব্দুস সালাম নদভীর ‘উসওয়ায়ে সাহাবা’ শীর্ষক যে সংক্ষিপ্ত গ্রন্থানু সংযুক্ত, তার ভূমিকা হিসেবে এটি পড়তে হবে।

আমি ‘উসওয়ায়ে সাহাবা’^১ গ্রন্থের দু’টো খণ্ডে সাহাবীদের সময়ের যে সব ধর্মীয়, চারিত্রিক, সামাজিক এবং শৈক্ষিক ঘটনা প্রবাহ একত্রিত করেছি, তার মধ্যে যদিও মহিলা সাহাবীগণের এইসব কীর্তিমালা উজ্জ্বলভাবে পরিদৃশ্যমান, কিন্তু তাঁদের গুরুত্ব, তাঁদের বিরাটত্ব এবং ইসলামে তাঁদের অবদানের দিক থেকে আমি সেইসব ঘটনামালা (যা উসওয়ায়ে সাহাবা এর দু’টো খণ্ডেই বিছিন্ন ছড়িয়ে ছিল) আরো অনেক সংযোজনের সাথে এই সংক্ষিপ্ত পুস্তিকায়^২ পৃথক একত্র করে দিয়েছি। এ থেকে একদিকে মহিলা সাহাবীগণের ধর্মীয়, চরিত্রগত, সামাজিক এবং শিক্ষাগত জীবন এক নতুন মহিমা অর্জন করবে আবার অন্যদিকে আমাদের মহিলাদের ও বালিকাদের সঠিক নির্দেশনা এবং অধ্যয়নের জন্যে যথার্থ এবং প্রভাবসম্প্রাপ্ত ঘটনা প্রবাহের একটি একত্র বিন্যাস হয়ে যাবে। তাকে অনুসরণ করে বর্তমান প্রজন্মের মুসলিম রমণীরা বিশুদ্ধ ইসলামী শিক্ষার উৎকৃষ্ট আদর্শ হতে পারবেন এবং তাঁদের শিক্ষা ও প্রতিপালনের ক্ষেত্রে যে সব সংশয় ও সন্দেহ প্রকাশ করা হচ্ছে, তার বাস্তব কর্মের ভিতর দিয়ে তার জবাব উপস্থিত করতে পারবেন।

আল্লাহই আমাদের উদ্যমের একক গন্তব্য।

মৌলানা আবদুস সালাম নদভী

শিবলী মনজিল, আজমগড়

১৩.১২.১৯২২ইং

টিকা

১. মরহুম মাওলানা আবদুস সালাম নদভী ‘উসওয়ায়ে সাহাবাহ’ (সাহাবীগণের জীবনাদর্শ) শিরোনামে দু’খণ্ডে সমাপ্ত একটি গ্রন্থ রচনা করেন; আমাদের বর্তমান-অনুদিত গ্রন্থের শেষাংশে মরহুম মাওলানার— ‘উসওয়ায়ে সাহাবিয়াত’ (মহিলা সাহাবীগণের জীবনাদর্শ) শিরোনামের একটি পরিশিষ্ট-পুস্তিকা সংযোজিত হচ্ছে। সেই পুস্তিকার ভূমিকা হিসেবে মাওলানা সংক্ষিপ্তভাবে কিছু কথা এখানে বলেছেন। -অনুবাদক

২. বর্তমান-অনুদিত গ্রন্থের অন্ত্যপর্যায়ে সন্নিবেশিত। -অনুবাদক

মহানবী সাল্লাল্লাহু আলাইহি ওয়াসাল্লাম-এর পবিত্র পত্নীগণ

হযরত খাদীজা (রাযিঃ)

নাম ও বংশতালিকা : নাম খাদীজা। উপনাম উম্মে হিন্দ। উপাধি তাহিরা। বংশ-পরম্পরা এ রকমঃ খাদীজা বিনতে খুয়াইলদ বিন আসাদ বিন আবদিল উজ্জা বিন কুসাই। কুসাই পর্যন্ত পৌছে তাঁর বংশ মহানবী সাল্লাল্লাহু আলাইহি ওয়াসাল্লাম-এর বংশের সঙ্গে মিলে যায়। তাঁর মাতার নাম ছিলঃ ফাতেমা বিনতে যায়িদা এবং তিনি লুআই বিন গালিবের দ্বিতীয় পুত্র আমেরের সন্তান ছিল।

হযরত খাদীজার পিতা নিজ- গোত্রে খুবই সম্মানিত ব্যক্তি ছিল। মক্কায়ে এসে বসবাস শুরু করেন এবং চাচাতো ভাই আবদুদ্দার বিন কুসাইর সঙ্গে অঙ্গীকারাবদ্ধ হন এবং এখানেই ফাতেমা বিনতে য়ায়েদার সঙ্গে বিবাহ বন্ধনে আবদ্ধ হন এবং তাঁর কোলে, হস্তীওয়ালা বছরের (عام الفيل) পনের বছর পূর্বে হযরত খাদীজা (রাযিঃ)-এর জন্ম হয়।

(তাবকাত-ই-ইবনে সা'আদঃ অষ্টম খণ্ড-পৃঃ ৮)

বিচার বুদ্ধি সম্পন্ন হলে হযরত খাদীজা (রাযিঃ) নিজের পবিত্র চরিত্রের জন্যে 'তাহিরা' অর্থাৎ 'পবিত্রতমা' উপাধিতে খ্যাতি অর্জন করেন।

(আল-ইসাবা ফি তময়িজিস সাহাবা ইবনে হাজার আসকালানীঃ অষ্টম খণ্ড-পৃঃ ৬০)

বিবাহ : পিতা তাঁর চরিত্র- বৈশিষ্ট্যকে বিবেচনা করে তাঁর সাথে বিয়ের জন্যে তওরাত-ইঞ্জিলে সুপণ্ডিত ভাইপো ওয়ারকা বিন নওফেলকে ঠিক করেন; কিন্তু কি একটা কারণে এই সম্পর্ক হতে পারলো না, এবং আবু হা'লা বিন নব্বাশ তমিমীর সঙ্গে তাঁর বিয়ে হয়ে যায়।

(আল-ইসতিয়াব হাফেজ ইবনু আবদিল বারঃ দ্বিতীয় খণ্ড-পৃঃ ৩৭৮)

আবু হা'লার পরে তিনি আতিক বিন আবিদ মখরুমীর সঙ্গে বিবাহসূত্রে যুক্ত হন।

এই সময়ে ফুজ্জার যুদ্ধ সংঘটিত হল। খাদীজার (রাযিঃ) পিতা এই যুদ্ধে গিয়ে মারা যান।

এটি হস্তীবছরের (عام الفيل) বিশ বছর পরেকার ঘটনা

(তাবকাতে ইবনে সা'আদঃ অষ্টম খণ্ড-পৃঃ ৯/তাবকাতে ইবনে সা'আদঃ প্রথম খণ্ড-পৃঃ ৮১)

ব্যবসা : পিতা এবং স্বামীর মৃত্যুতে হযরত খাদীজা (রাযিঃ) গভীর সংকটে আক্রান্ত হন। জীবিকার উৎস ছিল ব্যবসা-বাণিজ্য, কিন্তু তা দেখাশোনা করবার কেউ থাকলো না। তবুও নিজের আত্মীয়জনদেরকে পারিশ্রমিক দিয়ে ব্যবসা দ্রব্য প্রেরণ করতেন। একবার এই রকম মাল পাঠানোর সময় এলে আবু তালিব নবীজীকে বললঃ 'তোমাকে খাদীজার সঙ্গে দেখা করতে হয়, তাঁর মাল সিরিয়ায় যাবে, ভাল হত যদি তুমি সঙ্গে যেতে, আমার কাছে তো টাকা নেই, না হয় আমি তোমার নিজের জন্যে সম্পদ যোগাড় করে দিতাম।'

'আল-আমীন' উপাধি থেকে রাসূলে করীম সাল্লাল্লাহু আলাইহি ওয়াসাল্লাম-এর প্রসিদ্ধি সমগ্র মক্কায়ে ছিল এবং কাজ-করবারের সৌন্দর্য, সত্য্যভিযুখিতা, সততা ও দাতৃশীলতা এবং চরিত্রের পবিত্রতা সর্বত্র বিদিত ছিল। হযরত খাদীজা (রাযিঃ) যখন

এই কথাবার্তা সম্পর্কে অবহিত হন, তখন অবিলম্বেই নবীজীর কাছে পয়গাম পাঠালেনঃ ‘আপনি আমার ব্যবসার মাল নিয়ে সিরিয়া যাবেন, যে বিনিময় আমি অন্যদেরকে দেই, আপনাকে তার দ্বিগুণ দেব।’ নবীজী তাঁর প্রস্তাব গ্রহণ করলেন এবং বাণিজ্য-মাল নিয়ে মায়সারা (খাদীজার ভৃত্য)-এর পথসঙ্গী হয়ে বুসরা (بصرى) চলে গেলেন- এই বছরের মুনাফা পূর্ববর্তী সকল বছরের মুনাফার দ্বিগুণ হয়েছিল।

(তাবাকাতে ইবনে সা‘আদ- মুহাম্মদ বিন সা‘আদঃ প্রথম খণ্ড-পৃঃ ৮১)

মহানবী সাল্লাল্লাহু আলাইহি ওয়াসাল্লাম-এর

সাথে হযরত খাদীজা (রাযিঃ)-এর বিবাহ

হযরত খাদীজা (রাযিঃ)-এর ধন-সম্পদ ও ঐশ্বর্য এবং সৌজন্যময় ও বিনয়ী চরিত্র সমস্ত কুরাইশকে তাঁর প্রতি অনুকূল আগ্রহী করে তুলেছিল এবং সবাই তাঁর সাথে বিবাহ সূত্রে যুক্ত হবার প্রত্যাশী ছিল। কিন্তু নিয়তির নির্বাচনের দৃষ্টি পড়েছিল অন্য কারো উপর। মহানবী সাল্লাল্লাহু আলাইহি ওয়াসাল্লাম বাণিজ্যমাল নিয়ে সিরিয়া থেকে ফিরলে খাদীজা (রাযিঃ) তাঁকে বিয়ের প্রস্তাব পাঠান। নাকিসা বিনতে মি‘না এই কাজে নিযুক্ত হন। নবীজী প্রস্তাব গ্রহণ করলেন এবং বিয়ের তারিখ নির্ধারিত হয়ে গেল। হযরত খাদীজার পিতা যদিও ইনতেকাল করেছিলেন আগে, কিন্তু জীবিত ছিল তাঁর চাচা আমার বিন আসাদ। আরবের রমণীদের এই স্বাধীনতা ছিল যে, বিয়ে-শাদীর ব্যাপারে নিজেই কথাবার্তা বলতে পারত, সেই সূত্রে হযরত খাদীজা চাচা থাকার সত্ত্বেও নিজেই সরাসরি বিয়ের সমস্ত স্তর ও পর্যায় অতিক্রম করেন।

(তাবাকাতে ইবনে সা‘আদ-মুহাম্মদ বিন সা‘আদঃ প্রথম খণ্ড-পৃঃ ৮৪)

নির্ধারিত তারিখে হযরত আবু তালেব এবং বংশের সমস্ত গণ্যমান্য ব্যক্তিবর্গ-হযরত হামযাও ছিল যার মধ্যে-হযরত খাদীজার বাড়ীতে এলেন। হযরত খাদীজাও নিজ বংশের কিছু মুরুব্বীকে একত্রিত করেছিলেন। আবু তালেব বিয়ের খুতবা পাঠ করেন। আমার বিন আসাদের পরামর্শে পাঁচশ সোনালী দিরহাম মোহর হিসেবে নির্ধারিত হল এবং হযরত খাদীজা (রাযিঃ) মহানবী সাল্লাল্লাহু আলাইহি ওয়াসাল্লাম-এর স্ত্রী হয়ে উত্তম বিশ্বাসীর মর্যাদায় অভিষিক্ত হলেন। নবীজীর বয়স তখন পঁচিশ, হযরত খাদীজার বয়স তখন চল্লিশ-এটি নবীজীর নবুয়্যত-প্রাপ্তির পনের বছর পূর্বের ঘটনা।

(আল ইসাবা ফি তময়িজিসি সাহাবা ইবনে হাজার আসকালানীঃ অষ্টম খণ্ড পৃঃ ৬০)

ইসলাম গ্রহণ : পনের বছর পরে রাসূলুল্লাহ সাল্লাল্লাহু আলাইহি ওয়াসাল্লাম যখন নবুয়্যত প্রাপ্ত হন এবং নবুয়্যতের কর্তব্য সম্পাদন করতে গিয়ে সর্বপ্রথমে হযরত খাদীজাকে এই পয়গাম শোনালেন, খাদীজা (রাযিঃ) শোনার আগেই মু‘মিন ছিলেন, কেননা-খাদীজার চেয়ে বেশী অন্য কেউ মহানবীর এই দাবীর সত্যতার মীমাংসা করার ছিলেন না। বুখারী শরীফের ‘বদউল অহী’ অধ্যায়ে এই কাহিনী বিস্তৃত উল্লিখিত হয়েছে। যেমন :

عن عائشة انها قالت اول ما بدأ به رسول الله ﷺ من الوحي الرؤيا الصالحة في النوم - فكان لا يرى رؤيا الا جاءت مثل فلق الصبح - ثم حُبب اليه الخلاء وكان يخلو بغار حراء - فيتحنث فيه وهو التعبد الليالي ذوات العدد قبل ان ينزع إلى اهله ويتزود لذلك ثم يرجع الى خديجة فيتزود لمثلها حتى جاءه الحق وهو في غار حراء فجاءه الملك فقال : اقرأ - فقلت ما أنا قارئ قال فأخذني فغطني حتى بلغ مني الجهد - ثم أرسلني فقال اقرأ - فقلت ما أنا بقارئ فأخني - فغطني الثانية - ثم أرسلني - فقال اقرأ بسم ربك الذي خلق - خلق الانسان من علق - اقرأ وربك الاكرم - فرجع بها رسول الله ﷺ يرجف فواده فدخل على خديجة بنت خويلد - فقال زملوني زملوني فزملوه حتى ذهب عنه الروع فقال الخديجة وأخبرها الخبر لقد خشيت على نفسي فقالت خديجة كلا والله ما تخزيك الله ابدا - انك لتصل الرحمة وتحمل الكل وتكسب المعدوم وتقرى الضيف وتعين على نوائب الحق - فانطلقت به خديجة حتى أتت به ورقة بن نوفل بن اسد بن عبد العزى ابن عم خديجة وكان امرأ تنصر في الجاهلية وكان يكتب الكتاب العبراني فيكتب من الانجيل بالعبرانية ما شاء الله ان يكتب وكان شيخا كبيرا قد عمى فقالت له يا ابن عم اسمع من ابن اخيك - فقال له ورقة يا ابن اخي ماذا ترى؟ فاخبره رسول الله ﷺ خبر ما رأى -

فقال له ورقة هذا الناموس الذي نزل الله على موسى ياليتني فيها جدعا ياليتني ان اكون حيا اذ تخرجك قومك فقال رسول الله ﷺ او مخرجي هم قال نعم لم يأت رجل بمثل ما جئت به الا عودى وان يدركني يومك انصرك نصرا مؤمرا - ثم لم ينشب ورقة ان توفي وفتر الوحي -

হযরত আয়েশা সিদ্দিকা (রাযিঃ) বলেছেনঃ মহানবী সাল্লাল্লাহু আলাইহি ওয়াসাল্লাম-এর উপর অহীর সূচনা ঘটেছে সত্য স্বপ্নের মধ্য দিয়ে, তিনি যা কিছু স্বপ্নে দেখতেন তা সাদা প্রভাতের মত উদ্ভাসিত হয়ে যেত; এরপর মহানবী সাল্লাল্লাহু আলাইহি ওয়াসাল্লাম ধ্যানমগ্ন হন এবং সামগ্রী নিয়ে হেরা গুহায় চলে যেতেন এবং সেখানে আরাধনা করতেন। সামগ্রী শেষ হয়ে গেলে পুনরায় খাদীজার কাছে আসতেন এবং ফিরে গিয়ে আবার তাঁর ধ্যানে নিমগ্ন হতেন। এভাবে একদিন অদৃশ্য ফিরিশতা দৃষ্টিগোচর হল, ফিরিশতা তাঁকে বলছেনঃ পড়! মহানবী সাল্লাল্লাহু আলাইহি ওয়াসাল্লাম বললেনঃ আমি পড়ালেখা জানি না; ফিরিশতা তাঁকে জড়িয়ে ধরে তীব্র চাপ দিলেন এবং ছেড়ে দিলেন, এরপর বললেনঃ পড়! আমি আবার বললাম, আমি পড়ালেখা জানি না। ফিরিশতা দ্বিতীয়বার আমাকে জোরে চাপ দিলেন এবং ছেড়ে দিয়ে বললেনঃ পড়! আমি আবার বললামঃ আমি পড়ালেখা জানি না। এইভাবে ফিরিশতা আমাকে তৃতীয়বার চাপ দিয়ে বললেনঃ পড়! সেই প্রভুর নামে যিনি এই পৃথিবীকে সৃষ্টি করেছেন, যিনি মাংসপিণ্ড থেকে মানুষকে সৃষ্টি করেছেন, পড়! তোমার প্রভু খুবই দয়ালু ও করুণাপ্রবণ। নবীজী ঘরে ফিরে এলেন। ঈশী দীপ্তিতে তাঁর অন্তর কেবলি কাঁপছিল, খাদীজাকে বললেনঃ আমাকে কম্বল চড়িয়ে দাও, আমাকে কম্বল চড়িয়ে দাও। লোকেরা (অর্থাৎ ঘরের লোকজন) তাঁকে কম্বল তুলে দিলেন। এক পর্যায়ে তাঁর কম্পন চলে গেলে তিনি খাদীজাকে ডেকে সমস্ত ঘটনা বর্ণনা করলেন এবং বললেনঃ আমার ভয় হয়; খাদীজা বললেনঃ আপনি দ্বিধান্বিত হবেন না, আল্লাহ তা'আলা আপনাকে অসম্মান করবেন না, কেননা আপনি মমতাময় আচরণ করেন, নিঃস্ব ও গরীবদের সহায়তা করেন, আতিথেয়তা এবং বিপদের সময় আপনি সত্যের সহায়তা করেন। অতঃপর হযরত খাদীজা (রাযিঃ) তাঁকে, তাঁর চাচাত ভাই ওয়ারকা বিন নওফেলের কাছে নিয়ে গেল (ওয়ারকা নাসরানী ধর্মে দীক্ষিত ছিলেন, ইবরানী ভাষা জানতেন এবং ইবরানী ভাষায় ইঞ্জিল লিখতে পারতেন, তিনি বুদ্ধ ও অন্ধ হয়ে গিয়েছিলেন) এবং তাকে বললেন, আপনি আপনার ভাইপোর কথা শুনুন। ওয়ারকা বললেনঃ ভাইপো, কি দেখেছ তুমি? মহানবী সাল্লাল্লাহু আলাইহি ওয়াসাল্লাম যা কিছু ঘটেছে তার বিবরণ জানালেন। ওয়ারকা বললেনঃ এ-তো সেই ফিরিশতা, যে মুসার কাছে অবতীর্ণ হয়েছিল; আহা! আমি যদি সে সময় জীবিত থাকতাম এবং আমার শক্তি-সামর্থ্য থাকত, যখন তোমার জাতি তোমাকে দেশ থেকে বের করে দেবে! মহানবী সাল্লাল্লাহু আলাইহি ওয়াসাল্লাম বললেনঃ এই লোকেরা আমাকে বের করে দেবে? ওয়ারকা উত্তরে বললেনঃ কোন ব্যক্তিই আপনার মত, এমন আসেননি, যিনি প্রত্যাখ্যাত হননি। যদি আমি সেই দুঃসময় পর্যন্ত জীবিত থাকি তো তোমার বলিষ্ঠ সাহায্য করব। এরপরে ওয়ারকা দ্রুত ইস্তেকাল করলেন এবং অহী কিছু সময়ের জন্য স্থগিত হয়ে থাকলো।

এই সময় পর্যন্ত পাঁচ ওয়াক্ত নামায ফরয ছিল না। মহানবী সাল্লাল্লাহু আলাইহি ওয়াসাল্লাম নফল নামায পড়তেন, হযরত খাদীজা (রাযিঃ) ও তাঁর সাথে নফল নামাযে অংশগ্রহণ করতেন। ইবনে সাআদ বলেনঃ

مَكَثَ رَسُولُ اللَّهِ ﷺ وَخَدِيجَةُ يَصْلِيَانِ سَرَامَا شَاءَ اللَّهُ

অর্থাৎ মহানবী সাল্লাল্লাহু আলাইহি ওয়াসাল্লাম এবং হযরত খাদীজা (রাযিঃ) একটি সময় পর্যন্ত চুপিসারে নামায পড়েছেন।

(তাবকাত-ই-ইবনে সা'আদ মুহাম্মদ বিন সা'আদ, অষ্টম খণ্ড- পৃঃ ১০)

আফিফ কিন্দি মাল কেনার জন্যে মক্কা আসে এবং হযরত আব্বাস (রাযিঃ)-এর ঘরে অবস্থান করে। সকালে একদিন কা'বার দিকে তাকাতেই দেখলেনঃ একটি যুবক এল এবং আসমানের দিকে তাকিয়ে কিবলামুখী দাঁড়িয়ে গেল, অতঃপর একটি বালক তার ডানপাশে এসে দাঁড়াল, এরপর একজন মহিলা দু'জনের পেছনে এসে দণ্ডায়মান হল। নামায পড়ে এরা চলে গেলে আফিফ আব্বাস (রাযিঃ) কে বললেনঃ কোনো বড় ঘটনা এগিয়ে আসছে বোধ হয়। হযরত আব্বাস (রাযিঃ) বললঃ হ্যাঁ। আফিফ বললঃ এই যুবককে তুমি চেন? আব্বাস (রাযিঃ) বললেনঃ এটি আমার ভাইপো মুহাম্মদ অপরাট আরেকজন ভাইপো আলী এবং মহিলা হচ্ছে মুহাম্মদের স্ত্রী খাদীজা। আমার ভাইপোর ধারণা, তাঁর ধর্ম মহান প্রতিপালকের ধর্ম এবং সে যা কিছু করে, তাঁরই নির্দেশে করে। পৃথিবী সম্পর্কে যেটুকু আমার জ্ঞানঃ এই তিনজনেই কেবল তাঁর ধর্মমতে বিশ্বাসী।

(তাবকাত-ই-ইবনে সা'আদ, মুহাম্মদ বিন সা'আদ, অষ্টম খণ্ড) পৃঃ ১০-১১)

ইমাম আকিলি এই বর্ণনাকে দুর্বল মনে করেন, কিন্তু আমাদের বিবেচনায় এটি দুর্বল হওয়ার কোন কারণ নেই। বক্তব্যগত দিক থেকে এতে খারাপ কিছু নেই। বর্ণনাগত দিক থেকে এর প্রামাণিকতার বিভিন্ন পথ আছে। মুহাদ্দিছ ইবনে সা'আদ একে উদ্ধৃত করেছেন। বাগোবী, আবু ইয়াল্লা এবং ইমাম নাসায়ী এটিকে নিজেদের গ্রন্থে স্থান দিয়েছেন। হাকিম, ইবনে খোসাইমা, ইবনে মুন্দা এবং গায়লানিয়াত গ্রন্থকার এটিকে সমর্থন করেছেন। সবচেয়ে বড় কথা হচ্ছে ইমাম বুখারী তাঁর ইতিহাস গ্রন্থে এটিকে উদ্ধৃত করেছেন এবং 'সহীহ' (শুদ্ধ) বলে উল্লেখ করেছেন।

হযরত খাদীজা (রাযিঃ) কেবল নবুয়্যতেরই স্বীকার করেননি, তিনি ইসলামের প্রাথমিক অবস্থায় মহানবী সাল্লাল্লাহু আলাইহি ওয়াসাল্লাম-এর সবচেয়ে বড় একজন সহযোগী ও সাহায্যকারী হিসেবে পরিগণিত হয়েছিলেন। মহানবী সাল্লাল্লাহু আলাইহি ওয়াসাল্লামকে কান্নাফরগণ যে কয়েক বছর পর্যন্ত নির্যাতন করবার ব্যাপারে দ্বিধাকর্ণ ছিল, তার মধ্যে বড় রকমে কাজ করেছিল হযরত খাদীজা (রাযিঃ)-এর প্রভাব। পূর্বে উল্লিখিত হয়েছে, মহানবী সাল্লাল্লাহু আলাইহি ওয়াসাল্লাম যখন উচ্চারণ করলেন 'আমার ভয় হয়' তখন খাদীজা (রাযিঃ) বলেছিলেনঃ 'আপনি দ্বিধাশ্রিত হবেন না, আল্লাহ আপনাকে ছেড়ে যাবেন না।' ইসলামের আত্মস্থানের সূত্রে বিধর্মীরা যখন মহানবীকে নানা রকম নির্যাতন করল, তাতে হযরত খাদীজা (রাযিঃ) তাঁকে প্রবোধ দেন, সান্ত্বনা দেন। 'আল ইসতিয়াব' গ্রন্থে আছে-

فكان لا يسمع من المشركين شيئاً يكره من رد عليه وتكذيب له الا فرج

الله عنه بما تثبته وتصدقته وتخفف عنه وتهون عليه ما يلقي من قومه

(তাবকাত-ই-ইবনে সা'আদ বিন সা'আদ, দ্বিতীয় খণ্ড-পৃঃ ৭৪০)

মহানবী সাল্লাল্লাহু আলাইহি ওয়াসাল্লাম কাফিরদের কাছ থেকে অস্বীকার এবং বিরোধিতার যে দুঃখ পেতেন, হযরত খাদীজা (রাযিঃ)-এর কাছে এসে তা দূর হয়ে যেত, কেননা হযরত খাদীজা (রাযিঃ) তাঁর সমস্ত কথা সত্য বলে স্বীকার করতেন এবং বিধর্মীদের কথা তাঁর সামনে হালকা ভাবে ব্যাখ্যা করতেন।

সপ্তম সনে কুরাইশরা যখন ইসলামকে ধ্বংস করার সিদ্ধান্ত গ্রহণ করল, তখন তারা এই ফন্দি করল যে, রাসূলুল্লাহ সাল্লাল্লাহু আলাইহি ওয়াসাল্লাম এবং তাঁর পরিবারকে একটি ষাঁটিতে অন্তরীণ করে ফেলতে হবে। অতএব, আবু তালেব বাধ্য হয়ে সমস্ত হাশেম বংশ নিয়ে 'শেয়াবে আবু তালেব'-এর মধ্যে আশ্রয় গ্রহণ করল। হযরত খাদীজা (রাযিঃ)ও তখন সঙ্গে ছিলেন। 'সীরাতে ইবনে হিশাম'-এর বর্ণনা-

وهي عند رسول الله ﷺ ومعه في الشعب

'এবং তিনি (হযরত খাদীজা রাযিঃ) মহানবী সাল্লাল্লাহু আলাইহি ওয়াসাল্লাম-এর সঙ্গে 'শেয়াবে আবু তালেব'-এ ছিল।' (সীরাতে ইবনে হিশাম, প্রথম খণ্ড-পৃঃ ১৯২)

তিনটি বছর বনু হাশিম এই অন্তরীণ অবস্থায় অতিবাহিত করে। এত কঠিন ছিল এ জীবন যে, طلع নামক বৃক্ষের পাতা খেয়ে খেয়ে তারা থাকতেন। তবুও সেই সময়েও হযরত খাদীজার প্রভাবে কখনো কখনো খাবার এসে যেত। একদিনের ঘটনা। হযরত খাদীজা (রাযিঃ)-এর ভাইপো হাকিম ইবনে হিয়াম সামান্য গম নিজের ভৃত্যকে দিয়ে হযরত খাদীজা (রাযিঃ)-এর কাছে পাঠালেন। রাস্তায় আবু জেহেল তা দেখে ফেলল এবং ছিনিয়ে নিতে চাইল।

ঘটনাচক্রে আবুল বাখতরী কোথা থেকে সেখানে এল, সে কাফির ছিল যদিও কিন্তু তার করুণা হল এবং বলল, একটি লোক তার ফুফুর জন্যে কিছু খাবার পাঠাচ্ছে, তুমি বাধা দিচ্ছ কেন? (সীরাতে ইবনে হিশাম, প্রথম খণ্ড-পৃঃ ১৯২)

মৃত্যু : বিবাহের পর হযরত খাদীজা (রাযিঃ) পঁচিশ বছর পর্যন্ত জীবিত ছিলেন, (হিজরতের তিন বছর পূর্বে) ১১ই রমযান দশম সালে তিনি ইন্তেকাল করেন। এই সময় তাঁর বয়স হয়েছিল চৌষট্টি বছর, ছ'মাস। যেহেতু জানাযার নামায সে সময় পর্যন্ত শরীয়ত বিধিতে ছিল না, কাজেই সেভাবেই তাঁকে দাফন করে দেয়া হয়।

মহানবী সাল্লাল্লাহু আলাইহি ওয়াসাল্লাম নিজে তাঁর কবরে প্রবেশ করেন এবং নিজের সবচেয়ে বড় সহধর্মীনীকে মৃত্যু-মালিকের হাতে সমর্পণ করেন। 'জহুন' (جحون) নামক স্থানে হযরত খাদীজার কবর অবস্থিত। অসংখ্য মানুষ সব সময় তাঁর কবর জিয়ারত করছে।

(তাবকাত-ই-ইবনে সা'আদ, অষ্টম খণ্ড-পৃঃ ১১)

হযরত খাদীজা (রাযিঃ)-এর মৃত্যুর পর থেকে ইসলামের ইতিহাসের একটি নূতন অধ্যায় শুরু হল। এই সময়টি ইসলামের সবচেয়ে কঠিনতম সময়। নবীজী নিজেই এই বছরটিকে ‘আমূল হযন’ (عام الحزن) অর্থাৎ ‘বেদনার্ত বছর’ হিসেবে চিহ্নিত করেছেন। কেননা হযরত খাদীজা (রাযিঃ)-এর মৃত্যুর পরে কুরাইশদের আর কোন লোকের বালাই ছিল না; কুরাইশরা এখন খুবই নিষ্ঠুর প্রক্রিয়ায় এবং স্বাধীনভাবে মহানবী সাল্লাল্লাহু আলাইহি ওয়াসাল্লামকে নির্যাতন করা শুরু করল। এই বছরই মহানবী সাল্লাল্লাহু আলাইহি ওয়াসাল্লাম মক্কাবাসীদের কাছ থেকে নিরাশ হয়ে ‘তায়িফ’ চলে যান।

সন্তান-সন্ততি : হযরত খাদীজা (রাযিঃ)-এর অনেকগুলো সন্তান হয়। আবু হালা স্বামী থাকাকালীন তাঁর দু’টো ছেলে হয়, যাদের নাম হালা এবং হিন্দ। দ্বিতীয় স্বামী আতিকের সময় তাঁর একটি কন্যা সন্তানের জন্ম হয়, তার নামও হিন্দ আর মহানবী সাল্লাল্লাহু আলাইহি ওয়াসাল্লাম হতে ছয়জন সন্তানের জন্ম হয়; তার মধ্যে দু’জন ছেলে ছিল, এঁরা বাল্যকালেই মৃত্যুবরণ করেন-বাকী চারজন ছিল কন্যা সন্তান। নামসমূহ নীচে উল্লিখিত হচ্ছে—

(জুরকানী আলাল মাওয়াহিব, তৃতীয় খণ্ড- পৃঃ ২২১)

(১) **হযরত কাসিম :** ইনি ছিলেন মহানবী সাল্লাল্লাহু আলাইহি ওয়াসাল্লাম-এর বড় ছেলে; তাঁরই নামকে কেন্দ্র করে তাঁর উপনাম ছিলঃ আবুল কাসেম; বাল্যকালেই মক্কায় তাঁর মৃত্যু হয়, সবেমাত্র পাঁচ ভর করে চলা শুরু করেছিলেন তিনি।

(২) **হযরত যয়নব :** মহানবীর সবচেয়ে বড় মেয়ে।

(৩) **হযরত আবদুল্লাহ :** তাঁর জীবৎকাল খুবই সামান্য, মহানবীর নবুয়্যত প্রাপ্তিকালীন সময়ে জন্মেছিলেন বলে তাঁর উপাধি হয় তৈয়্যব (উত্তম) ও তাহির (পবিত্র)।

(৪) **হযরত রোকেয়া।**

(৫) **হযরত উম্মে কুলসুম।**

(৬) **হযরত ফাতেমা জোহরা :** তাঁর এক বছর অন্তর ব্যবধানে জন্ম গ্রহণ করেন।

হযরত খাদীজা (রাযিঃ) অধিক সংখ্যক সন্তানের প্রত্যাশী ছিলেন; যেহেতু পৃথিবীও তাঁর অনুকূল ছিল অর্থাৎ খুবই ঐশ্বর্যবান ছিলেন। সে কারণে আকাবার দাসী সলমাকে নিযুক্ত করেন বাচ্চাদের লালন পালনের জন্যে, সালমা তাদের খাওয়াতো, দুধ পান করাত।

মহানবী সাল্লাল্লাহু আলাইহি ওয়াসাল্লাম-এর পবিত্র পত্নীগণের মধ্যে হযরত খাদীজা (রাযিঃ)-এর কিছু বিশেষ বৈশিষ্ট্য অর্জিত ছিল। হযরত খাদীজা (রাযিঃ) ছিলেন মহানবী সাল্লাল্লাহু আলাইহি ওয়াসাল্লাম-এর প্রথমা স্ত্রী। তিনি যখন মহানবী সাল্লাল্লাহু আলাইহি ওয়াসাল্লাম-এর সঙ্গে বৈবাহিক সম্পর্ক যুক্ত হন, তখন তাঁর বয়স ছিল চল্লিশ। কিন্তু তবুও তাঁর জীবৎকালে মহানবী সাল্লাল্লাহু আলাইহি ওয়াসাল্লাম দ্বিতীয় বিয়ে করেননি এবং ইবরাহীম ছাড়া, মহানবীর সব সন্তান খাদীজার কোলেই জন্মগ্রহণ করে।

মর্যাদা ও কীতিমালা : উম্মুল মুমেনীন হযরত খাদিজার মর্যাদা ও মহত্ব এ থেকেও অনুমান করা যায় যে, মহানবী সাল্লাল্লাহু আলাইহি ওয়াসাল্লাম যখন নবুয়্যতের দায়িত্ব পালন করতে চাইলেন, তখন এই বিশ্বলোক থেকে একটি উচ্চারণও তাঁর স্বপক্ষে

উখিত হল না। হেরার গুহা, আরাফাতের ময়দান, ফারান পর্বত এক কথায় সমস্ত আরব উপদ্বীপ মহানবী সাল্লাল্লাহু আলাইহি ওয়াসাল্লাম-এর উচ্চারণের মূর্তিমান ছবি হয়ে ছিল, কিন্তু এই বিশ্বব্যাপী নৈঃশব্দের মধ্যে একটি আওয়াজ মক্কার বাতাসে তরঙ্গ সৃষ্টি করে ফিরছিল— সেই আওয়াজ হযরত খাদীজা (রাযিঃ)-এর পবিত্র অন্তর থেকে উখিত হয়েছিল এবং যা এই অবিশ্বাস, মুর্থতা ও মূঢ়তার অন্ধকারের মধ্যে ঐশী আলোর দ্বিতীয় জ্যোতির্ময় স্থান ছিল।

হযরত খাদীজা (রাযিঃ) সেই পবিত্র নারী যিনি নবুয়্যাতের পূর্বেই মূর্তিপূজা ছেড়ে দিয়েছিলেন। যেমন, ‘মুসনাদে আহমদ ইবনে হাম্বলের’ একটি বর্ণনাঃ মহানবী সাল্লাল্লাহু আলাইহি ওয়াসাল্লাম খাদীজা (রাযিঃ)কে বলছেনঃ আল্লাহর কসম! আমি কখনো ‘লাত’ এবং ‘উজ্জা’ প্রতিমার পূজা করবো না— খাদীজা (রাযিঃ) এটি শুনে উত্তর করলঃ ‘লাত’কে যেতে দিন, ‘উজ্জা’কে যেতে দিন, অর্থাৎ এসবের উল্লেখও করবেন না।

(মুসনাদে আহমদ ইবনে হাম্বল, চতুর্থ খণ্ড-পৃঃ ২২২)

মহানবী সাল্লাল্লাহু আলাইহি ওয়াসাল্লাম যখন নবুয়্যাতের বাণী উচ্চারণ করলেন, খাদীজা (রাযিঃ)ই সর্বপ্রথম সেই ডাকে সাড়া দিয়েছিলেন। মহানবী সাল্লাল্লাহু আলাইহি ওয়াসাল্লাম এবং ইসলাম তাঁর মাধ্যমে যে শক্তি ও সাহস অর্জন করেছিল, মহানবীর জীবন চরিতের প্রতিটি পৃষ্ঠাই তার উজ্জ্বল সাক্ষ্য বহন করে। ঐতিহাসিক ইবনে হিশাম বলেন—

وكانت له وزير صدق على الاسلام

অর্থাৎ তিনি (খাদীজা রাযিঃ) ইসলামের ব্যাপারে মহানবী সাল্লাল্লাহু আলাইহি ওয়াসাল্লাম-এর একজন যথার্থ উপদেষ্টা ছিলেন।

মহানবী সাল্লাল্লাহু আলাইহি ওয়াসাল্লাম-এর সাথে তাঁর কী রকম ভালবাসা ছিল, তা এ থেকেও পরিষ্কার যে, যদিও হযরত খাদীজা (রাযিঃ) বিপুল সম্পদ ও ঐশ্বর্যের অধিকারী ছিলেন, তবুও নবীজীর সেবা তিনি নিজেই করতেন। যেমন বুখারী শরীফের একটি বর্ণনায় আছে— হযরত জিবরাঈল (আঃ) একবার মহানবী সাল্লাল্লাহু আলাইহি ওয়াসাল্লামকে বলছেনঃ হযরত খাদীজা (রাযিঃ) বরতনে করে কী যেন নিয়ে আসছে, আপনি তাঁকে আল্লাহর এবং আমার সালাম পৌঁছে দেবেন। (সহীহ বুখারীঃ প্রথম খণ্ড পৃঃ ৫৩৯)

মহানবী সাল্লাল্লাহু আলাইহি ওয়াসাল্লাম হযরত য়ায়েদ ইবনে হারিসা (রাযিঃ)কে ভালবাসতেন খুব। কিন্তু মক্কায় তিনি দাস হয়ে রয়েছিলেন, হযরত খাদীজা (রাযিঃ) তাকে স্বাধীন করল। এরপর য়ায়েদ বিন হারিসা পৃথিবীর কোন প্রভুর সেবক না হয়ে রিসালতের সম্রাট, মহানবীর গোলাম হয়ে গেলেন।

মহানবী সাল্লাল্লাহু আলাইহি ওয়াসাল্লামও হযরত খাদীজাকে অসম্ভব ভালবাসতেন, তাঁর জীবিতাবস্থায় তিনি দ্বিতীয় বিয়ে করেননি; তাঁর মৃত্যুর পরে মহানবীর নিয়ম ছিল, যদি কোন পশু জবেহ হত, তিনি তাঁর বান্ধবীদের খুঁজে খুঁজে গোশত পাঠিয়ে দিতেন। হযরত আয়েশা (রাযিঃ) বলেন, যদিও আমি হযরত খাদীজা (রাযিঃ)কে দেখিনি, কিন্তু

তবুও আমার তাঁর প্রতি যে রকম ঈর্ষা হত, আর কারো প্রতি সে রকম হত না। তার কারণ ছিল এই যে, মহানবী সাল্লাল্লাহু আলাইহি ওয়াসাল্লাম সবসময় তাঁর কথা বলতেন। একবার আমি তাঁকে সে ব্যাপারে কটাক্ষ করলে নবীজী বললেনঃ আল্লাহ তা‘আলা আমাকে তাঁর ভালবাসা দিয়েছেন। (সহীহ বুখারীঃ প্রথম খণ্ড-পৃঃ ৫৩৯)

একবার, হযরত খাদীজার মৃত্যুর পর তাঁর বোন হা‘লা মহানবীর সঙ্গে দেখা করতে এলেন এবং অনুমতি প্রত্যাশার নিয়ম অনুযায়ী ভিতরে আসার সম্মতি চাইলেন; তাঁর কণ্ঠস্বর অনেকটা হযরত খাদীজার মত। মহানবীর কানে সে আওয়াজ প্রবেশ করতেই হযরত খাদীজার কথা মনে পড়ে গেল তাঁর এবং তিনি বিচলিত হলেন এবং বললেনঃ ‘হা‘লা হবে।’ হযরত আয়েশাও উপস্থিত ছিলেন সেখানে। তাঁর খুবই ঈর্ষা হল এতে। তিনি বললেনঃ ‘আপনি কি এক মৃত বৃদ্ধা রমণীর কথা স্মরণ করেন, আল্লাহ যেখানে আপনাকে উত্তম স্ত্রী দিয়েছেন।’ (সহীহ বুখারীর বর্ণনা এটুকুই কেবল, কিন্তু ‘ইসতিয়াব’-এন্তে আছে) মহানবী সাল্লাল্লাহু আলাইহি ওয়াসাল্লাম তার উত্তরে বললেনঃ কখনোই নয়, যখন লোকেরা আমাকে অস্বীকার করল, তখন তিনি আমাকে সমর্থন করেছেন, যখন অন্যেরা অবিশ্বাসী ছিল, তিনি ইসলামে বিশ্বাসী হয়েছেন, যখন আমার কেউই সাহায্যকারী ছিল না, তখন তিনিই আমার সহযোগিতা করেছেন এবং আমার সন্তান তাঁর থেকেই হয়েছে। (সীরাতুন নবীঃ দ্বিতীয় খণ্ড, দ্বিতীয় মুদ্রণ পৃঃ ৪০১)

হযরত খাদীজার মর্যাদা-নির্দেশী বহু হাদীছ বর্ণিত আছে। সহীহ বুখারী এবং সহীহ মুসলিম-এ আছে :

خير نسائها مريم بنت عمران وخير نسائها خديجة بنت خويلد

‘অর্থাৎ পৃথিবীর সবচেয়ে বিশিষ্ট ও মর্যাদান্বিত নারী মরিয়ম (আঃ) ও হযরত খাদীজা (রাযিঃ)’।

একবার হযরত জিবরাঈল মহানবী সাল্লাল্লাহু আলাইহি ওয়াসাল্লাম-এর কাছে বসা ছিলেন। এরই মধ্যে খাদীজা (রাযিঃ) এলেন। জিবরাঈল (আঃ) বললেন-

بشرها ببیت فی الجنة من قصب لاصخب فيه ولا نصب

অর্থাৎ ‘তাকে বেহেশতের এমন একটি প্রসাদের সুসংবাদ শুনিতে দিন, যা হবে মুক্তার এবং যার মধ্যে থাকবে না কোন হট্টগোল, কোন কষ্ট কিংবা পরিশ্রম।

(বুখারী শরীফ বাবু তযতিযিল্লবীয়ে (সাঃ) খাদীজাতা ও ফাযলিহা)

হযরত সাওদা (রাযিঃ)

সাওদা (রাযিঃ) ছিল তাঁর নাম, তিনি ছিলেন আ'মের গোত্রের, এই গোত্রটি কুরাইশের একটি প্রসিদ্ধ গোত্র ছিল।

তাঁর বংশক্রম এরকম : সাওদা বিনতে যামআ বিন কায়েস বিন আবদে শামস বিন আবদুদ বিন নাসর বিন মালেক বিন হাসল বিন আমের ইবনে লেওয়া।

মাতার নামঃ শামুস। তিনি ছিলেন মদীনা-বংশীয় বনু নজ্জার গোত্রের।

তাঁর পুরো নাম ও বংশ তালিকা এরকমঃ শামুস বিনতে কায়েস বিন যায়েদ বিন আমর বিন লবিদ বিন ফিরাশ বিন আমের বিন গনম বিন আদি বিন আন-নজ্জার।

বিবাহ : তাঁর পিতার চাচাত ভাই সোকরান বিন আমরের সাথে তাঁর বিয়ে হয়।

ইসলাম গ্রহণ : নবীজীর নবুয়্যাতের উন্মোচনকালেই ইসলামের সৌভাগ্য অর্জন করেন।

তাঁর সাথে তাঁর স্বামীও ইসলামে দীক্ষিত হন। এই সূত্রে তিনি প্রাথমিক পর্বের মুসলমান হওয়ার গৌরব অর্জন করেন। হাবশার দিকে প্রথম হিজরতের সময় পর্যন্ত হযরত সাওদা ও তাঁর স্বামী মক্কায় অবস্থান করেছিলেন, কিন্তু যখন বিধর্মী অবিশ্বাসীদের নির্যাতন ও নিপীড়ন সব সীমা অতিক্রম করে গেল এবং মুহাজিরদের একটি বড় অংশ হিজরতের জন্যে আগ্রহী হয়ে উঠল, তখন সেই হিজরতে হযরত সাওদা এবং তাঁর স্বামীও অংশগ্রহণ করলেন।

কয়েক বছর হাবশায় থেকে মক্কা ফিরে আসেন এবং কিছুদিন পর তার স্বামী ইন্তেকাল করেন।

নবীপত্নী হিসেবে সাওদা : মহানবী সাল্লাল্লাহু আলাইহি ওয়াসাল্লাম-এর পবিত্র পত্নীবৃন্দের মধ্যে এই গৌরব কেবল হযরত সাওদা (রাযিঃ)-এরই যে, হযরত খাদীজা (রাযিঃ)-এর মৃত্যুর পর সর্বপ্রথম তিনিই নবীজীর পত্নী হন। হযরত খাদীজার মৃত্যুর পরে মহানবী সাল্লাল্লাহু আলাইহি ওয়াসাল্লাম খুবই বেদনার্ত ও বিমর্ষ ছিল। মহানবীর এই অবস্থা দেখে উসমান বিন ময়উন-এর স্ত্রী খাওলা বিনতে হাকিম তাঁকে বলেন যে, আপনার এখন একজন বান্ধব ও সহধর্মীনি দরকার। নবীজী বললেনঃ হ্যাঁ, ঘরবাড়ী, ছেলে-সন্তান সবকিছুর দায়িত্ব ছিল খাদীজার ওপর। নবীজীর ইঙ্গিতধর্মী সম্মতিতে খাওলা, সাওদার পিতার কাছে গিয়ে অন্ধকার যুগের প্রথানুযায়ী বলল 'সৌভাগ্যপূর্ণ প্রভাত' তারপর বিয়ের প্রস্তাব জানালেন। তিনি বললেনঃ হ্যাঁ, মুহাম্মদ সাল্লাল্লাহু আলাইহি ওয়াসাল্লাম সম্ভ্রান্ত পরিবারের সন্তান, তবে সাওদার সঙ্গেও আলোচনা কর। এক কথায়, যখন সমস্ত পর্যায় অতিক্রান্ত হল, নবীজী নিজে উপস্থিত হলেন, সাওদার পিতা বিবাহ পড়ালেন। চারশ' দিরহাম মোহর নির্ধারিত হল। বিবাহের পর, সাওদা (রাযিঃ)-এর ভাই আবদুল্লাহ বিন যামআ (যে সে সময় পর্যন্ত অমুসলমান ছিল) এল এবং বিয়ের বিষয় অবহিত হওয়ার পর মাথায় মাটি নিয়ে বললঃ কী সর্বনাশ হয়ে গেছে। পরবর্তীতে ইসলাম গ্রহণ করবার পর নিজের এই মুর্থতা ও মূঢ়তার জন্যে সব সময় তিনি আফসোস করতেন।

(যুরকানী মাওয়াহিব : তৃতীয় খণ্ড- পৃঃ ২৬১)

হযরত সাওদা (রাযিঃ)-এর বিয়ে হয় রমযান মাসে, ১০ই নববী-সনে এবং যেহেতু তাঁর ও হযরত আয়েশার বিয়ের সময়কাল কাছাকাছি, সে জন্যে ঐতিহাসিকদের মধ্যে কার বিয়ে আগে হয়েছে এ নিয়ে মতভেদ আছে। ইবনে ইসহাকের মতে সাওদার বিয়ে আগে হয়েছে, আবদুল্লাহ বিন মুহাম্মদ বিন আকিলের মতে হযরত আয়েশা (রাযিঃ)-এর বিয়ে সাওদার আগে হয়েছে।

(তাবকাত-ই-ইবনে সা'আদঃ অষ্টম খণ্ড, পৃঃ ৩৬, ৩৭, ৩৮, ৩৯ এবং জুরকানীঃ ৩য় খণ্ড পৃঃ ২৬০) কোন কোন বর্ণনায় আছে যে হযরত সাওদা (রাযিঃ) নিজের প্রথম স্বামীর জীবৎকালে একটি স্বপ্ন দেখেছিলেন; সেই স্বপ্নের কথা স্বামীকে জানালে তিনি বলেনঃ সম্ভবতঃ আমার মৃত্যুর সময় নিকটবর্তী এবং তোমায় বিয়ে রসূলুল্লাহ সাল্লাল্লাহু আলাইহি ওয়াসাল্লাম-এর সাথে হবে। দেখা গেল এই স্বপ্ন অক্ষরে অক্ষরে সত্য হয়েছে।

(জুরকানী আলাল মাওয়াহিবঃ তৃতীয় খণ্ড-পৃঃ ২৬০ এবং তাবকাত-ই-ইবনে সা'আদ ৮ম খণ্ড-পৃঃ ৩৮, ৩৯) সাধারণ অবস্থা : নবুয়্যতের তেরতম বছরে মহানবী সাল্লাল্লাহু আলাইহি ওয়াসাল্লাম মদীনার বুকে হিজরত করবার পর তিনি হযরত যায়েদ বিন হারেসাকে মক্কা পাঠান হযরত সাওদাকে নিয়ে আসবার জন্যে। অতএব হযরত যায়েদের সাথে তিনি এবং হযরত ফাতেমা যোহরা (রাযিঃ) মদীনায় চলে আসেন।

দশম হিজরীতে মহানবী সাল্লাল্লাহু আলাইহি ওয়াসাল্লাম যখন হজ্জ্ব করেন, সাওদাও তাঁর সাথে ছিল; যেহেতু তিনি উন্নত ও দীর্ঘকায় এবং মোটাসোটা ছিলেন এবং সে কারণে দ্রুত চলাফেরা করতে পারছিল না। এ জন্যে মহানবী সাল্লাল্লাহু আলাইহি ওয়াসাল্লাম সম্মতি দেন যে, অন্যদের মুযদালিফা থেকে রওয়ানা হবার পূর্বে তাঁর চলে যাওয়া সঙ্গত। কেননা ভীড়ের মধ্যে তাঁর চলা কষ্টকর হবে। (সহীহ বুখারীঃ প্রথম খণ্ড-পৃঃ ২২৮) মৃত্যু : একবার নবী পত্নীরা মহানবী সাল্লাল্লাহু আলাইহি ওয়াসাল্লাম-এর কাছে উপস্থিত ছিলেন। তাঁরা মহানবীকে বললেনঃ ইয়া রসূলুল্লাহ! আমাদের মধ্যে সর্বপ্রথম কার মৃত্যু হবে? নবীজী বললেন; যার হাত সবার চেয়ে বড়। সাধারণ সকলে আক্ষরিক অর্থ বুঝল এই কথার; হাত মাপা হলে দেখা গেল সাওদার হাত সবার চেয়ে বড়।

(তাবকাত-ই-ইবনে সা'আদ, অষ্টম খণ্ড-পৃঃ ৩৭)

কিন্তু যখন সবার আগে মৃত্যু হল হযরত যয়নবের, তখন বোঝা গেল 'হাত বড়' বলতে মহানবীর উদ্দেশ্য ছিল ঔদার্য ও দানশীলতা। যাহোক, ঐতিহাসিক ওয়াকেদী হযরত সাওদার মৃত্যু-সাল হিসেবে নির্দেশ করেছেন ৫৪ হিজরী সন।

(তাবকাত-ই-ইবনে সা'আদ : অষ্টম খণ্ড পৃঃ ৩৭, ৩৯)

কিন্তু নির্ভরযোগ্য বর্ণনাকারীদের বর্ণনানুযায়ী হযরত সাওদা হযরত ওমরের শাসন কালে মৃত্যুবরণ করেন। (উসুদুল গাবা ও ইসতিয়াব ও খোলাসায়ে তাহযীবঃ সাওদা প্রসঙ্গ) হযরত ওমর (রাযিঃ) ২৩ হিজরীতে ইস্তিকাল করেন এজন্যে হযরত সাওদার মৃত্যুসাল হবে ২৪ হিজরী। খামীর-এর মধ্যে এই বর্ণনা আছে এবং এটিই সর্বাধিক শুদ্ধ।

(জুরকানী আলাল মাওয়াহিব : ৩য় খণ্ড পৃঃ ২৬২)

এ মতটিকেই ইমাম বুখারী, আল্লামা যাহবী, যাজারী, ইবনু আবদিল বার এবং আল্লামা খায়রাজী গ্রহণ করেছেন।

সন্তান-সন্ততি : নবীজীর ঘরে হযরত সাওদার কোন সন্তান হয়নি। প্রথম স্বামী (হযরত সোকরান) একটি সন্তানের স্মৃতি রেখে গিয়েছিলেন, যাঁর নাম ছিল আবদুর রহমান। তিনি জলুলা যুদ্ধে (পারস্য) শাহাদাত বরণ করেন।

(জুরকানী আলাল মাওয়াহিব : দ্বিতীয় খণ্ড পৃঃ ২৬০)

অবয়ব-সংগঠন : পবিত্র পত্নীদের মধ্যে হযরত সাওদা (রাযিঃ)-এর চেয়ে কেউ উন্নত ও দীর্ঘকায় ছিল না। হযরত আয়েশা (রাযিঃ)-এর কথা, যে তাঁকে দেখে ফেলত, তার থেকে তিনি লুকোতে পারতেন না।

(জুরকানী আলাল মাওয়াহিব : দ্বিতীয় খণ্ড পৃঃ ২৫০)

জুরকানীতে আছে : তাঁর জংগা লম্বা ছিল।

(সহীহ বুখারী : দ্বিতীয় খণ্ড, পৃঃ ৭০৭)

মর্যাদা ও মহিমা : হযরত সাওদা (রাযিঃ) থেকে কেবল পাঁচটি হাদীছ বর্ণিত, যার মধ্যে একটি কেবল বুখারী শরীফে আছে। সাহাবীগণের মধ্যে হযরত ইবনে আব্বাস (রাযিঃ) তাঁর থেকে হাদীছ বর্ণনা করেছেন।

চরিত্র : হযরত আয়েশা (রাযিঃ) বলেন :

ما من الناس امرأة أحب أن أكون في مسلاخها من سودة

অর্থাৎ ‘সাওদা ছাড়া আর কাউকে দেখেই আমার মনে হয়নি যে, তার ভিতরে আমার রুহ হত!

(জুরকানী আলাল মাওয়াহিব : তৃতীয় খণ্ড, পৃঃ ৪৫৯)

আনুগত্য এবং বাধ্যতায় তিনি সমস্ত পবিত্র পত্নীদের মধ্যে বিশিষ্ট ছিল। মহানবী সাল্লাল্লাহু আলাইহি ওয়াসাল্লাম বিদায় হজ্জের সময় সমস্ত পত্নীদের উদ্দেশ্য করে বলেছিলেন : ‘আমার পরে গৃহেই অবস্থান কর’।

(তাবকাত-ই-ইবনে সা‘আদ : অষ্টম খণ্ড, পৃঃ ৩৭)

হযরত সাওদা (রাযিঃ) নবীজীর এই নির্দেশ এত কঠোরভাবে পালন করেছিল যে, পরবর্তীতে হজ্জের জন্যও বেরোননি। তিনি বলতেন, আমি হজ্জ ও ওমরা দু’টোই সমাপন করেছি এবং এখন আল্লাহর নির্দেশ অনুযায়ী ঘরেই থাকব।

(জুরকানী আলাল মাওয়াহিব : তৃতীয় খণ্ড, পৃঃ ২০১)

উদারতা ও দানশীলতাও তাঁর একটি বিশিষ্ট স্বভাব ছিল এবং হযরত আয়েশা (রাযিঃ) ছাড়া তিনি এই গুণে সবার চেয়ে বিশিষ্ট ছিল। একবার হযরত উমর (রাযিঃ) তাঁর কাছে একটি থলে পাঠালেন। তিনি বাহককে জিজ্ঞেস করলেন, এটিতে কি আছে? সে বললঃ দিরহাম; তিনি বললেনঃ খেজুরের মত থলেতে করে দিরহাম পাঠানো হয়। এই বলে তখনই তিনি সব বন্টন করে দিলেন।

(তাবকাত-ই-ইবনে সা‘আদ : অষ্টম খণ্ড, পৃঃ ৩৮)

তিনি ভায়েফের চামড়া বানাতেন এবং তা থেকে যা আয় হত, তা খুবই স্বাধীনভাবে ভাল কাজে ব্যয় করতেন।

(আল-ইসাবা-ফি তময়িজিস সাহাবা : অষ্টম খণ্ড, পৃঃ ১১৮)

ত্যাগেও তিনি বিশিষ্ট ভূমিকা রাখতেন। তিনি এবং হযরত আয়েশা (রাযিঃ) আগে-পরে বিবাহ সম্পর্কে এসেছিলেন। কিন্তু যেহেতু তাঁর বয়স ছিল বেশি, এ জন্য যখন বৃদ্ধ হয়ে গেলেন, তখন কী জানি কেন তাঁর ধারণা হল, নবীজী বুঝি তাঁকে তালাক দিয়ে দিবেন এবং মহানবীর সান্নিধ্য সৌভাগ্য থেকে বঞ্চিত হয়ে পড়বেন। একারণে তিনি

তাঁর পালা হযরত আয়েশা (রাযিঃ)কে দিয়ে দেন, আর আয়েশা (রাযিঃ) তা আনন্দের সঙ্গে গ্রহণ করে নেন। (আল-ইসাৰা ফী তময়ীযিস সাহাবা ইবনে হাজার আসকালানীঃ ৮ম খণ্ড, পৃঃ ১১৮) মেযাজ ছিল শাণিত। হযরত আয়েশার সীমাহীন প্রশংসাকারী ছিলেন, কিন্তু হযরত আয়েশা (রাযিঃ) বলতেন, হযরত সাওদা খুবই দ্রুত রাগে জ্বলে ওঠতেন। একবার প্রকৃতির ডাকে সাড়া দেওয়ার জন্য ময়দানে যাচ্ছিলেন, রাস্তায় হযরত ওমর (রাযিঃ)-এর সঙ্গে দেখা হয়ে গেল। যেহেতু হযরত সাওদা (রাযিঃ) উন্নতকায় ছিলেন, তাই হযরত ওমর (রাযিঃ) চিনে ফেললেন। হযরত ওমর (রাযিঃ) পবিত্র পত্নীদের বাইরে বের হওয়া অপছন্দ করতেন। আর এর আগে তিনি মহানবী সাল্লাল্লাহু আলাইহি ওয়াসাল্লামের কাছে পর্দার আন্দোলন করেছিলেন : স্বভাবি রকমে বললেন, সাওদা তোমাকে আমি চিনে ফেলেছি। সাওদা (রাযিঃ)-এর তা খুবই খারাপ লাগল। নবীজীর কাছে গিয়ে হযরত ওমরের বিরুদ্ধে নালিশ করলেন। এই ঘটনার পর পর্দার আয়াত অবতীর্ণ হয়।

(আল-ইসাৰা ইবনে হাজার আসকালানী : পৃঃ ৬৫)

আবার পাশাপাশি রসিকতাও এরকম ছিল যে, কখনো কখনো এমন আচরণ করতেন যে, মহানবী সাল্লাল্লাহু আলাইহি ওয়াসাল্লাম হেসে ফেলতেন। একবার নবীজী সাল্লাল্লাহু আলাইহি ওয়াসাল্লামকে বললেন, গত রাতে আমি আপনাদের সাথে নামায পড়েছিলাম। আপনি এত দীর্ঘ সময় ধরে রুকু করছিলেন যে, আমার নাক দিয়ে পানি পড়ার উপক্রম হয়েছিল। এ জন্য আমি অনৈক্ষণ নাক ধরে রেখেছিলাম। মহানবী সাল্লাল্লাহু আলাইহি ওয়াসাল্লাম এ কথা শুনে স্মিত হেসে ওঠলেন।

(সহীহ বুখারী ও সহীহ মুসলিম : বিবাহ অধ্যায়)

দাজ্জালকে খুব ভয় করতেন। একবার হযরত আয়েশা (রাযিঃ) এবং হাফসা (রাযিঃ)-এর কাছে আসছিলেন। দুই জনে রসিকতার করে বললেন, তুমি কিছু শুনেছ? তিনি বললেন, কী? তাঁরা বললেন, দাজ্জাল বেরিয়েছে। হযরত সাওদা (রাযিঃ) এটি শুনে ভয় পেয়ে গেলেন। একটি তাবুতে যেখানে কয়েকজন লোক আগুন জ্বালাচ্ছিল, তখনই তাতে ঢুকে গেলেন। হযরত আয়েশা এবং হাফসা (রাযিঃ) হাসতে হাসতে নবীজীর কাছে গেলেন এবং তাকে এই পরিহাসের কথা বললেন। মহানবী সাল্লাল্লাহু আলাইহি ওয়াসাল্লাম সেই তাবুর দরজায় এসে বললেন, এখনো দাজ্জাল বের হয়নি। শুনে সাওদা (রাযিঃ) বেরিয়ে আসেন। মকড়ষার জাল শরীরে লেগেছিল, বাইরে এসে তা পরিস্কার করলেন।

(আল-ইসাৰা ইবনে হাজার আসকালানী : ৮ম খণ্ড-পৃঃ ৬৫)

আমার বিবেচনায় এই হাদীছ সন্দেহযুক্ত এবং বর্ণনা পরম্পরার দিক থেকে দুর্বল।

হযরত আয়েশা (রাযিঃ)

আয়েশা নাম; সিদ্দিকা এবং হোমায়রা ছিল উপাধি; উপনাম ছিল উম্মে আব্দুল্লাহ; হযরত আবু বকর (রাযিঃ)-এর কন্যা। মাতার নাম ছিলঃ যয়নব, উপনামঃ উম্মে রুমান এবং তিনি ছিলেন গনম বিন মালিক- গোত্রের রমণী।

হযরত আয়েশা (রাযিঃ) মহানবীর সাল্লাল্লাহু আলাইহি ওয়াসাল্লাম নবুয়্যত প্রাপ্তির চার বছর পর শাওয়াল মাসে জন্মগ্রহণ করেন। আবু বকর সিদ্দিকের গৃহে সেই সৌভাগ্যের মিনার ছিল, যেখানে সূর্যপ্রতিম ইসলামের কিরণগুচ্ছ সর্বপ্রথম আলোসম্পাত করেছিল। এই সূত্রে হযরত আয়েশা (রাযিঃ) ইসলামের সেইসব মহোত্তম ব্যক্তিবর্গের অন্তর্গত, যাদের কান কখনো অধর্ম ও অবিশ্বাসের আওয়াজ শ্রবণ করেনি। হযরত আয়েশা নিজেই বলেনঃ যখন থেকেই আমি আমার পিতামাতাকে চিনতে পারি, তাঁদেরকে মুসলমান হিসেবেই আবিষ্কার করি। (বুখারী শরীফ : প্রথম খণ্ড পৃঃ ২৫২)

হযরত আয়েশাকে ওয়ায়েলের স্ত্রী দুধ পান করান। ওয়ায়েলের উপনাম ছিল আবুল ফকিয়স। ওয়ায়েলের ভাই আফলাহ (হযরত আয়েশার দুধ-চাচা) কখনো তাঁর সাথে সাক্ষাৎ করতে আসতেন এবং মহানবীর অনুমতিক্রমে তিনি তাঁর সামনে আসতেন, দুধ-ভাই কখনো কখনো সাক্ষাৎ করতে আসত। (বুখারী শরীফ : প্রথম খণ্ড পৃঃ ৩৬১)

বিবাহ : সমস্ত পবিত্র পত্নীর মধ্যে এই বিশিষ্টতা কেবল আয়েশার যে, তিনি রাসূলুল্লাহ সাল্লাল্লাহু আলাইহি ওয়াসাল্লাম-এর কুমারী স্ত্রী ছিলেন। মহানবীর পূর্বে জুবাইর ইবনে মুতইমের সঙ্গে তাঁর বিয়ের কথা চলে; কিন্তু হযরত খাদীজার মৃত্যুর পরে নবীজীর অনুমতিক্রমে খাওলা বিনতে হাকিম যখন উম্মে রুমানের সঙ্গে কথা বললেন এবং উম্মে রুমান আবু বকরের কাছে তা উল্লেখ করলেন। (যেহেতু একরকম প্রতিশ্রুতি-ভঙ্গের ব্যাপার ছিল) কাজেই আবু বকর (রাযিঃ) বললেন, আমি তো আয়েশার বিবাহের ব্যাপারে জুবাইর ইবনে মুতইমের সঙ্গে ওয়াদা করে ফেলেছি- অবশ্য মুতইম নিজেই এই বলে বিয়ের প্রস্তাব নাকচ করে দিলেন যে, হযরত আয়েশা ঘরে এলে ইসলামও অনুপ্রবেশ করবে। যাই হোক, হযরত আবু বকর (রাযিঃ) খাওলার মাধ্যমে রাসূলুল্লাহ সাল্লাল্লাহু আলাইহি ওয়াসাল্লাম-এর সাথে আয়েশা (রাযিঃ)-এর আকদ করিয়ে দেন। পাঁচশো দিরহাম মোহর নির্ধারিত হয়। এটি নববী দশম সনের ঘটনা। এই সময় হযরত আয়েশা (রাযিঃ)-এর বয়স ছিল ছয় বছর।

এই বিবাহ ইসলামের আড়ম্বরহীনতার জাজ্বল্যমান ছবি ছিল। আতিয়া (রাযিঃ) এই ঘটনাকে এভাবে বর্ণনা করেনঃ হযরত আয়েশা (রাযিঃ) ছোট ছোট মেয়েদের সঙ্গে খেলছিলেন। তাঁর দুধ দাত্রী এসে তাঁকে নিয়ে গেল- হযরত আবু বকর এসে বিয়ে পড়িয়ে দিলেন। হযরত আয়েশা (রাযিঃ) নিজেই বললেনঃ যখন আমার বিয়ে হল, আমি তা অনুধাবনও করতে পারিনি। যখন আমার আম্মাজান বাইরে বেরোনো নিয়ে

বাধাবাধি শুরু করলেন কেবল তখনি আমি বিয়ের কথা বুঝলাম, এর পরে অবশ্য আম্মা আমাকে বুঝিয়েও দিলেন। (ভাবকাত-ই-ইবনে সা'আদ মুহাম্মাদ ইবনে সা'আদ : অষ্টম খণ্ড- পৃঃ ৪০) বিবাহের পর মহানবী সাল্লাল্লাহু আলাইহি ওয়াসাল্লাম মক্কায় অবস্থান করেছিলেন তিন বছর। নববী তের সনে মহানবী সাল্লাল্লাহু আলাইহি ওয়াসাল্লাম যখন হিজরত করলেন, তখন আবু বকর (রাযিঃ) তাঁর সঙ্গে ছিলেন এবং পরিবার-পরিজনকে দূশমনদের হাতে ছেড়ে এসেছিলেন। মদীনায় যখন সুস্থ ও আশ্বস্ত হলেন, হযরত আবু বকর (রাযিঃ) আব্দুল্লাহ বিন আরিকতকে পাঠালেন উম্মে রুমান (রাযিঃ), আসমা (রাযিঃ) এবং আয়েশা (রাযিঃ)কে নিয়ে আসার জন্যে। মদীনায় এসে হযরত আয়েশা (রাযিঃ) কঠিন জ্বরে আক্রান্ত হলেন। অসুখ এত বেশী হয়েছিল যে, মাথার চুল ঝরে গিয়েছিল।

(সহীহ বুখারী, হিজরত অধ্যায়)

তিনি সুস্থ হবার পর উম্মে রুমান, বিবাহ উদযাপন-প্রথার কথা চিন্তা করলেন। আয়েশার বয়স তখন দশ। বান্ধবীদের সঙ্গে চতুর্দোলায় খেলছিলেন। এ সময় উম্মে রুমান তাকে ডাক দিলেন। এই ঘটনার খবর পর্যন্ত তার ছিল না, মার কাছে এলেন, তিনি তাকে মুখ ধুইয়ে চুল ঠিক করে দিয়ে ঘরে নিয়ে গেলেন— আনসারী রমণীকুল অপেক্ষমান ছিল— আয়েশা (রাযিঃ) গৃহে প্রবেশ করতেই তারা মুবারকবাদ জানাল। কিছু সময় পর মহানবী সাল্লাল্লাহু আলাইহি ওয়াসাল্লামও উপস্থিত হলেন। (সহীহ বুখারী, আয়েশার বিবাহ প্রসঙ্গ) শাওয়াল মাসে বিয়ে হয়েছিল, শাওয়াল মাসেই এই উদযাপন সম্পন্ন হয়। হযরত আয়েশা (রাযিঃ)-এর বিয়ে থেকে আরবের কিছু নিরর্থ অপধারণার সংস্কার সাধিত হয়। আরবরা মৌখিক-কথিত ভাইয়ের মেয়ের সঙ্গে বিয়ের সম্পর্ক করত না ফলে যখন হযরত খাওলা (রাযিঃ) হযরত আবু বকরের (রাযিঃ) কাছে মহানবীর আগ্রহের কথা অভিব্যক্ত করলে, তিনি বিস্মিত হয়ে জিজ্ঞেস করলেনঃ ‘এটি বৈধ হবে? আয়েশা তো রাসূলুল্লাহ সাল্লাল্লাহু আলাইহি ওয়াসাল্লাম-এর ভাইঝি’ কিন্তু মহানবী সাল্লাল্লাহু আলাইহি ওয়াসাল্লাম বললেনঃ তুমি তো কেবল আমার ইসলামী ভ্রাতা।

আরেকটি প্রথা ছিল এরকমঃ আরবরা শাওয়াল মাসে বিবাহ করত না, কারণ প্রাচীনকালে এই মাসে প্লেগের প্রাদুর্ভাব ঘটেছিল। কিন্তু হযরত আয়েশার বিবাহ এবং সালামী (বধু-প্রত্যাবর্তন) দু'টোই এই মাসে হয়েছিল।

সাধারণ অবস্থা : যুদ্ধ-বিগ্রহের মধ্যে কেবল ওহোদ-যুদ্ধে তার অংশগ্রহণের কথা জানা যায়। বুখারী শরীফে হযরত আনাস থেকে উদ্ধৃতঃ আমি হযরত আয়েশা (রাযিঃ) এবং উম্মে সুলাইমকে দেখেছি যে, তারা মশক ভরে ভরে পানি এনে আহতদের পান কর করাতেন।

(সহীহ বুখারীঃ দ্বিতীয় খণ্ড পৃঃ ৫৮১)

মুসতালাক যুদ্ধে (এটি ৫ম হিজরীর ঘটনা) হযরত আয়েশা (রাযিঃ) মহানবীর সাথে ছিলেন। যুদ্ধ- থেকে প্রত্যাবর্তনের সময় তার হার কোথায় জানি পড়ে গেল। পুরো কাফেলাকে থামতে হল। নামাযের সময় হলে পানি পাওয়া গেল না। সমস্ত সাহাবী বিরক্ত ছিলেন। মহানবী সাল্লাল্লাহু আলাইহি ওয়াসাল্লাম জানতে পারলেন এবং

তয়শুমের (মাটি দিয়ে অজু) আয়াত অবতীর্ণ হল। এই বিধানে সমস্ত লোক খুশি হল।
উসাইদ বিন হুযাইর (রাযিঃ) বললেনঃ ‘হে আবু বকরের আত্মীয়জনরা! তোমাদের
জন্মে ঐশ্বর্যের বরকত হোক।’

এই যুদ্ধে ইফক-এর ঘটনা ঘটে; অর্থাৎ মুনাফিকরা হযরত আয়েশাকে অপবাদ দিল।
হাদীছের কিতাবসমূহ এবং ইতিহাসের গ্রন্থাবলীতে এই ঘটনা খুবই বিস্তৃতভাবে
উৎকলিত হয়েছে। কিন্তু যেই ঘটনা সম্পর্কে কুরআনুল কারীমেই পরিষ্কার উল্লিখিত
হয়েছে যে, এই ঘটনা শোনার সাথে সাথে কেন লোকেরা বলে দিল না। ‘পুরোপুরি
মিথ্যা’ সেই ঘটনা বিস্তৃত বর্ণনা করবার কোন প্রয়োজন নেই।

নবম হিজরীতে তাহরীম, ই’লা এবং তখয়ির-এর ঘটনা ঘটে। তাহরীমের ঘটনা
হযরত হাফসা (রাযিঃ)-এর জীবনী অংশে আসবে অবশ্য ই’লার ঘটনা বিস্তৃতভাবে
নিম্নে উপস্থাপিত হচ্ছে।

মহানবী সাল্লাল্লাহু আলাইহি ওয়াসাল্লাম নিরাভরণ-বৈরাগ্যস্পর্শী-সংযমী জীবন যাপন
করতেন। দু’দু’টো মাস ঘরে আগুন জ্বলতনা, ক্ষুধার্ত দিন কাটতে থাকত। পবিত্র
পত্নীরা যদিও মহানবীর সান্নিধ্যের সৌভাগ্যে অন্য-মানুষ থেকে বিশিষ্ট হয়ে
গিয়েছিলেন, কিন্তু তবু মানুষ্য প্রবণতা পুরো বিলুপ্ত হবার নয়। বিশেষ করে তারা
দেখতেন যে, ইসলামের বিজিত এলাকা ক্রমাগত বিস্তৃত হচ্ছে এবং সেই বিজয়ের
সূত্রে ঐশ্বর্য ও প্রাচুর্যের পরিমাণ এত বেড়ে গিয়েছিল যে, তার সামান্য অংশও তাদের
আরাম-আয়েশের জন্যে যথেষ্ট হত এবং এইসব ঘটনা সূত্রে স্বভাবীরকমে তাদের
ধৈর্য্য ও সংযমের পেয়ালা পূর্ণ হতে পারত।

একবার হযরত আবু বকর (রাযিঃ) ও হযরত ওমর (রাযিঃ) নবীজীর কাছে উপস্থিত
হলেন, দেখলেন : এদিক ওদিক তাঁর স্ত্রীরা বসে আছে। মাঝখানে তিনি এবং খরচপত্র
বাড়ানোর কথা স্ত্রীরা উচ্চারণ করছে। দু’জনেই তাঁদের মেয়েদেরকে সতর্ক করবার
জন্যে অগ্রসর হল। সঙ্গে সঙ্গে তাঁরা বললেনঃ আমরা আগামীতে আর নবীজীকে
অতিরিক্ত খরচের জন্য কষ্ট দেব না- কিন্তু বাকী স্ত্রীরা নিজেদের দাবীর উপর স্থির
থাকলেন। মহানবীর প্রশান্ত চিত্তে এই বিষয়টি এতই বেদনাসঞ্চারী হল যে, তিনি
অঙ্গীকার করে ফেললেন, একমাস আর তিনি স্ত্রীদের সঙ্গে একত্রিত হবেন না।
ঘটনাক্রমে তিনি সেই সময়কালেই ঘোড়া থেকে পড়ে গিয়েছিলেন এবং তাঁর পা আহত
হয়েছিল এবং তিনি উপরের একটি ঘরে একাকী অবস্থান গ্রহণ করল। ঘটনার
কার্যকারণ সূত্রে লোকেরা মহানবী সাল্লাল্লাহু আলাইহি ওয়াসাল্লামকে জিজ্ঞাসা করলেন,
তিনি স্ত্রীদের তালাক দিয়েছেন কিনা। তখন মহানবী সাল্লাল্লাহু আলাইহি ওয়াসাল্লাম
বললেনঃ না। এটি শুনে হযরত ওমর (রাযিঃ) আল্লাহু আকবার বলে উঠলেন।

যখন ই’লার সময়কাল বিগত হল, (অর্থাৎ একমাস) তিনি সেই ঘর থেকে নেমে এলেন।
সর্বপ্রথমে হযরত আয়েশা (রাযিঃ)-এর কাছে গেলেন। তিনি একটি একটি করে দিন
গুণছিলেন। বললেনঃ হে আল্লাহর রাসূল! আপনি তো একমাসের জন্যে অঙ্গীকার
করেছিলেন, এখন তো উনত্রিশ দিন হল, তিনি বললেনঃ মাস কখনো উনত্রিশ দিনেও হয়।

এরপর তখয়ীরের আয়াত অবতীর্ণ হল। সেই আয়াতের সূত্রে মহানবী সাল্লাল্লাহু আলাইহি ওয়াসাল্লামকে নির্দেশ দেওয়া হল যে, পবিত্র পত্নীদেরকে অবহিত করুনঃ দু’টো জিনিস তোমাদের জন্য খোলা-পৃথিবী ও পরলোক। যদি পৃথিবী তোমাদের প্রত্যাশিত হয়, তাহলে এসো, তোমাদেরকে প্রত্যাবর্তনের উপকরণরাজি দিয়ে যথাবিহিত সম্মান ও মর্যাদার সঙ্গে বিদায় জানিয়ে দেই, আর যদি তোমরা আল্লাহ ও আল্লাহর রাসূল এবং চিরায়ত আরামের আকাংক্ষী হও, তাহলে আল্লাহ তা’আলা পৃণ্যবানদের জন্যে বড় পুরস্কারের ব্যবস্থা করে রেখেছেন। যেহেতু হযরত আয়েশাহ ছিল এই সব ব্যাপারে পুরোভাগে, তাই রাসূলুল্লাহ সাল্লাল্লাহু আলাইহি ওয়াসাল্লাম তাকে আল্লাহর বাণী বিষয়ে অবহিত করলেন। আয়েশা (রাযিঃ) বললঃ আমি সবকিছু ছেড়ে আল্লাহ এবং তাঁর রাসূলকে গ্রহণ করছি।’ অন্যান্য স্ত্রীরাও একই উত্তর দিলেন।

(সহীহ বুখারী : দ্বিতীয় খণ্ড পৃঃ ২/ সহীহ মুসলিম-বাবুল ই’লা)

১১ হিজরীর রবিউল আউয়াল মাসে মহানবী সাল্লাল্লাহু আলাইহি ওয়াসাল্লাম ইন্তেকাল করেন। তের দিন অসুস্থ থাকেন, যার মধ্যে আট দিন আয়েশা (রাযিঃ)-এর ঘরে অবস্থান করেন। বিনম্র স্বভাবের কারণে স্ত্রীদের কাছ থেকে পরিষ্কার করে অনুমতিও চাননি, কেবল জিজ্ঞেস করলেনঃ ‘কাল আমি কার ঘরে থাকব। দ্বিতীয়দিন (সোমবার) আয়েশার ঘরে থাকবার কথা, পবিত্র পত্নীরা মহানবীর মর্জি বুঝে বললেন আপনার যেখানে ইচ্ছে হয় থাকুন। দুর্বলতা তাঁর এত বেড়ে গিয়েছিল যে চলবার সামর্থ্যও ছিল না, হযরত আলী (রাযিঃ) এবং হযরত আব্বাস (রাযিঃ) দু’জনে তাঁর হাত ধরে খুব কষ্ট করে আয়েশা (রাযিঃ)-এর ঘরে নিয়ে আসেন।

ইন্তেকালের পাঁচদিন পূর্বে শুক্রবারে তাঁর মনে এল, আয়েশার কাছে তিনি কিছু আশরাফি রেখেছিলেন; বললেন, হে আয়েশা! ওগুলো কোথায়? মুহাম্মাদ কি আল্লাহর সামনে খারাপ ধারণা নিয়ে মিলিত হবে! আল্লাহর পথে সেগুলো খরচ করে দাও।

(মুসনাদে আহমদ ইবনে হাম্বল : ষষ্ঠ খণ্ড পৃঃ ৯)

যেদিন তাঁর মৃত্যু হল (অর্থাৎ সোমবার) আপাত প্রশান্ত ছিল, কিন্তু দিন যখন বাড়তে লাগলো, তিনি সংজ্ঞাহীন হয়ে পড়তেন।

হযরত আয়েশা (রাযিঃ) বলেনঃ নবীজী সুস্থাবস্থায় বলতেনঃ নবীদেরকে অধিকার দেয়া হয় যে, তারা পৃথিবীকে গ্রহণ করতে পারেন অথবা মৃত্যুকে গ্রহণ করতে পারেন। এই অবস্থায় (অর্থাৎ যখন তিনি অসুস্থ শয্যায় কেবলি বেতুঁশ হয়ে যাচ্ছিলেন) তাঁর কণ্ঠ কেবলি উচ্চারণ করত এইসব শব্দমালাঃ ‘মা’আল-লাজিনা আনআমাল্লাহু আলাইহিম’ (অর্থাৎ তাঁদের সাথে যাদেরকে অনুগ্রহ করেছেন আল্লাহ) এবং কখনো বলতেনঃ ‘আল্লাহুমা ফির রফীকিল আ’লা’ (অর্থাৎ হে আল্লাহ! প্রধান বন্ধুর কাছে) আয়েশা (রাযিঃ) বুঝে গিয়েছিলেন কেবল আল্লাহর বন্ধুত্ব প্রত্যাশিত।

ইন্তেকালের কিছু পূর্বে হযরত আবু বকরের ছেলে আবদুর রহমান (রাযিঃ) মহানবীর কাছে এলেন, মহানবী সাল্লাল্লাহু আলাইহি ওয়াসাল্লাম তখন হযরত আয়েশা (রাযিঃ)-

এর বুকের উপর মাথা ঠেস দিয়ে শুয়েছিলেন। আবদুর রহমানের হাতে মিসওয়াক ছিল, মিসওয়াকের দিকে গভীর ভাবে তাকালেন, আয়েশা (রাযিঃ) বুঝলেন তিনি করতে চান। আবদুর রহমান থেকে মিসওয়াক নিয়ে দাঁত দিয়ে নরম করলেন এবং নবীজীকে দিলেন— মহানবী সাল্লাল্লাহু আলাইহি ওয়াসাল্লাম একেবারে সুস্থ মানুষের মত মিসওয়াক করল। আয়েশা (রাযিঃ) গর্ব করে বলতেনঃ সমস্ত স্ত্রীর মধ্যে এই সৌভাগ্য কেবল আমারই যে, শেষ সময়েও নবীজী আমার ব্যবহার করা জিনিস মুখে নিয়েছেন।

এখন মৃত্যুর সময় এগিয়ে আসছিল। হযরত আয়েশা (রাযিঃ) তাঁকে শান্ত রাখতে বসেছিলেন, হঠাৎ শরীরে ওজন অনুভূত হল। দেখলেন যখন চক্ষু বুজে এসেছে এবং রূহ পবিত্রলোকে উড়ে চলে গেছে। হযরত আয়েশা (রাযিঃ) আন্তে করে মহানবীর মাথা বালিশের উপর রেখে দিলেন এবং কাঁদতে লাগলেন।

হযরত আয়েশা (রাযিঃ)-এর জীবন গৌরবের সবচেয়ে বড় গৌরব এই যে, তাঁর গৃহই মহানবী সাল্লাল্লাহু আলাইহি ওয়াসাল্লাম-এর সমাধিস্থান হওয়ার সৌভাগ্য অর্জন করেছে। মহানবীর মরদেহ মোবারক সেই গৃহেরই এক কোণায় সমাহিত করা হয়। যেহেতু মহানবীর পত্নীদের জন্যে আল্লাহ তা'আলা দ্বিতীয় বিবাহ নিষিদ্ধ ঘোষণা করেছেন, সেজন্যে হযরত আয়েশা (রাযিঃ) নবীজীর মৃত্যুভোর দীর্ঘ আটচল্লিশটি বছর বৈধব্য জীবন অতিবাহিত করেন। এই সময় পরিসরে হযরত আয়েশা (রাযিঃ)-এর জীবনের একমাত্র লক্ষ্য ছিল কুরআনুল কারীম এবং হাদীছ শরীফের শিক্ষাদান করা, পরবর্তীতে এ বিষয়টি আলোচিত হবে।

মহানবীর মৃত্যুর দু'বছর পর হযরত আবু বকর ইন্তেকাল করেন (১৩ হিঃ)। আর সেই মৃত্যুর মধ্যে দিয়ে হযরত আয়েশা (রাযিঃ)-এর সর্বশেষ স্নেহচ্ছায়াও অন্তর্হিত হল।

হযরত আবু বকর (রাযিঃ)-এর পর খলীফা হল হযরত ওমর (রাযিঃ)। হযরত ওমর (রাযিঃ) হযরত আয়েশা (রাযিঃ)-এর ব্যাপারে যে রকম আন্তরিকতা প্রদর্শন করেছেন তার বর্ণনা আয়েশা (রাযিঃ) নিজেই করেছেন এভাবেঃ খাতাবের ছেলে ওমর (রাযিঃ) মহানবীর পরে আমার প্রতি সর্বাধিক মমতাপূর্ণ কৃপা করেছেন।

(মুসতাদরাকে হাকিমঃ ৪র্থ খণ্ড- পৃঃ ৮)

হযরত ওমর (রাযিঃ) মহানবী সাল্লাল্লাহু আলাইহি ওয়াসাল্লাম-এর পবিত্রপত্নীদের জন্যে দশ হাজার দিরহাম করে বার্ষিক ভাতার ব্যবস্থা করেছিলেন, কিন্তু হযরত আয়েশা (রাযিঃ)-এর ভাতা তিনি বার হাজার নির্ধারণ করেন। কারণ আয়েশা (রাযিঃ) ছিলেন মহানবীর সবচেয়ে প্রিয়তমা।

(মুসতাদরাক হাকিমঃ ৪র্থ খণ্ড)

হযরত উসমান (রাযিঃ)-এর শাহাদাতের ঘটনার সময় হযরত আয়েশা (রাযিঃ) মক্কার অবস্থান করছিলেন; হযরত তালহা (রাযিঃ) এবং হযরত জুবাইর (রাযিঃ) মদীনা থেকে গিয়ে তাঁকে ঘটনা প্রবাহ সম্পর্কে অবহিত করেন। সংস্কারের উদ্দেশ্যে আয়েশা (রাযিঃ) তখন বসরা গমন করেন। বসরায় হযরত আলী (রাযিঃ)-এর সাথে তাঁর যুদ্ধ হয়। ইতিহাসে যা 'জনগে জামাল' বা উটের যুদ্ধ নামে প্রসিদ্ধ। 'জমল' হচ্ছে 'উট'

যেহেতু আয়েশা (রাযিঃ) একটি উটের উপর সওয়ার ছিলেন এবং সেই উট, যুদ্ধে অনেক গুরুত্ব অর্জন করেছিল। সেজন্যে (হযরত আলীর সাথে সংঘটিত) এই যুদ্ধকে 'জনগে জামাল' বা উটের যুদ্ধ' হিসেবে অভিহিত করা হয়েছে। এই যুদ্ধ যদিও আকস্মিকভাবে উপস্থিত হয়েছিল, তবুও আয়েশা (রাযিঃ) এই যুদ্ধের জন্যে সারা জীবন আফসোস করতেন।

বুখারী শরীফের বর্ণনায় আছে, আয়েশা (রাযিঃ) মৃত্যুর পূর্বে বলে গিয়েছিলেনঃ আমাকে মহানবীর কবরের পাশে সমাধিস্থ করো না, বরং জান্নাতুল বাকী কবরস্থানে অন্যান্য স্ত্রীদের সাথে সমাহিত করবে। কেননা আমি মহানবীর মৃত্যুর পর একটি অপরাধ করেছি। (মুসতাদরকি হাকিমঃ

৪র্থ খণ্ড)

'তাবকাত-ই-ইবনে সা'আদ' গ্রন্থে আছে যখন তিনি (আয়েশা) এই আয়াতটি পড়তেন 'অর্থাৎ নবীপত্নীগণ! নিজেদের গৃহে সম্মানের সঙ্গে অবস্থান কর' তখন এত বেশী কাঁদতেন যে আঁচল ভিজে যেত। (তাবকাত-ই-ইবনে সা'আদঃ দ্বিতীয় খণ্ড)

হযরত আলী (রাযিঃ)-এর মৃত্যুর পর হযরত আয়েশা (রাযিঃ) আঠারো বছর আরো জীবিত ছিলেন, সেই বছরগুলো তাঁর স্থিত নৈঃশব্দ্যে কাটে।

ইত্তেকাল : আমীরে মুয়াবিয়া (রাযিঃ)-এর শাসনকালের উপাত্ত পর্যায়ে ৫৮ হিজরীতে হযরত আয়েশা (রাযিঃ) পরলোক গমন করেন। এই সময় তাঁর বয়স ছিল ৬৬ বছর। তাঁর কথা মত জান্নাতুল বাকীতে রাত্রিকালে দাফন করা হয়। কাসিম বিন মুহাম্মদ, আবদুল্লাহ বিন জুবাইর তাঁর শবদেহ কবরে নামান। এই সময় আবু হোরাযরা (রাযিঃ) মরওয়ান বিন হেকাম-এর পক্ষ থেকে মদীনার প্রশাসক ছিলেন, তিনিই সেজন্যে তাঁর নামায়ে জানাযা পড়ান।

সন্তান-সন্ততি : হযরত আয়েশা (রাযিঃ)-এর কোন সন্তান হয়নি। মনীষী ইবনুল আরাবী লিখেছেনঃ একটি অসম্পূর্ণ বাচ্চা ভূশিষ্ট হয়েছিল। তার নাম ছিলঃ আবদুল্লাহ এবং তারই নামে তিনি উপনাম রেখেছিল। কিন্তু এই কথাটি নিঃসন্দেহে ভ্রান্ত। হযরত আয়েশা (রাযিঃ) তাঁর উপনাম করেছিলেন উম্মে আবদুল্লাহ এবং সেটির সম্পর্ক তাঁর ভাগিনা আবদুল্লাহ বিন জুবাইরের সাথেই, যাকে তিনি তাঁর পুত্র করেছিলেন।

অবয়ন-সংগঠন : হযরত আয়েশা (রাযিঃ) সৌন্দর্যময়ী এবং রূপবতী ছিলেন, গৌরবর্ণের ছিলেন।

মহত্ত্ব ও মহিমা : বিদ্যা ও মনীষার দিক থেকে তিনি কেবল মহিলাদের মধ্যেই নয় অথবা কেবল অন্যবিধ স্ত্রীর মধ্যেই নয় অথবা কেবল বিশেষ বিশেষ সাহাবীর মধ্যেই নয় বরং কয়েকজন ব্যতিক্রম ছাড়া সমস্ত সাহাবীর মধ্যেই অনন্যা ছিল। তিরমিযী শরীফে হযরত আবু মূসা আশআরীর বর্ণনাঃ

ما اشكل علينا اصحاب محمد ﷺ حديث قط فسالنا عائشة الوجودنا عندها منه علما

অর্থাৎ ‘আমাদের কখনো এমন কোন অসুবিধায় পড়তে হয়নি, যা আমরা হযরত আয়েশা (রাযিঃ)-এর কাছে জিজ্ঞেস করেছি এবং তাঁর কাছ থেকে সে সম্পর্কে কোন জ্ঞানার্জন হয়নি (অর্থাৎ যে কোন অসুবিধার ক্ষেত্রেই তাঁর কাছ থেকে জ্ঞানমূলক সহযোগিতা পেতাম)।’

তাবেয়ীনের প্রতিভু ইমাম যুহরী বলেন :

كانت عائشة رضى الله عنها اعلم الناس يسئلهما الاكابر من اصحاب رسول الله ﷺ

অর্থাৎ ‘হযরত আয়েশা (রাযিঃ) সবার মধ্যে সবচেয়ে জ্ঞানী ছিলেন, বড় বড় বিশিষ্ট সাহাবীরা তাঁর কাছ থেকে জিজ্ঞেস করতেন।’

(তাবকাত-ই-ইবনে সা‘আদ-মুহাম্মাদ বিন সা‘আদঃ দ্বিতীয় খণ্ড পৃঃ ২৬)

উরওয়া বিন জুবাইর বলেন :

مارأيت احدا اعلم بالقران ولا بفريضة ولا بحلال ولا بفقه ولا بشعر ولا طب ولا بحديث العرب ولا نسب من عائشةؓ

অর্থাৎ ‘কুরআন, ফরয বিষয়াবলী, হালাল ও হারাম, ইসলামী আইন, কবিতা, চিকিৎসাবিদ্যা, আরব-ইতিহাস এবং বংশতত্ত্ব বিষয়ে হযরত আয়েশা (রাযিঃ)-এর চেয়ে বিদ্বান কাউকে আমি দেখিনি।’

ইমাম যুহরীর একটি সাক্ষ্য :

لو جمع علم الناس كلهم ثم علم ازواج النبی ﷺ فكانت عائشة وسعهم علما

অর্থাৎ ‘যদি সমস্ত পুরুষের এবং অন্যান্য নবীপত্নীদের জ্ঞান এক জায়গায় একত্র করা হয়, হযরত আয়েশা (রাযিঃ)-এর জ্ঞান বিস্তৃততর হবে।’

হযরত আয়েশা (রাযিঃ)-এর স্থান মুজতাহিদ সাহাবীদের মধ্যে গণ্য করা হয় এবং এই দিক থেকে (ইজতিহাদ ও গবেষণা) তিনি এত বিশিষ্ট যে, তাঁর নাম দ্বিধাহীনভাবে হযরত ওমর (রাযিঃ), হযরত আলী (রাযিঃ), হযরত আবদুল্লাহ বিন মাসউদ (রাযিঃ) এবং হযরত আবদুল্লাহ বিন আব্বাসের (রাযিঃ) সঙ্গে উচ্চারণ করা যায়। হযরত আয়েশা (রাযিঃ) আবু বকর (রাযিঃ), হযরত ওমর (রাযিঃ) হযরত উসমান (রাযিঃ)-এর সময় বিভিন্ন বিষয়ে ফতোয়া দিতেন। হযরত আয়েশা (রাযিঃ) বড় বড় সাহাবীদের উপর যেসব জটিল প্রতিকূল বিবেচনা উপস্থিত করেছিল আল্লামা সুয়ুতী সে সব নিয়ে একটি পুস্তিকা প্রণয়ন করেছেন, তার নামঃ ‘আইনুল ইসাবা ফি মাসতাদারাকাতুল আয়েশাতু আলাস সাহাবা।’

হযরত আয়েশা (রাযিঃ) সেই সব সাহাবীর অন্তর্গত, যারা অধিক সংখ্যক হাদীছ বর্ণনা করে বিখ্যাত হয়েছেন। তাঁর নিকট থেকে দু'হাজার দু'শ দশটি হাদীছ (২,২১০) বর্ণিত, যার মধ্যে ১৭৪টি হাদীছ ইমাম মুসলিম ও ইমাম বুখারী দু'জনেই সমর্থন করেছেন। ইমাম বুখারী স্বতন্ত্রভাবে তাঁর নিকট থেকে ৫৪টি হাদীছ বর্ণনা করেছেন, ইমাম মুসলিম স্বতন্ত্রভাবে তাঁর কাছ থেকে ৬৮টি হাদীছ বর্ণনা করেছেন। কারো কারো অভিমতঃ ইসলামী শরীয়ত-সম্পর্কিত নির্দেশাবলীর এক চতুর্থাংশ তাঁর নিকট থেকে বর্ণিত।

তর্কশাস্ত্রের বিভিন্ন বিষয় তিনি আলোচনা করেছেন। যেমন আল্লাহ-দর্শন, অগম্য-জ্ঞান, নবীদের শুদ্ধতা, মিরাজ, খিলাফত বিন্যাস এবং মৃতদের শ্রবণ বিষয়ে তিনি যেসব ধারণা ও মতামত অভিব্যক্ত করেছেন, নিরপেক্ষ দৃষ্টিতে দেখলে তাঁর দৃষ্টির গভীরতা শ্রদ্ধেয় হতে বাধ্য।

দ্বীনী রহস্যাবলী সম্পর্কিত বিদ্যার ক্ষেত্রে তাঁর বহু বিবেচনা উদ্ধৃত আছে। যেমন কুরআনুল কারীমের অবতরণ-বিন্যাস, মদীনায় ইসলামের বিজয়ের কারণসমূহ, জুমুআর গোসল, সংক্ষিপ্ত-নামাযের কারণ, আশুরার রোযার কারণ ও হজ্জের স্বরূপ এবং হিজরতের তাৎপর্য বিষয়ে বিশেষ ব্যাখ্যা ও বক্তব্য উপস্থিত করেছেন।

চিকিৎসা বিষয়ে অন্যান্য সাধারণ বধূ-রমণীদের মত তাঁরও জ্ঞান ছিল, অবশ্য আরব-ইতিহাস বিষয়ে তাঁর সমকক্ষ বিদ্বান কেউ ছিল না। অন্ধকার যুগের আরব-অবস্থা, তাদের প্রথা ও পরম্পরা, তাদের বংশ বিদ্যা, তাদের সামাজিক জীবন বিষয়ে তিনি এমন কিছু কথা বলেছেন, যা অন্যত্র দুঃপ্রাপ্য। ইসলামের ইতিহাস সম্পর্কেও কিছু গুরুত্বপূর্ণ ঘটনা তাঁর থেকে বর্ণিত আছে। যেমন প্রারম্ভিক অহীর প্রকৃতি, হিজরতের ঘটনাবলী, ইফক-এর ঘটনায় কুরআন-অবতরণ এবং তার বিন্যাস, নামাযের প্যাটার্ন, মহানবীর মৃত্যুকালীন অসুস্থ অবস্থাসমূহ, বদর যুদ্ধ, ওহোদ যুদ্ধ, খন্দক যুদ্ধ, কুরাইজা গোত্রের ঘটনা, জাতুর রিকা-যুদ্ধের আতংকমূলক নামাযের প্রকৃতি, মক্কা-বিজয়ে মহিলাদের বাইঅত, বিদায় হজ্জের জরুরী ঘটনাবলী মহানবীর চরিত্র ও স্বভাব, আবু বকরের খিলাফত, হযরত ফাতেমা (রাযিঃ) এবং মহানবীর পবিত্র পত্নীদের দাবী-দাওয়া, উত্তরাধিকার, হযরত আলীর চিত্তবেদনা এবং পরেকার বাইআতের বিস্তৃত অনুপুংখ অবস্থা তাঁর মাধ্যমেই জানা গেছে।

সাহিত্য চেতনার দিক থেকে দেখা যায় তিনি খুবই সুকণ্ঠী এবং শিল্পিত ও মনোহর উচ্চারণের অধিকারী ছিলেন। তিরমিযী শরীফে হযরত মুসা বিন তালহার এই কথাটি উদ্ধৃত হয়েছে :

مارأيت أفصح من عائشة رضى الله عنها

অর্থাৎ, 'আমি আয়েশা (রাযিঃ)-এর চেয়ে বেশি মনোজ্ঞ উচ্চারণের অধিকারী কাউকে দেখিনি।'

যদিও হাদীছ বর্ণনার ক্ষেত্রে ভাবার্থক বর্ণনার প্রথা প্রচলিত আছে এবং হাদীছের শব্দাশ্রয়ী বর্ণনা কম এবং খুবই কম, তবুও হযরত আয়েশা (রাযিঃ) কর্তৃক ব্যবহৃত আসল শব্দসমূহ হাদীছ বর্ণনায় রক্ষিত থেকে গেছে, ফলে পুরো হাদীছের আত্মা উদ্ভাসিত হয়ে উঠেছে, যেমন অহীর সূচনা সম্পর্কে তাঁর একটি বর্ণনা :

فما رأى رويًا الا جانيب مثل فلق الصبح

অর্থাৎ, 'তিনি (মহানবী) যা স্বপ্ন দেখতেন, তা প্রদোষকালীন শ্বেতাভার মত উদ্ভাসিত হয়ে উঠতো।'

মহানবী সাল্লাল্লাহু আলাইহি ওয়াসাল্লাম-এর উপর যখন অহী অবতীর্ণ হত, তখন তাঁর কপালে ঘাম জমে উঠতো, সেই কথাটি হযরত আয়েশা (রাযিঃ) বলেছেন এভাবে :

مثل الجمان

অর্থাৎ, 'কপালের উপর মুক্তা কম্পমান হত।'

ইফক-এর ঘটনাকালীন সময়ে রাতে ঘুম হত না। তাঁর সেই কথাটি তিনি বলেছেন এভাবে :

ما اكتحل بنوم

অর্থাৎ, (তখন আমি) 'স্বপ্নের সুরমা লাগাইনি।'

সহীহ বুখারী শরীফে তাঁর মাধ্যমে উম্মে জুরাআ-র যে কাহিনীটি উল্লিখিত আছে, তাকে আরবী সাহিত্যের প্রাণ হিসেবে চিহ্নিত করা যায়; বহু লেখক-সাহিত্যিক সেই কাহিনীর বিস্তৃত ভাষ্য-টীকাভাষ্য রচনা করেছেন।

বক্তৃতায়ও তিনি হযরত আলী (রাযিঃ), হযরত ওমর (রাযিঃ) ছাড়া সমস্ত সাহাবীদের মধ্যে বিশিষ্ট ছিল। 'উটের যুদ্ধে' তিনি যে বক্তৃতা দেন, তা জোশ এবং জোরের দিক থেকে অসামান্যতা অর্জন করেছেন। একটি বক্তৃতায় তিনি বলেনঃ

'হে জনসাধারণ! চুপ থাক, চুপ থাক, তোমাদের উপর আমার মাতৃত্বের অধিকার আছে, উপদেশ- দেবার মর্যাদা আমার অর্জনে আছে, কিন্তু তাকে নয় (অর্থাৎ তাকে উপদেশ দেবার নয়) যে আল্লাহর অনুগত নয়। আমাকে তোমরা কোনো দোষ দিতে পার না, কারণ মহানবী সাল্লাল্লাহু আলাইহি ওয়াসাল্লাম আমার বুকের উপর মাথা রেখে মৃত্যুবরণ করেছিলেন এবং আমি তাঁর প্রিয়তম পত্নী ছিলাম; আল্লাহ তা'আলা আমাকে অন্যদের থেকে সবদিক দিয়ে সংরক্ষিত রেখেছেন এবং আমার সত্তার মধ্য দিয়ে মু'মিন ও মুনাফিকের মধ্যে পার্থক্য হয়েছে এবং আমার কারণেই আল্লাহ তা'আলা তোমাদের জন্য তয়স্মুমের (মৃত্তিকা-অযু) বিধান অবতীর্ণ করেছেন।

'আবার আমার আব্বাজান পৃথিবীর তৃতীয় মুসলমান এবং হেরা গুহায় তিনি দু'জনের দ্বিতীয় ছিলেন এবং প্রথম ব্যক্তি ছিলেন যিনি 'সিদ্দিক' বা 'সত্যবাদীতম' উপাধিতে সম্বোধিত হয়েছেন। মহানবী সাল্লাল্লাহু আলাইহি ওয়াসাল্লাম তাঁর উপর সন্তুষ্ট হয়ে এবং

তাকে খিলাফতে অভিষিক্ত করে মৃত্যুবরণ করেছেন। এরপর (অর্থাৎ হযরত আবু বকর (রাযিঃ) খলীফা হওয়ার পর) যখন দ্বীন-ইসলামের রশি লম্বা হয়ে কাত হয়ে থাকতো, তখনও আমার আব্বাই ছিলেন একমাত্র ব্যক্তি যিনি তাঁর দু'টো অগ্রভাগ ধরে ফেলেছিলেন, যিনি অবিশ্বাসী-চাতুর্যের দৌড় স্তব্ধ করে দিয়েছিলেন, যিনি পৌত্তলিক প্রত্যাভর্তনের ঝরণা-উৎস শুকিয়ে দিয়েছিলেন, যিনি ইহুদীদের অগ্নি প্রজ্জ্বলন নিভিয়ে দিয়েছিল; তোমরা তো তখন চোখ বন্ধ করে অবক্ষয়ের কারণ উদ্ধারের জন্যে প্রতীক্ষমান ছিলে এবং বিশৃঙ্খল চীৎকারের মধ্যে নূতন আওয়াজের সন্ধানী ছিলে, তিনি হৃদিকে সমান করে দিয়েছিল, কর্মহীনকে ঠিক করেছিল, পতনোন্মুখকে রক্ষা করেছিলেন, অন্তরের সমাহিত অসুখগুলো দূর করেছিল, যারা পানির পিপাসা নিবারণ করেছিল তাদেরকে একেবারে ঘর পর্যন্ত পৌঁছিয়ে দিয়েছিলেন, আর যারা তৃষিত ছিল তাদেরকে ঘাট পর্যন্ত নিয়ে এসেছিল এবং যে একবার পান করে নিয়েছিলেন তাকে দ্বিতীয়বার পান করিয়েছিলেন; যখন তিনি চতুর অবিশ্বাসীর কর্মকাণ্ড নিশ্চিহ্ন করে দিলেন এবং বিধর্মী মুশরিকের বিরুদ্ধে সংগ্রামের আগুন জ্বালিয়ে তুললেন এবং তোমাদের সামগ্রীর পুটলি রশি দিয়ে বেঁধে দিলেন, তখন আল্লাহ তাঁকে তুলে নিলেন....।

হ্যাঁ, আমি প্রশ্নের লক্ষ্যস্থলে পরিণত হয়েছি যে, কেন আমি বাহিনী নিয়ে বেরোলাম? এর মধ্যে আমার লক্ষ্য গোনাহ-সন্ধান এবং ফিতনা তালাশ নয়; যেটিকে আমি পদদলিত করতে চাই এবং যা কিছু আমি বলছি সবই সত্য ও ন্যায়ের বিষয়ে সতর্ক করবার জন্য এবং প্রমাণকে চূড়ান্ত করবার জন্য। (মুসতাদরাক হাকিমঃ চতুর্থ খণ্ড-পৃঃ ১৩) হযরত আয়েশা (রাযিঃ) যদিও কবিতা রচনা করতেন না, তবুও কবি-মানসের অধিকারী ছিলেন এবং এত চমৎকার কবিত্ব-সংবেদনার অধিকারী ছিলেন যে, আরবের অবিসংবাদিক কবি-প্রতিভা হাসসান বিন সাবিত তাঁর কাছে কবিতা শোনানোর জন্য উপস্থিত হতেন। ইমাম বুখারী 'আদাবুল মুফরাদ' গ্রন্থে লিখেছেনঃ কা'ব বিন মালিকের পুরো কাসিদা হযরত আয়েশা (রাযিঃ)-এর স্মৃতিতে ছিল, সেই কাসিদায় কম-বেশী চল্লিশটি কবিতা ছিল। কা'ব ছাড়াও অন্যান্য জাহেলী যুগের এবং ইসলামী যুগের অসংখ্য কবির অনেক কবিতা তাঁর মুখস্থ ছিল, যা তিনি উপযুক্ত জায়গায় আবৃত্তি করতেন, হাদীছ গ্রন্থেও সেসবের উল্লেখ আছে।

হযরত আয়েশা (রাযিঃ) যে নিজে কেবল এইসব জ্ঞানে শিক্ষিত ছিলেন তা নয়, তিনি অন্যদেরকে এই সব শিক্ষায় দক্ষ করে তুলতেন। যেমন তাঁর হাতে যারা প্রশিক্ষণ পেয়েছিল, যদিও তাঁদের সংখ্যা দু'শোর মত, তার মধ্যে তাঁর অধিকতর ঘনিষ্ঠ ও বিশিষ্ট কয়েকজনের নাম :

উরওয়া বিন জুবাইর, কাসেম বিন মুহাম্মদ, আবু সালমা বিন আবদুর রহমান, মসরুক, উমরা, সুফিয়া বিনতে শাইবা, আয়েশা বিনতে তাহলা।

চরিত্র ও স্বভাব : চরিত্রের দিক থেকেও হযরত আয়েশা (রাযিঃ) ছিলেন উঁচু স্তরের অধিকারী। খুবই সংযমী ছিলেন। বিজিত অঞ্চলের লুণ্ঠিত দ্রব্য থেকে দূরে থাকতেন। কৃপা ও করুণা কম গ্রহণ করতেন, যদিও আত্ম-প্রশংসা অপছন্দ করতেন। কিন্তু নিজের মত-মন্তব্যে অটলনিষ্ঠ ছিলেন। বীরত্ব ও সাহসিকতা তাঁর চরিত্র-ভূষণ ছিল। তাঁর সবচেয়ে বিশিষ্ট গুণ ছিল দানশীলতা ও উদারতা। আবদুল্লাহ বিন জুবাইর (রাযিঃ) বলতেনঃ আমি তাঁর চেয়ে দানশীল কাউকে দেখিনি। একবার আমীরে মুয়াবিয়া (রাযিঃ) তাঁর জন্যে এক লক্ষ দিরহাম পাঠান, কিন্তু সন্ধ্যা হতে হতে সব তিনি দান করে দেন এবং নিজের জন্যে কিছুই অবশিষ্ট রাখলেন না। ঘটনাক্রমে তিনি সেদিন রোযা রেখেছিলেন, কাজের মেয়ে বললঃ ইফতারের জন্যে তো কিছুই নেই, তিনি বললেনঃ আগে থেকে স্মরণ করিয়ে দিলে না কেন। (সহীহ বুখারীঃ বাবু মানাকিবে কুরাইশ) একবার তাঁর পালিত পুত্র আবদুল্লাহ বিন জুবাইর (রাযিঃ) তাঁর দানশীলতা থেকে ভয় পেয়ে গেল এবং বলল, এখন তাঁর হাত বন্ধ করা উচিত। হযরত আয়েশা (রাযিঃ) এটি শুনে খুবই রাগান্বিত হলেন এবং তাঁর সাথে কথা না বলার শপথ করলেন। বহুদিন পর্যন্ত আবদুল্লাহ বিন জুবাইর অনুতপ্ত ছিলেন এবং বড় কষ্টে তাঁর রাগ ঠাণ্ডা হয়।

(সহীহ বুখারী শরীফ)

খুবই পরহেযগার, নিবেদিত এবং ইবাদতপরায়ণ ছিলেন। চাশত-এর নামায সব সময়ই পড়তেন। তিনি বলতেনঃ আমার আকা যদি কবর থেকে উঠে আসে এবং আমাকে নিষেধ করে তবু আমি পড়বো। মহানবী সাল্লাল্লাহু আলাইহি ওয়াসল্লাম-এর সাথে রাতে উঠে তাহাজ্জুদের নামায পড়তেন এবং এই নামাযের ব্যাপারে এতই কঠোর ছিলেন যে, মহানবী সাল্লাল্লাহু আলাইহি ওয়াসল্লাম-এর মৃত্যুর পর যখনই এ নামায কোনদিন কাজা হয়ে যেত, তো ফজরের পূর্বে উঠে তা পড়ে নিতেন। রামাযান মাসে তারাবীহ নামাযের খুবই গুরুত্ব দিতেন। যকওয়ানের গোলাম ইমামতি করতেন, তিনি তার পেছনে পড়তেন।

অধিকাংশ সময় রোযা রাখতেন, হজ্জেরও কঠিন অনুগামী ছিলেন এবং প্রতিবছর হজ্জ করতেন। গোলামদের খুবই স্নেহ করতেন, তাদেরকে কিনে মুক্ত করে দিতেন। যে সব গোলাম তিনি মুক্ত করে দিয়েছিলেন তাদের সংখ্যা ছয়ষট্টি।

(শরহুল বলুগল মরাম : কিতাবুল ইত্ক)

হযরত হাফসা (রাযিঃ)

হাফসা হচ্ছে নাম। তিনি হযরত ওমর (রাযিঃ)-এর কন্যা ছিলেন। বংশক্রম এরকমঃ হাফসা বিনতে ওমর বিন খাত্তাব বিন নোফায়েল বিন আবদুল উজ্জা বিন বিরাহ বিন আবদুল্লাহ বিন কুরাত বিন রিয়াহ বিন আদি বিন লুই বিন ফিহর বিন মালিক। মাতার নাম হচ্ছেঃ যয়নব বিনতে মজউন। যিনি ছিল বিখ্যাত সাহাবী উসমান বিন মজউনের বোন, আর নিজেও তিনি সাহাবী ছিলেন। হযরত হাফসা (রাযিঃ) এবং হযরত আবদুল্লাহ বিন ওমর (রাযিঃ) এরা দু'জন প্রকৃত ভাই বোন। মহানবী সাল্লাল্লাহু আলাইহি ওয়াসল্লাম নবুয়্যত প্রাপ্তির পাঁচ বছর আগে হযরত হাফসা (রাযিঃ)-এর জন্ম হয়। সে সময় কুরাইশরা কাবা ঘর নির্মাণে ব্যস্ত ছিল।

বিবাহ : বনু সাহম বংশের খনিস বিন হুযাফার সঙ্গে তাঁর প্রথম বিবাহ হয়।

ইসলাম গ্রহণ : মা, বাবা এবং স্বামীর সঙ্গে ইসলাম গ্রহণ করেন।

হিজরত ও দ্বিতীয় বিবাহ : স্বামীর সঙ্গে মদীনায হিজরত করেন। বদর যুদ্ধে স্বামী খনিস (রাযিঃ) আহত হন এবং ফিরে এসে সেই জখমের কারণে শাহাদত বরণ করেন। স্বামীর মৃত্যুর পর নির্দিষ্ট সময়ের ইদ্দত অতিক্রান্ত হলে হযরত ওমর (রাযিঃ) হাফসার বিয়ের বিষয়ে চিন্তা করেন। সেই সময়ে হযরত রোকেয়া (রাযিঃ)-এর মৃত্যু হয়। সে কারণে হযরত ওমর (রাযিঃ) সর্বপ্রথম হযরত উসমান (রাযিঃ)-এর সঙ্গে সাক্ষাৎ করেন এবং তাঁর সঙ্গে বিয়ের বিষয়ে আগ্রহ প্রকাশ করেন। তিনি বললঃ আমি বিবেচনা করে দেখবো। কিছুদিন পরে দেখা হলে তিনি তাঁর অনাগ্রহের কথা পরিষ্কার ওমর (রাযিঃ)কে জানান। হযরত ওমর (রাযিঃ) নিরুপায় হয়ে আবু বকরকে জানান। তিনি নিঃশব্দ থাকেন। এই দুঃপাতহীনতায় ওমর (রাযিঃ) ব্যথিত হন। এরপর মহানবী সাল্লাল্লাহু আলাইহি ওয়াসল্লাম স্বয়ং হাফসা (রাযিঃ)-এর সঙ্গে বিয়ের আগ্রহ প্রকাশ করেন। বিবাহ হয়ে গেলে হযরত আবু বকর (রাযিঃ) হযরত ওমর (রাযিঃ)-এর সঙ্গে দেখা করেন এবং বলেনঃ যখন তুমি আমার সাথে হযরত হাফসা (রাযিঃ)-এর বিয়ের আগ্রহ প্রকাশ করলে এবং আমি নিঃশব্দ থাকলাম, তুমি খুবই বেদনাকার্ত হলে তাতে; কিন্তু আমি কোন উত্তর করিনি এ জন্যে যে, যেহেতু রাসূলুল্লাহ সাল্লাল্লাহু আলাইহি ওয়াসল্লাম তার কথা উল্লেখ করেছিলেন এবং আমি চাচ্ছিলাম না মহানবীর এই গোপন কথাটি প্রকাশ করতে। যদি নবীজী তাঁর সাথে বিয়ের ব্যাপারে আগ্রহ না থাকতো, আমি উৎসাহী ছিলাম। (সহীহ বুখারী : দ্বিতীয় খণ্ড পৃঃ ৫৭১/আল-ইসাবা : ৮ম খণ্ড পৃঃ ৫১)

মৃত্যু : হযরত হাফসা (রাযিঃ) পঁয়তাল্লিশ হিজরীর শাবান মাসে মদীনায মৃত্যুবরণ করেন-এটি আমীরে মুয়াবিয়া (রাযিঃ)-এর শাসনামলের শেষদিকের ঘটনা। সে সময়ের মদীনার গভর্ণর মারওয়ান তাঁর নামাযে জানাযা পড়ান এবং কিছুদূর পর্যন্ত কফিন কাঁধে নিয়ে যান। এরপর আবু হোরাযরা (রাযিঃ) জানাযা কবর পর্যন্ত নিয়ে

যান। হযরত হাফসা (রাযিঃ)-এর ভাই আবদুল্লাহ বিন ওমর (রাযিঃ) এবং তাঁর সন্তানরা আসেম, সালেম, আবদুল্লাহ এবং হামজা শবদেহ কবরের মধ্যে নামান।

হযরত হাফসা (রাযিঃ)-এর মৃত্যুসাল নিয়ে বিতর্ক আছে। একটি বর্ণনায় তিনি ৪১ হিজরীর জমাদিউল আউয়াল-এ মৃত্যুবরণ করেন। এই সময় তাঁর বয়স হয়েছিল ঊনষাট বছর। কিন্তু তাঁর মৃত্যুসাল যদি ৪৫ হিজরী বলা হয়, তাহলে তাঁর বয়স হয় বাষাট বছর। একটি বর্ণনায় তিনি হযরত উসমান (রাযিঃ)-এর খিলাফতের সময় ২৭ হিজরীতে মৃত্যুবরণ করেন। এই কথাটি এই সূত্র থেকে এসেছে যে, ওহাব ইবনে মালেকের থেকে নেয়া একটি বর্ণনায় বলেছেন, যে বছর আফ্রিকা বিজিত হয় সে বছরই হযরত হাফসা (রাযিঃ) মৃত্যুবরণ করেন। আর আফ্রিকা হযরত উসমানের শাসনামলে ২৭ হিজরীতে বিজিত হয়। কিন্তু এটি খুবই ভ্রান্ত কথা। আফ্রিকা দু'বার বিজিত হয়। এই দ্বিতীয় বিজয়ের গৌরব মুয়াবিয়া বিন খাদিজের, যিনি আমীরে মুয়াবিয়া (রাযিঃ)-এর সময় আফ্রিকা আক্রমণ করেন।

মৃত্যুর সময় হযরত হাফসা (রাযিঃ) হযরত আবদুল্লাহ বিন ওমর (রাযিঃ)কে ডেকে উপদেশ দেন এবং অরণ্যে হযরত ওমর (রাযিঃ) কর্তৃক প্রদত্ত তাঁর যে সম্পত্তি ছিল তা ওয়াকফ করে দেন।

(জুরকানী আলাল মাওয়াহিব : তৃতীয় খণ্ড-পৃঃ ২৭১)

সন্তান-সন্ততি : তাঁর কোন সন্তান হয়নি।

মহত্ব ও মহিমা : (কোন সন্তান রেখে যাননি বটে) কিন্তু অনেক পরোক্ষ স্মৃতি রেখে গিয়েছিল, আর সেগুলো হচ্ছে; হযরত আবদুল্লাহ বিন ওমর, হামযা বিন আবদুল্লাহ, সুফিয়া বিনতে আবু উবাইদ, হারেসা বিন ওহাব, মতলব বিন আবু দাদাআ, উম্মে মুবাশশার আনসারিয়া, আবদুল্লাহ বিন সাফওয়ান বিন উমাইয়া, আবদুর রহমান বিন হারেস বিন হিশাম।

(জুরকানী আলাল মাওয়াহিব : তৃতীয় খণ্ড)

হযরত সুফিয়া (রাযিঃ) থেকে ৬০টি হাদীছ বর্ণিত আছে। যেগুলো তিনি হযরত রাসূলে কারীম সাল্লাল্লাহু আলাইহি ওয়াসল্লাম এবং হযরত ওমর (রাযিঃ)-এর কাছ থেকে শুনেছিলেন।

(জুরকানী আলাল মাওয়াহিব : তৃতীয় খণ্ড)

দ্বীনী প্রজ্ঞার জন্যে নিম্নোক্ত ঘটনা যথেষ্ট। একবার নবীজী বললঃ আমার একটি ধারণা বদর এবং হোদায়বিয়ায় অংশগ্রহণকারীরা দোযখে যাবেন। হযরত হাফসা (রাযিঃ) বললেন, কিন্তু কুরআন তো বলছে, তোমাদের মধ্যে প্রতিটি ব্যক্তি দোযখে যাবে। মহানবী সাল্লাল্লাহু আলাইহি ওয়াসল্লাম বলল, হ্যাঁ, তবে কুরআনে একথাও আছে- আবার শুদ্ধ পৃণ্যবানদের তিনি মুক্তি দেবেন এবং অত্যাচারীদের জানুর উপর ফেলে ছেড়ে দেবেন।

(মুসনাদে আহমাদ বিন হাম্বল : ষষ্ঠ খণ্ড-পৃঃ ২৮৫)

এই অন্বেষী-মানসের প্রভাবে রাসূলে কারীম সাল্লাল্লাহু আলাইহি ওয়াসল্লাম সব সময় তাঁর শিক্ষার কথা ভাবতেন। হযরত শেফা (রাযিঃ) পিঁপড়া কামড়ের মন্ত্র জানতেন। একদিন তিনি ঘরে এলে নবীজী তাঁকে বললঃ তুমি সেই মন্ত্র হাফসাকে শিখিয়ে দাও।

(মুসনাদে আহমাদ বিন হাম্বল : ষষ্ঠ খণ্ড-পৃঃ ২৮৫)

চরিত্র : তাঁর চরিত্র বিষয়ে ঐতিহাসিক ইবনে সা'আদের উক্তি :

انها صوامه قوامه

অর্থাৎ, 'তিনি (হাফসা) দিনে রোযাযাপনকারী এবং রাত্রে নামাযে দণ্ডায়মান থাকতেন।' অন্য বর্ণনায় আছে :

ما ت حفة حتى ما ت فطر

অর্থাৎ, 'মৃত্যু অবধি রোযা রেখেছিল তিনি।' (আল-ইসাবা ফি আহওয়ালিস সাহাবা : ৮ম খণ্ড পৃঃ ৫২) বিতর্ক অপহৃত্ত করতেন, সিফফিন যুদ্ধের পরে যখন প্রশাসনে বিষয়টি উপস্থাপিত হল, তাঁর ভাই আবদুল্লাহ বিন ওমর (রাযিঃ) এটিকে 'ফিতনা' (অবক্ষয়) ধারণা করে গৃহে অন্তরীণ থাকতে চাইতেন; কিন্তু হাফসা (রাযিঃ) বললেনঃ যদিও এই অংশ গ্রহণে তোমার কোন লাভ নেই, কিন্তু তবুও তোমার অংশ গ্রহণের প্রয়োজন আছে, কেননা মানুষ তোমার বিবেচনার জন্যে প্রতীক্ষা করবে এবং অসম্ভব নয় যে, তোমার নিঃসঙ্গ গৃহবাস তাদেরকে বিতর্কের মধ্যে ছুঁড়ে দেবে। (সহীহ বুখারী : দ্বিতীয় খণ্ড- পৃঃ ৫৮৯) দাজ্জালকে খুবই ভয় পেতেন তিনি।

(মুসনাদে আহমাদ : ষষ্ঠ খণ্ড- পৃঃ ২৮৩ এবং মুসলিম শরীফ-কিতাবুল ফিতান) মদীনায় ইবনে সইয়াদ নামক এক ব্যক্তি ছিল। দাজ্জাল সম্পর্কে মহানবী সাল্লাল্লাহু আলাইহি ওয়াসল্লাম যে লক্ষণসমূহ নির্দেশ করেছিলেন, তার মধ্যে সেইসব লক্ষণের বহুকিছুই বিদ্যমান ছিল। একদিন তার সাথে আবদুল্লাহ বিন ওমর (রাযিঃ)-এর দেখা হয়ে গেল। তিনি তাকে খুবই খারাপ বকাবকি করলেন। তাঁর বকাবকিতে সে এত বেশী ফুলে উঠলো যে, রাস্তা বন্ধ হয়ে গেল; আবদুল্লাহ বিন ওমর (রাযিঃ) তাঁকে মারতে আরম্ভ করলেন। হযরত হাফসা (রাযিঃ) ঘটনা জানতে পেরে তাঁকে বললেনঃ তোমার তার সাথে কি প্রয়োজন? তুমি জানো না, মহানবী সাল্লাল্লাহু আলাইহি ওয়াসল্লাম বলেছেন, দাজ্জাল বেরোনের নেপথ্যে- প্রেরণা হবে তার রাগ?

(বুখারী শরীফ : ২য় খণ্ড- পৃঃ ৭০ এবং ফতহুল বারী : ৮ম খণ্ড-পৃঃ ৫০৪) হযরত হাফসার (রাযিঃ) মনোগঠন ও মেযাজে একটু তেজ ছিল। কখনো কখনো মহানবীর সঙ্গে এদিক ওদিক কথাবার্তা বলতেন এবং বরাবর জবাব দিতেন। বুখারী শরীফে স্বয়ং ওমর ফারুক (রাযিঃ)-এর কথাঃ আমরা অন্ধকার যুগে রমণীদের সামান্য গুরুত্বও দিতাম না, ইসলামই তাদের সম্মান দিলো এবং কুরআনে যখন তাদের বিষয়ে আয়াত অবতীর্ণ হল তখন আমরা তাদের মূল্য ও মর্যাদা সম্পর্কে অবহিত হলাম। একদিন আমার স্ত্রী এক ব্যাপারে আমাকে তার রায় দিলো; আমি বললামঃ রায় বা পরামর্শের সঙ্গে তোমার আবার সম্পর্ক কি? বললঃ শোনো, সামান্য কথাও তোমার সহ্য হয় না, অথচ তোমারই মেয়ে রাসূলে করীম সাল্লাল্লাহু আলাইহি ওয়াসল্লামকে বরাবর জবাব দেয়, এমনকি রাসূলে কারীম সে জন্যে সারাদিন বিমর্ষ থাকেন। (এই কথা শুনে) আমি উঠে হাফসার কাছে এলাম এবং বললামঃ মেয়ে! আমি শুনলাম তুমি রাসূলুল্লাহ সাল্লাল্লাহু আলাইহি ওয়াসল্লাম-এর কথার বরাবরই জবাব দাও?

হাফসা (রাযিঃ) বললঃ হ্যাঁ, আমি এরকম করি। আমি বললামঃ খবরদার! আমি তোমাকে আল্লাহর শাস্তি বিষয়ে সতর্ক করছি। তুমি আয়েশা (রাযিঃ)কে ঈর্ষা করো না, মহানবীর ভালবাসার কারণে নিজের সৌন্দর্য সম্পর্কে হযরত আয়েশা (রাযিঃ)-এর একটি আনন্দ আছে।

(সহীহ বুখারী : দ্বিতীয় খণ্ড-পৃঃ ৭০)

তিরমিযীর বর্ণনা, একবার সুফিয়া কাঁদছিল। নবীজী এসে কান্নার কারণ জিজ্ঞেস করলেন, তিনি বললেনঃ আমাকে হাফসা (রাযিঃ) বলেছেন, আমি 'ইহুদীর মেয়ে'। মহানবী সাল্লাল্লাহু আলাইহি ওয়াসল্লাম হাফসাকে বললঃ আল্লাহকে ভয় করো। অতঃপর হযরত সুফিয়াকে বললেনঃ তুমি নবীর কন্যা, তোমার চাচা পয়গম্বর এবং পয়গম্বরের স্ত্রী হিসেবে আছ, হাফসা কি কথায় তোমার উপর গর্ব করতে পারে।

(তিরমিযী শরীফ বাবু ফযলে আযওয়াজিন নবীয়ে [সাঃ])

একবার হযরত আয়েশা (রাযিঃ) এবং হযরত হাফসা (রাযিঃ) হযরত সুফিয়াকে বললেনঃ আমরা রাসূলে কারীম সাল্লাল্লাহু আলাইহি ওয়াসল্লাম-এর নিকট তোমার চেয়ে অধিক সম্মানিত, কেননা আমরা তাঁর স্ত্রীও আবার তাঁর চাচাতো বোনও! হযরত সুফিয়া (রাযিঃ)-এর খারাপ লাগলো। নবীজীকে তিনি নালিশ করলেন। মহানবী সাল্লাল্লাহু আলাইহি ওয়াসল্লাম বললেনঃ তুমি এটি কেন বললে না যে, তোমরা কী করে আমার চেয়ে বেশি সম্মানিত হবে, আমার স্বামী রাসূলে কারীম সাল্লাল্লাহু আলাইহি ওয়াসল্লাম, আমার বাবা হযরত হারুন আলাইহিস সালাম এবং আমার চাচা হযরত মুসা আলাইহিস সালাম।

হযরত আয়েশা (রাযিঃ) এবং হযরত হাফসা (রাযিঃ), হযরত আবু বকর (রাযিঃ) এবং হযরত ওমর (রাযিঃ)-এর কন্যা ছিলেন। নবীজীর নৈকট্যের দিক থেকে তাঁরা সমান সমপর্যায়ের ছিলেন। এই জন্যে হযরত আয়েশা (রাযিঃ) এবং হযরত সুফিয়া (রাযিঃ) অন্যান্য পত্নীবৃন্দের তুলনায় পরস্পর এক ছিলেন। নবম হিজরীর তাহরীরের ঘটনা এই ঐক্যেরই পরিণতি ছিল। একবার কিছুদিন মহানবী সাল্লাল্লাহু আলাইহি ওয়াসল্লাম হযরত যয়নব (রাযিঃ)-এর কাছে অভ্যাসের অতিরিক্ত বসেছিলেন। তার কারণ ছিল এই যয়নবের কাছে কোথেকে মধু এসেছিল। তিনি মহানবীর সামনে তা উপস্থিত করেন- আর মধু মহানবীর খুবই প্রিয় ছিল। মহানবী সাল্লাল্লাহু আলাইহি ওয়াসল্লাম তা পান করেন এবং এইভাবে নির্দিষ্ট সময়ের অতিরিক্ত বিলম্ব হয়ে যায়। হযরত আয়েশা (রাযিঃ)-এর ঈর্ষা হল, হযরত হাফসা (রাযিঃ)কে ডেকে বললেন, নবীজী আমার এবং তোমার ঘরে এলে বলা দরকার আপনার মুখ থেকে 'মগাফির' ফুলের গন্ধ আসছে ('মগাফির' ফুল থেকে মৌমাছিরা মধু আহরণ করে।) [মগাফির ফুলের গন্ধের কথা বলা কোনো মিথ্যা ছিলো না, মগাফির-এর ফুলে যদি কোনো তীব্র গন্ধও থাকে সেটিও আশ্চর্যের নয়] মহানবী সাল্লাল্লাহু আলাইহি ওয়াসল্লাম তা শুনে কসম করে নিলেন কখনো মধু গ্রহণ না করবার এই প্রসঙ্গে কুরআনুল কারীমের এই আয়াত অবতীর্ণ হল :

يا ايها النبي لم تحرم ما احل الله لك تبتغي مرضات ازواجك

অর্থাৎ, ‘হে নবী! কেন তুমি স্ত্রীদের সন্তোষের জন্যে আল্লাহর হালাল করা জিনিস হারাম করে নিচ্ছে।’

(সহীহ বুখারী শরীফ : দ্বিতীয় খণ্ড- পৃঃ ৭২৯)

কখনো কখনো হযরত হাফসা (রাযিঃ) এবং হযরত আয়েশা (রাযিঃ)-এর মধ্যে, ঈর্ষা বিদ্বেষের ব্যাপারও হয়ে যেতো। একবার হযরত আয়েশা (রাযিঃ) এবং হযরত হাফসা (রাযিঃ) দু’জনেই মহানবীর সাথে সফরে ছিলেন। রাসূলে কারীম সাল্লাল্লাহু আলাইহি ওয়াসল্লাম রাতে হযরত আয়েশা (রাযিঃ)-এর উটে চড়তেন এবং তাঁর সাথে কথা বলতেন। একদিন হযরত হাফসা (রাযিঃ) হযরত আয়েশা (রাযিঃ)কে বললেনঃ আজ রাতে তুমি আমার উটের উপর এবং আমি তোমার উটের উপর সওয়ার হবো যাতে বিভিন্ন দৃশ্য দেখা যায়। হযরত আয়েশা (রাযিঃ) রাজী হয়ে গেলেন। রাসূলে কারীম সাল্লাল্লাহু আলাইহি ওয়াসল্লাম হযরত আয়েশা (রাযিঃ)-এর উটের কাছে এলেন, যার উপর হযরত হাফসা (রাযিঃ) বসা ছিলেন। যখন মনযিলে পৌঁছলেন এবং হযরত আয়েশা (রাযিঃ) নবীজীকে পেলেন না, তখন নিজের পা ইযখির-ঘাসের উপর ছড়িয়ে দিয়ে বলতে লাগলেন, ‘হে আল্লাহ! সাপ অথবা বিছু ঠিক করে দাও, আমাকে ছোবল মেরে চলে যাক।’

(সহীহ বুখারী এবং সীরাতুননবী : দ্বিতীয় খণ্ড- আল্লামা শিবলী নু‘মানী)

দরিদ্র-জননী হযরত যয়নব (রাযিঃ)

যয়নব ছিল তাঁর নাম। বংশক্রম এরকমঃ যয়নব বিনতে খুযাইমা বিন আবদুল্লাহ বিন ওমর বিন আবদে মনাফ বিন হিলাল বিন আমের সাআ’সাআ। তিনি দরিদ্র মানুষদের খুবই উদারতা ও দয়াদ্র্দের সঙ্গে খাওয়াতেন, সেজন্যে ‘উম্মুল মাসাকিন’ বা ‘দরিদ্র-মাতা’ উপনামে বিখ্যাত হন। মহানবী সাল্লাল্লাহু আলাইহি ওয়াসল্লাম-এর সঙ্গে বিবাহের পূর্বে তিনি আবদুল্লাহ বিন জাহাশের স্ত্রী ছিলেন। আবদুল্লাহ বিন জাহাশ ওহোদ যুদ্ধে শাহাদাত বরণ করেন এবং মহানবী সাল্লাল্লাহু আলাইহি ওয়াসল্লাম সে বছরই তাঁকে বিবাহ করেন। বিবাহের পর মহানবীর কাছে দু’তিন মাস থাকতে থাকতেই তাঁর মৃত্যু হয়ে যায়। মহানবী সাল্লাল্লাহু আলাইহি ওয়াসল্লাম-এর জীবনের মধ্যে হযরত খাদিজা (রাযিঃ)-এর পর ইনি একজন স্ত্রী ছিলেন যিনি তার জীবৎকালে মৃত্যুবরণ করেন। মহানবী সাল্লাল্লাহু আলাইহি ওয়াসল্লাম নিজেই তাঁর নামাজে জানাযা পড়ান এবং জান্নাতুল বাকীতে তাঁকে কবরস্থ করা হয়। মৃত্যুর সময় তাঁর বয়স ছিল ত্রিশ বছর।

(আল-ইসাবা ফি তময়িজিস সাহাবা, ইবনে হাজার আসকালানী : অষ্টম খণ্ড-পৃঃ ৯৪, ৯৫ এবং সীরাতুননবী-আল্লামা শিবলী নু‘মানী : দ্বিতীয় খণ্ড)

হযরত উম্মে সালমা (রাযিঃ)

তার নাম হিন্দ, উম্মে সালমা উপনাম। তিনি কুরাইশ গোত্রের মখযুম বংশের মেয়ে। বংশক্রম এরকমঃ হিন্দ বিনতে আবি উমাইয়া সুহাইল বিন আল-মুগিরা বিন আবদুল্লাহ বিন ওমর বিন মখযুম। তাঁর মা ছিলেন বনু ফিরাস বংশের মেয়ে। মাতার বংশক্রম এরকমঃ আতিকা বিনতে আমের বিন রাবেয়া বিন মালেক বিন ছুযাইমা বিন আলকামা বিন জাযালুত তাআন বিন ফিরাস বিন গানম বিন মালেক বিন কেনানা।

উম্মে সালমা (রাযিঃ)-এর পিতা আবু উমাইয়া মক্কার বিখ্যাত দানশীল ও দাতা ছিলেন। তিনি যখন সফরে বেরোতেন তো সমস্ত কাফেলার দায়িত্ব একাই বহন করতেন। এই কারণে তার উপাধি হয়েছিল ‘যাদুর রাব্বি’ অর্থাৎ ‘ভ্রমণকারীর সম্পদ।

(আল-ইসাবা ফি তময়িজিস সাহাবা : ৮ম খণ্ড- পৃঃ ২৪০)

হযরত উম্মে সালমা তাঁরই স্নেহ ও আদরের ছায়া-প্রচ্ছায়ায় বিপুল বৈভব ও ঐশ্বর্যের মধ্যে লালিত-পালিত হন।

বিবাহ : আবদুল্লাহ বিন আবদুল আসাদ যদিও নাম, কিন্তু আবু সালমা উপনামে যিনি বিখ্যাত ছিলেন, যিনি উম্মে সালমার চাচাতো ভাই ছিলেন এবং মহানবী সাল্লাল্লাহু আলাইহি ওয়াসাল্লাম-এর দুধ ভাই ছিল। তার সাথে উম্মে সালমা বিবাহ বন্ধনে আবদ্ধ হন।

ইসলাম গ্রহণ : নবুয়্যতের প্রারম্ভে নিজের স্বামীর সঙ্গে মুসলমান হন।

হাবশায় হিজরত : স্বামীর সঙ্গেই হাবশায় হিজরত করেন। হাবশায় কিছুকাল থেকে মক্কায় ফিরে আসেন এবং এখান থেকে মদীনায় হিজরত করেন। হিজরত বিষয়ে তার বৈশিষ্ট্য এই যে, ঐতিহাসিকদের মতানুযায়ী, তিনিই প্রথম মহিলা যিনি হিজরত করে মদীনায় আসেন।

(আল-ইসাবা : ৮ম খণ্ড- পৃঃ ২৪০)

মদীনায় হিজরত : হিজরতের ঘটনা খুবই তৎপর্যপূর্ণ। হযরত উম্মে সালমা স্বামীর সঙ্গে হিজরত করতে চাইতেন, (তাঁর বাচ্চা সালমাও সাথে ছিল) কিন্তু (উম্মে সালমার) গোত্র অসুবিধার সৃষ্টি করে। এজন্যে হযরত আবু সালমা (স্বামী) তাঁকে মক্কায় রেখেই মদীনায় চলে যান এবং তিনি নিজ ঘরে ফিরে চলে আসেন। (এদিকে সালমাকে আবু সালমার পরিবারের লোকেরা উম্মে সালমার কাছ থেকে ছিনিয়ে নিয়ে গিয়েছিল) এজন্যে উম্মে সালমার আরো বেশী বেদনা ছিল। এমন হত যে, প্রতিদিন ভয়ে বিহবল হয়ে ঘর থেকে বেরিয়ে যেতেন এবং বসে বসে কাঁদতেন। সাত আট দিন এরকম অবস্থা হল, পরিবারের লোকজন কিছুই অনুভব করল না। একদিন তাকে অনুসরণ করে তার পরিবারের এক ব্যক্তি বের হল। উম্মে সালমাকে কাঁদতে দেখে তার হৃদয় আর্দ্র হয়ে এল। ঘরে এসে লোকদের বলল : ‘এই মেয়ের উপর কেন অত্যাচার করছ? তাকে যেতে দাও এবং তার বাচ্চা তাকে দিয়ে দাও।’

রওয়ানা হবার অনুমতি পেয়ে বাচ্চা কোলে নিয়ে উটের উপর সওয়ার হয়ে গেলেন এবং মদীনার রাস্তা ধরলেন। তিনি ছিলেন একাকী, অর্থাৎ কোন পুরুষ সাথে ছিল না।

তনইম নামক স্থানে উসমান বিন তালহা তাকে দেখে বললঃ কোথায় যাচ্ছে? তিনি বললেনঃ মদীনা। উসমান বললেনঃ কেউ কি সাথে আছে? উত্তরে বললেনঃ আল্লাহ আছেন এবং এই বাচ্চা আছে। উসমান বললঃ এটি তো হয় না, তুমি একা কি করে যাবে? এই বলে উটের লাগাম ধরলেন এবং মদীনার দিকে রওয়ানা দিলেন। রাস্তার মধ্যে যখন কোথাও থামত উটকে বসিয়ে কোন বৃক্ষের নীচে চলে যেতেন এবং হযরত উম্মে সালমা নেমে পড়তেন। আবার রওয়ানা হবার সময় হলে উটের উপর বসার জিনিসপত্র **রেখে** সরে যেতেন এবং উম্মে সালমা (রাযিঃ)কে বলতেনঃ সওয়ার হয়ে যাও। হযরত উম্মে সালমা বলেনঃ আমি এরকম ভদ্র মানুষ কখনো দেখিনি। এই ভাবে অনেক জায়গায় থেমে থেমে মদীনায় উপস্থিত হলেন। কুবার আবাদ এলাকা নজরে ছিল, উসমান বললেনঃ তুমি এখন তোমার স্বামীর কাছে চলে যাও, তিনি এখানেই আছেন। উম্মে সালমা সেদিকে গেলেন, আর উসমান রওয়ানা দিলেন মক্কার দিকে।

(জুরকানী আলাল মাওয়াহিবঃ তৃতীয় খণ্ড-পৃঃ ২৭২, ২৭৩)

কুবায় পৌছবার পর লোকেরা তার অবস্থা সম্পর্কে জিজ্ঞেস করতো; এবং যখন তিনি তার পিতার (আবু উমাইয়ার) নাম বলতেন তাদের বিশ্বাস হত না (তিনি একাকী সফর করার কারণেই এটি হয়েছিল, কারণ ভদ্রমহিলারা এই ভাবে বাইরে বেরোতেন না) এবং উম্মে সালমা বাধ্য হয়ে নিঃশব্দ থাকতেন। কিন্তু যখন কয়েকজন লোক হজ্জ করবার উদ্দেশ্যে মক্কা রওয়ানা হল এবং উম্মে সালমা তাদের মাধ্যমে নিজ গৃহে পত্র পাঠালেন তখন লোকজনের বিশ্বাস হল যে, বাস্তবিকই তিনি আবু উমাইয়ার মেয়ে। আবু উমাইয়া যেহেতু কুরাইশ গোত্রের খুবই বিখ্যাত ও সম্মানিত ব্যক্তি ছিলেন, এ জন্যে হযরত উম্মে সালমাও খুবই গুরুত্বের দৃষ্টিতে গৃহীত হয়েছিল।

(মুসনাদে আহমাদ ইবনে হাম্বলঃ ষষ্ঠ খণ্ড- পৃঃ ৩০৭)

আবু সালমা (রাযিঃ)-এর মৃত্যু, দ্বিতীয় বিবাহ এবং পারিবারিক অবস্থা :

কিছুকাল পর্যন্ত স্বামীর সাথে থাকলেন। আবু সালমা (স্বামী) বড় ঘোড়সওয়ার, বদর যুদ্ধে এবং ওহোদ যুদ্ধে অংশ গ্রহণ করেছিল। ওহোদ যুদ্ধে কয়েকটি জায়গায় জখম পান, সেই জখমে তার আর বাঁচা হল না। জমাদিউস সানী মাসে (৪র্থ হিজরী) জখম ফেটে গেল এবং সেই কষ্টের কারণে তিনি মৃত্যুবরণ করেন।

(জুরকানী আলাল মাওয়াহিবঃ তৃতীয় খণ্ড-পৃঃ ২৭৩)

উম্মে সালমা (রাযিঃ) রাসূলে কারীম সাল্লাল্লাহু আলাইহি ওয়াসল্লাম-এর ঘরে এলেন এবং মৃত্যুর খবর শোনালেন- নবীজী নিজে তাঁর ঘরে উপস্থিত হলেন, ঘরে তখন কান্না-মাতমের বন্যা বয়ে যাচ্ছিলো। সালমা (রাযিঃ) বলেছিলেনঃ ‘হায় দারিদ্র! এ কেমন মৃত্যু হল। মহানবী সাল্লাল্লাহু আলাইহি ওয়াসল্লাম বলল ধৈর্য্য ধরো, তার মাগফিরাতের জন্যে প্রার্থনা করো এবং বলোঃ ‘আল্লাহ তাঁর চেয়ে উত্তম তাঁর স্থলাভিষিক্ত আমাকে দান করো।’

মহানবী সাল্লাল্লাহু আলাইহি ওয়াসল্লাম আবু সালমা (রাযিঃ)-এর লাশের কাছে এলেন এবং জানাযার নামায অত্যন্ত গুরুত্ব ও প্রযত্নের সঙ্গে পড়া হল। মহানবী সাল্লাল্লাহু আলাইহি ওয়াসল্লাম তাঁর জানাযায় নয় তকবীর বলেছিলেন। লোকেরা নামাযের পর তাকে বললঃ ইয়া রাসূলুল্লাহ! আপনি নয় তকবীর বললেন, আপনার ভুল হয়ে যায়নি তো! তিনি বললেনঃ আবু সালমা (নয় তকবীর কেন) হাজার তকবীরের অধিকার রাখে। মৃত্যুর পর আবু সালমা (রাযিঃ)-এর চোখ দুটো খোলা ছিল, মহানবী সাল্লাল্লাহু আলাইহি ওয়াসল্লাম নিজ হাতে তা বন্ধ করেন এবং তার মাগফিরাতের জন্য দু‘আ করেন।

আবু সালমা (রাযিঃ)-এর মৃত্যুর সময় উম্মে সালমা (রাযিঃ) গর্ভবতী ছিলেন, গর্ভ প্রসবের পর যখন ইদতের সময়সীমা অতিক্রান্ত হল, হযরত আবু বকর (রাযিঃ) তাকে বিয়ের প্রস্তাব দিলেন; কিন্তু উম্মে সালমা (রাযিঃ) রাজী হলেন না। এরপর হযরত ওমর (রাযিঃ) রাসূলে কারীম সাল্লাল্লাহু আলাইহি ওয়াসল্লাম-এর বিয়ের পয়গাম নিয়ে গেল। উম্মে সালমা (রাযিঃ) বললেনঃ আমার কিছু ওয়র-অজুহাত আছে— (ক) আমি খুবই স্বাধীন ও সম্মানচেতা মহিলা, (খ) ছেলে সন্তান আছে, (গ) আমার বয়স বেশী। মহানবী সাল্লাল্লাহু আলাইহি ওয়াসল্লাম এই সব অজুহাত মেনে নিলেন। এরপর উম্মে সালমার আর কী ওয়র থাকতে পারে। ফলে ওমর (রাযিঃ)কে বললেন, উঠ! মহানবী সাল্লাল্লাহু আলাইহি ওয়াসল্লাম এর সঙ্গে আমার বিয়ে করিয়ে দাও। (সুনানে নাসায়ী-পৃঃ ৫১)

শাওয়াল মাসের শেষে বিয়ের অনুষ্ঠান উদযাপিত হয়। আবু সালমার মৃত্যুর কারণে যে বিরাট— কঠিন দুঃখ পেয়েছিলেন তিনি, আল্লাহ তা‘আলা এই বিয়ের মধ্য দিয়ে তাঁর চিরায়ত আনন্দে পরিবর্তিত করেছেন। ‘ইবনে মাজাহ’ কিতাবে আছে :

فلما توفي أبو سلمة ذكرت الذي كان حدثني فقلت فلما اردت ان اقوال
اللهم غصني خيرا منه قلت في نفسي اعاض خيرا من ابي سلمة؟

ثم قلتها فعاضني الله محمد ﷺ

অর্থাৎ ‘যখন আবু সালমা (রাযিঃ)-এর মৃত্যু হল, আমি সেই হাদীছের কথা স্মরণ করলাম, যা আবু সালমা আমাকে বর্ণনা করেছিল এবং সেই অনুসারে আমি দু‘আ করা শুরু করলাম। দু‘আর মধ্যে আমি যখন এটি বলতে চাইতাম (আল্লাহ আমাকে আবু সালমার চেয়ে উত্তম স্থলাভিষিক্ত দান কর)। তখন হৃদয় বলতো (আবু সালমার চেয়ে ভাল কোথায় পাবো) কিন্তু আমি দু‘আ করা শুরু করলাম, তখন আবু সালমার স্থলাভিষিক্ত হিসেবে মহানবী সাল্লাল্লাহু আলাইহি ওয়াসল্লাম এলেন।

মহানবী সাল্লাল্লাহু আলাইহি ওয়াসল্লাম তাকে দু‘টো চাক্কি (আটা পেষার যন্ত্র) গাগরী (কলস) এবং চামড়ার বালিশ দিয়েছিলেন। এগুলো মহানবী সাল্লাল্লাহু আলাইহি ওয়াসল্লাম তাঁর অন্যান্য পত্নীদেরও দিয়েছিলেন। (মুসনাদে আহমদ ইবনে হাম্বল : ষষ্ঠ খণ্ড-পৃঃ ২৯৫)

তিনি খুবই লজ্জাবতী ছিলেন। প্রথম প্রথম যখন মহানবী সাল্লাল্লাহু আলাইহি ওয়াসল্লাম তাঁর ঘরে যেতেন, লজ্জার কারণে উম্মে সালমা মেয়ে যয়নবকে কোলে বসিয়ে নিতেন। এটি দেখে মহানবী সাল্লাল্লাহু আলাইহি ওয়াসল্লাম ফিরে যেতেন। উম্মে সালমার দুধ ভাই আম্মার বিন ইয়াসির এটি জানতে পেরে খুবই অসন্তুষ্ট হন এবং যয়নবকে ছিনিয়ে নিয়ে যান।

(মুসনাদে আহমদ : ষষ্ঠ খণ্ড-পৃঃ ২৯৫)

কিন্তু পরে এসব ক্রমান্বয়ে কমে আসে, অন্যান্য স্ত্রীরা যেভাবে থাকতেন তিনিও সেভাবে থাকতে লাগলেন। বিয়ের পূর্বে মহানবী সাল্লাল্লাহু আলাইহি ওয়াসল্লাম হযরত আয়েশা (রাযিঃ)কে উম্মে সালমার কথা উল্লেখ করল। হযরত আয়েশা (রাযিঃ)-এর খুবই ঈর্ষা হয়। তাবকাত-ই-ইবনে সা'আদ গ্রন্থে এ বিষয়ে এই শব্দগুচ্ছ আছে :

حزنت حزنا شديدا

অর্থাৎ, 'আমি (আয়েশা) খুবই ব্যথিত হলাম'।

উম্মে সালমাকে মহানবী সাল্লাল্লাহু আলাইহি ওয়াসল্লাম সীমাহীন ভালবাসতেন। এ কারণেই একবার যখন সমস্ত পত্নীরা হযরত আয়েশা (রাযিঃ) ছাড়া মহানবীর কাছে কিছু আরজ করতে চাইল, তখন সবাই দূত হিসেবে উম্মে সালমা (রাযিঃ)কে ঠিক করে রাসূলে কারীম সাল্লাল্লাহু আলাইহি ওয়াসল্লাম-এর কাছে পাঠালেন। বুখারী শরীফে আছে, পবিত্র পত্নীদের দু'টো দল ছিল; একদলে ছিলেনঃ হযরত আয়েশা, হযরত হাফসা, হযরত সুফিয়া, হযরত সাওদা। অন্য দলে ছিলেন হযরত উম্মে সালমা এবং অন্যান্য স্ত্রীরা। মহানবী সাল্লাল্লাহু আলাইহি ওয়াসল্লাম নির্ধারিত দিন-ক্ষণ তারিখ অনুসারে তাঁর স্ত্রীদের কাছে যেতেন। মহানবী সাল্লাল্লাহু আলাইহি ওয়াসল্লাম আয়েশা (রাযিঃ)কে অসাধারণ ভালবাসতেন, ফলে যেদিন হযরত আয়েশা (রাযিঃ)-এর ঘরে যেতেন লোকজন আয়েশা (রাযিঃ)-এর ঘরে সেদিন উপহার পাঠাতেন। উম্মে সালমার দল একদিন উম্মে সালমাকে বললেনঃ আমরা সবারই মঙ্গল প্রত্যাশী, আর এজন্যে মহানবী সাল্লাল্লাহু আলাইহি ওয়াসল্লাম যে দিন যে ঘরে থাকবেন, লোকদের উপহার সে দিন সে ঘরে পাঠানো উচিত। উম্মে সালমা (রাযিঃ) এই কথা মহানবী সাল্লাল্লাহু আলাইহি ওয়াসল্লাম-এর কাছে উপস্থাপন করলেন। মহানবী সাল্লাল্লাহু আলাইহি ওয়াসল্লাম দু'বার তা এড়িয়ে যান। তৃতীয়বার বললেনঃ হে উম্মে সালমা! আয়েশার ব্যাপারে আমাকে কষ্ট দিও না। আয়েশা ছাড়া তোমাদের মধ্যে এমন অন্য কোন স্ত্রী নেই, যার চাদরের নীচে আমার কাছে অহী অবতীর্ণ হয়েছে। উম্মে সালমা বললেনঃ 'ইয়া রাসূলুল্লাহ! আমি আপনাকে কষ্ট দেয়া থেকে আশ্রয় কামনা করছি।'।

(বুখারী শরীফ : ১ম খণ্ড-পৃঃ ৫৩২)

উম্মে সালমার গৃহে মহানবী সাল্লাল্লাহু আলাইহি ওয়াসল্লাম যেদিন রাত্রি যাপন করতেন উম্মে সালমার বিছানা হত মহানবীর জায়নামাযের সম্মুখে। মহানবী সাল্লাল্লাহু আলাইহি ওয়াসল্লাম নামায পড়তেন, আর ইনি থাকতেন তাঁরই সম্মুখে।

(মুসনাদে আহমদ ইবনে হাম্বল : ষষ্ঠ খণ্ড-পৃঃ ৩২২)

মহানবী সাল্লাল্লাহু আলাইহি ওয়াসল্লাম-এর আরামের দিকে তিনি খুবই খেয়াল রাখতেন। মহানবী সাল্লাল্লাহু আলাইহি ওয়াসল্লাম-এর বিখ্যাত গোলাম হযরত সফিনা (রাযিঃ) আসলে উম্মে সালমারই গোলাম ছিল। তাঁকে যখন মুক্তি দিলেন, তখন এই শর্ত যুক্ত করে দিলেন যে, মহানবী সাল্লাল্লাহু আলাইহি ওয়াসল্লাম যতদিন জীবিত আছেন, ততদিন তাঁর সেবা তোমার জন্যে অনিবার্য। (মুসনাদে আহমাদ-পৃঃ ৩১৬)

সাধারণ অবস্থা : উম্মে সালমা (রাযিঃ)-এর জীবনের উল্লেখযোগ্য ঘটনাবলী এরকমঃ খন্দকের যুদ্ধে তিনি অংশগ্রহণ করেননি বটে, কিন্তু মহানবী সাল্লাল্লাহু আলাইহি ওয়াসল্লাম-এর এত কাছাকাছি ছিল যে, মহানবীর কথাবর্তা ভালভাবেই শুনছিলেন। উম্মে সালমা (রাযিঃ) বলেন, (খন্দকের যুদ্ধের) সেই সময় আমার ভাল করে মনে আছে, মহানবী সাল্লাল্লাহু আলাইহি ওয়াসল্লাম-এর পবিত্র বক্ষ যখন ধূলো মৃত্তিকায় আকীর্ণ ছিল এবং তিনি লোকদেরকে ইট তুলে তুলে দিচ্ছিলেন এবং কবিতা পাড়ছিলেন, হঠাৎ তার দৃষ্টি গিয়ে ছিল আমাদের বিন ইয়াসির-এর উপর, বললেন (আফসোস) বিন সুমিয়া! তোমাকে একটি বিদ্রোহী গ্রুপ হত্যা করবে। (মুসনাদে আহমাদ-পৃঃ ২৮১)

কুরাইজা- গোত্র ঘেরাও-এর কালে (৫ম হিজরী) ইহুদীদের সাথে আলোচনা করবার জন্যে মহানবী সাল্লাল্লাহু আলাইহি ওয়াসল্লাম হযরত আবু লুবাবাকে প্রেরণ করেছিলেন। পরামর্শের একটি পর্যায়ে আবু লুবাবা ইহুদীদেরকে হাতের ইশারায় জানিয়ে দিয়েছিলেন যে, তোমাদের হত্যা করা হবে, কিন্তু পরে এটিকে একটি গোপন বিষয় ফাঁস করে ফেলেছেন মনে করে মসজিদের স্তম্ভের সাথে নিজেদের বেঁধে নেন। কয়েকদিন পর্যন্ত এভাবেই তিনি থাকেন-পরে তাঁর তওবা কবুল হয়। মহানবী সাল্লাল্লাহু আলাইহি ওয়াসল্লাম উম্মে সালমার গৃহে ছিলেন। সকালে হাসতে হাসতে ঘুম থেকে উঠলেন। উম্মে সালমা বললঃ আল্লাহ আপনাকে সবসময় হাস্যোজ্জ্বল রাখুন। এখন হাসছেন কেন বলবেন কি? তিনি বললঃ আবু লুবাবার তওবা গৃহীত হয়েছে। উম্মে সালমা (রাযিঃ) বললেনঃ আমি তাঁকে এ সুখবর জানিয়ে আসবো কি? হ্যাঁ, ইচ্ছে করলে জানিয়ে আসতে পার। উম্মে সালমা নিজ ঘরের দরোজায় দাঁড়ালেন এবং কণ্ঠস্বর উচু করে বললেনঃ আবু লুবাবা, মুবারক হোক, তোমার তওবা কবুল হয়ে গেছে। এই আওয়াজ কানে যেতেই পুরো মদীনা উপচে উঠে এল।

(জুরকানী আলাল মারাহিব : দ্বিতীয় খণ্ড-পৃঃ ১৫৩/তাবকাত-ই-ইবনে সা'আদ : ২য় খণ্ড-পৃঃ ৫৪)

এই সালেই (৫ম হিজরী) পর্দার আয়াত অবতীর্ণ হয়। এর আগে নবী পত্নীরা আত্মীয়-স্বজনের সামনে আসতেন, এখন (আয়াত অবতীর্ণ হওয়ার পর) বিশেষ আত্মীয় স্বজন ছাড়া সবার থেকে পর্দা করার নির্দেশ দেয়া হয়। হযরত উম্মে মকতুম (রাযিঃ) কুরাইশ গোত্রের একজন বিশিষ্ট সাহাবী এবং মহানবীর মুয়াজ্জিন ছিল। তিনি অন্ধ ছিলেন এবং সে কারণে মহানবীর স্ত্রীদের ঘরেও যাতায়াত করতেন। তিনি একদিন এলে মহানবী সাল্লাল্লাহু আলাইহি ওয়াসল্লাম উম্মে সালমা এবং হযরত মায়মুনাকে বললেনঃ তাঁর

থেকে পর্দা কর, তাঁরা বললেনঃ ‘তিনি তো অন্ধ’। মহানবী বললেন, তোমরা তো অন্ধ নও, তোমরা তো তাঁকে দেখতে পাচ্ছ। (মুসনাদে আহমাদ ইবনে হামলঃ ষষ্ঠ খণ্ড-পৃঃ ২৫৬) হৃদয়বিয়ার সন্ধিতে উম্মে সালমা মহানবীর সাথে ছিলেন। সন্ধির পর মহানবী সাল্লাল্লাহু আলাইহি ওয়াসাল্লাম নির্দেশ দিলেন সবাই হৃদয়বিয়াতে কুরবানী করবে। কিন্তু সবাই (এই সন্ধির কারণে) এত বেশী মর্মাহত ছিল যে, কেউই মহানবীর ডাকে উঠে দাঁড়ালো না, এমনকি (বুখারী শরীফে আছে) তিনবার বলার পরও কেউই আত্মহী হল না। (এই সন্ধির সমস্ত শর্ত আপাতদৃষ্টিতে মুসলমানদের সরাসরি বিরুদ্ধে ছিল, সবাই সেজন্য ব্যথিত, বেদনার্ত ও ক্রুদ্ধ ছিল)। মহানবী সাল্লাল্লাহু আলাইহি ওয়াসাল্লাম ঘরে এলেন এবং উম্মে সালমাকে উক্ত ঘটনা ব্যক্ত করলেন। উম্মে সালমা (রাযিঃ) বললেনঃ আপনি কাউকে কিছু বলবেন না বরং বাইরে এসে নিজে কুরবানী করুন এবং ইহরাম খুলার জন্যে চুল কেটে নিন। মহানবী সাল্লাল্লাহু আলাইহি ওয়াসাল্লাম বাইরে এসে কুরবানী করলেন এবং চুল মুড়ন করলেন। মহানবী সাল্লাল্লাহু আলাইহি ওয়াসাল্লামকে এসব করতে দেখে সবার দৃঢ় বিশ্বাস হল, (সন্ধির) এই সিদ্ধান্তে কোন পরিবর্তন হবে না তখন সকলেই কুরবানী করল এবং ইহরাম খুলে ফেললো। ভীড় এত বেশী ছিল যে, একজন আরেকজনের উপর গিয়ে পড়ছিল এবং দ্রুততা এরকম ছিল যে, প্রতি ব্যক্তিই চুল ছাটার কাজ করছিল।

(সহীহ বুখারী, ষষ্ঠ খণ্ড পৃঃ ৩৮০)

উম্মে সালমা (রাযিঃ)-এর এই ধারণা মনস্তত্ত্বের একটি বড় সমস্যার সমাধান নির্দেশ করে এবং এ থেকে বোঝা যায় যে, সকলের মানস-প্রকৃতি অনুধাবনের ক্ষেত্রে তিনি কী রকম যোগ্যতা রাখতেন। ইমামুল হারামাইন বললেনঃ কোমল প্রজাতির পুরো ইতিহাস নির্ভুল বিবেচনার এরকম অসাধারণ কোন দৃষ্টান্ত উপস্থিত করতে পারে না।

(জুরকানী আলাল মাওয়াহিব, তৃতীয় খণ্ড, পৃঃ ২৭২)

খায়বরের যুদ্ধে অংশগ্রহণ করেছিলেন। মরহবের দাঁতের উপর তলোয়ার পড়লে তা ভেঙ্গে যাওয়ার আওয়াজ তার কানে এসেছিল। (ইসতিআব ইবনু আবদিল বার, দ্বিতীয় খণ্ড, পৃঃ ৮০৩) নবম হিজরীতে ইলার ঘটনা ঘটে। হযরত উমর (রাযিঃ) হযরত হাফসা (রাযিঃ)কে সতর্ক করবার পর হযরত উম্মে সালমার কাছে এলেন, (উম্মে সালমা তার প্রিয় ছিল) তাঁর সাথেও এ বিষয়ে (অর্থাৎ ইলার বিষয়ে) কথা তুললেন, উম্মে সালমা (রাযিঃ) উত্তরে বললেনঃ

عجبنا يا ابن الخطاب دخلت في كل شيء حتى تبتغي بين رسول الله

ﷺ وازواجه

অর্থাৎ ‘ওহে খাত্তাবের পুত্র উমর! আশ্চর্য হই, তুমি সব ব্যাপারই নাক গলাচ্ছো, এমনকি মহানবী সাল্লাল্লাহু আলাইহি ওয়াসাল্লাম এবং তাঁর স্ত্রীদের মধ্যকার বিষয়ে মাথা ঘামাচ্ছো।’

(সহীহ বুখারী, দ্বিতীয় খণ্ড, পৃঃ ৭৩০)

উত্তরটি যেহেতু অতিরিক্ত রকম শুষ্ক ছিল, হযরত উমর (রাযিঃ) চূপ হয়ে গেলেন এবং উঠে চলে গেলেন। রাত্রে এই সংবাদ ছড়িয়ে পড়ল যে, মহানবী সাল্লাল্লাহু আলাইহি ওয়াসাল্লাম তাদের (স্ত্রীদেরকে) তালাক দিয়ে দিয়েছেন। সকালে হযরত উমর (রাযিঃ) মহানবী সাল্লাল্লাহু আলাইহি ওয়াসাল্লাম-এর কাছে এল এবং সমস্ত ঘটনা বর্ণনা করল, যখন উম্মে সালমার কথা উল্লেখ করলেন, তখন মহানবী সাল্লাল্লাহু আলাইহি ওয়াসাল্লাম হাসলেন।

বিদায় হজ্জে (দশম হিজরী) উম্মে সালমা (রাযিঃ) যদিও অসুস্থ ছিলেন তবুও মহানবীর সঙ্গে এলেন, নবহান (গোলামের নাম) উটের রশি ধরেছিল, মহানবী সাল্লাল্লাহু আলাইহি ওয়াসাল্লাম বললেন, মকাতিব গোলামের (শর্তসাপেক্ষে মুক্তি পাওয়ার দাস) কাছে যদি এমন পরিমাণ সম্পদ থাকে যে, তা দিয়ে স্বাধীন হয়ে যেতে পারে, তখন তার কাছ থেকে পর্দা করা জরুরী হয়ে যায়। (মুসনাদে আহমাদ বিন হাম্বল, ষষ্ঠ খণ্ড, পৃঃ ২৮৯) তওয়াফের বিষয়ে বললঃ ফজরের নামাযের সময় যদি হয়, তুমি উটের উপর থেকেই তওয়াফ করবে। উম্মে সালমা (রাযিঃ) সেভাবেই করেন।

(সহীহ বুখারী, প্রথম খণ্ড, পৃঃ ২১৯, ২২০)

এগার হিজরীতে মহানবী সাল্লাল্লাহু আলাইহি ওয়াসাল্লাম অসুস্থ হল। অসুস্থতা যখন বেড়ে গেল মহানবী সাল্লাল্লাহু আলাইহি ওয়াসাল্লাম হযরত আয়েশার ঘরে চলে গেলেন। হযরত উম্মে সালমা (রাযিঃ) অধিকাংশ সময়েই তাঁকে দেখতে যেতেন। একদিন মহানবী সাল্লাল্লাহু আলাইহি ওয়াসাল্লাম বেশী অসুস্থ হলে, হযরত উম্মে সালমা (রাযিঃ) চীৎকার করে ওঠেন, মহানবী সাল্লাল্লাহু আলাইহি ওয়াসাল্লাম নিষেধ করেন, বললেনঃ এটি মুসলমানের স্বভাব নয়। (তাবকাত-ই-ইবনে সা'আদ, দ্বিতীয় খণ্ড, পৃঃ ১৩) একদিন অসুস্থতা বৃদ্ধি পেলে স্ত্রীরা নবীজীকে ঔষধ পান করাতে চাইলেন, কিন্তু তাঁর ইচ্ছে ছিল না। তিনি নিষেধ করলেন; কিন্তু যখন তিনি সংজ্ঞাহীন হয়ে ছিলেন তখন হযরত উম্মে সালমা (রাযিঃ) এবং আসমা বিনতে উমাইস (রাযিঃ) তাঁকে ঔষধ খাইয়ে দেন। (সহীহ বুখারী, দ্বিতীয় খণ্ড, পৃঃ ৬৪১ এবং তাবকাত-ই-ইবনে সা'আদ, ২য় খণ্ড, পৃঃ ৩২)

কোন কোন বর্ণনায় এরকম আছে, তারা ঔষধ পান করাননি, তাঁরা পরামর্শ দিয়েছিলেন কেবল। সেই সময় হযরত উম্মে সালমা (রাযিঃ) এবং উম্মে হাবিবা, (যিনি হাবশা হয়ে এসেছিল) একদিন হাবশার খৃষ্টীয় উপাসনালয়ের (যা খুব সম্ভব রোমান ক্যাথলিক গীর্জা হবে) এবং তার মূর্তি ও ছবি প্রভৃতির উল্লেখ করেন। মহানবী সাল্লাল্লাহু আলাইহি ওয়াসাল্লাম বললেনঃ তাদের মধ্যে যখনই কোন পুণ্যবান ব্যক্তি মারা যায়, তাঁর কবরকে তারা উপাসনাগার করে তোলে এবং সেই (মৃত পুণ্যবান) ব্যক্তির একটি মূর্তি নির্মাণ করে দাড় করিয়ে দেয়, মহাপ্রলয়ের দিবসে মহান আল্লাহর দৃষ্টিতে এরা নিকৃষ্টতম সৃষ্টি হিসেবে গণ্য হবে।

(সহীহ বুখারী, সহীহ মুসলিম)

মৃত্যুর পূর্বে মহানবী সাল্লাল্লাহু আলাইহি ওয়াসাল্লাম হযরত ফাতিমা (রাযিঃ)-এর কানে কানে কথা বলেছিলেন, হযরত আয়েশা (রাযিঃ) তখন চঞ্চল-অস্থির হয়ে জিজ্ঞেস করতে লাগলেন সেকথা। কিন্তু উম্মে সালমা (রাযিঃ) তখন তাকে কিছুই জিজ্ঞেস করল না, মহানবী সাল্লাল্লাহু আলাইহি ওয়াসাল্লাম-এর ইন্তেকালের পর জিজ্ঞেস করলেন।

(তাবকাত-ই-ইবনে সা'আদ, ২য় খণ্ড, পৃঃ ৪০)

একষটি হিজরীতে হযরত হোসাইন (রাযিঃ) শাহাদাত বরণ করেন। হযরত উম্মে সালমা (রাযিঃ) স্বপ্নে দেখলেনঃ মহানবী সাল্লাল্লাহু আলাইহি ওয়াসাল্লাম এসেছেন, খুবই বিমর্ষ, মাথা এবং চুল ধুলোয় ভরা, তিনি জিজ্ঞেস করলেনঃ ইয়া রাসূলুল্লাহ! কি খবর? রাসূলুল্লাহ সাল্লাল্লাহু আলাইহি ওয়াসাল্লাম বললেনঃ হোসাইনের মৃত্যু-স্থান থেকে ফিরছি। উম্মে সালমা (রাযিঃ) জেগে উঠলেন, চক্ষু কোটর থেকে বিগলিত অশ্রু গড়িয়ে পড়ছিল তখন।

(সহীহ তিরমিযী, পৃঃ ২২৪)

সে সময়ই তাঁর কণ্ঠ থেকে বের হল, ইরাকবাসীরা হযরত হোসাইন (রাযিঃ)কে হত্যা করেছে, আল্লাহ তাদের হত্যা করুন, হোসাইনকে তারা অপমান করেছে, আল্লাহ তাদেরকে অভিশপ্ত করুন।

(মুসনাদে আহমদ ইবনে হাম্বল, ষষ্ঠ খণ্ড, পৃঃ ২৯৮)

তেষটি হিজরীতে হাররার ঘটনার পর সিরিয় বাহিনী মক্কা গেল, যেখানে আব্দুল্লাহ বিন জুবাইর (রাযিঃ) আশ্রয় গ্রহণ করেছিলেন। যেহেতু মহানবী সাল্লাল্লাহু আলাইহি ওয়াসাল্লাম একটি হাদীসে এ ধরনের একটি বাহিনীর কথা উল্লেখ করেছিলেন, কারো কারো সন্দেহ হল এবং তারা তা হযরত উম্মে সালমা (রাযিঃ)কে জিজ্ঞেস করল, তিনি বললেন, মহানবী সাল্লাল্লাহু আলাইহি ওয়াসাল্লাম এরকম বলেছেনঃ এক ব্যক্তি মক্কায় আশ্রয় গ্রহণ করবে। তার সাথে মোকাবিলা করবার জন্যে যে বাহিনী আসবে তারা সেখানেই প্রান্তরে ধ্বংস পড়বে, (উম্মে সালমা (রাযিঃ)কে জিজ্ঞেস করল) তাঁরাও কি ধ্বংস যাবে, যাদেরকে জোর করে বাহিনীর অন্তর্ভুক্ত করা হয়েছে? বললেন, হ্যাঁ, তবে মহাশ্রলয়ের দিবসে নিজ নিজ বিশ্বাস ও প্রত্যয় অনুযায়ী তারা উত্তীর্ণ হবে। হযরত আবু জাফর (রাযিঃ) বলতেনঃ এই ঘটনা মদীনার প্রান্তরে ঘটবে।

(সহীহ মুসলিম, দ্বিতীয় খণ্ড, পৃঃ ৪৯৩, ৪৯৪)

মৃত্যু : যে বছর হাররার ঘটনা ঘটলো, (৬৩ হিজরী) সে বছরই উম্মে সালমা (রাযিঃ) মৃত্যুবরণ করেন, সে সময় তাঁর বয়স ছিল চুরাশি বছর। হযরত আবু হোরাযরা (রাযিঃ) তাঁর জানাযার নামায পড়ান। জান্নাতুল বকীতে তাঁকে সমাধিস্থ করা হয়।

(জুরকানী আলাল মাওয়াহিব, তৃতীয় খণ্ড, পৃঃ ২৭৬)

সেই সময় ওলিদ বিন উতবা (আবু সুফিয়ানের পৌত্র) মদীনার গভর্ণর ছিলেন। উম্মে সালমা (রাযিঃ) বলে গিয়েছিল যে, ওলিদ যেন তাঁর জানাযা না পড়ায়। সেজন্যে ওলিদ অরণ্যের দিকে চলে যায় এবং নিজেই আবু হোরাযরা (রাযিঃ)কে পাঠিয়ে দেন।

(তারিখে তাবরী, তৃতীয় খণ্ড, পৃঃ ২৪৪৩)

সন্তান-সন্ততি : উম্মে সালমা (রাযিঃ)-এর প্রথম স্বামী থেকে যে সব সন্তান হয়েছে, তাদের নাম হচ্ছে :

সালমা : হাবশায় জন্ম হয়, মহানবী সাল্লাল্লাহু আলাইহি ওয়াসাল্লাম হযরত হামযার কন্যা উমামার সঙ্গে তাঁর বিবাহ দেন।

ওমর : মহানবী সাল্লাল্লাহু আলাইহি ওয়াসাল্লাম-এর সঙ্গে উম্মে সালমা (রাযিঃ)-এর বিবাহ তিনিই করিয়ে দেন। হযরত আলী (রাযিঃ)-এর খিলাফতকালে তিনি পারস্য এবং বাহরাইনের প্রশাসক ছিলেন।

দুররা : তাঁর কথা সহীহ বুখারীতে উল্লিখিত হয়েছে। উম্মে হাবিবা (রাযিঃ) (মহানবীর পবিত্র পত্নীদের একজন) মহানবী সাল্লাল্লাহু আলাইহি ওয়াসাল্লামকে বললেনঃ আমরা শুনেছি আপনি ‘দুররা’কে বিবাহ করতে চান? মহানবী সাল্লাল্লাহু আলাইহি ওয়াসাল্লাম বললেনঃ এটি কী করে সম্ভব? আমি তাঁকে যদি পালন নাও করে থাকতাম, তবুও তাকে বিয়ে করা আমার বৈধ হত না। কারণ সে আমার দুধ ভাইয়ের কন্যা।

(সহীহ বুখারী, দ্বিতীয় খণ্ড, পৃঃ ৭৬৪)

যয়নব : প্রথম নাম ছিল বাররা, কিন্তু মহানবী সাল্লাল্লাহু আলাইহি ওয়াসাল্লাম যয়নব নাম রাখেন।

(জুরকানী আলাল মাওয়াহিব, তৃতীয় খণ্ড, পৃঃ ২৭২)

অবয়ব সংগঠন : আল-ইসাবা-এহ্ছে আছে :

كانت ام سلمة موصوفة بالجمال البارع

অর্থাৎ, উম্মে সালমা (রাযিঃ) অসামান্য রূপসী ছিল।

বিন সা‘আদ বর্ণনা করেছেন যে, যখন হযরত আয়েশা (রাযিঃ) উম্মে সালমা (রাযিঃ)-এর রূপের কথা জানতে পারেন, খুবই ঈর্ষান্বিত ও বিরক্ত হন। কিন্তু এটি ওয়াক্কেদির বর্ণনা, কাজেই গুরুত্বহীন।

(তাবকাত-ই-ইবনে সা‘আদ, ৮ম খণ্ড, পৃঃ ৬৬/মুসনাদে আহমদ ইবনে হাম্বল, ষষ্ঠ খণ্ড, পৃঃ ২৮৯)

উম্মে সালমা গাঢ় ঘনচুলের অধিকারী ছিলেন।

মহত্ব ও মহিমা : জ্ঞানের দিক থেকে যদিও সমস্ত পত্নী উন্নত স্তরের অধিকারী ছিলেন, তবুও হযরত আয়েশা এবং উম্মে সালমা (রাযিঃ) তাদের মধ্যে তুলনাহীন ছিলেন, যেমন মাহমুদ বিন লবিদের উচ্চারণ :

كان ازواج النبی ﷺ يحفظن من حديث النبي ﷺ كثيرا ولا مثالا لعائشةؓ. ام سلمةؓ

অর্থাৎ, যদিও মহানবীর সকল পত্নী রাসূলুল্লাহ সাল্লাল্লাহু আলাইহি ওয়াসাল্লাম-এর প্রচুর হাদীছ স্মৃতিধার্য করেছিলেন, তবুও তাদের মধ্যে হযরত আয়েশা (রাযিঃ) এবং উম্মে সালমা (রাযিঃ)-এর কোন প্রতিদ্বন্দ্বী ছিল না।

(তাবকাত-ই-ইবনে সা‘আদ, দ্বিতীয় খণ্ড, পৃঃ ১২৬)

মারওয়ান বিন হেকম তাঁর কাছ থেকে বিভিন্ন বিষয় জিজ্ঞেস করতেন এবং প্রকাশ্য বলতেন :

كيف نسأل احداً وفينا ازواج النبي ﷺ

অর্থাৎ, ‘মহানবীর পত্নীরা থাকতে আমরা অন্যদের কাছে জিজ্ঞেস করবো?’

(মুসনাদে আহমদ ইবনে হাম্বল, ষষ্ঠ খণ্ড, পৃঃ ৩১৭)

হযরত আবু হোরাযরা (রাযিঃ) এবং হযরত আবদুল্লাহ বিন আব্বাস (রাযিঃ) জ্ঞানের সমুদ্র হওয়া সত্ত্বেও সালমার জ্ঞান-সমুদ্র থেকে স্বয়ংসম্পূর্ণ ছিলেন না। তাবেয়ীনদের একটি বড় অংশও তাঁর বিদ্যাশিবিরে আনত ছিল। (মুসনাদে আহমাদ, ষষ্ঠ খণ্ড, পৃঃ ৩১২) কুরআনুল কারীম ভাল পড়তেন এবং মহানবী সাল্লাল্লাহু আলাইহি ওয়াসাল্লাম-এর মত পড়তে পারতেন। একবার এক ব্যক্তি তাঁকে জিজ্ঞেস করল, মহানবী সাল্লাল্লাহু আলাইহি ওয়াসাল্লাম কিভাবে কুরআন পাঠ করতেন? তিনি বললেন, এক একটি আয়াত পৃথক পৃথক করে পড়তেন— এরপর নিজে পড়ে শুনালেন।

(মুসনাদে আহমদ ইবনে হাম্বল, ষষ্ঠ খণ্ড, পৃঃ ৩০০, ৩০২)

হাদীছের ক্ষেত্রে তাঁর হযরত আয়েশা (রাযিঃ) ছাড়া অন্য কোন প্রদ্বন্দ্বী ছিল না। উম্মে সালমা (রাযিঃ) থেকে ৩৭৮টি হাদীছ বর্ণিত আছে। এই হিসেবে তিনি সাহাবী হাদীছ বর্ণনাকারীদের মধ্যে তৃতীয় স্তরের সাহাবী।

হাদীছ শুনবার গভীর আগ্রহ লালন করতেন। একদিন বিনি কেটে চুল ঠিক করছিলেন সে সময় মহানবী সাল্লাল্লাহু আলাইহি ওয়াসাল্লাম খোতবা দেয়ার জন্যে দণ্ডায়মান হলেন। মহানবী ‘হে সমবেত মানুষ!’ উচ্চারণ করতেই তিনি তাড়াতাড়ি চুল বেঁধে ঝটপট দাঁড়িয়ে গেলেন এবং মহানবীর পুরো বক্তৃতা শুনলেন :

صاحب العقل البالغ والرأى الصائب

অনুসন্ধিৎসু গবেষক ছিলেন। (ই‘লামুল মুআক্কেইন, প্রথম খণ্ড, পৃঃ ১৩)

ইসাৰা গ্রন্থকার তার সম্পর্কে বর্ণনায় বলেছেন :

‘উম্মে সালমা পূর্ণ প্রজ্ঞাবান ও বিশুদ্ধ বিবেচক ছিলেন’।

মনীষী বিন কিয়াম লিখেছেনঃ উম্মে সালমার ফতোয়াসমূহ যদি একত্রিত করা যায়। তাহলে তা দিয়ে একটি ক্ষুদ্র পুস্তিকা তৈরি হতে পারে এবং তার ফতোয়াসমূহের বিশেষ বৈশিষ্ট্য এই যে, সেগুলোর অধিকাংশই ইমাম মুসলিম ও ইমাম বুখারী উভয়েই সমর্থন করেছেন এবং এই মতৈক্য তাঁর জটিল দূরদর্শী মেধা ও মনীষার একটি দৃষ্টান্ত।

(মুসনাদে আহমদ, ষষ্ঠ খণ্ড, পৃঃ ২৯৯; সহীহ বুখারী, ২য় খণ্ড, পৃঃ ২৩৯)

তাঁর দূরস্পর্শী মনীষার নিম্নোক্ত ঘটনাসমূহ সাক্ষ্য প্রদান করে :

হযরত আবদুল্লাহ বিন জুবাইর (রাযিঃ) আসরের নামাযের পর দু‘রাকাত নামায পড়তেন। মরওয়ান জিজ্ঞেস করলেন, আপনি এ নামায কেন পড়েন? তিনি বললঃ কারণ মহানবী সাল্লাল্লাহু আলাইহি ওয়াসাল্লাম পড়েছেন এবং তিনি এই হাদীছ হযরত

আয়েশা (রাযিঃ)-এর সূত্রে শুনেছেন। মরওয়ান সত্যতা যাচাইয়ের জন্যে হযরত আয়েশা (রাযিঃ)-এর কাছে লোক পাঠালেন। হযরত আয়েশা (রাযিঃ) বললেন, তিনি এ হাদীছ উম্মে সালমা (রাযিঃ)-এর সূত্রে পেয়েছেন। তখন উম্মে সালমা (রাযিঃ)-এর কাছে লোক গেল এবং তাঁকে একথা জানানো হলে, তিনি বললেন :

يُغْفِرُ اللَّهُ لِعَائِشَةَ لَقَدْ وَضَعْتَ أَمْرِي عَلَى غَيْرِ مَوْضِعِهِ أَوْلَمَ أَخْبَرَهَا

رَسُولُ اللَّهِ ﷺ قَدْ نَهَى عَنْهُمَا

অর্থাৎ, ‘আল্লাহ হযরত আয়েশা (রাযিঃ)কে ক্ষমা করবেন, তিনি আমার কথা বোঝেননি। (মুসনাদে আহমদ ইবনে হাম্বল, ষষ্ঠ খণ্ড, পৃঃ ৩০৩)

আমি কি তাকে এ কথা বলিনি যে, মহানবী সাল্লাল্লাহু আলাইহি ওয়াসাল্লাম সেই নামায পড়তে নিষেধ করেছেন। (মুসনাদে ইমাম আহমদ, ষষ্ঠ খণ্ড, পৃঃ ৩০৬, ৩০৭)

হযরত আবু হোরাযরা (রাযিঃ)-এর ধারণা ছিল রমযান মাসে বীর্যপাতজনিত অপবিত্রতার গোসল সাথে সাথে সকালে ঘুম থেকে উঠে করে ফেলা জরুরী, অন্যথা রোযা নষ্ট হয়ে যাবে। এক ব্যক্তি গিয়ে এটি হযরত আয়েশা (রাযিঃ) এবং উম্মে সালমা (রাযিঃ)কে জিজ্ঞেস করল- তাঁরা দু’জনেই বললেনঃ স্বয়ং মহানবী সাল্লাল্লাহু আলাইহি ওয়াসাল্লামই তো বীর্যপাত- উত্তর অবস্থায় রোযাদার থাকতেন।

(মুসনাদে আহমদ ইবনে হাম্বল, ষষ্ঠ খণ্ড, ৩০৬, ৩০৭)

আবু হোরাযরা (রাযিঃ) এটি শুনে বিস্ময়ে বিচলিত হয়ে উঠলেন এবং নিজ ধারণা প্রত্যাহার করে নিলেন এবং বললেনঃ আমি কী করবো ফযল বিন আক্বাসই তো আমাকে এরকম বলেছিল। কিন্তু এটি তো প্রত্যক্ষ সত্য, ফযল বিন আক্বাসের চেয়ে হযরত আয়েশা (রাযিঃ) ও উম্মে সালমা (রাযিঃ)-এর জ্ঞান অনেক বেশী। এরপর আবু হোরাযরা (রাযিঃ) তাঁর পূর্বের ফতোয়া ফিরিয়ে নেন। (মুসনাদে আহমদ, ষষ্ঠ খণ্ড, পৃঃ ৩০৬) একবার কিছু সাহাবী তাঁকে বললেনঃ রাসূলের অন্তর্জীবন সম্পর্কে কিছু বলুন। উম্মে সালমা (রাযিঃ) বললেনঃ তাঁর অন্তর ও বাহির একই রকম। এরপর মহানবী সাল্লাল্লাহু আলাইহি ওয়াসাল্লাম এলে উম্মে সালমা (রাযিঃ) এই কথা তাঁকে জানালেন। মহানবী সাল্লাল্লাহু আলাইহি ওয়াসাল্লাম বললেনঃ তুমি খুব ভাল করেছ।

(মুসনাদে আহমদ, ষষ্ঠ খণ্ড, পৃঃ ৩০৯)

হযরত উম্মে সালমা (রাযিঃ) পরিষ্কার উত্তর দিতেন এবং চেষ্টা করতেন যাতে প্রশ্নকারীর প্রত্যাশা পূর্ণ হয়ে যায়। একবার একজনকে কি একটি বিষয় সম্পর্কে বললেন, সে ব্যক্তি তাঁর কাছ থেকে উঠে অন্য স্ত্রীদের কাছে গেল, তাঁরাও একই উত্তর দিলেন। সে ফিরে এসে উম্মে সালমা (রাযিঃ)কে এই সংবাদ দিলেন, উম্মে সালমা (রাযিঃ) বললঃ অপেক্ষা কর, আমি তোমার প্রত্যাশা পূরণ করবো, আমি এ বিষয়ে রাসূলুল্লাহ সাল্লাল্লাহু আলাইহি ওয়াসাল্লাম-এর হাদীছ শুনেছি।

(মুসনাদে আহমদ, ষষ্ঠ খণ্ড, পৃঃ ২৯৭)

হাদীছ-ফিকহ (রাসূলের বাণী ও ইসলামী আইনতত্ত্ব) ছাড়াও ‘রহস্যবিজ্ঞান’ বিষয়ে উম্মে সালমা (রাযিঃ)-এর অধিকার ছিল। এই শাস্ত্রে হযরত হোযাইফা (রাযিঃ) ছিলেন বিশিষ্ট বিদ্বান। একবার হযরত আবদুর রহমান বিন আউফ (রাযিঃ) উম্মে সালমা (রাযিঃ)-এর কাছে এলে উম্মে সালমা (রাযিঃ) বললেনঃ রাসূলুল্লাহ সাল্লাল্লাহু আলাইহি ওয়াসাল্লাম-এর কথা, কিছু সাহাবী এরকম আছে, যাদেরকে আমার মৃত্যুর পরে আমিও দেখবো না, তারাও আমাকে দেখবে না, রাসূলের এই বাণী শুনে ভীত হয়ে আবদুর রহমান বিন আউফ (রাযিঃ) হযরত উমর (রাযিঃ)-এর কাছে গেলেন এবং তাকে এই হাদীছের কথা জানালেন। হযরত উমর (রাযিঃ) উম্মে সালমা (রাযিঃ)-এর কাছে এলেন এবং বললেনঃ সত্য করে বলুন আমিও কি তাঁদের মধ্যে আছি? উম্মে সালমা (রাযিঃ) বললেনঃ না, তবে তুমি ছাড়া আমি আর কাউকে আলাদা করবো না।

(মুসনাদে আহমদ ইবনে হাম্বল, ষষ্ঠ খণ্ড, পৃঃ ৩০৭)

হযরত উম্মে সালমা (রাযিঃ) থেকে যারা হাদীছ বর্ণনা করেছেন, তারা সংখ্যায় অনেক, সামান্য সংখ্যক ব্যক্তির নাম নিম্নে উদ্ধৃত হল :

আবদুর রহমান বিন আবি বকর, উসামা বিন যাইদ, হিন্দ বিনতে আল-হারেস আল ফেরাসিয়া, সুফিয়া বিনতে শায়বা, উমর (রাযিঃ), জয়নব (রাযিঃ), (উম্মে সালমার কন্যা) মুসআব বিন আবদুল্লাহ, নুবহান (গোলাম), আবদুল্লাহ বিন রাফি, নাফে, শুআবা, শুআবার পুত্র, আবু বুকাইর, হাসান বসরীর আন্মা খিইরা, সুলাইমান বিন ইসার, আবু উসমান আলহিন্দি, হামীদ, আবু সালমা, সায়ীদ বিন মুসাইয়িব আবু ওয়ায়েল, সুফিয়া বিনতে মুহসেন, শুআবা, আবদুর রহমান বিন হারেস বিন হিশাম: ইকরামা: আবু বকর বিন আবদুর রহমান; উসমান বিন আবদুল্লাহ; উরওয়া বিন জুবাইর; বিন আব্বাসের গোলাম কুরাইব; কুবাইসা বিন যুআইব; ইআশলা বিন মমলক।

চরিত্র ও স্বভাব : হযরত উম্মে সালমা (রাযিঃ) খুবই পূত পবিত্র ইবাদত-নিবেদিত জীবন যাপন করতেন। একবার একটি হার গলায় পরেছিলেন, যার কিছু অংশ স্বর্ণের ছিল। মহানবী সাল্লাল্লাহু আলাইহি ওয়াসাল্লাম বিমুখতা প্রকাশ করলে সাথে সাথে তা ফেলে দেন।

(মুসনাদে আহমদ ইবনে হাম্বল, ষষ্ঠ খণ্ড, পৃঃ ৩২২, ৩৩৫)

প্রতি মাসে ৩ দিন (সোমবার, শুক্রবার এবং বৃহস্পতিবার) রোযা রাখতেন। পুণ্যের সন্ধানী থাকতেন। তার প্রথম স্বামীর সন্তানেরা তাঁর সাথে থাকতো, তিনি তাদের উত্তমরূপে প্রতিপালন করতেন। মহানবী সাল্লাল্লাহু আলাইহি ওয়াসাল্লামকে এই ব্যাপারে জিজ্ঞেস করেছিলেন এ দ্বারা কি তিনি ছওয়াব পাবেন? মহানবী সাল্লাল্লাহু আলাইহি ওয়াসাল্লাম বলেছিলঃ হ্যাঁ।

(মুসনাদে আহমাদ, ষষ্ঠ খণ্ড, পৃঃ ২৮৯/সহীহ বুখারী, প্রথম খণ্ড, পৃঃ ১১৯৮)

ভাল কাজে অংশগ্রহণ করতেন। পবিত্রতার আয়াত (আয়াতে ততহীর) তাঁরই ঘরে অবতীর্ণ হয়েছিল। মহানবী সাল্লাল্লাহু আলাইহি ওয়াসাল্লাম হযরত ফাতিমা (রাযিঃ) এবং হযরত হোসাইন (রাযিঃ)কে ডেকে চাদর গায়ে দিয়ে দিলেন এবং বলল 'হে আল্লাহ! এরা আমার পরিবারের, এদের অপবিত্রতা দূর কর এবং এদেরকে পবিত্র কর।' উম্মে সালমা (রাযিঃ) এই দু'আ শুনে বললেনঃ নবীজী আমিও তাদের সাথে আছি, মহানবী সাল্লাল্লাহু আলাইহি ওয়াসাল্লাম বললেনঃ তুমি নিজের জায়গায় আছ এবং ভাল আছ।

(তিরমিযী শরীফ, পৃঃ ৫৩০)

সৎকাজের আদেশ করবার এবং অবৈধ কাজের নিষেধ করবার অনুসারী ছিলেন। নামাযের সময় সীমা কিছু কিছু শাসক পরিবর্তন করেছিল। (অর্থাৎ নামাযের মূল সময় সীমার পরিবর্তন করেনি। তারা অধিকতর উত্তম সময়ের অর্থাৎ মুসতাহাব সময়ের পরিবর্তন করেছিল) উম্মে সালমা (রাযিঃ) তাদের সতর্ক করেন এবং তাদেরকে বলেনঃ মহানবী সাল্লাল্লাহু আলাইহি ওয়াসাল্লাম যেখানে যোহরের নামায অবিলম্বে পড়তেন, সেখানে তোমরা আসরের নামায অবিলম্বে পড়ছো।

(মুসনাদে আহমাদ ইবনে হাম্বল, ষষ্ঠ খণ্ড, পৃঃ ২৮৯)

একদিন তাঁর ভাইপো দু'রাকাত নামায পড়ছিল। সিজদা স্থানে ধুলো থাকার কারণে সে সিজদার সময় তা পরিষ্কার করে নিয়েছিল। হযরত উম্মে সালমা (রাযিঃ) তাঁকে এই বলে বাঁধা দিলেন যে, এটি মহানবী সাল্লাল্লাহু আলাইহি ওয়াসাল্লাম-এর স্বভাব বিরোধী। মহানবী সাল্লাল্লাহু আলাইহি ওয়াসাল্লাম-এর এক গোলাম একবার এরকম করলে মহানবী সাল্লাল্লাহু আলাইহি ওয়াসাল্লাম বলেছিলেনঃ তোমার চেহারা আল্লাহর রাস্তায় ধুলোযুক্ত হোক।

(মুসনাদে আহমদ ইবনে হাম্বল, ষষ্ঠ খণ্ড, পৃঃ ৩০১)

খুবই দানশীল ছিলেন এবং অন্যদেরও দানশীলতার দিকে আগ্রহী করে তুলতেন। একবার আবদুর রহমান বিন আউফ (রাযিঃ) এসে তাঁকে বললেনঃ আন্মা আমার কাছে এত সম্পদ জমা পড়ে গেছে যে, এখন তা নষ্ট হয়ে যাওয়ার ভয় হয়। তিনি বললেনঃ পুত্র! তা খরচ কর। মহানবী সাল্লাল্লাহু আলাইহি ওয়াসাল্লাম বলেছেনঃ অনেক সাহাবী এরকম আছে যারা আমার মৃত্যুর পরে আমাকে আর কখনো দেখতে পাবে না।

(মুসনাদে আহমদ ইবনে হাম্বল, ষষ্ঠ খণ্ড, পৃঃ ২৯০)

একবার কিছু সংখ্যক ফকির যার মধ্যে মহিলাও ছিল তাঁর ঘরে এল এবং খুবই মিনতি নিয়ে কিছু চাইল। উম্মে হাসান বসা ছিলেন, তিনি কড়া নিষেধ করল— কিন্তু উম্মে সালমা (রাযিঃ) বললঃ আমাদের সে রকম নির্দেশ নেই, এরপর দাসীকে বললেনঃ এদেরকে কিছু দিয়ে বিদায় করে দাও কিছু না হোক অন্ততঃ এক টুকরো শুকনো খেজুর তাদের হাতে রেখে দাও।

(আল ইসতিয়াব, দ্বিতীয় খণ্ড, পৃঃ ৮০৩)

মহানবী সাল্লাল্লাহু আলাইহি ওয়াসাল্লামকে তিনি এত ভালবাসতেন যে, মহানবীর কিছু চুল তিনি ঝরকতের জন্যে রেখে দিয়েছিলেন, অনেক মানুষকে তা তিনি দেখাতেন।

(মুসনাদে আহমদ ইবনে হাম্বল, ষষ্ঠ খণ্ড, পৃঃ ২৯৬)

মহানবী সাল্লাল্লাহু আলাইহি ওয়াসাল্লাম তাঁকে এমন ভালবাসতেন যে, একবার তিনি বলেছিলেনঃ আমার উল্লেখ কুরআনে না থাকার কারণ কী? এটি শুনে তিনি মিসরের উপর দণ্ডায়মান হয়ে এই আয়াত পাঠ করছিলেনঃ ‘ইন্নালা মুসলিমীনা ওয়ালা মুসলিমাতে ওয়ালা মু‘মিনীনা ওয়ালা মু‘মিনাতে’। (মুসনাদে আহমদ ইবনে হাম্বল, ষষ্ঠ খণ্ড, পৃঃ ৩০১)

এই আয়াত পড়ে মহানবী সাল্লাল্লাহু আলাইহি ওয়াসাল্লাম বুঝিয়ে দিতে চেয়েছিলেন যে, উল্লেখ নেই একথা সত্য নয়, উল্লেখ আছে— প্রত্যক্ষভাবে নাম ধরে হয়তো নেই, কিন্তু পরোক্ষভাবে। প্রচ্ছন্নভাবে—মু‘মিনাতে মুসলিমাতে (বিশ্বাসী মহিলারা) প্রভৃতি সম্বোধনের মধ্য দিয়ে উল্লেখ করা হয়েছে।

একবার হযরত উম্মে সালমা (রাযিঃ) মহানবী সাল্লাল্লাহু আলাইহি ওয়াসাল্লাম-এর পাশে বসা ছিলেন। হযরত জিররিল (আঃ) এলেন এবং কথাবার্তা বলতে লাগলেন। জিবরিল চলে যাবার পর উম্মে সালমা (রাযিঃ)কে জিজ্ঞেস করলেন, ইনি কে বলতে পার? তিনি বললেনঃ হযরত দাহয়্যা। (জিবরীল [আঃ] কখনো কখনো সাহাবী দাহয়্যাহ কলবীর রূপে নবীজীর কাছে আসতেন। -অনুবাদক) কিন্তু এই ঘটনা যখন মহানবী সাল্লাল্লাহু আলাইহি ওয়াসাল্লাম অন্যদের কাছে বর্ণনা করেন, তা থেকে জানা গেছে যে, ইনি ছিলেন জিবরীল (আঃ)। (সহীহ মুসলিম, দ্বিতীয় খণ্ড, পৃঃ ২৪১, মিশর থেকে প্রকাশিত সংস্করণ)

খুব সম্ভব এটি পর্দার আয়াত অবতীর্ণ হওয়ার পূর্বকাল ঘটনা।

হযরত যয়নব বিনতে জাহাশ (রাযিঃ)

তাঁর নাম ছিল যয়নব। উপনাম উম্মুল হেকাম। তিনি কুরাইশ গোত্রের আসাদ বিন হোযাইমা বংশের সন্তান ছিল। বংশক্রম এরকমঃ যয়নব বিনতে জাহাশ বিন রুমায বিন ইআমার বিন সাবরা বিন কসির বিন গানম বিন দাওদান বিন আসাদ বিন হোযাইমা। মায়ের নাম ছিল উমাইমা। তিনি ছিল রাসূলুল্লাহ সাল্লাল্লাহু আলাইহি ওয়াসাল্লাম-এর চাচা আবদুল মুত্তালিবের কন্যা। এই হিসেবে হযরত যয়নব রাসূলে কারীম সাল্লাল্লাহু আলাইহি ওয়াসাল্লাম-এর প্রকৃত ফুফাতো কোন হন।

ইসলাম গ্রহণ : নবুয়তের প্রাথমিক লগ্নে ইসলাম গ্রহণ করেন। ‘উসুদুল গাবা’ গ্রন্থে আছে :

كانت قديمة الاسلام

অর্থাৎ, ‘তিনি প্রথম দিককার মুসলমান ছিলেন’

(৫ম খণ্ড পৃঃ ৪৬৩)

বিবাহ : মহানবী সাল্লাল্লাহু আলাইহি ওয়াসাল্লাম নিজের স্বাধীনকৃত গোলাম যায়েদ বিন হারিসার সাথে যয়নবের বিয়ে দিয়েছিলেন। ইসলাম পৃথিবীতে সাম্যের যে শিক্ষা প্রচলন করেছে এবং উঁচু ও নীচু সবাইকে একই সমতলে এনে উপস্থিত করেছে; যদিও পৃথিবীতে তার অনেক উদাহরণ বিদ্যমান। কিন্তু তবু যয়নবের বিয়ের এই ঘটনা নিজের স্বরূপের দিক থেকে এসবের উপর তার অধিকার প্রতিষ্ঠিত করে। কারণ এর

মাধ্যমে ব্যবহারিক শিক্ষার (Practical Education) ভিত্তি নির্মিত হয়। কুরাইশ এবং বিশেষ করে হাশিম গোত্রের-কাবার নেতৃত্বের কারণে আরবের বুকে তারা যে মর্যাদার অধিকারী ছিল, তার তুলনায় ইয়েমেনের বাদশারাও তার মত সমমর্যাদা দাবী করতে সক্ষম হত না। কিন্তু ইসলাম শুধুমাত্র আল্লাহ ভীতিকে সম্মান ও শ্রেষ্ঠত্বের মূল্যমান হিসেবে চিহ্নিত করেছে এবং গর্ব ও ঔদ্ধত্যকে অন্ধকার-যুগের স্বভাব হিসেবে সনাক্ত করেছে। এই হিসেবে যায়িদ বিন হারিসা যদিও দৃশ্যতঃ গোলাম ছিল তবু যেহেতু তিনি বিশ্বাসী মুসলমান এবং সৎ মানুষ ছিলেন এজন্যে হযরত যয়নবের সাথে তাঁর বিয়ে দিতে মহানবী সাল্লাল্লাহু আলাইহি ওয়াসাল্লাম-এর কোন অসুবিধা হয়নি। সাম্যের শিক্ষা তো আছেই, এছাড়াও এই বিয়ে অন্য একটি উদ্দেশ্যও ছিল, যা 'উসুদুল গাবা' (৫ম খণ্ড, পৃঃ ৪৬৩) গ্রন্থে উদ্ধৃত হয়েছে।

تزوجهاليعلمها كتاب الله وسنة رسوله

অর্থাৎ, 'মহানবী সাল্লাল্লাহু আলাইহি ওয়াসাল্লাম যয়নবের সাথে যায়েদের বিয়ে এজন্যে করিয়ে দিয়েছিল, যেন তিনি তাঁকে কুরআন ও হাদীছ শিক্ষা দিতে পারেন।' প্রায় একবছর তারা বিবাহ সম্পর্কে যুক্ত থাকেন, কিন্তু এরপর হারিসা আর ঠিক থাকেননি। অসন্তোষ বাড়তে থাকে। হযরত যায়েদ বিন হারিসা নবীজীর কাছে এ বিষয়ে নালিশ করেন। (তিরমিযী শরীফ, পৃঃ ৫৩১) এক পর্যায়ে তাঁকে তালাক দিয়ে দিতে চান :

جاء زيد بن حارثة فقال يا رسول الله ﷺ ان زينب اشتد على لسانها
وأنا أريد ان أطلقها

অর্থাৎ, 'হযরত যায়েদ বিন হারিসা মহানবী সাল্লাল্লাহু আলাইহি ওয়াসাল্লাম-এর কাছে এল এবং বলেন যে, যয়নব আমার কথার উপর কথা বলে, তর্ক করে এবং আমি তাকে তালাক দিতে চাই। (ফতহুল বারী, ইবনে হাজার আসকালানী, ৮ম খণ্ড, পৃঃ ৪০৩)

কিন্তু মহানবী সাল্লাল্লাহু আলাইহি ওয়াসাল্লাম তাকে বার বার বুঝাতেন যে, তালাক দিয়ো না। কুরআনুল কারীমেও আছে :

وَإِذْ تَقُولُ لِلَّذِي أَنْعَمَ اللَّهُ عَلَيْهِ وَأَنْعَمْتَ عَلَيْهِ أَمْسِكْ عَلَيْكَ زَوْجَكَ وَاتَّقِ اللَّهَ

অর্থাৎ, এবং যখন তুমি সেই ব্যক্তিকে (যাকে আল্লাহ এবং তাঁর রাসূল করুণা করেছে) বলছিলেন যে, নিজের স্ত্রীকে বিবাহ সম্পর্কের মধ্যে রাখো এবং আল্লাহকে ভয় করো।

(সূরায়ে আহযাব, আয়াত নং ৫)

কিন্তু কিছুতেই সম্ভাব ও সুসম্পর্ক থাকলো না এবং শেষে হযরত যায়েদ বিন হারিসা (রাযিঃ) যয়নবকে তালাক দিয়ে দেন। হযরত যয়নব (রাযিঃ) ছিলেন নবীজীর বোন, তাঁর প্রতিপালনই তিনি বেড়ে উঠেছিলেন, নবীজীর কথার কারণেই যয়নব যায়েদের সাথে

এই বিবাহ সম্পর্ক মেনে নিয়েছিলেন- নয়তো এটি ছিল রুচিশ্রুতি-বিরুদ্ধ (যেহেতু যায়েদ গোলাম ছিলেন, স্বভাবতই মানবীয় মনোবৃত্তির কারণে তিনি এই সম্পর্ক পছন্দ করতে পারেননি।) যাহোক যখন তিনি তালাকপ্রাপ্ত হয়ে গেলেন, মহানবী সাল্লাল্লাহু আলাইহি ওয়াসাল্লাম তাকে আনন্দিত ও অভিনন্দিত করবার জন্যে নিজেই বিয়ে করে নিতে চাইলেন। কিন্তু আরবে তখনো এরকম একটি সংস্কার ছিল যে, পালিত পুত্রকেও আপন পুত্রের মত মনে করা হত। এজন্যে সাধারণ মানুষের ধারণা নিয়ে তিনি চিন্তাভাবনা করেছিল। কিন্তু যেহেতু এটি অন্ধকার যুগের প্রথমাত্র ছিল, আর সেই কুসংস্কার ধ্বংস করাই ছিল ইসলামের লক্ষ্য, এজন্যে এই আয়াত অবতীর্ণ হল :

وَتُخْفَى فِي نَفْسِكَ مَا اللَّهُ مُبْدِيهِ وَتَخْشَى النَّاسَ وَاللَّهُ أَحَقُّ أَنْ تَخْشَاهُ

অর্থাৎ, ‘আপনি অন্তরে লুকিয়ে রাখছেন সেই কথা, আল্লাহ যাকে প্রকাশ করে দেবেন এবং আপনি মানুষের প্রথাকে ভয় করছেন অথচ আল্লাহ ছাড়া আর কাউকে ভয় করবার নেই।’

(সূরায় আহযাব, আয়াত নং ৫)

মহানবী সাল্লাল্লাহু আলাইহি ওয়াসাল্লাম হযরত যায়েদ বিন হারিসা (রাযিঃ)কে বললেনঃ আমার বিয়ের পয়গাম নিয়ে যয়নবের কাছে যাও। যায়েদ যয়নবের ঘরে এল। যয়নব তখন আটা পিষছিল। যায়েদ যয়নবের দিকে তাকাতে চাইলেন, কিন্তু কী বুঝে মুখ ফিরিয়ে নিয়ে বললেনঃ যয়নব! আমি রাসূলুল্লাহ সাল্লাল্লাহু আলাইহি ওয়াসাল্লাম-এর পয়গাম নিয়ে উপস্থিত হয়েছি। যয়নব উত্তর দিলেন, আমি চিন্তাভাবনা ছাড়া কোন সিদ্ধান্ত করি না। এই বলে তিনি জায়নামায়ে (ইসতেখারা করার জন্যে) দাঁড়িয়ে গেলেন। ওদিকে রাসূলুল্লাহ সাল্লাল্লাহু আলাইহি ওয়াসাল্লাম-এর কাছে অহী এল এবং বিয়ে হয়ে গেল। মহানবী সাল্লাল্লাহু আলাইহি ওয়াসাল্লাম হযরত যয়নবের গৃহে এলেন এবং অনুমতি ছাড়াই ভিতরে চলে গেলেন।

দিবসের কিছু সময় অতিক্রান্ত হওয়ার পর অলিমা-উদযাপনের দাওয়াত হল। সে ছিল ইসলামের আড়ম্বরহীনতার এক যথার্থ দৃষ্টান্ত, রুটি এবং তরকারীর ব্যবস্থা করা হয়েছিল অলিমায়। আনসারের মধ্যে রাসূলুল্লাহ সাল্লাল্লাহু আলাইহি ওয়াসাল্লাম-এর খালা এবং হযরত আনাসের আন্মা উম্মে সুলাইম মালিদা (এক ধরনের নরম রেশমী পশমের কাপড়) পাঠিয়েছিলেন। এককথায়, সব জিনিসপত্র যখন যোগাড় হয়ে গেল, মহানবী সাল্লাল্লাহু আলাইহি ওয়াসাল্লাম হযরত আনাসকে লোকজন ডেকে নিয়ে আসতে বললেন। তিনশো ব্যক্তি এই অলিমায় উপস্থিত হন। খাওয়ার সময় মহানবী সাল্লাল্লাহু আলাইহি ওয়াসাল্লাম দশ দশ জন করে ব্যবস্থা করে দিয়েছিলেন- লোকেরা দফায় দফায় আসতেন এবং খেয়ে চলে যেতেন।

এই দাওয়াতেই পর্দার আয়াত অবতীর্ণ হয়। কারণ ছিল এই, কয়েকজন দাওয়াতের ব্যক্তি ছিল, তারা খাওয়ার পর কথাবার্তা শুরু করল এবং এত দেরী করে ফেললো যে,

মহানবী সাল্লাল্লাহু আলাইহি ওয়াসাল্লাম কষ্ট পেলেন। রাসূলে কারীম সাল্লাল্লাহু আলাইহি ওয়াসাল্লাম মহৎ মানবীয় প্রবৃত্তির কারণে কিছু না বলে নিঃশব্দ ছিলেন। বারবার ভিতরে যাচ্ছিলেন বাইরে আসছিল, সেই ঘরে হযরত যয়নবও বসা ছিলেন এবং তিনি দেয়ালের দিকে মুখ ফিরিয়েছিলেন।

মহানবীর আসা-যাওয়া দেখে কেউ কেউ বুঝতে পারলো এবং উঠে চলে গেল। হযরত আনাস (রাযিঃ) মহানবীকে (নবীজী তখন অন্য স্ত্রীর ঘরে) খবর দিলেন, তিনি বাইরে এলেন, তখন অহী এভাবে উচ্চারিত হল :

يَا أَيُّهَا الَّذِينَ آمَنُوا لَا تَدْخُلُوا بُيُوتَ النَّبِيِّ إِلَّا أَنْ يُؤْذَنَ لَكُمْ إِلَى طَعَامٍ غَيْرٍ
نَاطِرِينَ إِنَّهُ وَلَكِنْ إِذَا دُعِيتُمْ فَادْخُلُوا فَإِذَا طَعِمْتُمْ فَانْتَشِرُوا
وَلَا مُسْتَأْنَسِينَ لِحَدِيثٍ - إِنَّ ذَلِكُمْ كَانَ يُؤْذَى النَّبِيَّ فَيَسْتَحْيِي مِنْكُمْ وَاللَّهُ
لَا يَسْتَحْيِي مِنَ الْحَقِّ وَإِذَا سَأَلْتُمُوهُنَّ مَتَاعًا فَسْأَلُوهُنَّ مِنْ وَرَاءِ حِجَابٍ

অর্থাৎ, ‘হে বিশ্বাসীগণ! তোমরা নবীর গৃহে যেয়ো না। (সে সময় ছাড়া) যখন তোমাদেরকে খাওয়ার জন্যে অনুমতি দেয়া হয়, কিন্তু (যাবে এইভাবে) যাতে তোমরা তাঁর তৈরি করবার জন্যে প্রতীক্ষমান হয়ে না থাকতে হয়, হাঁ যখন তোমাদেরকে ডাকা হবে, তখনই তোমরা যাবে এবং যখন খাওয়া শেষ হয়ে যাবে উঠে চলে আসবে এবং কথাবার্তায় আবিষ্ট হয়ে (বসে থেকো না, নবীজী এতে অসন্তোষ বোধ করেন। তিনি তোমাদের সৌজন্য প্রকাশ করেন) কিন্তু আল্লাহ তা‘আলা সত্যোচ্চারণে সৌজন্য করেন না এবং যখন তোমরা তাঁদের কাছ থেকে কিছু চাইবে, পর্দার বাইরে থেকে চাইবে।’ (সূরায় আহযাব)

মহানবী সাল্লাল্লাহু আলাইহি ওয়াসাল্লাম ঘরের বাইরে পর্দা লাগিয়ে দিলেন, লোকজনের ভিতরে যাওয়া নিষিদ্ধ হয়ে গেল— এটি ৫ম হিজরীর জুলকাঅদা মাসের ঘটনা।

হযরত যয়নবের বিবাহের কিছু বৈশিষ্ট্য আছে যা অন্যত্র পাওয়া যায় না। তাঁর বিবাহের মধ্য দিয়ে অন্ধকার যুগের একটি কুসংস্কার (পালিত পুত্র ও আপন পুত্রের মধ্যে কোন প্রভেদ নেই) বিলুপ্ত হয়ে যায়, ইসলামী সাম্যের সেই মহান দৃশ্য দৃশ্যমান হল যে, স্বাধীন ও ক্রীতদাসের মধ্যকার ব্যবধান উঠে গেল; পর্দার আয়াত অবতীর্ণ হল। বিবাহের জন্যে আল্লাহর অহী এল, অলিমাও বর্ণাঢ্য হলে এই সব কারণে হযরত যয়নব (রাযিঃ) পত্নীদের তুলনায় গর্ববোধ করতেন।

মহানবী সাল্লাল্লাহু আলাইহি ওয়াসাল্লাম-এর পত্নীগণের মধ্যে যারা হযরত আয়েশা (রাযিঃ)-এর সমমানের অধিকার রাখতেন তাদের মধ্যে হযরত যয়নব (রাযিঃ) ছিলেন বিশেষভাবে বিশিষ্ট। স্বয়ং হযরত আয়েশা (রাযিঃ) বলেন :

هي التي كانت تساميني منهن في المنزلة عند رسول الله ﷺ

অর্থাৎ, ‘পত্নীদের মধ্যে যয়নবই কেবল রাসূলুল্লাহ সাল্লাল্লাহু আলাইহি ওয়াসাল্লাম এর দৃষ্টিতে সম্মান ও মর্যাদায় আমার প্রতিদ্বন্দ্বীতা করতো’। (সহীহ মুসলিম)

মহানবী সাল্লাল্লাহু আলাইহি ওয়াসাল্লামও তাঁর হৃদয়তোষণে সচেষ্ট থাকতেন। এ কারণেই যখন কয়েকজন নবীপত্নী হযরত ফাতিমা (রাযিঃ)কে দূত নির্ধারণ করে মহানবী সাল্লাল্লাহু আলাইহি ওয়াসাল্লাম-এর কাছে পাঠালেন এবং ব্যর্থ হলেন, তখন সবাই দূত হিসেবে হযরত যয়নব (রাযিঃ)কে নির্বাচন করেন, কেননা তিনিই ছিলেন এই কাজের সর্বাধিক উপযুক্ত। হযরত যয়নব (রাযিঃ) প্রভূত সাহসের সাথে পত্নীদের বার্তা উপস্থাপন করেন এবং অত্যন্ত দৃঢ়তার সঙ্গে প্রমাণ করবার চেষ্টা করেন যে, হযরত আয়েশা (রাযিঃ) এই পদের (অর্থাৎ দূতের মর্যাদার) অধিকারী নন। হযরত আয়েশা (রাযিঃ) নিঃশব্দ শুনে যাচ্ছিলেন সব এবং মহানবী সাল্লাল্লাহু আলাইহি ওয়াসাল্লাম-এর মুখবয়বের দিকে তাকাচ্ছিলেন। হযরত যয়নব (রাযিঃ) যখন বক্তৃতা শেষ করল তখন সম্মতি পেয়ে উঠে দাঁড়ালেন এবং এত দৃঢ়তার সাথে বক্তৃতা করলেন যে, হযরত যয়নব নির্বাক হয়ে গেলেন। মহানবী সাল্লাল্লাহু আলাইহি ওয়াসাল্লাম বললেনঃ ‘কেনইবা হবে না’ আবু বকর (রাযিঃ)-এর মেয়ে তো। (সহীহ মুসলিম)

মৃত্যু : মহানবী সাল্লাল্লাহু আলাইহি ওয়াসাল্লাম তাঁর পত্নীদেরকে বলেছিলেন :

اسرعكن لحاقابی اطولكن يدا

অর্থাৎ, ‘তোমাদের মধ্যে সে-ই দ্রুত আমার সাথে সাক্ষাৎ করবে (অর্থাৎ মৃত্যুর পর) যার হাত লম্বা হবে।

এখানে (হাত লম্বা-কথাটির রূপকার্থই নির্দেশিত হয়েছে) দানশীলতার কথাই মূলত রূপক হিস্তিতে বুঝানো হয়েছে। কিন্তু মহানবীর পত্নীগণ তাঁর আসল আক্ষরিক অর্থ ধরে নিয়েছিলেন এবং সেই হিসেবে তাঁরা নিজেদের হাতসমূহ পরস্পর মাপামাপি শুরু করেছিল। হযরত যয়নব (রাযিঃ) ছিলেন সবচেয়ে বড় দানশীল এবং তিনিই অমোঘ বাণীর প্রথম বর্ষণস্থল হয়েছিলেন। পবিত্র পত্নীদের মধ্যে সবার আগে তিনিই ইন্তেকাল করেছিলেন। কাফনের ব্যবস্থা নিজেই করে গিয়েছিলেন এবং বলে গিয়েছিলেন যে, হযরত উমর (রাযিঃ)ও যদি কাফন দেন, তার মধ্যে একটিকে যেন দান করে দেয়া হয়। তাঁর এ কথা পূরণ করা হয়েছিল। হযরত উমর (রাযিঃ) নামাযে জানাযা পড়ান। এরপর পবিত্র পত্নীদের কাছে জিজ্ঞেস করলেনঃ কারা কবরে প্রবেশ করবে? তারা বললঃ তাঁরাই

প্রবেশ করবে, যাঁরা তাঁর গৃহে প্রবেশ করতো। অতএব উসামা বিন যায়েদ, মুহম্মদ বিন আবদুল্লাহ বিন জাহাশ, আবদুল্লাহ বিন আবি আহমদ বিন জাহাশ এরা তাঁর শবদেহ কবরে নামিয়ে নেন এবং জান্নাতুল বাকীতেই তাঁকে সমাধিস্থ করা হয়।

(সহীহ বুখারী, প্রথম খণ্ড, পৃঃ ১৯১; সহীহ মুসলিম, ২য় খণ্ড, পৃঃ ৩৪১; উসূদুল গাবা, ৫ম খণ্ড, পৃঃ ৪৬৫) হযরত যয়নব (রাযিঃ) বিশ হিজরীতে মৃত্যুবরণ করেন। তাঁর বয়স ছিল তখন তিশান্ন বছর। ঐতিহাসিক ওয়াকেদী লিখেছেন, মহানবী সাল্লাল্লাহু আলাইহি ওয়াসাল্লাম-এর সঙ্গে যখন তাঁর বিয়ে হয়, তখন তাঁর বয়স ছিল পঁয়ত্রিশ বছর। কিন্তু এই মত সাধারণ মতের বিরোধী, সাধারণ বর্ণনা অনুযায়ী আটত্রিশ বছর বয়সে মহানবী সাল্লাল্লাহু আলাইহি ওয়াসাল্লাম-এর সঙ্গে তাঁর বিয়ে হয়।

হযরত যয়নব (রাযিঃ) পরিত্যক্ত সম্পত্তি হিসেবে একটি গৃহ স্মৃতি হিসেবে রেখে যান- এটিকে ওলিদ বিন আবদুল মালিক তার শাসনকালে পঞ্চাশ হাজার টাকা দিয়ে কিনে নেন এবং সেটিকে মসজিদে নববীর সঙ্গে সংযুক্ত করে দেন।

(তারিখে তাবারী, ত্রয়োদশ খণ্ড, পৃঃ ৪৪৯)

অবয়ব-সংগঠন : হযরত যয়নব (রাযিঃ) ক্ষুদ্রকায় কিন্তু সুন্দরী ও শোভন শরীরী সংগঠনের ছিলেন।

(জুরকানী আলাল মাওয়াহিব, তৃতীয় খণ্ড, পৃঃ ২৮৩)

মহত্ত্ব ও মহিমা : হাদীছ কম বর্ণনা করতেন। হাদীছের গ্রন্থসমূহে তাঁর কাছ থেকে কেবল এগারটি হাদীছ বর্ণিত আছে। বর্ণনাকারীদের মধ্যে অন্তর্ভুক্ত আছেন হযরত উম্মে হাবিবা (রাযিঃ), যয়নব বিনতে আবি সালমা (রাযিঃ), মুহম্মদ বিন আব্দুল্লাহ বিন জাহাশ (রাযিঃ), কুলসুম বিনতে তালক এবং ময়কুর গোলাম।

চরিত্র-বৈশিষ্ট্য : হযরত উম্মে সালমা বলেন :

كانت زينب صالحة صوامة قوامة

অর্থাৎ, ‘যয়নব সৎ স্বভাবী, রোযাদার এবং নামায আদায়কারী ছিল।’

(জুরকানী ইবনে সা‘আদের রেফারেন্স থেকে)

হযরত আয়েশা (রাযিঃ) বলেন :

لم ار امرأة قط خيرا في الدين من زينب واتقى لله واصدق حديثا واوصل للرحم واعظم صدقة واشد ابتذال لنفسها في العمل الذي تصدق به

وتقرب به الى الله ما عدا سورة من حدة كانت فيها تسرع منها الفیئة۔

অর্থাৎ, ‘আমি যয়নবের চেয়ে দীনদার, অধিক পরহেযগার সত্যবাদী, অধিক উদার দানশীল এবং আল্লাহর সন্তোষ বিধান অধিক সচেষ্টিত কোন মহিলা দেখিনি, মেজায়ে তাঁর একটু তেজ এবং তীক্ষ্ণতা ছিল, যে কারণে খুবই দ্রুত তিনি আবার লজ্জাবোধও করতেন।

(সহীহ মুসলিম, তৃতীয় খণ্ড, পৃঃ ৩৩৫)

হযরত যয়নবের আল্লাহ ভীতি ও পরহেযগারীর অবস্থা ছিল এমন যে, যখন হযরত আয়েশা (রাযিঃ)কে (মুনাফিক বদমাশরা) অপবাদে অভিযুক্ত করে, সেই অপবাদের মধ্যে অন্য অনেকের সাথে যয়নব (রাযিঃ)-এর বোন হামনাও অংশ গ্রহণ করেছিল কিন্তু মহানবী সাল্লাল্লাহু আলাইহি ওয়াসাল্লাম যখন হযরত আয়েশা (রাযিঃ)-এর চরিত্র বিষয়ে যয়নবকে জিজ্ঞেস করলেন, হযরত যয়নব পরিষ্কার ভাষায় তার উত্তর দিয়েছিলেন :

ما عملت الا خيرا

অর্থাৎ, ‘আমি হযরত আয়েশা (রাযিঃ)-এর ভাল ছাড়া খারাপ কিছু জানি না।’

হযরত আয়েশা (রাযিঃ)কে তাঁর এ অসামান্য সততা ও সৎ সিদ্ধান্তের প্রশংসা করতে হয়েছিল। অসাধারণ ভীতি ও নিষ্ঠা নিয়ে তিনি ইবাদত করতেন। একবার মহানবী সাল্লাল্লাহু আলাইহি ওয়াসাল্লাম মুহাজির মুসলমানদের (অর্থাৎ নিজ বাসভূমি ত্যাগী মুসলমান) মধ্যে কিছু মাল বন্টন করেছিলেন। হযরত যয়নব (রাযিঃ) এই ব্যাপারে কিছু বলতে যাচ্ছিলেন। হযরত উমর (রাযিঃ) ধমক দিয়ে উঠছিলেন— মহানবী সাল্লাল্লাহু আলাইহি ওয়াসাল্লাম উমর (রাযিঃ)কে বললেনঃ তুমি যয়নবের কাছে ক্ষমা চেয়ে নাও, যয়নব অত্যন্ত পূত-পবিত্র-সাদ্বী-সতী মহিলা।

(আল ইসাবা ফি তময়িজিস সাহাবা-ইবনে হাজার আসকালানী, ৮ম খণ্ড, পৃঃ ৯৩)
হযরত যয়নব (রাযিঃ) খুবই সংযমী ছিলেন, পরহেযগার মহিলা ছিল। নিজের শারীরিক শ্রমের মাধ্যমে তিনি জীবিকা উপার্জন করতেন এবং তা আল্লাহর রাস্তায় খরচ করতেন। হযরত আয়েশা (রাযিঃ) বলেনঃ যখন হযরত যয়নব (রাযিঃ)-এর মৃত্যু হল মদীনার ফকির-মিসকীনরা বিব্রত ও বিচলিত হয়েছিল এবং তারা ভীত হয়েছিল।

(আল ইসাবা ফি তময়িজিস সাহাবা ইবনে হাজার আসকালানী, ৮ম খণ্ড, পৃঃ ৯৩)
একবার হযরত উমর (রাযিঃ) তাঁর জন্যে বার্ষিক ভাতা পাঠালেন। তিনি তার উপর একটি কাপড় ঢেকে দিলেন এবং বয়রা বিন রাফিকে নির্দেশ দিলেন এগুলো আমার পরিবারবর্গ বংশধরদের মধ্যে এবং এতিমদের মধ্যে ভাগ করে দাও। বয়রা বললেনঃ আমাদেরও কিছু অধিকার আছে তো? তিনি বললেনঃ কাপড়ের নীচে যা কিছু আছে সেটা তোমার (দেখলেন পঁচাশি দিরহাম আছে) এরপর যখন সমস্ত মাল বন্টন করে ফেলা হল তিনি দু’আ করলেনঃ হে আল্লাহ! এরপর আর যেন হযরত উমর (রাযিঃ)-এর সম্মানী গ্রহণ করতে না হয়, তার প্রার্থনা গৃহীত হয়। সে বছরই তিনি ইন্তেকাল করেন।

(তাবকাত-ই-ইবনে সা’আদ, ৮ম খণ্ড, পৃঃ ৭৮)

হযরত জুআয়রা (রাযিঃ)

জুআয়রা তাঁর নাম। তিনি খাযাআ গোত্রের মুসতালাক বংশের সন্তান ছিলেন। বংশক্রম
এরকমঃ জুআয়রা বিনতে হারিস বিন আবি দিরার বিন হাবিব বিন আইয বিন মালিক
বিন জুযাইমা (মুসতালাক) বিন আসাদ বিন আমর বিন রাবিয়া বিন হারিসা বিন আমর
মুযিকিয়া।

হযরত জুআয়রার আব্বা হারিস বিন আবি দিরার বনু মুসতালাক বংশের পুরোধা-প্রধান
ছিল।

(আবকাত-ই-ইবনে সা'আদ, দ্বিতীয় খণ্ড, পৃঃ ৪৫)

বিবাহ : হযরত জুআয়রা (রাযিঃ)-এর প্রথম বিবাহ নিজেরই বংশের মুসাফেঅ বিন
সফওয়ান (যি শফর)-এর সঙ্গে হয়েছিল।

মুরাইসি যুদ্ধ ও দ্বিতীয় বিবাহ : হযরত জুআয়রা (রাযিঃ)-এর পিতা এবং স্বামী
দু'জনেই ইসলামের শত্রু ছিল। জুআয়রার পিতা হারিস-কুরাইশদের ইঙ্গিতে অথবা,
স্ব:প্রণোদিত হয়ে মদীনার উপর হামলার প্রস্তুতি শুরু করেছিল। মহানবী সাল্লাল্লাহু
আলাইহি ওয়াসাল্লাম অবহিত হওয়ার পর যথাযথ পর্যালোচনার জন্যে বুরাইদা বিন
হাবিব আসলামীকে পাঠিয়ে দিলেন। বুরাইদা ফিরে এসে সংবাদটি সত্য বলে জানায়।
মহানবী সাল্লাল্লাহু আলাইহি ওয়াসাল্লাম সাহাবাদের প্রস্তুত হতে বললেন। ৫ম হিজরীর
২রা শাবান মহানবী সাল্লাল্লাহু আলাইহি ওয়াসাল্লাম-এর বাহিনী মদীনা থেকে রওয়ানা
হল এবং মদীনা থেকে নয় মাইল দূরে মুরাইসি নামক স্থানে উপস্থিত হয়ে অবস্থান
করল। হারিস এই আগমনের খবর আগে থেকেই জেনে গিয়েছিল, এজন্যে তার
সংগঠিত বাহিনী বিচ্ছিন্ন হয়ে পড়ে এবং সে নিজেও একদিকে চলে গিয়েছিল। কিন্তু
মুরাইসি বাসিন্দারা সুশৃংখল দাঁড়িয়ে গেল এবং অনেকক্ষণ পর্যন্ত তীর বর্ষণ করতে
লাগলো। কিন্তু মুসলমানরা যখন হঠাৎ এক সাথে তাদের উপর হামলা করল তখন
তাদের অবস্থান ভিত্তি নষ্ট হয়ে গেল। দশব্যক্তি নিহত হল এবং বাকীরা গ্রেফতার হল।
এদের সংখ্যা প্রায় ছয়শো জনের মত। গনীমতের সম্পদ হিসেবে দু'হাজার উট এবং
পাঁচ হাজার ছাগল মুসলমানদের হাতে এল।

যুদ্ধে যারা গ্রেফতার হয়েছিল, তাদের মধ্যে হযরত জুআয়রা (রাযিঃ)ও ছিল। বিন
ইসহাক বলেন, কিছু কিছু হাদীছ গ্রন্থেও এই বর্ণনা উদ্ধৃত। যুদ্ধের সমস্ত বন্দীকে দাস
এবং দাসী করে বন্টন করে দেয়া হয়। হযরত জুআয়রা (রাযিঃ) ছিলেন সাবিত বিন
কায়েসের ভাগে। তিনি সাবিত বিন কায়েসকে বললেন আমার সাথে মুকাতিবত চুক্তি
করে নাও অর্থাৎ পয়সার বিনিময়ে আমাকে মুক্ত করে দাও। সাবিত নয় আওকিয়া
স্বর্ণের বিনিময়ে মুক্তি দানে সম্মত হলেন। হযরত জুআয়রা (রাযিঃ)-এর কাছে টাকা
ছিল না, কারো কাছ থেকে টাকা নিয়ে এই অঙ্ক তিনি আদায় করতে চাইলেন। মহানবী
সাল্লাল্লাহু আলাইহি ওয়াসাল্লাম-এর কাছেও এলেন, হযরত আয়েশা (রাযিঃ) সেখানে
উপস্থিত ছিলেন।

ঐতিহাসিক বিন ইসহাক হযরত আয়েশা (রাযিঃ)-এর বাণী বর্ণনা করেছেন- যা নিঃসন্দেহে তাঁর ব্যক্তিগত বিবেচনা যে, যেহেতু জুআয়রা (রাযিঃ) মধুর ও মমতাময়ী স্বভাবের ছিলেন, যখন তাকে আমি মহানবী সাল্লাল্লাহু আলাইহি ওয়াসাল্লাম-এর কাছে যেতে দেখলাম তখনই বুঝলাম যে, জুআয়রার সৌন্দর্য ও মাধুর্যে আমি যেরকম প্রভাবিত হয়েছি নবীজীও সেরকম প্রভাবিত হবেন। যাই হোক হযরত আয়েশা (রাযিঃ) জুআয়রাকে মহানবী সাল্লাল্লাহু আলাইহি ওয়াসাল্লাম-এর কাছে নিয়ে গেলেন। মহানবী সাল্লাল্লাহু আলাইহি ওয়াসাল্লাম বললঃ তুমি কি এর চেয়ে ভাল জিনিস চাও না? জুআয়রা (রাযিঃ) বলল, যেমন? মহানবী সাল্লাল্লাহু আলাইহি ওয়াসাল্লাম বললেনঃ যেমন আমি তোমার তরফ থেকে টাকা আদায় করে দেব এবং তোমাকে বিয়ে করে নেব। জুআয়রা (রাযিঃ) রাজি হয়ে গেলেন। মহানবী সাল্লাল্লাহু আলাইহি ওয়াসাল্লাম একাই সেই টাকা আদায় করে দিলেন এবং তাকে বিয়ে করলেন।

কিন্তু অন্য একটি বর্ণনায় আরো পরিষ্কারভাবে বিষয়টি উদ্ধৃত হয়েছে। আসল ঘটনা হচ্ছে, হযরত জুআয়রার পিতা হারিস আরবের একজন প্রধান ও পুরোধা ব্যক্তি ছিল। যুআয়রা গ্রেফতার হবার পর হারিস (পিতা) মহানবী সাল্লাল্লাহু আলাইহি ওয়াসাল্লাম-এর কাছে এসে বললেনঃ আমার মেয়ে দাসী হতে পারে না, কারণ আমার মর্যাদা এবং স্তর এর উর্ধ্বে। আমি আমার গোত্রের দলপতি এবং আরবের একজন পুরোধা ব্যক্তি। কাজেই আপনি তাকে মুক্তি দিয়ে দেন। মহানবী সাল্লাল্লাহু আলাইহি ওয়াসাল্লাম বলল, এটিতো ঠিক হয় না বরং জুআয়রার নিজের মতের উপরই ছেড়ে দেয়া যাক। হারিস জুআয়রাকে গিয়ে বললেনঃ মহানবী সাল্লাল্লাহু আলাইহি ওয়াসাল্লাম তোমার মত ও মজ্বির উপর ছেড়ে দিয়েছেন, দেখো আমাকে লজ্জিত করো না। জুআয়রা বললেনঃ আমি মহানবী সাল্লাল্লাহু আলাইহি ওয়াসাল্লাম-এর সঙ্গে থাকতে চাই। এরপর মহানবী সাল্লাল্লাহু আলাইহি ওয়াসাল্লাম তাঁকে বিয়ে করে নেন।

বিন সাআদ তাঁর তাবকাত গ্রন্থে এ বর্ণনা উদ্ধৃত করেছেন যে, হযরত জুআয়রা (রাযিঃ)-এর পিতা তার মুক্তিপণ আদায় করেন এবং যখন জুআয়রা মুক্ত হয়ে গেল, তখন মহানবী সাল্লাল্লাহু আলাইহি ওয়াসাল্লাম তাঁকে বিয়ে করে নেন।

(তাবকাত-ই-ইবনে সাআদ, ৮ম খণ্ড, পৃঃ ৮৪)

হযরত জুআয়রা (রাযিঃ)কে মহানবী সাল্লাল্লাহু আলাইহি ওয়াসাল্লাম যখন বিয়ে করে নিলেন, তখন যুদ্ধের সমস্ত বন্দীকে (যারা মুসলিম বাহিনীর অংশে এসে গিয়েছিল) সাথে সাথেই মাফ করে দেয়া হয়। মুসলিম বাহিনী বললেনঃ যে বংশে মহানবী সাল্লাল্লাহু আলাইহি ওয়াসাল্লাম বিয়ের সম্পর্ক স্থাপন করলেন সেই বংশ গোলাম হতে পারে না। (আবু দুউদ কিতাবুল ইত্বক, দ্বিতীয় খণ্ড, পৃঃ ১০৫; তাবকাত ২য় খণ্ড, পৃঃ ৪৬; মুসলিম, পৃঃ ৬১) হযরত আয়েশা (রাযিঃ) বলেনঃ আমি জুআয়রা (রাযিঃ)-এর চেয়েও স্বীয় জাতির জন্যে মহৎ সৌভাগ্য স্বরূপ নারী দেখিনি। কারণ তাঁরই সূত্রে বনু মুসতালাক গোত্রের

সহস্র পরিবারকে মুক্ত করে দেয়া হয়।

(উসুদুল গাবা, ৫ম খণ্ড, পৃঃ ৪২০)

হযরত জুআয়রা (রাযিঃ)-এর নাম ছিল 'বাররা' মহানবী সাল্লাল্লাহু আলাইহি ওয়াসাল্লাম সে নাম বদলে 'জুআয়রা' রাখেন, কেননা পূর্বোক্ত নামে দুর্ভাগ্যের দ্যোতনা ছিল।

(সহীহ মুসলিম, ২য় খণ্ড, পৃঃ ২৩১)

মৃত্যু : পঞ্চাশ হিজরীর রবিউল আউয়াল মাসে হযরত জুআয়রা (রাযিঃ) মৃত্যুবরণ করেন। সে-সময় তাঁর বয়স হয়েছিল পয়ষটি বছর। মরওয়ান তাঁর নামাযে জানাযা পড়ান। জান্নাতুল বাকীতে সমাহিত হন।

অবয়ব-সংগঠন : হযরত জুআয়রা (রাযিঃ) সুন্দরী এবং সুসম অবয়বের অধিকারী ছিল।

(উসুদুল গাবা, ৫ম খণ্ড, পৃঃ ৪২০)

মহত্ত্ব ও মহিমা : রাসূলে কারীম সাল্লাল্লাহু আলাইহি ওয়াসাল্লাম থেকে কয়েকটি হাদীছ বর্ণনা করেছেনঃ তাঁর কাছ থেকে নিম্নোক্ত মহান ব্যক্তিবর্গ হাদীছ শ্রবণ করেছেনঃ হযরত আবদুল্লাহ বিন আব্বাস (রাযিঃ), জাবির (রাযিঃ), আবদুল্লাহ বিন উমর (রাযিঃ), উবাইদ বিন আসসিয়াক, তোফায়েল, আবু আইউব মরাগি, কুলসুম, বিন মুসতালাক, আবদুল্লাহ বিন শদ্দাদ, কুরাইব।

চরিত্র-বৈশিষ্ট্য : হযরত জুআয়রা (রাযিঃ) পূত-পবিত্র ইবাদত নিবেদিত জীবনযাপন করতেন। একদিন সকালে মসজিদে দু'আ করছিলেন। মহানবী সাল্লাল্লাহু আলাইহি ওয়াসাল্লাম তাঁকে দেখলেন এবং দেখে চলে গেলেন। দুপুর নিকটবর্তী হল, তখনও তাঁকে মহানবী সাল্লাল্লাহু আলাইহি ওয়াসাল্লাম এই অবস্থায় পান। (সহীহ তিরমিযী, পৃঃ ৫৯০)

জুমু'আর দিবসে মহানবী সাল্লাল্লাহু আলাইহি ওয়াসাল্লাম তার ঘরে এলেন, জুআয়রা (রাযিঃ) রোযাদার ছিলেন, মহানবী সাল্লাল্লাহু আলাইহি ওয়াসাল্লাম জিজ্ঞেস করলেনঃ কালও কি রোযাদার ছিলে? তিনি বললেনঃ না, আগামীকাল রাখবো? মহানবী সাল্লাল্লাহু আলাইহি ওয়াসাল্লাম বললেনঃ অতঃপর তোমার ইফতার করে নেয়া উচিত।

(সহীহ বুখারী, প্রথম খণ্ড, পৃঃ ২৭১)

অন্য বর্ণনায় আছেঃ মহানবী সাল্লাল্লাহু আলাইহি ওয়াসাল্লাম প্রতি মাসে তিন দিন রোযা রাখতেন, এই তিন দিনের মধ্যে একদিন শুক্রবার হতই। এ জন্যে কেবল জুমু'আর দিনে রোযা রাখবার ব্যাপারে বিদ্বান ব্যক্তিদের বিতর্ক আছে। হানাফী ইমামদের বিবেচনায় শুধুমাত্র জুমু'আর দিবসে রোযা রাখাও বৈধ। ইমাম মালিক (রহঃ) বৈধ বলেছেন। কোন কোন শাফেয়ী মনীষী তার বিরোধিতা করেছেন।

(ফতহুল বারী-আল্লামা ইবনে হাজার আসকালানী, ৪র্থ খণ্ড, পৃঃ ২০৪)

ইমাম আবু ইউসুফের দৃষ্টিতেঃ ভাল হয়; যদি সেই জুমু'আর রোযার সাথে আরেকটি রোযা মিলিয়ে নেয়া যায়।

(সহীহ মুসলিম, ১ম খণ্ড, পৃঃ ৪০০)

এই আলোচনা কেবল জুমু'আর দিবসে রোযা রাখার ব্যাপারে এবং দু'টোর সঙ্গে তার সম্পর্ক নেই।

মহানবী সাল্লাল্লাহু আলাইহি ওয়াসাল্লাম তাঁকে ভালবাসতেন, তাঁর ঘরে মহানবীর যাতায়াত ছিল, একবার এসে জিজ্ঞেস করলেনঃ কোন খাবার আছে? তিনি বললেনঃ আমার দাসী দানের গোশত দিয়েছিল, সেটিই আছে, আর কিছু নেই। মহানবী সাল্লাল্লাহু আলাইহি ওয়াসাল্লাম বললেনঃ তা নিয়ে এসো, কেননা দান যাকে করা হয়েছে তার কাছে পৌঁছে গেছে।

(বয়লুল মজহদ, তৃতীয় খণ্ড, পৃঃ ১৬৯)

হযরত উম্মে হাবিবা (রাযিঃ)

‘রমলা’ তাঁর নাম, উপনাম উম্মে হাবিবা। বংশক্রম এরকমঃ রমলা বিনতে আবি সুফিয়ান সাখার বিন হারব বিন উমিয়্যা বিন আবদে শামস। মাতার নাম ছিলঃ সুফিয়া বিনতে আবুল আস। তিনি হযরত উসমান (রাযিঃ)-এর প্রকৃত ফুফু ছিলেন। হযরত উম্মে হাবিবা (রাযিঃ) মহানবী সাল্লাল্লাহু আলাইহি ওয়াসাল্লাম-এর নবুয়্যত প্রাপ্তির পূর্বে জন্মগ্রহণ করেন।

(আল-ইসাবা ফি তময়িজিস সাহাবা, ৮ম খণ্ড, পৃঃ ৮৪)

বিবাহ : হারাব বিন উমিয়্যার প্রতিশ্রুত বন্ধু উবাইদুল্লাহ বিন জাহাশের সঙ্গে তার বিবাহ হয়।

(আল-ইবাসা, ইবনে হাজার আসকালানী, ৮ম খণ্ড, পৃঃ ৮৫)

ইসলাম গ্রহণ : স্বামী উবাইদের সঙ্গেই মুসলমান হন এবং হাবশায় হিজরত করেন। হাবশায় গিয়ে পরে উবাইদ খ্রীষ্টান হয়ে যায় এবং উম্মে হাবিবাকে খ্রীষ্টধর্ম গ্রহণ করতে বলে। কিন্তু তিনি খ্রীষ্টান না হয়ে ইসলামের উপর অটল থাকলেন। এখন সেই সময় এসে গেল, যাতে তিনি হিজরতের পুণ্যার্জনকারী এবং বিশ্বাসী মানবজাতির পবিত্র জননী হওয়ার গৌরব অর্জন করবেন। উবাইদ খ্রীষ্টান হয়ে পুরোপুরি স্বাধীন জীবন যাপন শুরু করে, মদ্যপানে অভ্যস্ত হয়ে পড়ে অবশেষে তার মৃত্যু হয়।

(জুরকানী আলাল মাওয়াহিব, তৃতীয় খণ্ড, পৃঃ ২৭৬, ইবনে সা‘আদ থেকে উদ্ধৃত)

দ্বিতীয় বিবাহ : (স্বামীর ইস্তেকালের পর) ইদতকাল অতিক্রান্ত হওয়ার পর, মহানবী সাল্লাল্লাহু আলাইহি ওয়াসাল্লাম আমর বিন উমিয়্যা যামরীকে নাজ্জাশীর কাছে বিয়ের উদ্দেশ্যে পাঠান। যখন তিনি নাজ্জাশীর (হাবশার বাদশাহ) কাছে পৌঁছলেন, নিজের দাসী আবরাহার মাধ্যমে উম্মে হাবিবার কাছে পয়গাম পাঠালেন যে, মহানবী (সাল্লাল্লাহু আলাইহি ওয়াসাল্লাম) আমাকে তোমার বিয়ের জন্য লিখেছেন। তিনি খালিদ বিন সায়িদ উমবীকে প্রতিনিধি নির্ধারণ করেন এবং এই কাজের কারণে আবরাহাকে রূপোর দু’টো কাঁকন এবং অঙ্গুরী প্রদান করেন। সন্ধ্যা হলে নাজ্জাশী জাফর বিন আবি তালিব এবং সেখানকার মুসলমানদের একত্র করে নিজেই নিকাহ পড়ান এবং মহানবী সাল্লাল্লাহু আলাইহি ওয়াসাল্লাম-এর তরফ থেকে চারশো দিনার মোহর আদায় করেন। বিবাহ সম্পন্ন হলে হযরত উম্মে হাবিবা (রাযিঃ) জাহাজে করে রওয়ানা করেন এবং মদীনার বন্দরতীরে অবতরণ করেন। এই সময়ে মহানবী সাল্লাল্লাহু আলাইহি ওয়াসাল্লাম খায়বরে অবস্থান করছিল। এটি সপ্তম হিজরী অথবা

ষষ্ঠ হিজরীর ঘটনা। এই সময়ে হযরত উম্মে হাবিবা (রাযিঃ)-এর বয়স ছত্রিশ কি সাইত্রিশ বছর ছিল।

(মুসনাদে আহমাদ ইবনে হাম্বল, ষষ্ঠ খণ্ড, পৃঃ ৪২৭)
হযরত উম্মে হাবিবা (রাযিঃ)-এর বিয়ে প্রসঙ্গে বহুবিধ বর্ণনা রয়েছে। আমরা যে বর্ণনা করেছি তা ‘মুসনাদে আহমদের’ বর্ণনা এবং এটি প্রসিদ্ধ বর্ণনাসমূহের অনুবর্তী। অবশ্য মোহরের সংখ্যার ক্ষেত্রে কিছু বিভ্রান্তি বোধ হয়। সাধারণ বর্ণনা এটি এবং মুসনাদে আহমদ বিন হাম্বলেও আছে যে, মহানবী সাল্লাল্লাহু আলাইহি ওয়াসাল্লাম-এর পত্নীদের এবং মহানবী সাল্লাল্লাহু আলাইহি ওয়াসাল্লাম-এর কন্যাদের মোহর চারশো দিরহাম ছিল, কাজেই চারশো দিনার বর্ণনাকারীর ভুল। এই সুত্রে আমরা ‘সহীহ মুসলিম’ এর একটি বর্ণনার সমালোচনা করবো।

‘সহীহ মুসলিম’ এ আছেঃ লোকেরা আবু সুফিয়ানের দিকে চোখ তুলে তাকাতে এবং তাঁর কাছে বসতে অপছন্দ করতো। এই প্রেক্ষাপটে আবু সুফিয়ান তিনটি জিনিসের আবেদন করেন, যার মধ্যে একটি ছিল, উম্মে হাবিবাকে বিয়ে করে নেয়ার ব্যাপারে। মহানবী সাল্লাল্লাহু আলাইহি ওয়াসাল্লাম তাঁর আবেদন মঞ্জুর করেন।

(সহীহ মুসলিম, দ্বিতীয় খণ্ড, পৃঃ ৩৬১)

এই বর্ণনা থেকে মনে হয় যে, আবু সুফিয়ান মুসলমান হওয়ার সময় উম্মে হাবিবা (রাযিঃ) নবীপত্নীর অন্তর্গত হননি। কিন্তু এটি বর্ণনাকারীর বিভ্রম। সে জনৈক বিন সাআদ, বিন হাজম, বিন জাওযি, বিন আসির, বায়হাকী এবং আবদুল আজিম মুনযিরি তার বিরুদ্ধে অনেক বর্ণনা উপস্থিত করেছিলেন এবং বিন সাআদ ছাড়া সবাই এই বর্ণনার প্রতিবাদ করেছেন।

মৃত্যু : হযরত উম্মে হাবিবা (রাযিঃ) নিজ ভাই আমীরে মুয়াবিয়ার শাসন সময়ে চুয়াল্লিশ হিজরীতে ইন্তেকাল করেন। মদীনায়ে সমাধিস্থ হন। এই সময় তাঁর বয়স ছিল ৭৩ বছর। কবর-বিষয়ে এটুকু জানা যায় যে, হযরত আলী (রাযিঃ)-এর গৃহেই তার কবর ছিল (হজ্জরত হোসাইনের পুত্র থেকে) জানা গেছে যে, একবার আমি আমার ঘরের একটি কোণ খনন করলে এরকম একটি লিখিত টুকরো আমার হস্তগত হয় যে, ‘এটি রমলা বিনতে সাখার-এর কবর’ অতঃপর সেটি আমি সেই স্থানেই রেখে দিই।

(ইসতিয়াব, ইবনে আবদিল বার দ্বিতীয় খণ্ড, পৃঃ ৭৫০)

মৃত্যুর নিকটবর্তী সময়ে হযরত উম্মে হাবিবা (রাযিঃ), হযরত আয়েশা (রাযিঃ) এবং হযরত উম্মে সালমা (রাযিঃ)কে নিজের কাছে ডাকেন এবং বলেনঃ সতীনদের মধ্যে পরস্পর যা কিছু হয়, তা আমাদের মধ্যেও হয়ে যেতো, এজন্যে আমাকে মাফ করে দাও। হযরত আয়েশা (রাযিঃ) বলেনঃ আমি ক্ষমা করে দিয়েছি এবং তাঁর জন্যে মাগফিরাত কামনা করেছি— উম্মে হাবিবা (রাযিঃ) বললেনঃ তুমি আমাকে আনন্দিত করছে, আল্লাহ তোমাকে আনন্দিত করুন।

সন্তান-সন্ততি : প্রথম স্বামীর ঘরে তার দু'টো সন্তান জনগ্রহণ করে, আবদুল্লাহ এবং হাবিবা। হাবিবা মহানবীর কোলে লালিত হয় এবং সাকিফ গোত্রের প্রধান দাউদ বিন উরওয়া বিন মসউদের সঙ্গে তাঁর বিবাহ হয়।

অবয়ব-সংগঠন : সুন্দরী ছিলেন, সহীহ মুসলিম-এ স্বয়ং আবু সুফিয়ানেরই কথা :

عندى احسن العرب واجمله ام حبيبة

অর্থাৎ, 'আমার কাছে আরবের অন্যতম সুন্দরী ও রূপসী কন্যা আছে।'

মহত্ব ও মহিমা : হযরত উম্মে হাবিবা (রাযিঃ)-এর নিকট থেকে হাদীছ গ্রন্থসমূহে ৬৫টি হাদীছ আছে। বর্ণনাকারীদের সংখ্যাও কম নয়। কয়েকজনের নামঃ হাবিবা (কন্যা), মুয়াবিয়া এবং উকবা (আবু সুফিয়ানের পুত্রদ্বয়) আবদুল্লাহ বিন উতবা, আবু সুফিয়ান বিন সাঈদ সাকিফ (ভাগিনা), সালেম বিন সেওয়ার (গোলাম), আবুল জারাহ, সুফিয়া বিনতে শাইবা, যয়নব বিনতে আবু সালমা, উরওয়া বিন জুবাইর, আবু সালেহ আস্ সম্মান, শহর বিন হাওশাব।

চরিত্র-বৈশিষ্ট্য : হযরত উম্মে হাবিবা (রাযিঃ)-এর প্রগাঢ় ঈমানের একটি ঘটনা লক্ষ্য করবার মত। মক্কা বিজয়ের সময় তাঁর বাবা আবু সুফিয়ান (যখন তিনি কাফের ছিল) মদীনায়া মহানবী সাল্লাল্লাহু আলাইহি ওয়াসাল্লাম-এর কাছে আসে এবং উম্মে হাবিবা (রাযিঃ)-এর ঘরে যায়। যখন তিনি রাসূলে কারীম সাল্লাল্লাহু আলাইহি ওয়াসাল্লাম-এর বিছানায় বসতে চাইলেন, উম্মে হাবিবা (রাযিঃ) তা দেখে বিছানা উল্টে দিলেন। আবু সুফিয়ান অসম্ভব রাগ করে বলল বিছানা কি এতই প্রিয়। তিনি বললঃ এটি রাসূলুল্লাহ সাল্লাল্লাহু আলাইহি ওয়াসাল্লাম-এর বিছানা, আর আপনি তো শিরকবাজ অবিশ্বাসী এবং সেজন্য আপনি অপবিত্র। আবু সুফিয়ান বললেনঃ তুই আমার অনুপস্থিতিতে অনেক বদলে গেছিস। (আল-ইসাবা ফি তময়িজিস সাহাবা, ইবনে হাজার, অষ্টম খণ্ড, পৃঃ ৮৫) হাদীছের উপর অত্যন্ত কঠোরভাবে আমল করতেন এবং অন্যদেরকেও এই বিষয়ে তগাদা দিতেন। একবার তার ভাগিনা আবু সুফিয়ান বিন সয়ীদ বিন মুগিরা এল এবং যবের আটা খেয়ে তিনি যখন কুলি করল, উম্মে হাবিবা (রাযিঃ) বললেনঃ তোমার ওষু করা উচিত। কেননা নবীজীর নির্দেশ হচ্ছেঃ যে জিনিস আঙুনে রন্ধন করা হয়েছে, তা ব্যবহার করলে অযু প্রয়োজনীয় হয়ে পড়ে। (মুসনাদে আহমাদ ইবনে হাম্বল, দ্বিতীয় খণ্ড, পৃঃ ৩২৬)

[এই নির্দেশ বিলুপ্ত অর্থাৎ প্রথমে ছিল, কিন্তু পরে রাসূলুল্লাহ সাল্লাল্লাহু আলাইহি ওয়াসাল্লাম আর বাকী রাখেননি- সাহাবাগণ আঙুনের পাকানো জিনিস খেতেন এবং যদি প্রথম থেকে অযু থাকতো, দ্বিতীয়বার অযু করতেন না, বরং প্রথম অযু থেকেই নামায পড়ে নিতেন- এই রকম একটি হাদীছ হযরত ফাতেমার জীবনী অংশে পরে উপস্থাপিত হবে।]

আবু সুফিয়ানের ইন্তেকাল হলে মুখবয়বে সুগন্ধি লাগান এবং বলেন, মহানবী সাল্লাল্লাহু আলাইহি ওয়াসাল্লাম-এর নির্দেশ হচ্ছেঃ কারো উপর তিন দিনের বেশী দুঃখ করা ঠিক নয়, অবশ্য স্বামীর জন্যে চার মাস দশ দিন শোক করা উচিত।

(সহীহ বুখারী, দ্বিতীয় খণ্ড, পৃঃ ৮০৩)

মহানবী সাল্লাল্লাহু আলাইহি ওয়াসাল্লাম-এর কাছ থেকে একবার শুনেছিলেন যে, যে ব্যক্তি প্রতিদিন বার রাকাত নফল নামায পড়বে, তার জন্যে জান্নাতে ঘর তৈরি হবে- উম্মে হাবিবা (রাযিঃ) বলেনঃ আমি এই নামায সব সময় পড়ি। এর ফল হল এই যে, তাঁর ছাত্র এবং ভাই উতবা এবং উতবার ছাত্র আমার বিন উআইস এবং উমরের ছাত্র নোমান-বিন সালেম-সকলেই-নিজ নিজ কালে বরাবরই এই নামায পড়তেন। স্বভাবতই ভাল মেযাজের ছিলেন। একবার মহানবী সাল্লাল্লাহু আলাইহি ওয়াসাল্লাম বললেন যে আমার বোনকে বিয়ে করে নেন, রাসূলুল্লাহ সাল্লাল্লাহু আলাইহি ওয়াসাল্লাম বললেনঃ তোমার কি তা পছন্দ? তিনি বললঃ হ্যাঁ আমিই আপনার একক স্ত্রী নই, এজন্যই এটি আমার পছন্দ যে, আপনার সঙ্গে বিবাহের সৌভাগ্যে আমার পাশাপাশি আমার বোনও অংশগ্রহণ করুক। (সহীহ বুখারী, দ্বিতীয় খণ্ড, পৃঃ ৭৬৪)

হযরত ময়মুনা (রাযিঃ)

ময়মুনা তাঁর নাম, তিনি ছিল কুরাইশ গোত্রের রমণী। বংশক্রম হচ্ছেঃ ময়মুনা বিনতে হারিস বিন হাজন বিন বুযাইর বিন হাযম বিন রোতবা বিন আবদুল্লাহ বিন হৈলাল বিন আমের বিন সাঅসাআ বিন মুআবিয়া বিন বকর বিন হাওয়ায়েন বিন মনসুর বিন ইকরামা বিন খলিফা বিন কায়েস বিন আয়লান বিন মুযার। ময়মুনার আত্মা ছিলেন হোমায়ের গোত্রের মহিলা।

মাতার নাম ও বংশ তালিকা হচ্ছেঃ হিন্দ বিনতে আউফ বিন জুবাইর বিন হারিস বিন হুমাতা বিন জারশ।

বিবাহঃ প্রথম তাঁর বিয়ে হয়েছিল মসউদ বিন আমর বিন উমাইর সাকাফির সাথে।

(জুরকানী আলাল মাওয়াহিব, তৃতীয় খণ্ড, পৃঃ ২৮৮)

কিন্তু কোন কারণে দু'জনের পৃথক হয়ে যেতে হয়। এরপর তাঁর বিয়ে হয় আবু রহম বিন আবদুল উজ্জার সাথে। আবু রহম ৭ম হিজরীতে মৃত্যুবরণ করলে লোকেরা মহানবী সাল্লাল্লাহু আলাইহি ওয়াসাল্লাম-এর সঙ্গে তাঁর বিয়ের ব্যাপারে চেষ্টা করে।

রাসূলুল্লাহ সাল্লাল্লাহু আলাইহি ওয়াসাল্লাম সপ্তম হিজরীর জিলকদ মাসে উমরার উদ্দেশ্যে মক্কা রওয়ানা হন, সেই সময় ইহরাম অবস্থায় হযরত ময়মুনার সঙ্গে বিবাহ হয়।

(বুখারী শরীফ, দ্বিতীয় খণ্ড, পৃঃ ৬১১)

হযরত আব্বাস (রাযিঃ) বিবাহের মুতাওয়াল্লি হন।

(নাসায়ী শরীফ, পৃঃ ৫১৩)

মহানবী সাল্লাল্লাহু আলাইহি ওয়াসাল্লাম উমরা করবার পর যখন মদীনা ফিরলেন, রাস্তায় সরফ নামক একটি স্থানে (যেটি মদীনা থেকে দশ মাইল দূরে) অবস্থান করেন।

(তাহযীব, ১২তম খন্ড, পৃঃ ৪৫৩)

মহানবী সাল্লাল্লাহু আলাইহি ওয়াসাল্লাম-এর গোলাম আবু রাযি হযরত ময়মুনা (রাযিঃ)কে নিয়ে সরফ-এ আসেন এবং এখানেই বিবাহ উৎসব উদযাপিত হয়।

(তাবকাত-ই-ইবনে সা'আদ, দ্বিতীয় খণ্ড, পৃঃ ৮৯)

এটি মহানবী সাল্লাল্লাহু আলাইহি ওয়াসাল্লাম শেষতম বিবাহ ছিলেন এবং ময়মুনা ছিলেন শেষতম স্ত্রী।

(যায়ুলুল মুনযিল ভাবারী, ১৩তম খণ্ড, পৃঃ ২৪৫৩)

মৃত্যু : এটি আশ্চর্য রকম ঘটনা যে, সরফ-নামক স্থানে যেখানে তার বিবাহ হয়েছিল, সেখানেই তিনি মৃত্যুবরণ করেন।

(সহীহ বুখারী, দ্বিতীয় খণ্ড, পৃঃ ৬১১ এবং মুসনাদে আহমদ, ৬ষ্ঠ খণ্ড, পৃঃ ৩৩৩)

হযরত আবদুল্লাহ বিন আব্বাস (রাযিঃ) তাঁর নামাযে জানাযা পড়ান এবং কবরে রাখেন। সহীহ হাদীছ গ্রন্থগুলোতে উল্লেখ আছেঃ যখন তাঁর শবদেহ উঠানো হয়, হযরত আবদুল্লাহ বিন আব্বাস (রাযিঃ) বলেনঃ

‘ইনি মহানবীর পবিত্র পত্নী, কাজেই মরদেহ খুব বেশী নাড়াচাড়া যাতে না হয়, যথাযোগ্য মর্যাদার সঙ্গে ধীরে ধীরে নিয়ে চল।’ (সহীহ বুখারী, দ্বিতীয় খণ্ড, পৃঃ ২৫৮)

মৃত্যুসাল বিষয়ে যদিও বিতর্ক আছে, কিন্তু সঠিক এই যে, তিনি ৫১ হিজরীতে মৃত্যুবরণ করেন।

মহত্ত্ব ও মহিমা : হযরত ময়মুনার কাছ থেকে ছয়চল্লিশটি হাদীছ বর্ণিত আছে। এইসব হাদীছ বর্ণনার কোন কোনটি থেকে তার ফিকাহ-বিষয়ক অভিজ্ঞানের স্বাক্ষর পাওয়া যায়।

একবার হযরত আবদুল্লাহ বিন আব্বাস (রাযিঃ) বিষন্ন ছিলেন, জিজ্ঞেস করলেন বৎস! কি ব্যাপার কারণ কি? হযরত বিন আব্বাস স্ত্রীর কথা বললেন এবং স্ত্রীর ঋতুস্রাবের কথা বললেন। হযরত ময়মুনা বললেন, কি সুন্দর! আমার ঋতুকালীন সময়ে মহানবী সাল্লাল্লাহু আলাইহি ওয়াসাল্লাম আমার কোলে মাথা রেখে ঘুমুতেন এবং কুরআনুল কারীম পড়তেন; এবং এই রকমভাবে আমরা চাটাই উঠিয়ে তা মসজিদে রেখে আসতাম এবং কখনও এ হাতেই হত। (মুসনাদে আহমদ ইবনে হাম্বল, ১৬তম খণ্ড, পৃঃ ৩৩১) হযরত ময়মুনা (রাযিঃ) থেকে যেসব বুয়ুর্গ ব্যক্তি হাদীছ বর্ণনা করেছেন, তাদের নাম হচ্ছে—

হযরত বিন আব্বাস, হযরত আবদুল্লাহ বিন শাদ্দাদ ইবনুল হাদ, আবদুর রহমান বিন আসসায়েব, ইজিদ বিন আছম্ম, (এঁরা সবাই তাঁর ভাগিনা ছিলেন) উবাইদ উল্লাহ খওলানী, বেযইয়া (দাসী), আতা বিন ইসার, সুলায়মান বিন ইসার (গোলাম) ইবরাহীম বিন আবদুল্লাহ বিন মাতবাদ বিন আব্বাস, কুরাইব (আবদুল্লাহ বিন আব্বাসের গোলাম), উবাইদুল্লাহ বিন সাব্বাক, আবদুল্লাহ বিন উতবা, আলিয়া বিনতে সবই।

হযরত আয়েশা (রাযিঃ) বলেন :

انها كانت اتقانا الله واوصلنا للرحم

‘ময়মুনা আল্লাহকে অনেক ভয় করতেন এবং অপরের কল্যাণ করতেন।’

(আল ইসাবা-ফি-তময়িজিস সাহাবা ইবনে হাজার আসকালানী, ৮ম খণ্ড, পৃঃ ১৯২)

মহানবী সাল্লাল্লাহু আলাইহি ওয়াসাল্লাম-এর নির্দেশানুসরণ সব মুহূর্তেই তাঁর নজরে থাকতো। একবার তাঁর দাসী (বেযইয়া) আবদুল্লাহ বিন আব্বাস (রাযিঃ)-এর সঙ্গে গিয়ে দেখে যে, স্বামী স্ত্রীর বিছানা পৃথক পৃথক পাতানো, তাঁর ধারণা হল দু'জনের মধ্যে হয়তো কিছু হয়ে গেছে। কিন্তু জিজ্ঞেসের পর জানলেন যে, স্ত্রীর ঋতুকালীন সময়ে বিন আব্বাস (রাযিঃ) বিছানা পৃথক করে নেন। এটি ময়মুনাকে এসে তিনি বললেন। হযরত ময়মুনা (রাযিঃ) বললেনঃ তুমি গিয়ে বলো যে, নবীজীর জীবন-পদ্ধতি থেকে এই বিমুখতা কেন? মহানবী সাল্লাল্লাহু আলাইহি ওয়াসাল্লাম সবসময়েই আমাদের বিছানায় আরাম করতেন।

(আল-ইসাবা ফি তময়িজিস সাহাবা, ইবনে হাজার আসকালানী, ৮ম খণ্ড, পৃঃ ১৯২) একবার এক মহিলা অসুস্থ হয়ে, মনে মনে নিয়ত করে নেন যে, ভাল হলে তিনি বায়তুল-মুকাদ্দাস-এ গিয়ে নামায পড়বেন। আল্লাহর রহমতে তিনি ভাল হয়ে যান এবং সফরের প্রস্তুতি নিতে থাকেন। বিদায় নেয়ার জন্যে যখন হযরত ময়মুনা (রাযিঃ)-এর কাছে এলেন, তিনি বললেনঃ তুমি এখানেই থাকো এবং মসজিদে নববীতে গিয়ে নামায পড়ে নাও— কেননা এখানে নামায পড়ার ছওয়াব অন্য মসজিদে নামায পড়ার চেয়ে হাজার গুণ বেশী।

(মুসনাদে আহমদ ইবনে হাম্বল, ইমাম আহমাদ ইবনে হাম্বল, ষষ্ঠ খণ্ড, পৃঃ ৩৩২) হযরত ময়মুনা (রাযিঃ) গোলাম আজাদ করতে পছন্দ করতেন; একবার এক দাসীকে আজাদ করলে মহানবী সাল্লাল্লাহু আলাইহি ওয়াসাল্লাম বললেনঃ আল্লাহ তোমাকে তার প্রতিদান দিন।

(মুসনাদে আহমদ ইবনে হাম্বল, ষষ্ঠ খণ্ড, পৃঃ ৩৩৩) হযরত ময়মুনা (রাযিঃ) কখনো কখনো ঋণ করতেন; একবার একটু বড় অংকের কর্জ নিলে কেউ একজন বললেনঃ আপনি কিভাবে এটি শোধ করবেন? তিনি বললেন মহানবী সাল্লাল্লাহু আলাইহি ওয়াসাল্লাম-এর বাণী ‘যে ব্যক্তি আদায় করবার ইচ্ছা রাখে, আল্লাহ তাঁর ঋণ শোধ করে দেন। (মুসনাদে আহমদ ইবনে হাম্বল, ষষ্ঠ খণ্ড, পৃঃ ৩৩২)

হযরত সাফিয়া (রাযিঃ)

তার আসল নাম ছিল জয়নব; কিন্তু যেহেতু তিনি খয়বরের যুদ্ধে বিশেষভাবে মহানবী সাল্লাল্লাহু আলাইহি ওয়াসাল্লাম-এর অংশে এসেছিলেন এবং আরবে যুদ্ধ-লব্ধ এরকম অংশ ইমাম অথবা বাদশাহর জন্যে নির্ধারিত হত। এজন্যে তাকে সাফিয়া বলা হত, আর তিনিও সে কারণে এই নামে প্রসিদ্ধ হয়ে যান। এটি জুরকানির বর্ণনা।

পিতা এবং মাতা উভয় দিক থেকেই হযরত সাফিয়া (রাযিঃ) একটি বিশিষ্টতা অর্জন করেছিলেন। পিতা ছিল হুয়াই বিন আখতব বনু নাজির গোত্রের নেতা, হযরত হারুন আলাইহিস সালামের বংশধর বলে গণ্য হলেন। মাতার নাম ছিল যরদ, যিনি ছিলেন কুরাইজা গোত্রনেতা সামওয়্যারের কন্যা। আর এ দু'টি বংশ (কুরাইজা গোত্র এবং বনু

নজির গোত্র) বনি ইসরাইলের সব গোত্রের ভিতরে বিশিষ্ট গোত্র হিসেবে অভিচিহ্নিত হত—এরা বহুকাল থেকে আরবের উত্তরাংশে বসতি নির্মাণ করেছিল।

বিবাহ : হযরত সাফিয়া (রাযিঃ)-এর প্রথম বিয়ে হয় সালাম বিন মশকন আলকরজীর সঙ্গে, সালাম তালাক দেয়ার পর তাঁর বিয়ে হয় কিনানা বিন আবিল হুকাইকের সাথে, যিনি হিজায়ের ব্যবসায়ী ও খায়বরের প্রধান আবু রাযি-এর ভতিজা ছিল। কিনানা খায়বর যুদ্ধে মারা যান, হযরত সাফিয়ার পিতা এবং ভাইও মারা যান এবং নিজেও মুসলমানদের হাতে শ্রেফতার হন। যখন খয়বরের সমস্ত কয়েদী একত্রিত করা হয়। হযরত দাহইয়া কলবী (রাযিঃ) রাসূলুল্লাহ সাল্লাল্লাহু আলাইহি ওয়াসাল্লাম-এর কাছে একটি দাসীর আবেদন করেন মহানবী সাল্লাল্লাহু আলাইহি ওয়াসাল্লাম তাঁকে নির্বাচনের অধিকার দিলে তিনি সাফিয়াকে নির্বাচন করেন। কিন্তু একজন সাহাবী মহানবীকে বললেন, আপনি বনু নজির ও বনু কুরাইজার বিশিষ্ট মহিলাকে দাহইয়া কালবীকে দিয়ে দিলেন, অথচ সাফিয়া তো কেবল আপনারই যোগ্য—(সাহাবীর উদ্দেশ্য ছিলঃ আরবের এই বিশিষ্ট মহিলার সাথে অন্যান্য সাধারণ আরব-রমণীর মত ব্যবহার সঙ্গত নয়।) ফলত: মহানবী সাল্লাল্লাহু আলাইহি ওয়াসাল্লাম হযরত দাহইয়াকে অন্য দাসী প্রদান করেন এবং সাফিয়াকে স্বাধীন করে বিয়ে করে নেন।

(সহীহ বুখারী, কিতাবুস-সালাত, প্রথম খণ্ড, পৃঃ ৫৪৬)

খয়বর থেকে রওনা হয়ে ‘ছহবা’ নামক স্থানে বিবাহ উৎসব উদযাপিত হয় এবং যা কিছু সম্পদ লোকদের কাছে ছিল, তা দিয়ে অলিমা-উৎসব পালন করেন। সেখান থেকে রওনা হলে মহানবী সাল্লাল্লাহু আলাইহি ওয়াসাল্লাম হযরত সাফিয়া (রাযিঃ)কে নিজের উটের উপর তুলে নেন এবং পর্দার ব্যবস্থা করেন। এটি এরকম ঘোষণার মতই যে, হযরত সাফিয়া (রাযিঃ) পবিত্র পত্নীদের অন্তর্ভুক্ত হয়ে গেছেন।

(আল-ইসাবা ফি তময়িজিস সাহাবা, অষ্টম খণ্ড, পৃঃ ১২৬/তাবকাত-ই-ইবনে সা‘আদ, অষ্টম খণ্ড, পৃঃ ৮৬)

সাধারণ অবস্থা : হযরত সাফিয়া (রাযিঃ)-এর প্রসিদ্ধ ঘটনাপুঞ্জের মধ্যে হজ্জের ভ্রমণ উল্লেখযোগ্য, যে হজ্জ তিনি মহানবী সাল্লাল্লাহু আলাইহি ওয়াসাল্লাম-এর সঙ্গে করেছিলেন।

হযরত ওসমান (রাযিঃ)কে ঘেরাও করবার সময় (৩৫ হিজরী) হযরত সাফিয়া (রাযিঃ) তাঁর খুব সাহায্য করেছিলেন। যখন হযরত উসমান (রাযিঃ)-এর জীবন যাপনের প্রয়োজনীয় সবকিছু বন্ধ করে দেয়া হয় এবং তার ঘরে পাহারা নিযুক্ত করা হয়—হযরত সাফিয়া (রাযিঃ) একটি খচ্চরের উপর সওয়ার হয়ে গোলাম সঙ্গে করে হযরত উসমান (রাযিঃ)-এর গৃহাভিমুখে যান। পাহারাদাররা এটি দেখে হযরত সাফিয়ার (রাযিঃ) খচ্চরকে মারতে শুরু করে, হযরত সাফিয়া বললেনঃ আমার অসম্মানিত হওয়ার প্রয়োজন নেই, আমি ফিরে যাচ্ছি, তোমরা খচ্চরকে ছেড়ে দাও। ঘরে ফিরে এসে হযরত হাসানকে হযরত উসমান (রাযিঃ)-এর সহযোগিতার জন্যে ঠিক করেন,

হযরত হাসান তাঁর ঘর থেকে হযরত উসমান (রাযিঃ)-এর জন্যে খাবার এবং পানি নিয়ে যেতেন। (আল ইসাবা ফি তময়িজিস সাহাবা, প্রথম খণ্ড, পৃঃ ১২৭)

মৃত্যু : হযরত সাফিয়া ৫০ হিজরীতে মৃত্যুবরণ করেন এবং জান্নাতুল বাকী কবরস্থানে সমাহিত হন। এ সময় তাঁর বয়স হয়েছিল ষাট বছর। মৃত্যুকালে একলক্ষ টাকার সম্পদ রেখে যান, তার এক তৃতীয়াংশ ইহুদী ভগ্নিপুত্রের জন্যে অসীয়াত করে যান।

(জুরকানী আলাল মাওয়াহিব, তৃতীয় খণ্ড, পৃঃ ১৯৬)

অবয়ব-সংগঠন : ক্ষুদ্রাকায় এবং সুন্দরী ছিলেন। (সহীহ মুসলিম, প্রথম খণ্ড, পৃঃ ৫৪৮)

মহত্ত্ব ও মহিমা : হযরত সাফিয়া (রাযিঃ)-এর কাছ থেকে কয়েকটি হাদীছ বর্ণিত আছে যেগুলো জয়নুল আবেদীন, ইসহাক বিন আব্দুল্লাহ বিন হারিস, মুসলিম বিন সফওয়ান, কিনানা এবং এজিদ বিন মাতাব প্রমুখ বর্ণনা করেছেন।

অন্যান্য নবীপত্নীগণের মত হযরত সাফিয়া (রাযিঃ)ও নিজ কালে জ্ঞানের কেন্দ্র ছিলেন। হযরত সুহায়রা বিনতে জি'ফর হজ্জ করে হযরত সাফিয়া (রাযিঃ)-এর কাছে মদীনায় এলেন, তখন কুফার বহু রমণী ইসলামী শরীয়তের বিধি-নির্দেশ জানবার জন্যে হযরত সাফিয়া (রাযিঃ)-এর কাছে বসা ছিলেন। হযরত সুহায়রারও উদ্দেশ্য এই রকম ছিল, এজন্যে তিনি কুফার মহিলাদের দিয়ে হযরত সাফিয়া (রাযিঃ)কে প্রশ্ন করান। একটি বিষয় ছিল মদ বিষয়ে, হযরত সাফিয়া (রাযিঃ) শুনে বললেনঃ ইরাকবাসীরা এই বিষয়টি প্রায় সময়েই জিজ্ঞেস করেন।

(মুসনাদে আহমদ ইবনে হাম্বল, ইমাম আহমাদ, ষষ্ঠ খণ্ড, পৃঃ ৩৭৭)

চরিত্র : হযরত সাফিয়া (রাযিঃ) বিচিত্রবিধ চরিত্র-বৈশিষ্ট্যের আধার ছিল। 'উসুদুল গাবা' গ্রন্থে আছে। হযরত সাফিয়া (রাযিঃ) ছিলেন অসম্ভব মেধাবী' জুরকানীতে আছে- হযরত সাফিয়া (রাযিঃ) মেধাবী, অমিতাভ এবং ধৈর্যশীল ছিলেন।

(উসুদুল গাবা ইবনুল আসীর, ৫ম খণ্ড, পৃঃ ৪৯০/জুরকানী আলাল মাওয়াহিব, তৃতীয় খণ্ড, পৃঃ ২৯৬)

ধৈর্যশীলতা তার চরিত্রের একটি উজ্জল প্রাপ্ত। খায়বর যুদ্ধে যখন তিনি তাঁর বোনের সঙ্গে শ্রেফতার হয়ে আসছিলেন, তাঁর বোন পরাভূত ইহুদীদের লাশ দেখে চীৎকার করে উঠছিল- হযরত সাফিয়া (রাযিঃ) আপন প্রিয় স্বামীর কাছ দিয়ে যাচ্ছিলেন, কিন্তু তিনি সেই আগের মত স্থির ও অচঞ্চল, তাঁর স্থির কপালে কোন বিচলতা জাগেনি।

একবার হযরত হাফসা (রাযিঃ) হযরত সাফিয়া (রাযিঃ)কে ইহুদী বলেন, হযরত সাফিয়া (রাযিঃ) তা জানতে পেরে কাঁদতে থাকেন। হযরত সাফিয়া (রাযিঃ)-এর এক দাসী ছিল, যে হযরত ওমর (রাযিঃ)-এর কাছে গিয়ে তাঁর বিরুদ্ধে নালিশ করতো। একদিন সে হযরত উমর (রাযিঃ)কে গিয়ে বললেনঃ সাফিয়ার মধ্যে ইহুদী প্রবৃত্তি এখনো অবশিষ্ট আছে, সাফিয়া এখনও (ইহুদীদের মত) 'শনিবার'কে ভাল দিন মনে করে এবং ইহুদীদের সঙ্গে ভাল ব্যবহার করে। হযরত উমর (রাযিঃ) বিষয়টির সত্যাসত্য যাচাই করবার জন্যে একটি লোক পাঠান। এর উত্তরে হযরত হাফসা (রাযিঃ) বলেনঃ শনিবারকে 'উত্তম দিবস' মনে করার কোন প্রয়োজন নেই, তার বদলে আল্লাহ

আমাদেরকে জুমু'আর দিবস দান করেছেন। হ্যাঁ, অবশ্য ইহুদীদের সাথে আমি ভাল ব্যবহার করি, কেননা তারা আমার আত্মীয় পরিজন, এরপর দাসীকে ডেকে জিজ্ঞেস করেন, তুমি আমার বিরুদ্ধে নালিশ করেছ? দাসী উত্তরে বলেঃ হ্যাঁ আমাকে শয়তান ঠেলে দিয়েছিল। হযরত সাফিয়া নিঃশব্দ হয়ে যান এবং সেই দাসীকে স্বাধীন করে দেন। (আল ইসাবা ফি আহওয়ালিস সাহাবা, অষ্টম খণ্ড, পৃঃ ১২৭; জুরকানী, তৃতীয় খণ্ড, পৃঃ ২৯৬) মহানবী সাল্লাল্লাহু আলাইহি ওয়াসাল্লাম-এর প্রতি অসম্ভব মমতা ছিল হযরত সাফিয়ার। মহানবী সাল্লাল্লাহু আলাইহি ওয়াসাল্লাম যখন অসুস্থ হন, তখন হযরত সাফিয়া (রাযিঃ) অত্যন্ত বেদনার সঙ্গে বলেন, আহা! আপনার অসুখ যদি আমার হত। অন্যান্য পত্নীরা তাঁর দিকে দৃষ্টিপাত করতে শুরু করলেন, মহানবী সাল্লাল্লাহু আলাইহি ওয়াসাল্লাম বললেনঃ সে ঠিকই বলছে অর্থাৎ তার এই অভিব্যক্তির মধ্যে কোন কৃত্রিমতা নেই। (জুরকানী আলাল মাওয়াহিব, তৃতীয় খণ্ড, পৃঃ ১৯৬- ইবনে সা'আদ থেকে উদ্ধৃত) মহানবী সাল্লাল্লাহু আলাইহি ওয়াসাল্লাম তাঁকে অসম্ভব ভালবাসতেন এবং সবসময়েই তাকে খুশী করবার চেষ্টা করতেন। একবার মহানবী সাল্লাল্লাহু আলাইহি ওয়াসাল্লামও সফরে ছিলেন, পবিত্র পত্নীরাও তাঁর সাথে ছিলেন- হযরত সাফিয়া (রাযিঃ)-এর উট দূর্ভাগ্যক্রমে অসুস্থ হয়ে পড়েন। হযরত যয়নব (রাযিঃ)-এর কাছে প্রয়োজনের অতিরিক্ত উট ছিল, মহানবী সাল্লাল্লাহু আলাইহি ওয়াসাল্লাম তাকে বললেনঃ সাফিয়াকে একটি উট দিয়ে দাও- তিনি বললেনঃ আমি ঐ ইহুদীকে উট দেবো? এই কথায় মহানবী সাল্লাল্লাহু আলাইহি ওয়াসাল্লাম তার উপর এত বেশী রাগ করলেন যে, দু'মাস পর্যন্ত তাঁর কাছেও যাননি। (আল ইসাবা ফি তময়িজিস সাহাবা/ আব্বাসী আসকালানী, অষ্টম খণ্ড, পৃঃ ১২৬) একবার হযরত আয়েশা (রাযিঃ) হযরত সাফিয়া (রাযিঃ)-এর শরীর আকৃতি-বিষয়ে কয়েকটি কথা উচ্চারণ করলে, মহানবী সাল্লাল্লাহু আলাইহি ওয়াসাল্লাম বলেন, তুমি এমন কথা বলছো যে, যদি তা সমুদ্রে নিক্ষেপ করা হয়, তাহলে তা তার সাথে মিশে যাবে। অর্থাৎ তা সমুদ্রের পানিকেও ময়লা করে দেবে। (আবু দাউদ শরীফ, তৃতীয় খণ্ড, পৃঃ ১৯৩) একবার মহানবী সাল্লাল্লাহু আলাইহি ওয়াসাল্লাম হযরত সাফিয়া (রাযিঃ)-এর কাছে যান এবং দেখেন যে তিনি ক্রন্দন করছেন। ক্রন্দনের কারণ জিজ্ঞেস করলেন মহানবী; তিনি বললেন হযরত আয়েশা (রাযিঃ) এবং হাফসা (রাযিঃ) বলছেন যে, তারাই নাকি নবীপত্নীদের মধ্যে উত্তম, কেননা তাঁরা পত্নীই শুধু নয়, মহানবীর চাচাতো বোনও বটে। মহানবী সাল্লাল্লাহু আলাইহি ওয়াসাল্লাম বললেনঃ তুমি তাদেরকে এটি বলে দিলে না কেন যে, হারুন (আঃ) আমার পিতা, মুসা (আঃ) আমার চাচা এবং মুহাম্মদ সাল্লাল্লাহু আলাইহি ওয়াসাল্লাম আমার স্বামী- কাজেই তোমরা আমার চেয়ে কি করে উত্তম হতে পারো।

হজ্জের সফরের সময় হযরত সাফিয়া (রাযিঃ)-এর উট বসে গিয়েছিল এবং তিনি সবার পিছনে পড়ে গিয়েছিলেন; মহানবী সাল্লাল্লাহু আলাইহি ওয়াসাল্লাম সেদিক দিয়ে যাওয়ার সময় দেখলেন হযরত সাফিয়া (রাযিঃ) অবিশ্রাম অশ্রুসিক্ত ক্রন্দন করছেন, মহানবী সাল্লাল্লাহু আলাইহি ওয়াসাল্লাম নিজের হাত এবং চাদর দিয়ে তার অশ্রুজল মুছলেন, তিনি তাঁর অশ্রুজল মুছতে যেতেন আর অমনি উনি আরো অধিক বেগে ক্রন্দন করতেন। (জুরকানী, তৃতীয় খণ্ড, পৃঃ ২৯৬)

হযরত সাফিয়া (রাযিঃ) অসম্ভব উদ্যমশীল, প্রাণময় ও উদার মহিলা ছিলেন। যখন তিনি মহানবী সাল্লাল্লাহু আলাইহি ওয়াসাল্লাম-এর পত্নী হয়ে আসেন, হযরত ফাতিমা (রাযিঃ) এবং অন্যান্য নবী পত্নীদেরকে স্বর্ণালঙ্কার দান করেন। (জুরকানী, তৃতীয় খণ্ড, পৃঃ ২৯৬)

খুব ভাল রাঁধতে জানতেন এবং মহানবী সাল্লাল্লাহু আলাইহি ওয়াসাল্লাম-এর জন্যে হযরত আয়েশা (রাযিঃ)-এর ঘরে তিনি যে খাবার পঠিয়েছিলেন তার উল্লেখ বুখারী এবং নাসায়ী শরীফে এসেছে।

মহানবী সাল্লাল্লাহু আলাইহি ওয়াসাল্লাম-এর পবিত্র কন্যাগণ

হযরত যয়নব (রাযিঃ)

মহানবী সাল্লাল্লাহু আলাইহি ওয়াসাল্লাম-এর বড় মেয়ে ছিলেন হযরত যয়নব; নবুয়্যতের দশ বছর পূর্বে নবীজীর বয়স যখন ত্রিশ, যয়নবের জন্ম হয়।

বিবাহ : খালাতো ভাই আবুল আস বিন রবীর সঙ্গে তাঁর বিয়ে হয়।

সাধারণ অবস্থা : নবুয়্যতের ত্রয়োদশ বছরে যখন মহানবী সাল্লাল্লাহু আলাইহি ওয়াসাল্লাম মক্কা থেকে মদীনায হিজরত করে যান, মহানবী সাল্লাল্লাহু আলাইহি ওয়াসাল্লাম-এর আত্মীয়-পরিবার, মক্কায থেকে গিয়েছিল। হযরত যয়নবও আপন শ্বশুরালয়ে ছিলেন। বদর যুদ্ধে (দ্বিতীয় হিজরী) আবুল ‘আস (যয়নবের স্বামী) কাফিরদের পক্ষে অংশগ্রহণ করে, আবদুল্লাহ বিন জুবাইর তাকে শ্রেফতার করে এবং এই শর্তের সাপেক্ষে রেহাই দেয় যে, মক্কায গিয়ে হযরত যয়নবকে (রাযিঃ) মদীনায পাঠিয়ে দেবে।

(তাবকাত-ই-ইবনে সা‘আদ, ৮ম খণ্ড, পৃঃ ২০)

আবুল আস মক্কায গিয়ে হযরত যয়নবকে (রাযিঃ) আপন ছোট ভাই কেনানার সঙ্গে করে মদীনার দিকে রওয়ানা করে দেন। যেহেতু কাফিরদের অপঘাতের সম্ভাবনা ছিল, কেনানা হাতিয়ার সঙ্গে করে নিয়েছিল। ‘জি তাবি’ নামক স্থানে পৌঁছলে কুরাইশের কিছু লোক আক্রমণ করে, হিয়ার বিন আসওয়াদ হযরত যয়নবকে বল্লম মেরে মাটির উপর ফেলে দেন। যয়নব অন্তঃসত্তা ছিলেন, গর্ভপাত হয়ে যায়। কেনানা তাঁর তীরের ঝুলি থেকে তীর বের করে বললেন, কেউ যদি এবার কাছে আসেন, এই তীর তোমাদের অনুসরণ করবে। লোকজন ফিরে গেলে আবু সুফিয়ান অন্যবিধ কুরাইশ- নেতৃবৃন্দের সঙ্গে সেখানে এল এবং বলল, ‘তীর গুটিয়ে নাও, আমাদের কিছু কথা আছে’ তিনি তীর ফিরিয়ে নিলেন। আবু সুফিয়ান বললঃ মুহাম্মদ সাল্লাল্লাহু আলাইহি ওয়াসাল্লাম-এর দিক থেকে যে সব বিপদের মুখোমুখি আমরা হয়েছি, তুমি জান। এখন যদি তুমি প্রকাশ্যে তার কন্যাকে আমাদের অধিকার থেকে নিয়ে যাও, তাহলে লোকেরা আমাদের দুর্বল বলবে। আমরা যয়নবকে বাধা দেব না। যখন হাঙ্গামা কমে আসবে তখনি চুপিসারে নিয়ে যাও। কেনানা এই কথা মেনে নিলেন এবং যয়নবকে নিয়ে মক্কায ফিরে এল। কিছুদিন পর রাতে যয়নবকে নিয়ে রওয়ানা হন মদীনার দিকে, জায়েদ বিন হারেসাকে মহানবী সাল্লাল্লাহু আলাইহি ওয়াসাল্লাম আগে থেকেই পাঠিয়ে দিয়েছিল। তিনি ‘বতনে যাজুয’ নামক স্থানে অপেক্ষা করছিলেন; কেনানা হযরত যয়নবকে তাঁর হাতে সমর্পণ করেন এবং তিনি অতঃপর তাঁকে নিয়ে রওয়ানা হয়ে যান।

হযরত যয়নব (রাযিঃ) মদীনায আসেন, তাঁর স্বামী আবুল আস তখনো অবিশ্বাসীদের দলে মক্কায। ষষ্ঠ হিজরীর জমাদিউল আউয়াল মাসে আবুল ‘আস কুরাইশের একটি কাফেলার সঙ্গে সিরিয়ার দিকে রওয়ানা হন— মহানবী সাল্লাল্লাহু আলাইহি ওয়াসাল্লাম হযরত যায়েদ বিন হারিসাকে ১৭০ জন আরোহীসহ পাঠান; ‘আয়েজ’ নামক স্থানে

কাফেলা ধরা পড়ে মুসলমানদের হাতে, কিছু লোককে গ্রেফতার করা হয়, কিছু মাপ ও সম্পদ হাতে আসে আর এদের মধ্যে আবুল 'আসও ছিল। আবুল 'আসকে ধরে নিয়ে এলে হযরত যয়নব (রাযিঃ) তাঁকে ছেড়ে দেন এবং মহানবী সাল্লাল্লাহু আলাইহি ওয়াসাল্লাম তাঁর মালও তাঁকে ফিরিয়ে দেন। আবুল 'আস মক্কায় ফিরে গিয়ে লোকদের কাছে তাদের আমানত ফিরিয়ে দেন এবং ইসলাম গ্রহণ করেন। ইসলাম গ্রহণের পর হিজরত করে মদীনায় আসেন। হযরত যয়নব (রাযিঃ) তাঁকে শিরক- অবস্থায় ছেড়ে আসেন, এজন্যে উভয়ের মধ্যে ছাড়াছাড়ি হয়ে গিয়েছিল। মদীনায় আসার পর দ্বিতীয়বার তাঁরা বিবাহ- বন্ধনে আবদ্ধ হন। তিরমিযী প্রভৃতি গ্রন্থে হযরত বিন আব্বাস (রাযিঃ)-এর বর্ণনা আছেঃ কোন নতুন বিবাহ হয়নি; কিন্তু অন্য বর্ণনায় নতুন বিবাহের পরিষ্কার উল্লেখ আছে। হযরত বিন আব্বাসের বর্ণনা যদিও হাদীছেব সনদের দিক থেকে অন্যান্য বর্ণনার উপর অগ্রাধিকার আছে কিন্তু ইসলামী আইনতত্ত্ববিদগণ দ্বিতীয় বর্ণনাটিকে (অর্থ্যাৎ যয়নব (রাযিঃ)-এর সঙ্গে আবুল 'আসের নতুন বিবাহ হয়েছে) গ্রহণযোগ্য বিবেচনা করেছেন এবং হযরত বিন আব্বাসের বর্ণনাকে এইভাবে ব্যাখ্যা করেছেন যে, নতুন বিবাহের মোহর এবং অন্যান্য শর্তাবলীর মধ্যে কোন রদবদল করা হয়নি-ফলে ইবনে আব্বাস সেই বিবাহকে প্রথম বিবাহ হিসাবে উল্লেখ করেছেন, কেননা ছাড়াছাড়ির পর দ্বিতীয় বিবাহ তো জরুরী। আবুল 'আস হযরত যয়নব (রাযিঃ)-এর সঙ্গে খুবই ভদ্রোচিত ব্যবহার করেন এবং মহানবী সাল্লাল্লাহু আলাইহি ওয়াসাল্লামও তাঁর ভদ্রোচিত ব্যবহার ও সৌজন্যমূলক সম্পর্কের প্রশংসা করেন।

(তাবকাত-ই-ইবনে সা'আদ, মুহাম্মদ ইবনে সা'আদ, অষ্টম খণ্ড, পৃঃ ২১)

মৃত্যু : নতুন বিবাহের পর হযরত যয়নব (রাযিঃ) অত্যন্ত অল্প সময় জীবিত ছিলেনঃ অষ্টম হিজরীতেই তাঁর ইন্তেকাল হয়ে যায়। হযরত উম্মে আইমন (রাযিঃ) হযরত সাওদা (রাযিঃ) হযরত উম্মে সালমা (রাযিঃ) এবং উম্মে আতিয়া (রাযিঃ) তাঁকে গোসল করান- যার পদ্ধতি স্বয়ং মহানবী সাল্লাল্লাহু আলাইহি ওয়াসাল্লাম শিখিয়ে দেন। মহানবী সাল্লাল্লাহু আলাইহি ওয়াসাল্লাম নিজে জানাযার নামায পড়ান, নিজে কবরে প্রবেশ করেন এবং নিজের চক্ষুমণিকে মাটিতে সমর্পণ করেন- এবং মহানবী সাল্লাল্লাহু আলাইহি ওয়াসাল্লাম-এর মুখবয়বে বেদনা ও বিষন্নতার ছায়া লেগে ছিল।

(তাবকাত-ই-ইবনে সা'আদ, অষ্টম খণ্ড, পৃঃ ২৪, সহীহ বুখারী, ১ম খণ্ড, পৃঃ ১৬৭)

সন্তান-সন্ততি : হযরত যয়নব (রাযিঃ) দু'জন সন্তান রেখে যানঃ আলী এবং উমামা। আলী সম্পর্কে একটি বর্ণনায় পাওয়া যায় যে, বাল্যকালেই মৃত্যুবরণ করেন, কিন্তু সাধারণ বর্ণনার তথ্য এই যে, সাবালক হয়েছিলেন। বিন আসার লিখেছেনঃ ইয়ারমুকের যুদ্ধে মারা যান, মক্কা বিজয়ের সময় ইনিই মহানবী সাল্লাল্লাহু আলাইহি ওয়াসাল্লাম-এর পেছনে সঙ্গী ছিলেন। আর উমামা অনেকদিন জীবিত ছিলেন, তাঁর কথা পরে আলোচিত হবে।

চরিত্র- বৈশিষ্ট্য : মহানবী সাল্লাল্লাহু আলাইহি ওয়াসাল্লাম ও তাঁর স্বামীর প্রতি অসম্ভব মমতা ছিল। হযরত আনাস (রাযিঃ) তাঁকে রেশমের চাদরে আবৃত দেখেছিলেন, যে চাদরে আবার হলুদ রংয়ের ধারা ছিল। (তাবকাত-ই-ইবনে সা'আদ, অষ্টম খণ্ড, পৃঃ ২২)

হযরত রোকেয়া (রাযিঃ)

প্রসিদ্ধ বর্ণনা অনুযায়ী হযরত রোকেয়া (রাযিঃ) মহানবী সাল্লাল্লাহু আলাইহি ওয়াসাল্লাম-এর দ্বিতীয় কন্যা ছিলেন, যিনি নবুয়্যতের পূর্বে ৩৩ হিজরীতে জন্মগ্রহণ করেন।

বিবাহ : প্রথম তাঁর বিয়ে হয়েছিল আবু লাহাবের পুত্র আনতাবার সঙ্গে এবং এটি নবুয়্যতের আগের ঘটনা। মহানবী সাল্লাল্লাহু আলাইহি ওয়াসাল্লাম-এর তৃতীয় কন্যা উম্মে কুলসুমের বিবাহ আবু লাহাবের দ্বিতীয় পুত্র উতাইবার সাথে হয়েছিল।

ইসলাম : যখন মহানবী সাল্লাল্লাহু আলাইহি ওয়াসাল্লাম নবুয়্যত প্রাপ্ত হন এবং তিনি ইসলামের দাওয়াত শুরু করেন, তখন আবু লাহাব পুত্রদেরকে একত্রিত করে বললঃ 'যদি তোমরা মুহম্মদের কন্যাদের থেকে পৃথক না হয়ে যাও, তবে তোমাদের সঙ্গে আমার উঠাবসা করা হারাম'। তারা দু'জনেই পিতার কথা মেনে নেয়। মহানবী সাল্লাল্লাহু আলাইহি ওয়াসাল্লাম হযরত রোকেয়ার বিবাহ হযরত উসমান (রাযিঃ)-এর সঙ্গে করিয়ে দেন।

সাধারণ-অবস্থা : নবুয়্যতের পঞ্চম বছর হযরত উসমান (রাযিঃ) হাবশায় হিজরত করেন, হযরত রোকেয়াও তাঁর সাথে চলে যান। ফিরে আসেন যখন, তখন মক্কার অবস্থা আগের চেয়ে আরো অধিক বিপন্ন ছিল। কাজেই দ্বিতীয়বার হিজরত করেন। বহুদিন মহানবী সাল্লাল্লাহু আলাইহি ওয়াসাল্লাম তাঁদের কোন খবরই জানতে পারলেন না, একজন মহিলা এসে খবর দিলো যে আমি তাঁদের দু'জনকে দেখেছি। মহানবী সাল্লাল্লাহু আলাইহি ওয়াসাল্লাম দু'আ করলেন এবং বললেনঃ ইবরাহীম (আঃ) এবং লুত (আঃ)-এর পরে উসমানই প্রথম ব্যক্তি যে স্ত্রীকে নিয়ে হিজরত করেছে।

(উসদুল গাবা-ইবনুল আসীর, পঞ্চম খণ্ড, পৃঃ ১৫৭)

দ্বিতীয় বারের হিজরতে হাবশায় তাঁরা অনেকদিন অবস্থান করেন। যখন এই সংবাদ পেলেন যে, মহানবী সাল্লাল্লাহু আলাইহি ওয়াসাল্লাম মদীনার দিকে হিজরত করে যাচ্ছেন কয়েকজন সাহাবীসহ, তখন কয়েকজন মহান পুরুষ, যাদের মধ্যে হযরত উসমান এবং হযরত রোকেয়াও ছিলেন-মক্কা চলে এলেন এবং মহানবী সাল্লাল্লাহু আলাইহি ওয়াসাল্লাম-এর অনুমতিক্রমে মদীনায় হিজরত করেন। মদীনায় তিনি হযরত হাসানের ভাই আওস বিন সাবিতের গৃহে অবস্থান করেন।

মৃত্যু : দ্বিতীয় হিজরী ছিল বদর-যুদ্ধের বছর: হযরত রোকেয়া (রাযিঃ) খুব অসুস্থ হয়ে যান এ সময়, মহানবী সাল্লাল্লাহু আলাইহি ওয়াসাল্লাম সে সময় বদর-যুদ্ধের প্রস্তুতি নিচ্ছিলেন, যুদ্ধে বেরুবার সময় হযরত উসমানকে ছেড়ে দেন হযরত রোকেয়ার অসুস্থতার দেখা শোনার জন্যে।

(বুখারী শরীফ, প্রথম খণ্ড, পৃঃ ৪৪২)

যে দিন এজিদ বিন হারিসা (রাযিঃ) বদর-যুদ্ধের বিজয়ের খবর নিয়ে মদীনায়ে এসেছিলেন, সে দিনই হযরত রোকেয়া (রাযিঃ) মৃত্যুবরণ করেন। যুদ্ধের কারণে মহানবী সাল্লাল্লাহু আলাইহি ওয়াসাল্লাম তাঁর জানাযায় অংশগ্রহণ করতে পারেননি। কিন্তু যখন ফিরলেন এবং এই মৃত্যুর ঘটনা অবহিত হলেন— কবরের কাছে গেলেন বিষন্ন বেদনার্ত অবস্থায় এবং বললেনঃ উসমান বিন মাযউন (রাযিঃ) পূর্বেই চলে গেছেন, এখন তুমি তাঁর কাছে চলে যাও। এই কথা মহিলাদের মধ্যে বিলাপের বন্যা বইয়ে দেয়, হযরত ওমর (রাযিঃ) চাবুক নিয়ে মারতে এলে, মহানবী সাল্লাল্লাহু আলাইহি ওয়াসাল্লাম বলল, ‘ক্রন্দন খারাপ নয়, কিন্তু হাত পা নেড়ে আহাজারি শয়তানী কাজ, তা থেকে অবশ্যই বাঁচা উচিত।’ প্রিয় কন্যা হযরত ফাতেমা (রাযিঃ)ও মহানবী সাল্লাল্লাহু আলাইহি ওয়াসাল্লাম কাছে উপস্থিত হল, তিনি কবরের পাশে বসে কাঁদছিলেন, আর মহানবী সাল্লাল্লাহু আলাইহি ওয়াসাল্লাম তাঁর অশ্রুজল কাপড় দিয়ে মুছিয়ে দিচ্ছিলেন।

সন্তান-সন্ততি : হাবশায় হিজরত-কালীন সময়ে হযরত রোকেয়ার একটি পুত্র সন্তানের জন্ম হয়, তার নাম ছিল আব্দুল্লাহ; হযরত উসমানের উপনাম আবু আব্দুল্লাহ এবং সেই নামের সূত্রেই তাঁর নাম। ছয় বছর পর্যন্ত জীবিত ছিলেন, একবার একটি পাখি তার চেহারায়ে ঠোকর দেয় এবং তখনই তার মৃত্যু হয়। এটি চতুর্থ হিজরীর জমাদিউল আউয়াল মাসের ঘটনা। আব্দুল্লাহর পরে হযরত রোকেয়ার আর কোন সন্তান হয়নি।

অবয়ব-সংগঠন : হযরত রোকেয়া (রাযিঃ) সুন্দরী এবং শোভন শরীর গঠনের অধিকারিণী ছিল। জুরকানীতে আছে—‘তিনি খুবই রূপবতী ছিল।’

(ইসতিযাব-ইবনে আবদিল বার, দ্বিতীয় খণ্ড, পৃঃ ৪৭ এবং তাবকাত-ই-ইবনে সা‘আদা বিন সা‘আদা, অষ্টম খণ্ড, পৃঃ ২৪ এবং উসুদুল গাবা ইবনুল আসীর, পঞ্চম খণ্ড, পৃঃ ৪৫৬ ও ৪৫৭ এবং জুরকানী

আলাল মাওয়াহিব, তৃতীয় খণ্ড, পৃঃ ২২৬)

হযরত উম্মে কুলসুম (রাযিঃ)

উম্মে কুলসুম (রাযিঃ) মহানবী সাল্লাল্লাহু আলাইহি ওয়াসাল্লাম-এর তৃতীয় কন্যা, এবং এই উপনামেই তিনি প্রসিদ্ধ। তৃতীয় হিজরীতে রোকেয়া (রাযিঃ)-এর ইন্তেকালের পরে রবিউল আউয়াল মাসে হযরত উসমান, হযরত উম্মে কুলসুমকে বিবাহ করে নেন। বুখারী শরীফে আছে, হযরত হাফসা (রাযিঃ) যখন বিধবা হলেন, হযরত উমর (রাযিঃ) তাকে হযরত উসমানের সঙ্গে বিবাহের পয়গাম দেন, হযরত উসমান (রাযিঃ) চিন্তা করলেন। অন্য বর্ণনায় আছে, যখন মহানবী সাল্লাল্লাহু আলাইহি ওয়াসাল্লাম বিষয়টি অবহিত হলেন, অর্থাৎ উমর (রাযিঃ) হযরত উসমানকে বিয়ের পয়গাম দিয়েছে হাফসার সাথে। হযরত উমর (রাযিঃ)কে ডেকে তিনি বললেনঃ আমি তোমাকে উসমান (রাযিঃ)-এর চেয়ে ভাল ব্যক্তির সন্ধান দিচ্ছি এবং উসমান (রাযিঃ)কে তার চেয়ে উত্তম রমণীর সংবাদ দিচ্ছি। তুমি তোমার কন্যার সঙ্গে আমার বিবাহ করিয়ে

দাও, আর আমি আমার মেয়ের সঙ্গে উসমানের বিবাহ দিচ্ছি। যাই হোক, বিয়ে হল, বিয়ের পর উম্মে কুলসুম ছয় বৎসরকাল হযরত উসমানের সঙ্গে ছিলেন।

মৃত্যু : নবম হিজরীর শাবান মাসে হযরত উম্মে কুলসুম (রাযিঃ)-এর মৃত্যু হয়। মহানবী সাল্লাল্লাহু আলাইহি ওয়াসাল্লাম এই মৃত্যুতে গভীর শোকাহত হন, কবরের পাশে মহানবী সাল্লাল্লাহু আলাইহি ওয়াসাল্লাম-এর অশ্রুজল গড়িয়ে পড়ছিল। মহানবী সাল্লাল্লাহু আলাইহি ওয়াসাল্লাম জানাযার নামায পড়ান এবং হযরত আবু তালহা, হযরত আলী, ফযল বিন আব্বাস এবং উসামা বিন যায়েদ মরদেহ কবরে রাখেন।

(তাবকাত-ই-ইবনে সা'আদ, অষ্টম খণ্ড, পৃঃ ২৫ ও ২৬ সহীহ বুখারী, প্রথম খণ্ড, পৃঃ ১৭১)

তঁার কোন সন্তান-সন্ততি হয়নি।

হযরত ফাতেমা (রাযিঃ)

ফাতেমা ছিল তাঁর নাম, যাহরা তাঁর উপাধি। মহানবী সাল্লাল্লাহু আলাইহি ওয়াসাল্লাম-এর কন্যাদের মধ্যে সবচেয়ে কমবয়স্কা ছিলেন। তাঁর জন্ম সন নিয়ে বিতর্ক আছে। একটি বর্ণনায় তিনি নবুয়্যতের প্রথম বছরে জন্মগ্রহণ করেন। ঐতিহাসিক বিন ইসহাকের মতে কেবল ইবরাহীম ছাড়া, মহানবী সাল্লাল্লাহু আলাইহি ওয়াসাল্লাম আর সকল সন্তান নবুয়্যতের পূর্বে জন্মগ্রহণ করেন। মহানবী সাল্লাল্লাহু আলাইহি ওয়াসাল্লাম চল্লিশ বৎসর বয়সে নবুয়্যত প্রাপ্ত হন-এই তথ্যের উপর ভিত্তি করে কেউ কেউ উপরোক্ত দুই বর্ণনায় এভাবে ঐক্যবিধান করেন যে, নবুয়্যতের প্রথম বছরের শুরুতে হযরত ফাতেমা (রাযিঃ) জন্ম নিয়েছিল হয়তো। এবং যেহেতু দু'টো সময়ের মধ্যে খুব কমই ব্যবধান, এজন্যে এই বিতর্ক বর্ণনারই হবে। ঐতিহাসিক ইবনুল জাওয়ী লিখেছেনঃ নবুয়্যতের পাঁচ বছর পূর্বে কাবা ঘরের নির্মাণ চলছিল যখন, তখন হযরত ফাতেমা (রাযিঃ)-এর জন্ম হয়। কোন কোন বর্ণনায় আছে, নবুয়্যতের এক বছর পূর্বে তাঁর জন্ম হয়।

বিবাহ : হযরত ফাতেমা (রাযিঃ)-এর যখন (প্রসিদ্ধ বর্ণনা অনুযায়ী) আঠারো বৎসর বয়স এবং যদি নবুয়্যতের প্রথম বছরকে তাঁর জন্মসন ধরে নেয়া হয়, তবে পনের বছর সাড়ে পাঁচ মাস হন- তখন দ্বিতীয় হিজরীর জিলহজ্জ মাসে মহানবী সাল্লাল্লাহু আলাইহি ওয়াসাল্লাম হযরত আলী (রাযিঃ)-এর সাথে তাঁর বিবাহ দেন। বিন সাআদের বর্ণনায় আছে, সর্বপ্রথম হযরত আবু বকর (রাযিঃ) হযরত ফাতেমার সঙ্গে বিয়ের ব্যাপারে আগ্রহ ব্যক্ত করেন, মহানবী সাল্লাল্লাহু আলাইহি ওয়াসাল্লাম বলেনঃ আল্লাহ তা'আলার যা নির্দেশ হবে। এরপর হযরত উমর (রাযিঃ) একই রকম উৎসাহ প্রকাশ করেন এবং মহানবী সাল্লাল্লাহু আলাইহি ওয়াসাল্লামও একই রকম কথা উচ্চারণ করেন। কিন্তু এই বর্ণনাটি সঠিক বলে মনে হয় না। আল্লামা বিন হাজার আসকালানী তাঁর বিখ্যাত 'ইসা'বা' গ্রন্থে হযরত ফাতেমা (রাযিঃ)-এর জীবনী অংশে বিন সাআদের অধিকাংশ বর্ণনা উদ্ধৃত করেছেন, কিন্তু এই বর্ণনা তিনি এড়িয়ে গেছেন।

বাই হোক, হযরত আলী (রাযিঃ) যখন আবেদন করেন, রাসূলুল্লাহ সাল্লাল্লাহু আলাইহি ওয়াসাল্লাম হযরত ফাতেমা (রাযিঃ)-এর সম্মতি জানতে চাইলে, হযরত ফাতেমা (রাযিঃ) নিঃশব্দ থাকেন-এটি এক রকমের সম্মতি ছিল। রাসূলুল্লাহ সাল্লাল্লাহু আলাইহি ওয়াসাল্লাম হযরত আলীকে জিজ্ঞেস করলেনঃ তোমার কাছে মোহর দেয়ার জন্যে কী আছে? তিনি বললেনঃ কিছুই নেই। মহানবী সাল্লাল্লাহু আলাইহি ওয়াসাল্লাম বললেনঃ কিন্তু সেই যুদ্ধের লৌহজ্জামাটি কোথায়? (এটি বদরযুদ্ধে পেয়েছিলেন তিনি) তিনি বললেন, সেটি তো আছে, মহানবী সাল্লাল্লাহু আলাইহি ওয়াসাল্লাম বললেন সেটিই যথেষ্ট। হযরত উমর (রাযিঃ) সেটি হযরত উসমানের কাছে চারশো আশি দিরহামে বিক্রি করেন এবং সেই টাকা মহানবী সাল্লাল্লাহু আলাইহি ওয়াসাল্লাম-এর হাতে তুলে দেন। মহানবী সাল্লাল্লাহু আলাইহি ওয়াসাল্লাম হযরত বিলালকে নির্দেশ দিলেন বাজার থেকে সুগন্ধি নিয়ে আসার জন্যে।

এই লৌহজামা ছাড়া হযরত আলী (রাযিঃ)-এর কাছে সম্পদের মধ্যে ছিল একটি ভেড়ার চামড়া, একটি পুরনো ইয়েমেনের চাদর-হযরত আলী (রাযিঃ) এইসব মাল হযরত ফাতেমাকে উৎসর্গ করেন। হযরত আলী (রাযিঃ) এতদিন মহানবী সাল্লাল্লাহু আলাইহি ওয়াসাল্লাম-এর কাছেই থাকতেন, বিয়ের পর পৃথক বসবাস প্রয়োজনীয় হয়ে যায়। হযরত হারেসা বিন নোমান আনসারীর অনেকগুলো ঘর ছিল, যার মধ্যে কয়েকটি তিনি মহানবী সাল্লাল্লাহু আলাইহি ওয়াসাল্লামকে উৎসর্গ করেছিলেন। হযরত ফাতেমা (রাযিঃ) মহানবী সাল্লাল্লাহু আলাইহি ওয়াসাল্লামকে বললেনঃ সে সব ঘরের কোন একটি নিয়ে দেয়ার জন্য। মহানবী সাল্লাল্লাহু আলাইহি ওয়াসাল্লাম বললেনঃ কিভাবে হয়? তাকে বলতে তো আমার লজ্জা হয়। হারেসা শুনে দৌড়ে এসে বললেনঃ নবীজী! আমি এবং আমার যা কিছু আছে, সবই আপনার। আল্লাহর কসম! যে ঘর আপনি নিচ্ছেন, সেটি আমার কাছে থেকে যাওয়ার চেয়ে আমি বেশী আনন্দিত। যাহোক হযরত হারেসা (রাযিঃ) একটি ঘর খালি করে দিলেন এবং হযরত ফাতেমা (রাযিঃ) সেখানে উঠে গেলেন।

মদীনার বাদশাহ ও পৃথিবীর প্রেসিডেন্ট মহানবী সাল্লাল্লাহু আলাইহি ওয়াসাল্লাম তাদেরকে যে মাল-সম্পদ দিয়েছিলেনঃ তা হচ্ছে মোটা রশি সংযুক্ত একটি চৌকি, একটি তোশক (খেজুর পাতার), একটি ছাগল, দুটো মাটির কলস, একটি মশক এবং দু'টো চাক্কি- আশ্চর্যের ব্যাপার হচ্ছে এই দু'টো জিনিস সারা জীবন তাঁর সঙ্গে ছিল।

হযরত ফাতেমা (রাযিঃ) যখন নতুন ঘরে গেলেন, মহানবী সাল্লাল্লাহু আলাইহি ওয়াসাল্লাম তাদের কাছে এলেন-দরোজায় দাড়িয়ে অনুমতি চাইলেন এবং ভিতরে প্রবেশ করলেন। একটি খালায় কিছু পানি আনালেন এবং দুটো হাত তার মধ্যে রাখলেন, তারপর হযরত আলী (রাযিঃ)-এর বুকে এবং কবজিতে পানির ফোটা ছিটিয়ে দিলেন এরপর হযরত ফাতেমাকে ডাকেন, ফাতেমা (রাযিঃ) লজ্জায় আনত হয়ে এলেন,

তাকেও পানি ছিটিয়ে দিয়ে বললেন : আমি আমার বংশের উত্তম ব্যক্তির সঙ্গে তোমার বিবাহ দিয়েছি।

(সহীহ বুখারী, দ্বিতীয় খণ্ড, পৃঃ ৫৭১ এবং তাবাকাত-ই-ইবনে সা'আদা, অষ্টম খণ্ড এবং জুরকানী আলাল মাওয়াহিব, দ্বিতীয় খণ্ড এবং আল ইসাবা-ফি-আহওয়ালিস সাহাবা, অষ্টম খণ্ড)

পিড়হীনতার দাগ : হযরত ফাতেমা (রাযিঃ)-এর বয়স প্রসিদ্ধ বর্ণনা অনুযায়ী যখন ঊনত্রিশ বছর, মহানবী সাল্লাল্লাহু আলাইহি ওয়াসাল্লাম এই পৃথিবী ছেড়ে চলে যান। হযরত ফাতেমা (রাযিঃ) ছিলেন মহানবী সাল্লাল্লাহু আলাইহি ওয়াসাল্লাম-এর প্রিয় সন্তান এবং এখন কেবল তিনিই অবশিষ্ট থেকে গিয়েছিলেন- এজন্যে অন্যদের চেয়ে অনেক বেশী শোকাহত হন তিনি। মৃত্যুর পূর্বে একদিন মহানবী সাল্লাল্লাহু আলাইহি ওয়াসাল্লাম তাকে ডেকে পাঠালেন, তিনি উপস্থিত হলে মহানবী সাল্লাল্লাহু আলাইহি ওয়াসাল্লাম তাঁর কানে কানে কিছু কথা বললেন, তা শুনে তিনি কাঁদতে লাগলেন, আবার ডেকে একইভাবে তার কানে কিছু কথা বলল, তখন হেসে উঠলেন। হযরত আয়েশা (রাযিঃ) ব্যাপারটি জিজ্ঞেস করলে বলেছিলেন 'প্রথমবার তিনি বলেছিলেন যে, আমি এই অসুখেই মৃত্যুবরণ করবো যখন আমি তা শুনে কাঁদতে লাগলাম, তিনি বললেনঃ আমার পরিবারের মধ্যে সবার আগে তুমিই আমার সাথে এসে মিলিত হবে, তখন হাসতে থাকি।

(সহীহ বুখারী, দ্বিতীয় খণ্ড, পৃঃ ৬৩৮)

মৃত্যুর পূর্বে বার বার বেহুঁশ হয়ে যাচ্ছিলেন মহানবী সাল্লাল্লাহু আলাইহি ওয়াসাল্লাম। হযরত ফাতেমা (রাযিঃ) এটি দেখে বললেনঃ 'হায় আমার আব্বার অস্বস্তি ও অস্থিরতা!' মহানবী সাল্লাল্লাহু আলাইহি ওয়াসাল্লাম বললেনঃ তোমার পিতা আজকের পর আর অস্থির হবেন না।

(সহীহ বুখারী, দ্বিতীয় খণ্ড, পৃঃ ৬৪১)

তাঁর মৃত্যু একটি বিপদ নামিয়ে আনে হযরত ফাতেমা (রাযিঃ)-এর উপর। 'উসুদুল গাবা' গ্রন্থে আছেঃ যতদিন তিনি এরপর জীবিত ছিল, কখনো হাসেননি।

(উসুদুল দাবা, পঞ্চম খণ্ড, পৃঃ ৫২৪) .

বুখারী শরীফে লিখেছেনঃ যখন সাহাবারা লাশ দাফন করে ফিরে এলেন, তখন হযরত ফাতেমা (রাযিঃ) হযরত আনাস (রাযিঃ)কে জিজ্ঞেস করলেন, মহানবী সাল্লাল্লাহু আলাইহি ওয়াসাল্লাম-এর উপর মাটি ঢালতে তোমাদের কি ভাল বোধ হয়েছে।

(সহীহ বুখারী, দ্বিতীয় খণ্ড, পৃঃ ৬৪১)

মহানবী সাল্লাল্লাহু আলাইহি ওয়াসাল্লাম-এর মৃত্যুর পর উত্তরাধিকারের বিষয়টি উত্থাপিত হল- হযরত আব্বাস (রাযিঃ) হযরত আলী (রাযিঃ), পবিত্র পত্নীরা এঁরা সবাই মিরাসের দাবীদার ছিলেন, হযরত ফাতেমা (রাযিঃ) একজন প্রতিনিধি উপস্থিত ছিলেন। যেহেতু মহানবী সাল্লাল্লাহু আলাইহি ওয়াসাল্লাম-এর সম্পত্তি বিশুদ্ধ সম্পত্তি ছিল, উত্তরাধিকারের আইন সেখানে চালু করা যেতে পারে না, এজন্যে হযরত আবু বকর (রাযিঃ) বললেন : আমি রাসূলুল্লাহ সাল্লাল্লাহু আলাইহি ওয়াসাল্লাম-এর

আত্মীয়জনকে আমার আত্মীয়জন থেকে অধিক ভালবাসি; কিন্তু অসুবিধা হল মহানবী সাল্লাল্লাহু আলাইহি ওয়াসাল্লাম স্বয়ং বলেছেন; নবীগণ যা রেখে যান, তার পুরোটাই সদকা হিসেবে গণ্য হয় এবং তার মধ্যে উত্তরাধিকারের আইন চালু করা যায় না, কাজেই মহানবী সাল্লাল্লাহু আলাইহি ওয়াসাল্লাম-এর সম্পদ আমি কী করে বন্টন করি। তবে হ্যাঁ মহানবী সাল্লাল্লাহু আলাইহি ওয়াসাল্লাম-এর জীবৎকালে নবী-পরিবার তা থেকে যে রকম লাভবান হত এখনও হতে পারবেন। সহীহ বুখারীর বর্ণনায় পাই, এতে হযরত ফাতেমা (রাযিঃ) খুবই দুঃখিত হয়েছিলেন এবং এতে তিনি এতই নারাজ হয়েছিলেন যে শেষ সময় পর্যন্তও তার সাথে তিনি কথা বলেননি। তবে ‘তাবকাত-ই-ইবনে সা‘আদ’ গ্রন্থে আছে, হযরত ফাতেমা (রাযিঃ) পরে হযরত আবু বকর (রাযিঃ)-এর সাথে স্বাভাবিক হয়ে গিয়েছিলেন।

(বুখারী শরীফ, প্রথম খণ্ড, পৃঃ ৫২৬ এবং দ্বিতীয় খণ্ড, পৃঃ ৬০৯/তাবকাত-ই-ইবনে সা‘আদ, অষ্টম খণ্ড, পৃঃ ১৭)

মৃত্যু : মহানবী সাল্লাল্লাহু আলাইহি ওয়াসাল্লাম-এর ইন্তেকালের ছয় মাস বিগত হওয়ার পর ১১ হিজরীর রামায়ান মাসে হযরত ফাতেমা (রাযিঃ) মৃত্যুবরণ করেন। মহানবী সাল্লাল্লাহু আলাইহি ওয়াসাল্লাম যে ভবিষ্যৎবাণী করেছিলেন— আমার পরিবারের সবার আগে তুমিই আমার সাথে এসে মিলিত হবে— সত্য হয়েছিল। এটি ছিল মঙ্গলবার, রামায়ানের তৃতীয় দিবস। এ সময় তাঁর বয়স হয়েছিল ঊনত্রিশ বছর। কিন্তু অন্যান্য বর্ণনা অনুসরণ করলে হিসেব পৃথক হবে, যেমন একটি বর্ণনায় চব্বিশ বছর। একটি বর্ণনায় পঁচিশ বছর এবং একটি বর্ণনায় ত্রিশ বছর উল্লিখিত। জুরকানী লিখেছেন, প্রথম বর্ণনা (অর্থাৎ ঊনত্রিশ সাল) অধিক শুদ্ধ। যদি নবুয়্যতের প্রথম বছরকে তাঁর জন্ম সন ধরা হয়, তাহলে মৃত্যুকালে তাঁর এই বয়স হতে পারে না। তবে চব্বিশ বছর বয়স যদি সমর্থিত হয়, তখন নবুয়্যতের পরবর্তী বছরকে তাঁর জন্ম সন হিসেবে নির্ধারণ করা যেতে পারে। কিন্তু যদি এই বর্ণনাকে শুদ্ধ মনে করা হয় যে, নবুয়্যতের পাঁচ বছর পূর্বে তাঁর জন্ম, তখন তাঁর মৃত্যুকালীন বয়স হবে ঊনত্রিশ বছর। হযরত ফাতেমা (রাযিঃ)-এর দাফন-কাফনে বিশেষ অভিনিবেশ অনুসৃত হয়। মহিলাদের মরদেহের উপর বর্তমানে পর্দার ব্যবহারের যে পদ্ধতি প্রচলিত, তাঁর মধ্যে দিয়েই শুরু হয়েছে। হযরত ফাতেমা (রাযিঃ)-এর পূর্বে মহিলা পুরুষ সবার জানাযা খোলা অবস্থায় হত, যেহেতু হযরত ফাতেমা (রাযিঃ)-এর মন-মানসে অসম্ভব লজ্জাবোধ ছিল। এজন্যে তিনি হযরত আসমা বিনতে উমাইসকে বলেছিলেন যে, উনুত্ত জানাযায় মহিলাদের পর্দাহীনতা হয়, যেটি আমি অপছন্দ করি। হযরত আসমা (রাযিঃ) বললেন, হে রাসূলুল্লাহ সাল্লাল্লাহু আলাইহি ওয়াসাল্লাম-এর কলিজার টুকরা! আমি হাবশায় একটি পদ্ধতি দেখেছি, বললে তা দেখাতে পারি। এটি বলে তিনি খোরমা-খিজুরের কিছু ডাল আনালেন এবং তা দিয়ে কাপড়ের মত তৈরী করলেন, যা থেকে পর্দার মত ব্যবস্থা হয়ে গেল। হযরত ফাতেমা (রাযিঃ) এই সুন্দর পদ্ধতি দেখে

সীমাহীন খুশী হন। হযরত ফাতেমার পর হযরত জয়নব (রাযিঃ)-এর জানাযাও এই পদ্ধতিতে উঠানো হয়।

(উসুদুল গাবা, পঞ্চম খণ্ড, পৃঃ ৫২৪)

হযরত ফাতেমা (রাযিঃ)-এর কবর-বিষয়েও বিতর্ক আছে। কারো কারো ধারণা হচ্ছে, তিনি জান্নাতুল বাকী কবরস্থানে হযরত হাসানের মাজারের পাশে সমাহিত হন। বিন যুলালা এটিই লিখেছেন। ঐতিহাসিক মসউদিও এই রকম বর্ণনা করেছেন। ঐতিহাসিক মসউদি ৩২২ হিজরীতে জান্নাতুল বাকীর একটি কবরে একটি শিলালেখ দেখেন, যেখানে লেখা ছিলঃ ‘এটি ফাতেমা যুহরার কবর।’ (খোলাসাতুল ওফা, পৃঃ ২১৭) তাবকাত-ই-বিন সা‘আদের বর্ণনা থেকে জানা যায় যে, তিনি ‘দারে আকীলের’ একটি কোণায় সমাধিস্থ হন।

(তাবকাত-ই-ইবনে সা‘আদ, অষ্টম খণ্ড, পৃঃ ২০)

একটি বর্ণনায় আছে যে, তিনি আপন গৃহেই সমাধিস্থ হন—কিন্তু এতে বিন শাব্বা এই আপত্তি তোলেন যে, তখন আবার পর্দার কি প্রয়োজন ছিল? কিন্তু তাবকাতের একটি বর্ণনার অনুসরণে তার এই উত্তর দেয়া যেতে পারে যে, হযরত ফাতেমা, সালমার গৃহে অসুস্থ হয়েছিলেন, সেখানেই ইন্তেকাল করেছিলেন এবং সেখানেই তাঁকে গোছল করানোর হয়। এরপর হযরত আলী (রাযিঃ) জানাযা উঠিয়ে বাইরে আনেন এবং সমাধিস্থ করেন।

(তাবকাত-ই-ইবনে সা‘আদ, অষ্টম খণ্ড, পৃঃ ১৮)

বর্তমানে হযরত ফাতেমা (রাযিঃ)-এর কবর সর্বসম্মতিক্রমে ‘দারে আকীল’ই বোঝা হয়। মুহম্মদ লবিব বেক তিবনুনি— যিনি ১৩২৭ হিজরীতে খিদয়ু মিশরের হিজাজ-ভ্রমণের সঙ্গী ছিলেন নিজের ভ্রমণ বৃত্তান্তে তার উল্লেখ করেছেন। (আর রিহলাতুল মজাযিয়াহ, মিশর)

সন্তান-সন্ততি : হযরত ফাতেমা (রাযিঃ)-এর পাঁচজন সন্তান হয়ঃ হযরত যয়নব, হযরত হাসান, হযরত হোসাইন, হযরত মোহসেন, হযরত উম্মে কুলসুম। যয়নব এবং মোহসেন বাল্যকালেই মৃত্যুবরণ করেন। হযরত যয়নব, হযরত হাসান, হযরত হোসাইন হযরত উম্মে কুলসুম বিশেষ ঘটনার কারণে ইতিহাসে বিখ্যাত। মহানবী সাল্লাল্লাহু আলাইহি ওয়াসাল্লাম এদেরকে অসম্ভব স্নেহ করতেন আর হযরত আলীও হযরত ফাতেমা (রাযিঃ)-এর মমতা তো ছিলই।

মহানবী সাল্লাল্লাহু আলাইহি ওয়াসাল্লাম-এর কন্যাদের মধ্যে কেবল হযরত ফাতেমা (রাযিঃ)ই এই মর্যাদার অধিকারী যে, তাঁর থেকে মহানবী সাল্লাল্লাহু আলাইহি ওয়াসাল্লাম এর বংশ প্রবাহিত হয়।

অবয়ব : হযরত ফাতেমা যুহরা (রাযিঃ)-এর অবয়ব— কাঠামো রাসূলে কারীম সাল্লাল্লাহু আলাইহি ওয়াসাল্লাম-এর সঙ্গে সাদৃশ্যপূর্ণ ছিল। হযরত আয়েশা (রাযিঃ) বলেছেন, ফাতেমা (রাযিঃ)-এর কথাবার্তা, স্বভাব-প্রকৃতি, উঠাবসা অবিকল মহানবী সাল্লাল্লাহু আলাইহি ওয়াসাল্লাম-এর মত।

(সহীহ তিরমিযী, পৃঃ ৬৩৬)

চলাফেরার ধরনও ছিল মহানবী সাল্লাল্লাহু আলাইহি ওয়াসাল্লাম-এর মত।

(সহীহ বুখারী, ২য় খণ্ড, পৃঃ ৯৩০)

গুণাবলী ও বৈশিষ্ট্য : হাদীছ গ্রন্থাবলীতে হযরত ফাতিমা (রাযিঃ)-এর আঠারোটি হাদীছ বর্ণিত আছে, যেগুলো অনেক বড় বড় সাহাবী তাঁর কাছ থেকে বর্ণনা করেছেন। হযরত আলী (রাযিঃ), হযরত হাসান (রাযিঃ), হযরত হোসেন (রাযিঃ), হযরত আয়েশা (রাযিঃ), হযরত উম্মে কুলসুম (রাযিঃ), হযরত সালমা (রাযিঃ), উম্মে রাযি (রাযিঃ), হযরত আনাস বিন মালেক (রাযিঃ) প্রমুখ সাহাবী তাঁর কাছ থেকে হাদীছ বর্ণনা করেছেন।

নিম্নোক্ত ঘটনাবলী দ্বারা তাঁর সূক্ষ্ম জ্ঞানের পরিচয় পাওয়া যায়ঃ হযরত আলী (রাযিঃ) কোন এক ভ্রমণে গিয়েছিলেন- ফেরার পর হযরত ফাতিমা (রাযিঃ) তাঁকে কুরবানীর গোশত পেশ করেন। হযরত আলী (রাযিঃ) খেতে চাইলেন না। ফাতিমা (রাযিঃ) বলেনঃ এ গোশত খেতে কোন অসুবিধা নেই, মহানবী সাল্লাল্লাহু আলাইহি ওয়াসাল্লাম-এর অনুমোদন আছে। (মুসনাদে আহমদ, ৬ষ্ঠ খণ্ড, পৃঃ ২৮২)

একবার মহানবী সাল্লাল্লাহু আলাইহি ওয়াসাল্লাম তাঁর ওখানে গোশত ভক্ষণ করছিলেন- তখনই নামাযের সময় হয়ে যায়, আর মহানবী সাল্লাল্লাহু আলাইহি ওয়াসাল্লাম সে অবস্থাতেই নামাযের জন্যে উঠে দাঁড়ান। মহানবী সাল্লাল্লাহু আলাইহি ওয়াসাল্লাম একবার বলেছিল আঙুনে পাক করা জিনিস খাওয়ার পর অযু নষ্ট হয়ে যায় সেজন্যে হযরত ফাতিমা (রাযিঃ) মহানবী সাল্লাল্লাহু আলাইহি ওয়াসাল্লামকে অযু করে নিতে বলেন। মহানবী সাল্লাল্লাহু আলাইহি ওয়াসাল্লাম বললেন, ওযূর দরকার নেই, সমস্ত ভাল খাদ্য তো আঙুনেই পাক করা হয়। (মুসনাদে আহমদ, ৬ষ্ঠ খণ্ড, পৃঃ ৩৮৩)

হযরত ফাতিমা (রাযিঃ) ছিলেন মহানবী সাল্লাল্লাহু আলাইহি ওয়াসাল্লাম-এর অত্যন্ত প্রিয়ভাজন স্নেহসিক্ত সন্তান। (আল ইসাবা, ৮ম খণ্ড, পৃঃ ১৫৭)

মহানবী সাল্লাল্লাহু আলাইহি ওয়াসাল্লাম বলেছেনঃ ‘ফাতিমা আমার শরীরের অংশ, যে তাকে ব্যথিত করবে, সে আমাকেই ব্যথিত করবে। (সহীহ বুখারী, ১ম খণ্ড, পৃঃ ৫৩২)

আবু জেহেলের মেয়েকে হযরত আলী (রাযিঃ) একবার বিয়ের পয়গাম দিয়েছিলঃ বিষয়টি মহানবী সাল্লাল্লাহু আলাইহি ওয়াসাল্লাম-এর কানে যায় এবং এই সূত্রে মহানবী সাল্লাল্লাহু আলাইহি ওয়াসাল্লাম মসজিদে নববীর মিম্বরে দাঁড়িয়ে নিম্নোক্ত বক্তব্য রাখেন।

‘হিশামের বংশধররা আলীর সঙ্গে নিজের মেয়ের বিয়ে দিতে চায় এবং আমার অনুমতি প্রত্যাশা করে, কিন্তু আমি অনুমতি দেবো না এবং কখনোই দেবো না। তবে হ্যাঁ, আলী আমার মেয়েকে তালাক দিয়ে তাদের মেয়েকে বিয়ে করতে পারে। ‘ফাতেমা (রাযিঃ) আমার শরীরের একটি অংশ; যে তাকে কষ্ট দেবে সে আমাকেই কষ্ট দেবে।’

[এরপর মহানবী সাল্লাল্লাহু আলাইহি ওয়াসাল্লাম আবুল আসের উল্লেখ করেন- আবুল আস মহানবী সাল্লাল্লাহু আলাইহি ওয়াসাল্লাম-এর কন্যা যয়নবের স্বামী ছিলেন।] সে আমাকে যা বলেছিল তাকে সত্য প্রমাণ করে দেখিয়েছে এবং যে অঙ্গীকার করেছে তা পূরণ করেছে। আর আমি হারামকে হালাল করবার জন্য কিংবা হালালকে হারাম

করাবার জন্য আসিনি। কিন্তু আল্লাহর কসম! আল্লাহর নবীর কন্যার সঙ্গে কখনোই আল্লাহর দূশমনের মেয়ে একত্রিত হতে পারে না। (সহীহ বুখারী, প্রথম খণ্ড, পৃঃ ৪৩৮) মহানবী সাল্লাল্লাহু আলাইহি ওয়াসাল্লাম-এর এই বক্তৃতায় আলী (রাযিঃ)-এর ওপর এমন প্রভাব সৃষ্টি হয় যে, হযরত ফাতিমা (রাযিঃ) জীবিত থাকাকালীন তিনি আর কোন মেয়েকে বিয়ে করেননি।

রাসূলে কারীম সাল্লাল্লাহু আলাইহি ওয়াসাল্লাম হযরত ফাতিমা (রাযিঃ)কে সেইসব মহতী নারীবৃন্দের অন্তর্গত করেছেন, যারা আল্লাহর নিকট অত্যন্ত সম্মানিত ও মর্যাদাস্বিত। হাদীছে এসেছেঃ ‘তোমার অনুসরণের জন্য পুরো পৃথিবীতে মরিয়ম (আঃ), খাদীজা (রাযিঃ), ফাতিমা (রাযিঃ) এবং আসিয়া (রাযিঃ) যথেষ্ট....)’

(তিরমিযী শরীফ : কিতাবুল মানাকিব)

হযরত ফাতিমা (রাযিঃ)-এর খোদাভীতি এবং আল্লাহর আনুগত্য এরকম ছিল যে, তিনি মহানবী সাল্লাল্লাহু আলাইহি ওয়াসাল্লাম-এর প্রিয়তম কন্যা হওয়া সত্ত্বেও এবং ইসলামে বৈরাগ্যের বীজ বা মূল উপড়ে ফেলার পরও এবং চারিদিকে ইসলামের বিজয় সূচিত হওয়ার কারণে মদীনায় ঐশ্বর্য ও বৈভবের স্রোত বয়ে যাওয়ার পরও তার অংশ ছিল খুবই সামান্য এবং এত সামান্য যে আমাদের অশ্রু সংবরণ মুশকিল হয়ে যায়।

হযরত ফাতিমা (রাযিঃ)-এর পারিবারিক জীবন ছিল এরকম যে, চাক্কিতে আটা পিষতে পিষতে তাঁর হাতে দাগ পড়ে গিয়েছিল; মশকে করে পানি আনতে আনতে বাহুসন্ধিতে মাংসপিণ্ড ফুলে গিয়েছিল; আর ঘর ঝাড়ু দিতে দিতে কাপড়ে দাগ ধরে যেতো, চুলোর পাশে বসে থাকতে থাকতে কাপড় কালো হয়ে যেতো- কিন্তু এত কিছুর পরও মহানবী সাল্লাল্লাহু আলাইহি ওয়াসাল্লামকে তিনি তাঁর ছিড়ে যাওয়া হাত দেখিয়ে ঘরের জন্যে একটি কাজের মেয়ের আহ্বান করলে, মহানবী সাল্লাল্লাহু আলাইহি ওয়াসাল্লাম বলেনঃ প্রিয় কন্যা! কাজের মেয়ের অধিকার তোমার চেয়ে বদরের যুদ্ধের এতিমদের অগ্রগণ্য।

(আবু দাউদ শরীফ)

একবার মহানবী সাল্লাল্লাহু আলাইহি ওয়াসাল্লাম হযরত ফাতিমা (রাযিঃ)-এর কাছে গিয়ে দেখেন যে, তিনি দারিদ্রের কারণে এমন সংকীর্ণ দোপাট্টা পরেছেন যে, মাথা ঢাকতে গেলে পা খুলে যায়, পা আবৃত করতে গেলে মাথা খুলে যায়। শিবলীর কবিতায় ভ্রূছে-

মহানবী সাল্লাল্লাহু আলাইহি ওয়াসাল্লাম ফাতেমা (রাযিঃ)কে আরাম-আনন্দ, অলঙ্কার-সৌন্দর্যের কোন দ্রব্য না দিয়ে ক্ষান্ত ছিলেন না; বরং এই ধরনের দ্রব্য অন্যসূত্রে তিনি পেলেও তা পছন্দ হত না তার।

একবার হযরত আলী (রাযিঃ) তাঁকে স্বর্ণের তৈরি একটি হার এনে দিলে, হযরত ফাতিমা (রাযিঃ) সঙ্গে সঙ্গে তা বিক্রি করে দেন এবং তার বদলে একজন দাস কিনে নেন।

একবার মহানবী সাল্লাল্লাহু আলাইহি ওয়াসাল্লাম কোন এক যুদ্ধ থেকে ফিরলেন। হযরত ফাতিমা (রাযিঃ) মহানবী সাল্লাল্লাহু আলাইহি ওয়াসাল্লামকে স্বাগত জানাবার

জন্য ঘরের দরজায় পর্দা টানিয়েছিলেন, পুত্র হাসান-হোসেনের হাতে পরিণয় দিয়েছিলেন চাঁদির কাঁকন; মহানবী সাল্লাল্লাহু আলাইহি ওয়াসাল্লাম যথাসময়ে হযরত ফাতিমা (রাযিঃ)-এর ঘরে আসেন এবং এসব পার্থিব বিলাস উপকরণ দেখে ফিরে চলে যান। হযরত ফাতিমা (রাযিঃ) মহানবী সাল্লাল্লাহু আলাইহি ওয়াসাল্লাম-এর অসন্তোষের কথা জানতে পারেন এবং সঙ্গে সঙ্গে পর্দা নষ্ট করে ফেলেন এবং বাচ্চাদের কাঁকনও খুলে নেন। বাচ্চারা মহানবী সাল্লাল্লাহু আলাইহি ওয়াসাল্লাম-এর কাছে কাঁদতে কাঁদতে গেল। মহানবী সাল্লাল্লাহু আলাইহি ওয়াসাল্লাম তাঁদের বলেন, এঁরা আমার পরিবারের সদস্য- আমি চাইনা বিলাস এদের স্পর্শ করুক; এর বদলে ফাতিমা (রাযিঃ)-এর জন্যে এর একটি হার এবং হাতির দাঁতের কাঁকন কিনে আন। (এইসব ঘটনাগুলো আবু দাউদ এবং নাসায়ীতে উল্লিখিত)

সততা এবং ন্যায়নিষ্ঠায় তাঁর তুলনা ছিল না; হযরত আয়েশা (রাযিঃ) বলেন, আমি ফাতিমার চেয়ে অধিক সত্যবাদী কাউকে দেখিনি কেবল মহানবী সাল্লাল্লাহু আলাইহি ওয়াসাল্লাম ছাড়া। (ইসতিয়াব, দ্বিতীয় খণ্ড, পৃঃ ৭৭২)

তিনি ছিলেন লজ্জাশীলা। একবার মহানবী সাল্লাল্লাহু আলাইহি ওয়াসাল্লাম তাঁকে ডাকলে লজ্জায় কাতর হয়ে তিনি আসেন। নিজের জানাযার শবদেহের উপর পর্দা করবার কথাও তিনি এজন্যেই বলেছিলেন।

মহানবী সাল্লাল্লাহু আলাইহি ওয়াসাল্লাম ভালবাসতেন তিনি সীমাহীন। হযরত ফাতিমা (রাযিঃ)-এর বয়স তখন অল্প, মহানবী সাল্লাল্লাহু আলাইহি ওয়াসাল্লাম মক্কায়ে নামায পড়ছিলেন তখন উকবা বিন আবু মুঈত তাঁর ঘাড়ের উপর উটের নাড়িভূড়ি ছুঁড়ে দেয়; আর এ দৃশ্যে আনন্দিত কুরাইশরা একে অপরের গায়ের উপর চলে পড়ছিল। হযরত ফাতিমা (রাযিঃ) কারো মাধ্যমে তা জানতে পারেন, তাঁর বয়স তখন মাত্র পাঁচ কি ছয় বছর, কিন্তু মমত্বের টানে তিনি দৌড়ে আসেন এবং নাড়িভূড়ি সরিয়ে উকবাকে যাচ্ছেতাই বলতে থাকেন এবং বদ দু'আ দেন। (সহীহ বুখারী, প্রথম খণ্ড, পৃঃ ৩৮, ৭৪)

মহানবী সাল্লাল্লাহু আলাইহি ওয়াসাল্লামও তাকে সীমাহীন ভালবাসতেন। মহানবী সাল্লাল্লাহু আলাইহি ওয়াসাল্লাম-এর অভ্যাস ছিল যখনই কোন সফর-বেরফার চিন্তা করতেন তখন সবশেষে হযরত ফাতিমা (রাযিঃ)-এর কাছে যেতেন এবং সফর থেকে ফিরবার পর প্রথম যিনি মহানবী সাল্লাল্লাহু আলাইহি ওয়াসাল্লাম-এর মুখোমুখি হত তিনিও হযরত ফাতিমা (রাযিঃ)। হযরত ফাতিমা যখন মহানবী সাল্লাল্লাহু আলাইহি ওয়াসাল্লাম-এর কাছে যেতেন, তখন মহানবী সাল্লাল্লাহু আলাইহি ওয়াসাল্লাম দাঁড়িয়ে যেতেন চুম্বন করতেন তাঁর ললাটেরেখায় এবং নিজের বসবার জায়গায় বসাতেন তাঁকে। মহানবী সাল্লাল্লাহু আলাইহি ওয়াসাল্লাম সব সময় হযরত ফাতিমা (রাযিঃ) এবং হযরত আলী (রাযিঃ)-এর মধ্যে ভাল সম্পর্ক বিরাজমান রাখবার জন্যে চেষ্টা চালাতেন। যখন মাঝে মাঝে আলী (রাযিঃ) এবং ফাতিমা (রাযিঃ)-এর মধ্যে পারিবারিক বিষয়ে দ্বন্দ্বের

সূত্রপাত হত, মহানবী সাল্লাল্লাহু আলাইহি ওয়াসাল্লাম তাঁদের মাঝে সমন্বয় করে দিতেন। একবার এরকম দ্বন্দ্ব হল, তখন মহানবী সাল্লাল্লাহু আলাইহি ওয়াসাল্লাম তাদের ঘরে গেলেন এবং দ্বন্দ্ব মিটিয়ে দিলেন এবং দ্বন্দ্ব মিটিয়ে দিয়ে মহানবী সাল্লাল্লাহু আলাইহি ওয়াসাল্লাম সীমাহীন খুশী হলেন। বাইরে বেরুলেও যেন তাঁর আনন্দ আর ধরে না। মহানবী সাল্লাল্লাহু আলাইহি ওয়াসাল্লামকে জিজ্ঞেস করা হল, আপনি এত বেশী খুশী কেন? বললেন, আমি আমার প্রিয়তম দু'জনের মধ্যে সন্ধি করিয়ে দিয়েছি। একবার হযরত আলী (রাযিঃ) হযরত ফাতিমা (রাযিঃ)-এর উপর কঠোর আচরণ করেন, ফাতিমা (রাযিঃ) আপত্তি জানিয়ে মহানবী সাল্লাল্লাহু আলাইহি ওয়াসাল্লামকে নালিশ করতে গেলে হযরত আলী (রাযিঃ)ও পিছনে পিছনে আসতে থাকেন। হযরত ফাতিমা (রাযিঃ) নালিশ করেন- মহানবী সাল্লাল্লাহু আলাইহি ওয়াসাল্লাম বলেন, প্রিয় কন্যা! তোমার নিজেরই বোঝা উচিত, কোন স্বামী স্ত্রীর পেছনে পেছনে নিঃশব্দ চলে আসে। হযরত আলী (রাযিঃ)-এর উপর মহানবী সাল্লাল্লাহু আলাইহি ওয়াসাল্লাম-এর এই কথার এমন প্রভাব হয় যে, তিনি ফাতিমা (রাযিঃ)কে বললেন, 'এখন থেকে তোমার মন-মজ্জির বিরুদ্ধে আর কোন কথা বলবো না।'

সাধারণ মহিলা সাহাবীগণ হযরত উমামা (রাযিঃ)

নাম ও বংশ পরিচয় : হযরত উমামা (রাযিঃ) হচ্ছেন আবুল আস বিন রুবাই-এর কন্যা; যিনি রাসূলে কারীম সাল্লাল্লাহু আলাইহি ওয়াসাল্লাম-এর কন্যা যয়নবের গর্ভজাত সন্তান ছিলেন।

তার বংশতালিকা এরকম : উমামা বিনতে আবুল আস বিন রুবাই বিন আবদুল উজ্জা বিন আবদে শামস বিন আবদে মনাফ।

সাধারণ অবস্থা : উমামা (রাযিঃ)কে মহানবী সাল্লাল্লাহু আলাইহি ওয়াসাল্লাম খুব ভালবাসতেন, এমনকি নামাযের সময়ও মহানবী সাল্লাল্লাহু আলাইহি ওয়াসাল্লাম উমামা (রাযিঃ)কে কাছে রাখতেন বলে হাদীছে উল্লেখ আছে। সহীহ বুখারীতে আছেঃ একবার উমামা (রাযিঃ)কে কাঁধে নিয়ে মহানবী সাল্লাল্লাহু আলাইহি ওয়াসাল্লাম মসজিদে এলেন এবং সেভাবেই নামায পড়ালেন— যখন রুকু করতে যেতেন নীচে রেখে দিতেন আবার দাঁড়ালে ফের তুলে নিতেন। এভাবেই মহানবী সাল্লাল্লাহু আলাইহি ওয়াসাল্লাম পুরো নামায পড়ান। (সহীহ বুখারী, প্রথম খণ্ড, পৃঃ ৭৪; জুরকানী, তৃতীয় খণ্ড, পৃঃ ৩৫৫)

মহানবী সাল্লাল্লাহু আলাইহি ওয়াসাল্লাম-এর কাছে একবার কিছু জিনিস উপঢৌকন এল; সেই উপঢৌকনের মধ্যে একটি স্বর্ণের হারও ছিল। উমামা কোন এক কোণায় খেলছিলেন তখন— মহানবী সাল্লাল্লাহু আলাইহি ওয়াসাল্লাম বললেনঃ আমি এটি আমার প্রিয়তম কোন লোককে দেবো। নবীপত্নীরা ভাবলেনঃ হযরত হযরত আয়েশা (রাযিঃ)কেই দেয়া হবে। কিন্তু মহানবী সাল্লাল্লাহু আলাইহি ওয়াসাল্লাম উমামাকে ডাকলেন এবং নিজেই তা তার গলায় পরিয়ে দিলেন। কোন কোন বর্ণনায় হারের বদলে আংটির উল্লেখ আছে। (জুরকানী, তৃতীয় খণ্ড, পৃঃ ২২৪)

আর সেখানে উপঢৌকন প্রেরণকারীর নামও উল্লিখিত হয়েছে, অর্থাৎ নাজ্জাশী।

(তাবাকাত-ই-ইবনে সা'আদ, অষ্টম খণ্ড, পৃঃ ২৭)

বিবাহ : মহানবী সাল্লাল্লাহু আলাইহি ওয়াসাল্লাম-এর মৃত্যুর সময় সাবালিকা হয়ে গিয়েছিলেন তিনি; এজন্যে হযরত ফাতিমা (রাযিঃ)-এর মৃত্যুর পর হযরত আলী (রাযিঃ) তাঁকে বিয়ে করেন। আবুল আস-এর অছীয়ত ছিল উমামা (রাযিঃ)-এর বিয়ে যাতে জুবাইর ইবনুল আওয়ামের সঙ্গে হয় (যিনি আশারায়ে মুবাম্বাশারা-র একজন, মহানবী সাল্লাল্লাহু আলাইহি ওয়াসাল্লাম-এর ফুফাতো ভাই)— সেজন্যে হযরত জুবাইর (রাযিঃ)-এর সম্মতিতেই আলী (রাযিঃ)-এর সঙ্গে উমামা (রাযিঃ)-এর বিয়ে হয় এবং বিবাহ পড়ান খোদ জুবাইর (রাযিঃ) নিজেই। এটি ১১ হিজরীর ঘটনা।

চল্লিশ হিজরীতে আলী (রাযিঃ) যখন শহীদ হন, মুগীরা বিন নৌফেলকে (আবদুল মুত্তালিবের প্রপৌত্র) অছীয়ত করে যান উমামাকে বিয়ে করে নিতে মুগীরা অতঃপর

বিয়ে করে নেন। তার আগে আমীরে মুআবিয়া (রাযিঃ) পয়গাম পাঠিয়েছিল, মরওয়ানকে তিনি লিখেছিল এই বিয়েতে পাঁচ হাজার টাকা খরচ করতে। কিন্তু মুগীরা উমামা (রাযিঃ)-এর কাছ থেকে অবহিত হয়ে তাড়াতাড়ি হযরত হাসান (রাযিঃ)-এর অনুমতিতে বিয়ে পড়িয়ে নেন।

(তাবাকত-ই-ইবনে সা'আদ, অষ্টম খণ্ড, পৃঃ ২৭; উসুদুল গাবা, ৫ম খণ্ড, পৃঃ ৪০০)
মৃত্যুঃ হযরত উমামা (রাযিঃ) মুগীরা (রাযিঃ)-এর কাছেই মৃত্যুবরণ করেন।

(আল ইসাবা ফি হময়িজিস সাহাবা ইবনে হাজার আসকালানী, অষ্টম খণ্ড, পৃঃ ১৪)
সন্তান-সন্ততি : মুগীরা (রাযিঃ)-এর সঙ্গে বিয়ের পর একটি সন্তান হয়, তার নাম ছিল ইয়াহইয়া; কিন্তু কোন কোন বর্ণনায় পাওয়া যায় যে, উমামার কোন সন্তান হয়নি।

হযরত সুফিয়া (রাযিঃ)

নাম ও বংশ পরিচয় : সুফিয়া তাঁর নাম তিনি ছিল রাসূলুল্লাহ সাল্লাল্লাহু আলাইহি ওয়াসাল্লাম-এর পিতামহ আবদুল মুত্তালিবের কন্যা; তাঁর মাতার নাম হালা বিনতে ওহাব- যিনি মহানবী সাল্লাল্লাহু আলাইহি ওয়াসাল্লাম-এর জননী হযরত আমিনার বোন ছিল। এই হিসেবে হযরত সুফিয়া (রাযিঃ) ফুফু হওয়ার পাশাপাশি, মহানবী সাল্লাল্লাহু আলাইহি ওয়াসাল্লাম-এর খালাতো বোনও হন। রাসূলুল্লাহ সাল্লাল্লাহু আলাইহি ওয়াসাল্লাম-এর চাচা হযরত হামযা (রাযিঃ)ও কিন্তু হালা বিনতে ওহাবের সন্তান-এজনে সুফিয়া (রাযিঃ) এবং হযরত হামযা (রাযিঃ) দু'জনেই ভাইবোন।

বিবাহ : হযরত সুফিয়ার বিয়ে হয় আবু সুফিয়ান বিন হারবের ভাই হারেসের সঙ্গে এবং সুফিয়ার গর্ভে হারেসের একটি সন্তানও হয়। হারেসের মৃত্যুর পর হযরত খাদিজা (রাযিঃ)-এর ভাই আওয়াম বিন খুয়াইলদের সঙ্গে বিয়ে হয়। তার থেকে জন্ম হয় হযরত জুবাইর (রাযিঃ)।

ইসলাম গ্রহণ : চল্লিশ বছর বয়সে মহানবী সাল্লাল্লাহু আলাইহি ওয়াসাল্লাম নবুয়্যত লাভ করেন। রাসূলুল্লাহ সাল্লাল্লাহু আলাইহি ওয়াসাল্লাম-এর সমস্ত ফুফুদের মধ্যে এই সম্মান কেবল মাত্র হযরত সুফিয়ার অর্জনে যে, একমাত্র তিনিই ইসলাম গ্রহণের সৌভাগ্য লাভ করেন। উসুদুল গাবা গ্রন্থে আছেঃ 'এটিই সত্য যে তিনি ছাড়া তার ফুফুদের আর কেউই মুসলমান হননি। (উসুদুল গাবা, ৫ম খণ্ড, পৃঃ ৪৯২)

সাধারণ অবস্থা : তিনি হযরত জুবাইর (রাযিঃ)-এর সঙ্গে হিজরত করেন। অহুদের যুদ্ধে যখন মুসলমানরা পরাজিত হয়, তিনি মদীনা থেকে বেরুলেন; বেদনাময় ভঙ্গিতে সাহাবীদেরকে বলতেনঃ 'রাসূলুল্লাহ সাল্লাল্লাহু আলাইহি ওয়াসাল্লাম আমাদের ছেড়ে গিয়েছেন।

(তাবাকত-ই-ইবনে সা'আদ, ৮ম খণ্ড, পৃঃ ২৮)।
মহানবী সাল্লাল্লাহু আলাইহি ওয়াসাল্লাম তাঁকে আসতে দেখে হযরত জুবাইর (রাযিঃ)কে ডেকে বলল : হামজা (রাযিঃ)-এর লাশ যেন তিনি দেখতে না পান। হযরত জুবাইর

(রাযিঃ) তাঁকে মহানবী সাল্লাল্লাহু আলাইহি ওয়াসাল্লাম-এর কথা বলল, তিনি বললঃ আমি আমার ভাইয়ের খবর আগেই জেনে গেছি, আল্লাহর পথে এটি বড় কোন কোরবানী নয়। মহানবী সাল্লাল্লাহু আলাইহি ওয়াসাল্লাম-এর অনুমতি পেয়ে হামযা (রাযিঃ)-এর লাশের কাছে গেল- রক্তের বন্যা বয়ে চলেছে। আর প্রিয় ভাইয়ের ছেড়াখোড়া লাশ পড়ে আছে- কিন্তু তবু তিনি কেবল 'ইন্নািল্লিহ পড়ে নিঃশব্দ হয়ে গেল এবং তার রুহের মাগফিরাতের জন্য দু'আ করলেন। এটি ছিল অসম্ভব দুঃখ আর বেদনার ঘটনা, এক শোকগাঁথাও তাই চলে এল তাঁর মুখে। সেই শোকগাঁথার উচ্চারণে মহানবী সাল্লাল্লাহু আলাইহি ওয়াসাল্লামকে এক জায়গায় তিনি সম্বোধন করেছেন এভাবে :

‘আজ আপনার উপর নেমে এসেছে সেই রাত

যার সূর্য বিকট কালোবর্ণ হয়ে গেছে

অথচ এই কৃষ্ণ-সূর্য কিছু-আগেও উজ্জ্বল ছিল’

(উসুদুল গাবা, ৫ম খণ্ড, পৃঃ ৪৯২; আল-ইসাবা, ৮ম খণ্ড, পৃঃ ১২৯/আল-ইসাবা, ৮ম খণ্ড, পৃঃ ১২৯)

উহুদের যুদ্ধের মত খন্দকের যুদ্ধেও তিনি অত্যন্ত দৃঢ়তা এবং ধৈর্যের প্রমাণ দেন। আনসারের দুর্গের মধ্যে ‘ফারে’ নামক দুর্গটি সর্বাধিক সুদৃঢ় ছিল- মহিলারা ছিল সে দুর্গেই। তাদের সংরক্ষণের জন্যে নিযুক্ত ছিল কবি হযরত হাসসান বিন সাবিত। ইতুগীরা যখন দেখলো যে সমস্ত বাহিনী হযরত মুহাম্মদ সাল্লাল্লাহু আলাইহি ওয়াসাল্লাম-এর সঙ্গে তখন তারা দুর্গে আক্রমণ করল; এক ইহুদী পৌছে গেল দরোজার ফটক পর্যন্ত এবং দুর্গে আক্রমণ চালাবার ফন্দি খুঁজছিল এ সময় তাকে হযরত সুফিয়া (রাযিঃ) দেখে ফেলেন। হাসসান (রাযিঃ)কে বললঃ নেমে হত্যা করে ফেল তাকে, তা না হলে এগিয়ে শত্রুদের খবর দিয়ে দেবে। কিন্তু হযরত হাসসানে (রাযিঃ)-এর কি যেন হয়ে গিয়েছিল। (কবি-মানুষ বলে হয়তো) যুদ্ধের দিকে তাকাতেও পারতেন না, তিনি নিজের অপারগতা প্রকাশ করল এবং বলল, যদি সেকাজ পারতাম, আমি এখানে আছি কেন? হযরত সুফিয়া (রাযিঃ) তারুর একটি খুঁটি তুলে নিলেন এবং নীচে নেমে ইহুদীর মাথায় এমন সজোরে আঘাত করল যে, তার মাথা ফেটে গেল। হযরত সুফিয়া (রাযিঃ) চলে এল এবং হাসসানকে বললঃ যাও তার হাতিয়ার এবং কাপড় ছিনিয়ে নাও- হাসসান বললঃ যেতে দাও, আমার তা দরকার নেই। হযরত সুফিয়া (রাযিঃ) বলল, ঠিক আছে তবে তার মাথা কেটে নিয়ে দুর্গের নীচে নিক্ষেপ করো, যাতে ইহুদীরা তা দেখে সন্ত্রস্ত হয়ে পড়ে। কিন্তু এটিও করতে হল হযরত সুফিয়া (রাযিঃ)কেই (কবিকে দিয়ে কিছুই হবার নয়)। ইহুদীদের বিশ্বাস হয়ে গেল, দুর্গের মধ্যে মুসলমানদের ফৌজ আছে। আর এই ভয়ে তারা আর আক্রমণের সাহস করল না।

(তাবাকাত-ই-ইবনে সা’আদ, ৮ম খণ্ড, পৃঃ ২৭ ও ২৮; উসুদুল গাবা, ৫ম খণ্ড, পৃঃ ৪৯৩)

১১ হিজরীতে মহানবী সাল্লাল্লাহু আলাইহি ওয়াসাল্লাম ইন্তেকাল করল। হযরত সুফিয়া (রাযিঃ) কী রকম ব্যথিত হয়েছিল, তা সহজেই অনুমেয়, তিনি একটি দরদ-ভরা

মসীয়া বা শোকগাঁথাও রচনা করেন। তার একটি পংক্তি এরকম :

‘যখন ঘনিয়ে এল সেই দিন, আর মৃত্যু হল মহানবীর

কি বলবো, অশ্রু-বন্যায় ভেসে গেল

আমার চোখের মূল ও মুক্তিকা’

বিন ইসহাক তার ‘নবী-চরিত’ এ এই শোকগাঁথা সংকলন করেছেন।

(আল ইসাবা, ৮ম খণ্ড, পৃঃ ১২৯)

মৃত্যু : হযরত সুফিয়া (রাযিঃ) হিজরী বিশ সনে ইন্তেকাল করেন এবং সমাহিত হন জান্নাতুল-বাকীতে। মৃত্যুর সময় তার বয়স হয়েছিল তিয়াত্তর বছর।

ইসাবা গ্রন্থকারের বর্ণনা অনুযায়ী হযরত সুফিয়া (রাযিঃ) কিছু হাদীছও বর্ণনা করেছেন, কিন্তু আমরা তা পাইনি। মুসনাদেও সেসব হাদীছের খোঁজ মেলে না।

(আল ইসাবা, ৮ম খণ্ড, পৃঃ ১২৮)

হযরত উম্মে আইমন (রাযিঃ)

নাম ও বংশ পরিচয় : নাম ‘বরকত’ উম্মে আইমন (রাযিঃ) উপনাম, ওরফে উম্মে আনতবা।

বংশক্রম এরকম : বরকত বিনতে সা‘লাবা বিন আমর বিন হিসন বিন মালিক বিন সালমা বিন আমার বিন নো‘মান। ইনি ছিলেন হাবশার (বর্তমান ইথিওপিয়ার) অধিবাসী। মহানবী সাল্লাল্লাহু আলাইহি ওয়াসাল্লাম-এর পিতা আবদুল্লাহর দাসী ছিলেন ইনি। মহানবী সাল্লাল্লাহু আলাইহি ওয়াসাল্লাম-এর পিতা মারা গেলে তিনি নবী জননী আমিনার কাছে বসবাস করতে থাকেন। এরপর মহানবী সাল্লাল্লাহু আলাইহি ওয়াসাল্লাম-এর কাছে চলে আসেন, আর তিনিই মহানবী সাল্লাল্লাহু আলাইহি ওয়াসাল্লাম-এর লালন পালন করেন।

(আল-ইসাবা, ৮ম খণ্ড, পৃঃ ২১২, ২১৩)

বিবাহ : হারিছ বিন খযরজের পরিবারে উবাইদ বিন যায়েদ নামের এক ব্যক্তি ছিল; উম্মে আইমন (রাযিঃ)-এর বিয়ে হয় তারই সঙ্গে। কিন্তু তার মৃত্যু হলে মহানবী সাল্লাল্লাহু আলাইহি ওয়াসাল্লাম নিজের প্রিয়তম যায়েদ বিন হারিসা (রাযিঃ)-এর সঙ্গে তাঁর বিয়ে পড়িয়ে দেন এবং এটি ছিল নবুয়্যত প্রাপ্তির পরের ঘটনা।

(সহীহ বুখারী, ১ম খণ্ড, পৃঃ ৫২৯)

ইসলাম গ্রহণ : হযরত যায়েদ যেহেতু মুসলমান হয়েছিলেন, উম্মে আইমনও একই সাথে ইসলাম গ্রহণ করেন।

সাধারণ অবস্থা : যখন মুসলমানরা হাবশায় হিজরত করেন, তিনিও সেখানে যান এবং সেখান থেকে পরে মদীনায়ে চলে আসেন। তিনি উহুদ যুদ্ধে অংশগ্রহণ করেন। যুদ্ধে তিনি লোকদেরকে পানি পান করাতেন এবং আহতদের শুশ্রূষা করতেন। তিনি খায়বরের যুদ্ধেও অংশগ্রহণ করেন।

১১ হিজরীতে মহানবী সাল্লাল্লাহু আলাইহি ওয়াসাল্লাম মৃত্যুবরণ করেন; এতে দারুণ শোকাহত হন উম্মে আইমন (রাযিঃ)। তা দেখে হযরত আবু বকর (রাযিঃ) এবং হযরত উমর (রাযিঃ) বোঝানোর চেষ্টা করেন যে, মহানবী সাল্লাল্লাহু আলাইহি ওয়াসাল্লাম-এর জন্যে আল্লাহর কাছে উত্তম জিনিস আছে। উম্মে আইমন (রাযিঃ) এটি শুনে উত্তরে বলেন, আমি তা ভাল করে জানি আর এজন্যে আমি কাঁদছি না- আমি কাঁদছি কেবল এজন্যে যে, এখন অহীর আগমন বন্ধ হয়ে গেল। হযরত আবু বকর (রাযিঃ) এবং হযরত উমর (রাযিঃ)-এর উপর এই উত্তরের এমন প্রভাব সৃষ্টি হয় যে, তারাও তাঁর সাথে মিলে উচ্ছ্বসিত হয়ে রোদন করতে লাগলেন।

(সহীহ মুসলিম, ২য় খণ্ড, পৃঃ ৩৪১)

২৩ হিজরীতে হযরত উমর (রাযিঃ) শহীদ হন। উম্মে আইমন (রাযিঃ) সংবাদ পেয়ে খুব কঁদেছিলেন। কেউ কেউ জিজ্ঞেস করল, আপনি কাঁদছেন কেন? তিনি বললেন, 'কাঁদছি এজন্যে যে ইসলাম দুর্বল হয়ে গেল।'

(ইসাবা, ৮ম খণ্ড, পৃঃ ২১৪)

সন্তান-সন্ততি : তাঁর দুটো সন্তান হয়, আইমন (রাযিঃ) এবং উসামা (রাযিঃ)। আইমন (রাযিঃ) ছিলেন প্রথম স্বামী, সাহাবী ছিলেন- খয়বরের যুদ্ধে শহীদ হন, আর উসামা (রাযিঃ) ছিলেন মহানবী সাল্লাল্লাহু আলাইহি ওয়াসাল্লাম-এর অত্যন্ত প্রিয়ভাজন, আর তার পিতাও মহানবী সাল্লাল্লাহু আলাইহি ওয়াসাল্লাম-এর কাছে একই রকম আদরের ছিলেন। তিনি খুব উঁচু মর্যাদার সাহাবী ছিলেন। তিনি মহানবী সাল্লাল্লাহু আলাইহি ওয়াসাল্লাম-এর অসাধারণ মমতার অধিকার করে নিয়েছিলেন।

গুণাবলী ও বৈশিষ্ট্য : মহানবী সাল্লাল্লাহু আলাইহি ওয়াসাল্লাম থেকে তিনি কয়েকটি হাদীছ বর্ণনা করেন- বর্ণনাকারীদের মধ্যে হযরত আনাস বিন মালিক (রাযিঃ) জনশ বিন আবদুল্লাহ এবং আবু এজিদ মদনী প্রমুখ উল্লেখযোগ্য।

চরিত্র : মহানবী সাল্লাল্লাহু আলাইহি ওয়াসাল্লাম তাঁকে খুব সম্মান করতেন। মহানবী সাল্লাল্লাহু আলাইহি ওয়াসাল্লাম বলতেনঃ উম্মে আইমন (রাযিঃ) আমার জননী। তিনি প্রায়ই তার ঘরে যেতেন, একবার তাঁর ঘরে গেলে উম্মে আইমন (রাযিঃ) তাঁকে শরবত দিলেন। মহানবী সাল্লাল্লাহু আলাইহি ওয়াসাল্লাম কোন কারণে একটু অন্যগ্রহ দেখালেন, উম্মে আইমন (রাযিঃ) নারাজ হন।

(সহীহ মুসলিম, দ্বিতীয় খণ্ড, পৃঃ ৩৪১)

(মহানবী সাল্লাল্লাহু আলাইহি ওয়াসাল্লামকে পালন করেছিল বলে উম্মে আইমন (রাযিঃ)-এর এক ধরনের গৌরব বোধ ছিল- এই রাগও সেই অনুরাগ প্রকৃতির)।

(নববী, শরহে মুসলিম)

আনসারগণ মহানবী সাল্লাল্লাহু আলাইহি ওয়াসাল্লামকে অনেকগুলো খেজুর বাগান দিয়েছিল। মুসলমানরা যখন বনু কুরায়জা এবং বনু নজীরের উপর বিজয়ী হল- মহানবী সাল্লাল্লাহু আলাইহি ওয়াসাল্লাম ক্রমশঃ আনসারদেরকে তাদের খেজুর বৃক্ষের বাগান ফেরৎ দিতে আরম্ভ করলেন। হযরত আনাস (রাযিঃ)-এর কিছু বাগানও ছিল

মহানবী সাল্লাল্লাহু আলাইহি ওয়াসাল্লাম-এর কাছে। সেগুলো মহানবী সাল্লাল্লাহু আলাইহি ওয়াসাল্লাম উম্মে আইমন (রাযিঃ)কে দেন। হযরত আনাস (রাযিঃ) এলে উম্মে আইমন (রাযিঃ) সেগুলো ফেরৎ দিতে অস্বীকার করেন— এবং অস্বীকৃতিতে অটল ও অবিচল থাকেন তিনি, এটি দেখে মহানবী সাল্লাল্লাহু আলাইহি ওয়াসাল্লাম তাকে বাগানের দশগুণ বেশী দিয়ে দেন। (সহীহ বুখারী, জুরকানী আলাল মাওয়াহিব, তৃতীয় খণ্ড, পৃঃ ৩৩৭)

হযরত ফাতিমা বিনতে আসাদ (রাযিঃ)

নাম ও বংশ পরিচয় : তাঁর নাম ফাতিমা। তিনি ছিল আসাদ বিন হাশিমের স্ত্রী। তিনি ছিলেন মহানবী সাল্লাল্লাহু আলাইহি ওয়াসাল্লাম-এর পিতামহ আবদুল মুত্তালিবের—ভাতিজি।

বিবাহ : আবদুল মুত্তালিবের পুত্র আবু তালিবের সঙ্গে তার বিবাহ হয়ে এবং তারই গর্ভে হযরত আলী (রাযিঃ)-এর জন্ম হয়।

ইসলাম গ্রহণ : ইসলামের সূচনাকালে হাশিম পরিবার মহানবী সাল্লাল্লাহু আলাইহি ওয়াসাল্লামকে সর্বাধিক আনুকূল্য প্রদান করে এবং হাশিম পরিবারের অনেকেই ইসলামও গ্রহণ করেন। হযরত ফাতিমা বিনতে আসাদ (রাযিঃ) ছিলেন তাদেরই একজন। যদিও তার স্বামী মুসলমান হননি, কিন্তু তিনি এবং তাঁর কিছু সন্তান ইসলামে দীক্ষিত হন। আবু তালিব মারা গেলে হযরত ফাতিমা (রাযিঃ)ই মহানবী সাল্লাল্লাহু আলাইহি ওয়াসাল্লাম-এর শক্তিশালী বাহু হয়ে দাঁড়ান।

হিজরত এবং সাধারণ অবস্থা : মুসলমানরা হিজরতের অনুমতি অর্জন করলে হযরত ফাতিমা বিনতে আসাদ (রাযিঃ) মদীনায় হিজরত করেন। এখানে হযরত আলী (রাযিঃ)-এর সঙ্গে নবীহৃদয়-পদ্ম ফাতিমা জোহরার (রাযিঃ)-এর বিয়ে হয়। বিয়ের পর হযরত আলী (রাযিঃ)-এর নিজের মাতাকে (হযরত ফাতিমা বিনতে আসাদকে) বলেন যে, মহানবী সাল্লাল্লাহু আলাইহি ওয়াসাল্লাম-এর কন্যা আসছে আমি পানি ভরবো এবং বাইরের কাজ করব এবং সে চাক্ষিতে আটা পিষার কাজে আপনার সাহায্য করবে।

(উসুদুল গাবা, ৫ম খণ্ড, পৃঃ ৫১৭)

মৃত্যু : মহানবী সাল্লাল্লাহু আলাইহি ওয়াসাল্লাম-এর জীবৎকালে তাঁর মৃত্যু হয়। কারো কারো ধারণা তিনি হিজরতের পূর্বেই মৃত্যুবরণ করেন। কিন্তু এটি সত্য নয়। মহানবী সাল্লাল্লাহু আলাইহি ওয়াসাল্লাম নিজের জামা খুলে তাঁর কাফন তৈরী করেন এবং কবরের মধ্যে নেমে শুয়ে যান। এরূপ করার কারণ জিজ্ঞেস করলে মহানবী সাল্লাল্লাহু আলাইহি ওয়াসাল্লাম বলেনঃ আবু তালিবের পর তাঁর চেয়ে বেশী আর কেউ আমায় আনুকূল্য দান করেনি। এজন্যে আমি তাঁকে আমার জামা পরিয়েছি, যাতে বেহেশতে তিনি পোশাক পান এবং জন্য কবরের মধ্যে শুয়ে গেছি, যাতে কবরের কঠোর অবস্থা একটু শিথিল হয়।

(উসুদুল গাবা, ৫ম খণ্ড, পৃঃ ৫১৭)

সন্তান-সন্ততি : তাঁর কয়েকজন সন্তান হয়— হযরত আলী (রাযিঃ), হযরত জাফর তইআর (রাযিঃ), তালেব, আকিল ।

চরিত্র-বৈশিষ্ট্য : তাঁর চরিত্র বৈশিষ্ট্য বিষয়ে ইসাবা গ্রন্থে উল্লেখ আছেঃ তিনি খুব ভাল ও নেককার মহিলা ছিলেন— মহানবী সাল্লাল্লাহু আলাইহি ওয়াসাল্লাম তাঁকে দেখতে যেতেন এবং তাঁর গৃহে আরাম করতেন । (ইসাবা, ৮ম খণ্ড, পৃঃ ১৬০)

হযরত উম্মুল ফযল (রাযিঃ)

নাম ও বংশ পরিচয় : ‘লুবাবা’ ছিল তাঁর নাম আর উপনাম উম্মুল ফযল, উপাধি ছিলঃ কুবরা । বংশক্রম এরকমঃ লুবাবাতুল কুবরা বিনতিল হারিস বিন হাজন বিন বুজাইর ইবনুল হারাম বিন রুবিয়া বিন আবদুল্লাহ বিন হিলাল বিন আমের বিন সাঅসাআ । মাতার নাম ছিলঃ হিন্দ বিনতে আওফ । তিনি কিনানা গোত্রের মহিলা ছিলেন । লুবাবার কয়েকজন বোন আছে, যাঁরা হাশিম এবং কুরাইশ গোত্রের বেশ কয়েকজন সম্মানিত ব্যক্তির সঙ্গে পরিণয় সূত্র আবদ্ধ হন । যেমন— হযরত মায়মুনা (রাঃ) মহানবী সাল্লাল্লাহু আলাইহি ওয়াসাল্লাম-এর পবিত্র পত্নী । লুবাবা (রাযিঃ) (হযরত আব্বাস (রাযিঃ) (মহানবী সাল্লাল্লাহু আলাইহি ওয়াসাল্লাম-এর চাচা) সালমা (রাযিঃ) (হযরত হামযা (রাযিঃ), হযরত আসমা (রাযিঃ) হযরত জাফর তইআর (রাযিঃ) (হযরত আলী (রাযিঃ)-এর ভাই)-এর পত্নী । এই জন্য তার মাতা (হিন্দ বিনতে আওফ) সম্পর্কে একটি কথা প্রচলিত ছিলঃ শ্বশুরপক্ষীয় আত্মীয়তার ক্ষেত্রে তাঁর কোন তুলনা নেই ।

বিবাহ : মহানবী সাল্লাল্লাহু আলাইহি ওয়াসাল্লাম-এর সম্মানিত চাচা হযরত আব্বাস (রাযিঃ)-এর সঙ্গে তাঁর বিবাহ হয় ।

ইসলাম গ্রহণ : হিজরতের পূর্বে মুসলমান হন । ঐতিহাসিক বিন সা‘আদের ধারণা হচ্ছে, তিনি হযরত খাদীজা (রাযিঃ)-এর পর ইসলাম গ্রহণ করেন আর অন্যান্য মহিলারা এদের পর ইসলাম গ্রহণ করেন । এইভাবে দেখা যায় তিনি বহুপূর্বে ইসলামে দীক্ষিত হয়েছিলেন ।

অবস্থা : উম্মুল ফযল (রাযিঃ) মহানবী সাল্লাল্লাহু আলাইহি ওয়াসাল্লাম-এর সঙ্গে হজ্জ্ব ও করেছিলেন । বিদায় হজ্জের সময় যখন লোকদের আরফার দিন (আরাফাত দিবসে) মহানবী সাল্লাল্লাহু আলাইহি ওয়াসাল্লাম-এর রোযা থাকা বিষয়ে সংশয় হল এবং তাঁর কাছে উল্লেখ করল, তখন তিনি মহানবী সাল্লাল্লাহু আলাইহি ওয়াসাল্লাম-এর নিকট এক পেয়ালা দুধ পাঠান এবং যেহেতু মহানবী সাল্লাল্লাহু আলাইহি ওয়াসাল্লাম রোযা ছিলেন না, কাজেই তিনি তা পান করে নেন । এতে লোকজন আশ্বস্ত হয় ।

(সহীহ বুখারী, ১ম খণ্ড, পৃঃ ২৬৭)

মৃত্যু : উম্মুল ফযল (রাযিঃ) হযরত উসমান (রাযিঃ)-এর খিলাফত কালে মৃত্যুবরণ করেন । এই সময় হযরত আব্বাস (রাযিঃ) জীবিত ছিলেন । হযরত উসমান (রাযিঃ) তাঁর জানাযার নামায পড়ান ।

সন্তান-সত্ত্বতি : হযরত আব্বাস (রাযিঃ)-এর অধিকাংশ সন্তান তাঁর গর্ভে জন্ম হয় এবং যেহেতু সবাই ছিল অত্যন্ত যোগ্য, তাই তাঁকে খুব ভাগ্যবতী মনে করা হত। হযরত ফযল (রাযিঃ), আবদুল্লাহ মাবদ, উবায়দুল্লাহ, কুসাম, আবদুর রহমান এবং উম্মে হাবিবা-তাঁরই স্মৃতিবাহী। আর এঁদের মধ্যে আবদুল্লাহ এবং উবায়দুল্লাহ জ্ঞানাকাশের চন্দ্র ও নক্ষত্র ছিলেন।

গুণাবলী ও বৈশিষ্ট্য : তিনি মহানবী সাল্লাল্লাহু আলাইহি ওয়াসাল্লাম-এর থেকে তেত্রিশটি হাদীছ বর্ণনা করেছেন। বর্ণনাকারীরা হলেনঃ আবদুল্লাহ (রাযিঃ), হযরত আব্বাস (রাযিঃ)-এর সন্তানেরা আনাস বিন মালিক, আবদুল্লাহ বিন হারিছ বিন নৌফল, উমাইর, কুরাইব, কাবুস প্রমুখ।

চরিত্র বৈশিষ্ট্য : তিনি অত্যন্ত ইবাদত পালনকারিনী ও দুনিয়াবিমুখ ছিলেন। প্রতি সোমবার এবং বৃহস্পতিবার রোযা রাখতেন। (খোলাসাত্তুত তাহযীব, পৃঃ ৪৯৫)

তিনি মহানবী সাল্লাল্লাহু আলাইহি ওয়াসাল্লামকে খুব ভালবাসতেন। মহানবী সাল্লাল্লাহু আলাইহি ওয়াসাল্লাম প্রায়ই তাঁর কাছে যেতেন এবং দুপুরে আরাম করতেন।

হযরত উম্মে রুমান (রাযিঃ)

নাম ও বংশ পরিচয় : তাঁর প্রকৃত নাম জানা যায়নি, তবে উম্মে রুমান তাঁর উপনাম। আর তিনি ছিলেন কেনানা গোত্রের ফিরাস পরিবারের সন্তান।

বংশক্রম এরকম : উম্মে রুমান বিনতে আমের বিন উআইমর বিন আবদে শামস বিন এতাব বিন আজিনা বিন সাবিআ বিন দাহমান বিন হারিস বিন গনম বিন মালিক বিন কিনানা।

বিবাহ : আবদুল্লাহ বিন সাবখারার সঙ্গে তাঁর বিবাহ হয় এবং তাঁরই সঙ্গে তিনি মক্কায় এসে বসতি করেন, আবদুল্লাহ, হযরত আবু বকর (রাযিঃ)-এর হলিফ হয়ে যান। সেজন্যে যখন আবদুল্লাহ মারা যান, হযরত আবু বকর তাঁকে বিয়ে করে নেন।

ইসলাম গ্রহণ : কিছুকাল পর মক্কা থেকে ইসলামের আওয়াজ ওঠে- হযরত আবু বকর (রাযিঃ)-এর সঙ্গে সঙ্গে উম্মে রুমানও সেই আওয়াজকে স্বাগত জানান।

হিজরত : হিজরতের সময় হযরত আবু বকর (রাযিঃ) একাকী মহানবী সাল্লাল্লাহু আলাইহি ওয়াসাল্লাম-এর সঙ্গে তাঁর সহযোগিতার জন্যে মদীনা রওনা হয়ে যান। কিন্তু তাঁর পরিবার মক্কায় রয়ে যায়। পৌছার পর এজিদা বিন হারিছা এবং আবু রাযিকে মহিলাদেরকে মদীনা নিয়ে যাবার জন্য প্রেরণ করা হয়। আর তখন অন্যান্য মহিলাবৃন্দের সঙ্গে উম্মে রুমানও মদীনার অভিযাত্রিক হন।

সাধারণ অবস্থা : ৬ষ্ঠ হিজরীর শাবান মাসে ইফক-এর ঘটনা ঘটে। উম্মে রুমান (রাযিঃ)-এর জন্যে এটি ছিল সবচেয়ে অসুবিধার, সবচেয়ে সংকটের সময়। হযরত আয়েশা (রাযিঃ) এই ঘটনা জানতে পেরে মহানবী সাল্লাল্লাহু আলাইহি ওয়াসাল্লাম-এর

কাছ থেকে অনুমতি নিয়ে মাতৃ আঙ্গায়ে চলে আসেন। হযরত আবু বকর (রাযিঃ) উপরে বসা ছিলেন, উম্মে রুমান (রাযিঃ) মাটিতে; কেন এসেছ জিজ্ঞেস করলে হযরত আয়েশা (রাযিঃ) সমগ্র ঘটনা বর্ণনা করেন। উম্মে রুমান (রাযিঃ) সব শুনে বললেনঃ এতে ভয় পাওয়ার কি আছে— যে রমণী তাঁর স্বামীর সবচেয়ে প্রিয়, তাঁর সতীন্দ্রা হিংসার কারণে এরকম করে। কিন্তু হযরত আয়েশা (রাযিঃ) এতে সান্ত্বনা পাননি বরং চীৎকার করে কাঁদতে থাকলেন। হযরত আবু বকর (রাযিঃ) কান্নার শব্দ শুনে পেয়ে নেমে আসেন এবং নিজেও অবিরল কাঁদতে থাকেন। তারপর হযরত আয়েশা (রাযিঃ)কে বলেন যে, তুমি নিজের ঘরে ফিরে যাও— সাথে সাথে উম্মে রুমানকে সঙ্গে নিয়ে নিজেও রওয়ানা হন। হযরত আয়েশা (রাযিঃ)—এর যেহেতু এই দুঃখ থেকে জ্বর এসে গিয়েছিল। ফলে মাতা-পিতা নিজেদের কোদো তুলে নেন তাঁকে। আসরের নামাযের পর মহানবী সাল্লাল্লাহু আলাইহি ওয়াসাল্লাম এলেন এবং বললেন: হে আয়েশা! বাস্তবিকই যদি তোমার এরকম কোন ভুল হয়ে গিয়ে থাকে, তাহলে আল্লাহর কাছে তওবা করে নাও। হযরত আয়েশা (রাযিঃ) পিতা-মাতাকে বলেন যে, আপনারা উত্তর দিন। কিন্তু তারা বললেন, আমরা কি বলতে পারি? হযরত আয়েশা (রাযিঃ) নিজেই উত্তর দিয়ে দিলেন। যখন মহানবী সাল্লাল্লাহু আলাইহি ওয়াসাল্লাম—এর উপর অহী এল—যেখানে হযরত আয়েশা (রাযিঃ)কে সম্পূর্ণ নিষ্পাপ ঘোষণা করা হল। তখন উম্মে রুমান (রাযিঃ) বললেন, ‘তুমি উঠে মহানবী সাল্লাল্লাহু আলাইহি ওয়াসাল্লাম—এর কাছে যাও’ হযরত আয়েশা (রাযিঃ) বললেনঃ আমি তাঁর কাছেও কৃতজ্ঞ নই, আপনাদের কাছেও কৃতজ্ঞ নই— আমি কৃতজ্ঞ একমাত্র আল্লাহর কাছে এবং তাঁরই কৃতজ্ঞতা প্রকাশ করছি আমি। (সহীহ বুখারী, ২য় খণ্ড, পৃঃ ৫৯৫, ৫৯৬, ৫৯৯ এবং ৭০০) একই বছরের শেষে অতিথিদের ঘটনা ঘটে। হযরত আবু বকর (রাযিঃ) আসহাবে সুফফার তিনজন সাহাবীকে নিজের ঘরে ডেকেছিলেন। তিনি মহানবী সাল্লাল্লাহু আলাইহি ওয়াসাল্লাম—এর কাছে গেলে ফিরতে দেরী হয়ে যায়। ঘরে ফিরলে উম্মে রুমান (রাযিঃ) বলেন, অতিথিদের ছেড়ে কোথায় বসে আছেন? তিনি বললেন, তুমি তাদের খাওয়াওনি? উত্তরে উম্মে রুমান (রাযিঃ) বললেনঃ খাবার পাঠিয়েছিলাম— কিন্তু তাঁরা না খেয়ে ফেরৎ পাঠিয়ে দিয়েছেন। (আসলে ফেরৎ পাঠাননি, ঠিকই খেয়েছিল তাঁরা; কিন্তু বিপুল বেঁচে গিয়েছিল)। হযরত আবু বকর (রাযিঃ) উম্মে রুমান (রাযিঃ)কে জিজ্ঞেস করেন এখন আর কতটুকু আছে? উম্মে রুমান (রাযিঃ) বললেনঃ তিন গুণের বেশী; অতঃপর সবই তুলে নিয়ে মহানবী সাল্লাল্লাহু আলাইহি ওয়াসাল্লাম—এর কাছে পাঠিয়ে দেয়া হয়। (সহীহ বুখারী, ১ম খণ্ড, পৃঃ ৮৪ ও ৮৫)

মৃত্যু : হযরত উম্মে রুমান (রাযিঃ) ৯ হিজরী অথবা তারপরে মৃত্যুবরণ করেন। মহানবী সাল্লাল্লাহু আলাইহি ওয়াসাল্লাম নিজে কবরে প্রবেশ করেন এবং তাঁর জন্যে মাগফিরাতের দু’আ করেন। কারো কারো মতে উম্মে রুমান (রাযিঃ)—এর মৃত্যু—সাল ৬ষ্ঠ হিজরী। কিন্তু এটি সঠিক নয়— কেননা ঘটনা প্রবাহ তার অনুমোদন করে না।

সন্তান-সন্ততি : উপরে উল্লিখিত হয়েছেঃ উম্মে রুমান (রাযিঃ) দু'টো বিয়ে করেন। প্রথম স্বামী থেকে একটি ছেলে হয়— তার নাম ছিল, তোফায়েল; আর হযরত আবু বকর (রাযিঃ) থেকে দু'টো সন্তানের জন্ম হয়ঃ হযরত আবদুর রহমান (রাযিঃ) এবং হযরত আয়েশা (রাযিঃ)।

হযরত সুমায়্যা রাযিঃ)

নাম ও বংশ পরিচয় : তিনি খাব্বাতের কন্যা ছিলেন এবং আম্মার বিন ইয়াসেরের জননী। তিনি আবু হুযাইফা বিন মুগিরা মখজুমির দাসী ছিলেন।

বিবাহ : তাঁর বিবাহ হয় ইয়াসির আবসির সঙ্গে; যিনি ছিলেন আবু হুযাইফার হলিফ; হযরত আম্মার (রাযিঃ)-এর জন্ম হলে আবু হুযাইফা তাঁকে আযাদ করে দেন।

(ইসাবা, ৮ম খণ্ড, পৃঃ ১৪৪; ইসতিয়াব, ২য় খণ্ড, পৃঃ ৭৫৯)

ইসলাম গ্রহণ : তাঁর বয়স যখন বার্বাক্যের কোঠায় তখনই মক্কায় ইসলামের আহ্বান প্রচারিত হয়। ইসলামের আহ্বানে হযরত সুমায়্যা (রাযিঃ) ইয়াসির (রাযিঃ) এবং আম্মার (রাযিঃ) তিনজনই সাড়া দেন। ইতিহাসে উল্লেখ আছে, হযরত সুমায়্যা ইসলামে দীক্ষা গ্রহণকারীদের মধ্যে সপ্তম ছিলেন। কিছুদিন স্বস্তিতে থাকবার পর কুরাইশদের নিপীড়ন— নির্যাতন শুরু হয়ে যায় এবং ক্রমে ক্রমে সেই অত্যাচার বাড়তে থাকে আরো; এবং যে মুসলমানের উপর যে কুরাইশ কাফির অধিকার বিস্তৃত করতো, সে-ই তার চরম নির্যাতনের শিকার হত। হযরত সুমায়্যা (রাযিঃ)কে মুগিরার পরিবার শিরক করতে বাধ্য করে। কিন্তু তিনি তাঁর বিশ্বাসের উপর অটল-অবিচল থাকেন। সেই অবিচলতার পরিণামে কুরাইশের লোকেরা তাঁকে লোহার পোশাক পরিয়ে উত্তপ্ত মধ্য দুপুরের প্রচণ্ড রৌদ্রালোকে দাঁড় করিয়ে দিতো। কিন্তু হযরত সুমায়্যা (রাযিঃ)-এর প্রগাঢ় বিশ্বাস আর সুদৃঢ় প্রত্যয়ের সামনে সেই আগুনের গোলক ঠাণ্ডা হয়ে যেতো। মহানবী সাল্লাল্লাহু আলাইহি ওয়াসাল্লাম সেই পথ দিয়ে যাবার সময় এই করুণ—নির্মম দুঃসহ অবস্থা দেখে বলতেন, ইয়াসিরের বংশধররা ধৈর্য ধরো এর বিনিময়ে তোমাদের জন্য পরবর্তী জগতে জান্নাত বরাদ্দ আছে।

মৃত্যু : সারাদিন এই দুঃসহ নির্যাতনের পর সন্ধ্যায় অব্যাহতি মিলতো; একবার সন্ধ্যায় ঘরে এলে আবু জেহেল তাকে গালাগালি শুরু করে দেয়; এবং তারপর এক পর্যায়ে আবু জেহেলের রাগ এমন তীব্র হয় যে, সঙ্গে সঙ্গে তার প্রতি বর্ষা নিক্ষেপ করেন— আর সেই বর্ষা বিদ্রূপ হওয়ার সাথে সাথেই তিনি মৃত্যুর কোলে ঢলে পড়েন। ইন্না লিল্লাহে ওয়া ইন্না ইলাইহি রাজেউন।

নিজের মায়ের এই মর্মান্তিক মৃত্যুতে হযরত আম্মার (রাযিঃ) সীমাহীন মর্মান্বিত হন; মহানবী সাল্লাল্লাহু আলাইহি ওয়াসাল্লামকে এসে বললেনঃ এখন ধৈর্যের সীমা ছাড়িয়ে

গেছে; মহানবী সাল্লাল্লাহু আলাইহি ওয়াসাল্লাম ধৈর্য ধরতে বলেন এবং বলেনঃ ۞ আল্লাহ ইয়াসির-বংশকে জাহান্নাম থেকে বাঁচাও। এই ঘটনা হিজরতের আগের। ۞ সেইদিক থেকে হযরত সুমায়্যা (রাযিঃ) ইসলামের সর্বপ্রথম শহীদ।

(ইসতিয়াব, ২য় খণ্ড, পৃঃ ৭৩০,

বদরের যুদ্ধে যখন আবু জেহেল মারা যায়, তখন মহানবী সাল্লাল্লাহু আলাইহি ওয়াসাল্লাম হযরত আন্নার (রাযিঃ)কে বলেনঃ দেখ তোমার মায়ের হত্যাকারীর বিচার আল্লাহ করে দিয়েছেন। (ইসাবা, ৮ম খণ্ড, পৃঃ ১১৪- ইবনে সা'আদ থেকে উদ্ধৃত)

হযরত উম্মে সুলাইম (রাযিঃ)

নাম ও বংশ পরিচয় : সহলা অথবা রমলা ছিল তাঁর নাম; উম্মে সুলাইন তাঁর উপনাম, গমিছা এবং রমিছা তাঁর উপাধি। তাঁর বংশ তালিকা এরকমঃ উম্মে সুলাইম বিনতে মিলহান বিন খালিদ বিন আদি বিন নজ্জার। তাঁর মাতার নাম মলিকা বিনতে মালেক বিন আদি বিন যায়দ। হযরত উম্মে সুলাইম সালমা বিনতে যায়েদের নাতনি ছিলেন। আর সালমা ছিলেন রাসূলুল্লাহ সাল্লাল্লাহু আলাইহি ওয়াসাল্লাম-এর খালা। কারণ সালমা আবদুল মুত্তালিবের মাতা ছিলেন। (আল-ইসাবা ফি আহওয়ালিস ছাহাবা, ৮ম খণ্ড, পৃঃ ২৪৪)

বিবাহ : মালেক বিন নজরের সঙ্গে তার প্রথম বিয়ে হয়।

ইসলাম গ্রহণ : মদীনায়ে ইসলামের প্রারম্ভকালে তিনি মুসলমান হন। মালেক (অর্থাৎ তার স্বামী) যেহেতু তাঁর পুরনো প্রথায় স্থির থাকতে চাইতো-আর উম্মে সুলাইম তাকে সর্বদা ধর্ম পরিবর্তনের কথা বলতেন। ফলে দু'জনের সম্পর্কে অসুবিধা এবং সমস্যা সৃষ্টি হয় এবং পরিণামে মালেক অসন্তুষ্ট হয়ে সিরিয়া চলে যায়। সিরিয়াতেই মালেকের মৃত্যু হয়। একই গোত্রের আবু তালহা এরপর তাঁকে বিয়ের প্রস্তাব করেন; কিন্তু উম্মে সুলাইম (রাযিঃ)-এর সেই একই কথা- আবু তালহাও অমুসলিম ছিলেন, এজন্যে উম্মে সুলাইম (রাযিঃ) রাজি হননি।

কিছুদিন চিন্তাভাবনা করে তালহা ইসলাম গ্রহণের কথা ঘোষণা করেন এবং উম্মে সুলাইম (রাযিঃ)-এর নিকট উপস্থিত হয়ে কালেমা পড়েন। হযরত উম্মে সুলাইম (রাযিঃ) আনাস (রাযিঃ)কে বললেনঃ এবার তোমরা আবু তালহাকে আমার সঙ্গে বিয়ে পড়িয়ে দাও। (ইসাবা, তাবাকাত-ই-ইবনে সা'আদ থেকে উদ্ধৃত)

বিয়ের মোহর নেননি, বলেছিলেন 'আমার মোহর হচ্ছে ইসলাম।' হযরত আনাস (রাযিঃ) বলতেনঃ এটা খুবই আশ্চর্যজনক ও অপূর্ব মোহর ছিল।

সাধারণ অবস্থা : বিয়ের পরে হযরত আবু তালহা (রাযিঃ) বাইয়াতে আকাব্য অংশগ্রহণ করেন এবং কয়েক মাস পর হযরত রাসূলে কারীম সাল্লাল্লাহু আলাইহি ওয়াসাল্লাম মদীনায়ে চলে যান। হযরত উম্মে সুলাইম (রাযিঃ) নিজের পুত্র হযরত আনাস (রাযিঃ)কে নিয়ে মহানবী সাল্লাল্লাহু আলাইহি ওয়াসাল্লাম-এর কাছে আসেন

এবং বলেন আনাসকে আপনার খিদমতের জন্যে পেশ করলাম, এ আমার ছেলে, আপনি তার জন্যে দু'আ করুন। মহানবী সাল্লাল্লাহু আলাইহি ওয়াসাল্লাম দু'আ করেন।

(সহীহ মুসলিম, ২য় খণ্ড, পৃঃ ৩৫২, সহীহ বুখারী, ২য় খণ্ড, পৃঃ ২৪৪)

এই সময়ে মহানবী সাল্লাল্লাহু আলাইহি ওয়াসাল্লাম আনসার এবং মুহাজিরদের মধ্যে ভ্রাতৃত্ব-বন্ধন স্থাপন করেন এবং মুয়খাতের সেই স্মরণীয় মজলিস তাঁর ঘরেই অনুষ্ঠিত হয়।

(বুখারী শরীফ)

যুদ্ধসমূহে উম্মে সুলাইম (রাযিঃ) অত্যন্ত আগ্রহ ও দৃঢ় আবেগের সঙ্গে অংশগ্রহণ করেন-সহীহ মুসলিম শরীফে আছে-

كَانَ رَسُولُ اللَّهِ ﷺ يَغْزُو بِأَمِّ سَلِيمٍ وَنِسْوَةٍ مِنَ الْأَنْصَارِ مَعَهُ إِذَا غَزَا
فَيَسْقِيْنِ الْمَاءَ وَيَدَاوِيْنَ الْجَرْحَى

অর্থাৎ, মহানবী সাল্লাল্লাহু আলাইহি ওয়াসাল্লাম হযরত উম্মে সুলাইম (রাযিঃ) এবং আনসারের কয়েকজন মহিলাকে যুদ্ধসমূহে সঙ্গে রাখতেন- যারা লোকদেরকে পানি দিতো এবং আহত ব্যক্তিদের ব্যান্ডেজ বেঁধে দিতো অর্থাৎ সেবা-যত্ন নিতো।

উল্লেখ যুদ্ধে যখন মুসলমানদের সুদৃঢ় অবস্থান নড়ে যায়, তখন তিনি খুবই তীব্র একাগ্রতায় কাজ করছিলেন। সহীহ বুখারীতে হযরত আনাস (রাযিঃ) থেকে বর্ণিত আমি হযরত আয়েশা (রাযিঃ), হযরত উম্মে সুলাইম (রাযিঃ)কে দেখেছি যে, তাঁরা মশক ভরে ভরে পানি নিচ্ছিলেন এবং আহতদের পানি পান করচ্ছিলেন। মশক যদি খালি হয়ে যেতো, তা আবার তারা ভরে নিয়ে আসতেন।

(সহীহ বুখারী, কিতাবুল মাগাজী, ২য় খণ্ড, পৃঃ ৫৮১)

৫ম হিজরীতে মহানবী সাল্লাল্লাহু আলাইহি ওয়াসাল্লাম হযরত যয়নব (রাযিঃ)কে বিয়ে করেন। তখন হযরত উম্মে সুলাইম (রাযিঃ) একটি পাত্রে মালাই তৈরী করে আনাসের মাধ্যমে পাঠান এবং বললেন যে, মহানবী সাল্লাল্লাহু আলাইহি ওয়াসাল্লামকে এই নগণ্য উপহার গ্রহণ করতে বলবে।

(সহীহ মুসলিম, ১ম খণ্ড, পৃঃ ৫৫০)

৭ম হিজরীতে খায়বরের যুদ্ধ হয়। এই যুদ্ধে হযরত উম্মে সুলাইম অংশগ্রহণ করেন। মহানবী সাল্লাল্লাহু আলাইহি ওয়াসাল্লাম হযরত সুফিয়া (রাযিঃ)কে বিয়ে করেন। হযরত সুফিয়া (রাযিঃ)কে উম্মে সুলাইম সাজিয়েছিলেন। (সহীহ বুখারী, ২য় খণ্ড, পৃঃ ৫৮১) হোনাইন যুদ্ধে একটি খঞ্জর ছিল তাঁর হাতে। আবু তালহা উম্মে সুলাইম (রাযিঃ)-এর হাতে খঞ্জর দেখে মহানবী সাল্লাল্লাহু আলাইহি ওয়াসাল্লামকে গিয়ে বলল। মহানবী সাল্লাল্লাহু আলাইহি ওয়াসাল্লাম উম্মে সুলাইম (রাযিঃ)কে বলল, কি করবে এটি দিয়ে? তিনি বললেনঃ কোন মুশরিক কাছে এলে ঢুকিয়ে দেবো তার পেটে। মহানবী সাল্লাল্লাহু আলাইহি ওয়াসাল্লাম তাঁর কথা শুনে স্মিত হাসলেন, হযরত উম্মে সুলাইম (রাযিঃ) বললেন, নবীজী! মক্কার যেসব লোক ফেরারী হয়ে গেছে তাদেরকে হত্যা করবার

নির্দেশ দিন। মহানবী সাল্লাল্লাহু আলাইহি ওয়াসাল্লাম বললেন, ‘আল্লাহ নিজেই তাদের ব্যবস্থা সম্পূর্ণ করেছেন। (সহীহ মুসলিম, ১ম খণ্ড, পৃঃ ৫৫০)

মৃত্যু : হযরত উম্মে সুলাইম (রাযিঃ)-এর মৃত্যুর মাস এবং বছর জানা যায়নি। তবে মনে হয় তিনি খুলাফায়ে রাশেদীনের যুগের প্রথম দিকে মৃত্যুবরণ করেন।

সন্তান-সন্ততি : ইতোপূর্বে বর্ণিত হয়েছে, তিনি দুটো বিয়ে করেছিলেন; প্রথম স্বামী থেকে হযরত আনাস (রাযিঃ)-এর জন্ম হয় আর আবু তালহা (রাযিঃ)-এর তরফ থেকে দু’টো ছেলে হয়ঃ আবু উমায়ের ও আবদুল্লাহ। আবু উমায়ের ছোট বয়সে মারা যায়, আর আবদুল্লাহ থেকে বংশ প্রবাহিত হয়।

গুণাবলী ও বৈশিষ্ট্য : হযরত উম্মে সুলাইম (রাযিঃ)-এর সূত্রে কয়েকটি হাদীছ বর্ণিত আছে। সেই হাদীছ আনাস (রাযিঃ), হযরত আবদুল্লাহ বিন আব্বাস (রাযিঃ), হযরত য়ায়েদ বিন সাবিত (রাযিঃ), আবু সালমা এবং আমার বিন আসেম- তাঁর কাছ থেকে বর্ণনা করেছেন। লোকেরা তাঁর থেকে মাসায়িল জিজ্ঞাসা করতো। হযরত আবদুল্লাহ বিন আব্বাস এবং হযরত য়ায়েদ বিন সাবিতের মধ্যে একটি মাসআলায় বিতর্ক হয়, তখন তারা উম্মে সুলাইম (রাযিঃ)কে বিচারক হিসেবে মেনে নেন।

(সহীহ মুসলিম, ১ম খণ্ড, পৃঃ ৫৪৬)

মাসআলা জিজ্ঞেস করবার ক্ষেত্রে তাঁর কোনো লজ্জা ছিল না।

(সহীহ মুসলিম, ২য় খণ্ড, পৃঃ ১০৩)

একবার মহানবী সাল্লাল্লাহু আলাইহি ওয়াসাল্লাম-এর কাছে এলেন এবং বললেন, নবীজী! আল্লাহ তা‘আলা সত্য কথার ক্ষেত্রে লজ্জা করেন না- স্বপ্নের কারণে মেয়েদের উপর গোসল ফরয কিনা বলবেন কি?

উম্মুল মু‘মেনীন হযরত উম্মে সালমা (রাযিঃ) এই প্রশ্ন শুনছিলেন, অকস্মাৎ হেসে ফেললেন। বলল, উম্মে সুলাইম! তুমি মেয়েদের খুব লজ্জিত করলে- আচ্ছা বল তো, মেয়েদের কখনো আবার তা হয় নাকি? মহানবী সাল্লাল্লাহু আলাইহি ওয়াসাল্লাম বললেনঃ কেন হবে না? তা না হলে বাচ্চারা মেয়েদের অবিকল আকৃতির হয় কেন?

(মুসনাদে আহমাদ, ৬ষ্ঠ খণ্ড, পৃঃ ৪৩০ ও ৪৩১/মুসনাদে আহমাদ, ৬ষ্ঠ খণ্ড, পৃঃ ৩০৬, ৬৯২, ৩৭৬)

চরিত্র-বৈশিষ্ট্য : হযরত উম্মে সুলাইম (রাযিঃ) অনেক উন্নত চরিত্রগুণ ও বৈশিষ্ট্যের অধিকারী ছিলেন। তাঁর ঈমানের তেজ ছিল এই রকম যে, প্রথম স্বামী থেকে শুধুমাত্র ইসলাম গ্রহণে অনিচ্ছার কারণে তিনি আলাদা হয়ে যান। হযরত আবু তালহা (রাযিঃ) প্রস্তাব দিলে তা ফিরে দেন এজন্যে যে, আবু তালহা মুশরিক ছিলেন। এই ক্ষেত্রে তিনি আবু তালহাকে যে ভাবে ইসলামের আমন্ত্রণ জানান, তা স্মরণীয়। (ইসাবা, ৮ম খণ্ড, পৃঃ ৩৪৩) ‘উম্মে সুলাইম (রাযিঃ) বললেনঃ আবু তালহা! তুমি জান যে তোমার মাবুদ মৃত্তিকা থেকে তৈরী? তিনি বললেন- হ্যাঁ জানি, উম্মে সুলাইম বললেন, তা যদি জেনেই থাক তবে বৃক্ষ পল্লবের নিরর্থ পূজোতে তোমার অরুচি হয় না কেন?’

আবু তালহা'র উপর এই আলাপের এমন প্রভাব পড়ে যে, সঙ্গে সঙ্গেই তিনি ইসলামে দীক্ষিত হন।

মহানবী সাল্লাল্লাহু আলাইহি ওয়াসাল্লামকে উম্মে সুলাইম সীমাহীন ভালবাসতেন। প্রায়ই মহানবী সাল্লাল্লাহু আলাইহি ওয়াসাল্লাম তাঁর ঘরে যেতেন এবং দুপুরে নিদ্রাসুখ গ্রহণ করতেন। মহানবী সাল্লাল্লাহু আলাইহি ওয়াসাল্লাম ঘুমোবার পর বিছানা ছেড়ে উঠলে উম্মে সুলাইম (রাযিঃ) মহানবী সাল্লাল্লাহু আলাইহি ওয়াসাল্লাম-এর ঘাম এবং ঝরে পড়া চুল একটি পাত্রে জমা করে রাখতেন। (সহীহ বুখারী, ২য় খণ্ড, পৃঃ ৯২৯)

একবার মহানবী সাল্লাল্লাহু আলাইহি ওয়াসাল্লাম তাঁর মশকে মুখ দিয়ে পানি পান করেন- উম্মে সুলাইম (রাযিঃ) উঠে সেই মশকের মুখ কেটে নিজের কাছে রেখে দেন এজন্যে যে, মহানবী সাল্লাল্লাহু আলাইহি ওয়াসাল্লাম-এর পবিত্র ওষ্ঠের স্পর্শ লেগেছে তাতে। (মুসনাদে আহমাদ, ৬ষ্ঠ খণ্ড, পৃঃ ৩৭৬)

মহানবী সাল্লাল্লাহু আলাইহি ওয়াসাল্লামও তাঁকে খুবই ভালবাসতেন। সহীহ মুসলিমে আছে। 'মহানবী সাল্লাল্লাহু আলাইহি ওয়াসাল্লাম পবিত্র পত্নীদের ছাড়া অন্য কোন রমণী গৃহে যেতেন না। কিন্তু উম্মে সুলাইম (রাযিঃ) ছিল তাঁর ব্যতিক্রম। লোকেরা জিজ্ঞেস করলে মহানবী সাল্লাল্লাহু আলাইহি ওয়াসাল্লাম বলেন, তাঁর প্রতি আমার করুণা হয়। তাঁর ভাই হারাম আমার সঙ্গে থেকে শহীদ হয়েছেন। এ থেকে বোঝা যায় যে, তিনি অধিকাংশ সময়ে হযরত উম্মে সুলাইম (রাযিঃ)-এর ঘরে যেতেন।

(সহীহ মুসলিম, ২য় খণ্ড, পৃঃ ৩৪১)

হযরত উম্মে সুলাইম (রাযিঃ) খুবই সহিষ্ণু, ধৈর্যশীল এবং সুশান্ত মেজাজের মহিলা ছিলেন। আবু উমাইর তাঁর খুবই স্নেহভাজন, খুবই মমতাময় ছেলে ছিল। কিন্তু সেই ছেলের যখন মৃত্যু হল, উম্মে সুলাইম অবিচলিত ধৈর্য-সহিষ্ণুতার পরিচয় দেন। পরিবারের সবাইকে বলে দেন যে, আবু উমাইরের মৃত্যুর খবর আবু তালহা (রাযিঃ)কে যেন না জানানো হয়। রাতে আবু তালহা (রাযিঃ) এলেন। আবু তালহাকে তিনি রাতের খাবার খাওয়ালেন এবং খুবই প্রশান্তভাবে বিছানায় শয়্যাগ্রহণ করেন। কিছু রাত অতিক্রান্ত হবার পর উম্মে সুলাইম (রাযিঃ) ঘটনার কথা উল্লেখ করেন; বললেন, যদি তোমাকে কেউ কোন দ্রব্য ধার হিসেবে দেয় এবং পরে তা আবার ফেরৎ নিয়ে যেতে চায়, তাহলে তুমি কি তা দিতে অস্বীকার করবে? আবু তালহা (রাযিঃ) বললেনঃ না কখনোই নয়। উম্মে সুলাইম (রাযিঃ) বললেন, কাজেই এখন তোমার পুত্রের বিষয়ে ধৈর্যধারণ আবশ্যিক। আবু তালহা এ কথা শুনে রাগ করল, প্রথমেই বলা হলনা কেন। সকালে মহানবী সাল্লাল্লাহু আলাইহি ওয়াসাল্লাম-এর কাছে গেল এবং পুরো ঘটনা বর্ণনা করেন। তিনি বলল, আল্লাহ তা'আলা এই রজনীতে তোমাদের দু'জনকে খুব বরকত দান করেছেন। (সহীহ মুসলিম, ২য় খণ্ড, পৃঃ ৩৪২)

একইভাবে একবার আবু তালহা (রাযিঃ) এল এবং বলল; মহানবী সাল্লাল্লাহু আলাইহি ওয়াসাল্লাম ক্ষুধার্ত, কিছু পাঠিয়ে দাও। হযরত উম্মে সুলাইম (রাযিঃ) কিছু রুটি একটি

কাপড়ের মধ্যে মুড়ে নিয়ে হযরত আনাস (রাযিঃ)কে দিলেন মহানবী সাল্লাল্লাহু আলাইহি ওয়াসাল্লাম-এর কাছে নিয়ে যাবার জন্যে মহানবী সাল্লাল্লাহু আলাইহি ওয়াসাল্লাম মসজিদে ছিলেন এবং সাহাবীরাও ঘিরে বসে আছেন। হযরত আনাস (রাযিঃ)কে দেখে বললেন, আবু তালহা তোমাকে পাঠিয়েছে? তিনি বললেন জ্বি হ্যাঁ। মহানবী সাল্লাল্লাহু আলাইহি ওয়াসাল্লাম বলল, খাবার জন্যে আনাস (রাযিঃ) বললেন, হ্যাঁ। মহানবী সাল্লাল্লাহু আলাইহি ওয়াসাল্লাম সকল সাহাবাদের নিয়ে আবু তালহার ঘরে গেলেন; আবু তালহা (রাযিঃ) ভয় পেয়ে গেলেন এবং উম্মে সুলাইম (রাযিঃ)কে বললেন, এখন কি করা যায়? খাবার তো খুবই কম-আর মহানবী সাল্লাল্লাহু আলাইহি ওয়াসাল্লাম-এর সাথে তো অনেক সাহাবী। উম্মে সুলাইম (রাযিঃ) অত্যন্ত শান্তভাবে বললেন, এই বিষয়ে আল্লাহ এবং তাঁর নবী সবচেয়ে বেশী জানেন। মহানবী সাল্লাল্লাহু আলাইহি ওয়াসাল্লাম ভিতরে এলেন, হযরত উম্মে সুলাইম (রাযিঃ) সেই আগের একই রুটি ও তরকারী মহানবী সাল্লাল্লাহু আলাইহি ওয়াসাল্লাম-এর সামনে রেখে দেন। আল্লাহর কি ইচ্ছে, তাতে খুব বরকত হল এবং সবাই খেয়ে তৃপ্ত হয়ে গেলেন।

(সহীহ বুখারী, ২য় খণ্ড, পৃঃ ৮১০)

হযরত উম্মে সুলাইম (রাযিঃ)-এর চরিত্র বৈশিষ্ট্য এবং জীবন কীর্তি অনেক। মহানবী সাল্লাল্লাহু আলাইহি ওয়াসাল্লাম বলেছেনঃ আমি বেহেশতে গেলাম সেখানে পদশব্দ শুনতে পেয়ে জিজ্ঞেস করলামঃ কে? লোকেরা বললেন, আনাস (রাযিঃ)-এর মা গমিছা বিনতে মিলহান (অর্থাৎ উম্মে সুলাইম)।

(সহীহ মুসলিম, ২য় খণ্ড, পৃঃ ৩৪২)

হযরত উম্মে উমারা (রাযিঃ)

নাম ও বংশ পরিচয় : তাঁর নাম ছিল নসিবা; উপনামঃ উম্মে উমারা। তিনি খায়রাজ গোত্রের নজ্জার বংশের মহিলা ছিলেন। বংশ তালিকা এরকমঃ উম্মে উমারা বিনতে কা'ব বিন আমার বিন আওফ বিন মবযুল বিন আমার বিন গানম বিন মায়েন বিন নজ্জার।

বিবাহ : প্রথম বিয়ে যায়েদ বিন আসেম-এর সঙ্গে; তারপর তিনি আরবা বিন আমরের সঙ্গে দাম্পত্য সূত্রে আবদ্ধ হন।

ইসলাম গ্রহণ : আরবার সাথেই বাইয়াতে আকাবায় অংশগ্রহণ করেন। নবীচরিত মূলক ইতিহাস গ্রন্থসমূহে উল্লিখিত আছে যে, বাইয়াতে আকাবায় ৭৩ জন পুরুষ এবং দুজন মহিলা অংশগ্রহণ করেন। সেই দু'জন সৌভাগ্যবতী মহিলার একজন হযরত উম্মে উমারা।

যুদ্ধ : তিনি ওহুদ যুদ্ধে অংশগ্রহণ করেন এবং খুবই বীরত্বের সঙ্গে লড়াই করেন। যতক্ষণ পর্যন্ত মুসলমানরা বিজয়ী ছিল, তিনি তাঁদের মশক ভরে ভরে পানি খাওয়ান। কিন্তু মুসলমানরা যখন পরাভূত হল তিনি মহানবী সাল্লাল্লাহু আলাইহি ওয়াসাল্লাম-এর

কাছে চলে যান এবং মহানবী সাল্লাল্লাহু আলাইহি ওয়াসাল্লামকে আড়াল করে করে দন্ডায়মান হন। কাফিররা যখন মহানবী সাল্লাল্লাহু আলাইহি ওয়াসাল্লাম-এর উপর ঝাঁপিয়ে পড়তো তিনি মহানবী সাল্লাল্লাহু আলাইহি ওয়াসাল্লামকে তাদের তীর তরবারি থেকে রক্ষা করতেন। মহানবী সাল্লাল্লাহু আলাইহি ওয়াসাল্লাম নিজেই বলেছেনঃ আমি তাঁকে ওহুদের যুদ্ধে ডানে-বামে সমান লড়তে দেখেছি। বিন কুমিয়া যখন আক্রমণাত্মক ভঙ্গিতে মহানবী সাল্লাল্লাহু আলাইহি ওয়াসাল্লাম-এর কাছে পৌঁছে গেল, হযরত উম্মে উমারা এগিয়ে গিয়ে তার প্রতিরোধ করেন। প্রতিরোধ করতে গিয়ে নিজের কাঁধে আঘাত লাগে এবং তিনি গর্তে পড়ে যান। ইবনে কুমিয়াকে তিনিও তরবারির আঘাত করেন, কিন্তু ইবনে কুমিয়া লৌহ পোশাক পরিহিত থাকায় তাঁর তরবারি কাজ করেনি। (ইবনে

হিশাব, পৃঃ ৮৫)

কিছু কিছু বর্ণনায় আছে যে, তিনি একজন কাফিরকে হত্যা করেছিলেন। ওহুদ যুদ্ধের পর উম্মে উমারা বাইয়াতুর রিদওয়ানে অংশ নেন, খায়বরে অংশ নেন এবং মক্কা বিজয়েও তাঁর অংশগ্রহণ ছিল।

হযরত আবু বকর (রাযিঃ)-এর সময় ইমামার যুদ্ধ সংঘটিত হয়; নবুয়্যতের দাবীদার মুসায়লামা কাযাবাবের সঙ্গে সংঘর্ষ হয়। হযরত উম্মে উমারা (রাযিঃ) নিজের এক ছেলে হাবিবকে নিয়ে হযরত খালেদ (রাযিঃ)-এর সঙ্গে রওনা হয়ে যান এবং মুসায়লামা যখন তার সন্তানকে হত্যা করে ফেলে, তিনি মানত করেন, ‘হয় মুসায়লামার মৃত্যু হবে, অথবা নিজে গিয়ে জীবন দিয়ে দেবেন’ এটি বলে তিনি তলোয়ার ধারণ করেন এবং যুদ্ধাঙ্গনের দিকে অগ্রসর হন এবং এতো তীব্র বীরত্বের সঙ্গে লড়াই করেন যে, ১২৭ জনকে আঘাত করতে সক্ষম হন এবং নিজের একটি হাত কেটে যায়। এই যুদ্ধে মুসায়লামাও নিহত হয়।

মৃত্যু : এরপর তিনি আর কতদিন বেঁচে ছিলেন তা জানা যায়নি।

সন্তান-সন্ততি : তাঁর চার সন্তান ছিল (প্রথম স্বামী থেকে) হাবিব, আবদুল্লাহ, (দ্বিতীয় স্বামী থেকে) তামীম, খাওলা।

মর্যাদা ও মহত্ত্ব : তিনি কতিপয় হাদীছ বর্ণনা করেন। যেগুলো উব্বাদ বিন তামীম (পৌত্র) লায়লা, ইকরামা, হারিস, বিন কা’ব এবং উম্মে সা’আদ বিনতে সাআদ বিন রুবাই থেকে বর্ণিত আছে।

চরিত্র-বৈশিষ্ট্য : মহানবী সাল্লাল্লাহু আলাইহি ওয়াসাল্লাম এর প্রতি তাঁর অনুরাগ কতো প্রবল ছিল, তাতো ওহুদের যুদ্ধেই আমরা দেখেছি। এ ছাড়াও আরো ছোট ছোট ঘটনা আছে। একবার মহানবী সাল্লাল্লাহু আলাইহি ওয়াসাল্লাম তাঁর ঘরে প্রবেশ করলে তিনি খাবার নিয়ে আসেন। মহানবী সাল্লাল্লাহু আলাইহি ওয়াসাল্লাম বললেন, তুমিও খাও।

তিনি বললেনঃ আমি তো রোযা আছি। মহানবী সাল্লাল্লাহু আলাইহি ওয়াসাল্লাম খেলেন এবং বললেনঃ রোযাদারের নিকট কিছু খাওয়া হলে ফেরেশতারা তাঁর জন্যে দু'আ করতে থাকে।

(মুসনাদ, ষষ্ঠ খণ্ড, পৃঃ ৩৬৫)

উপরে বর্ণিত ঘটনাবলী থেকে ইসলামের প্রতি তাঁর গভীর নিষ্ঠার পরিচয় পাওয়া যায়।

হযরত উম্মে আতিয়া (রাযিঃ)

নাম ও বংশ পরিচয় : তাঁর নাম ছিলঃ নসীবা বিনতে হারিছ; তিনি ছিলেন আনসার গোত্রের আবু মালিক বিন নজ্জার বংশের মেয়ে।

(তাবাকাত-ই-ইবনে সা'আদ, ৮ম খণ্ড, পৃঃ ৩২১, ৩২২)

ইসলাম গ্রহণ : হিজরতের পূর্বেই ইসলাম গ্রহণ করেন। মহানবী সাল্লাল্লাহু আলাইহি ওয়াসাল্লাম মদীনা তশরীফ নিলে আনসারী মহিলাদেরকে বাইয়াতের জন্যে একটি গৃহে একত্রিত করা হয় এবং মহানবী সাল্লাল্লাহু আলাইহি ওয়াসাল্লাম হযরত উমর (রাযিঃ)কে দরোজায় পাঠান এই অঙ্গীকার গ্রহণ করার জন্য যে, তারা এরপর শিরক করবে না, চুরি এবং ব্যভিচার থেকে বিরত থাকবে, সন্তান হত্যা করবে না। কারো সম্পর্কে মিথ্যে অপবাদ রটাবে না, ভাল কথা অগ্রাহ্য করবে না। হযরত উমর (রাযিঃ)-এর অঙ্গীকার সঁবাই গ্রহণ করার পর হযরত উমর (রাযিঃ) নিজের হাত ঘরের ভেতরে প্রবেশ করান এবং মহিলারাও নিজেদের হাত বাইরে বের করে- এতেই বাইয়াত হয়ে যায়। এরপর উম্মে আতিয়া (রাযিঃ) হযরত উমর (রাযিঃ)কে জিজ্ঞেস করেন-ভাল কথা অগ্রাহ্য না করার অর্থ কি? হযরত উমর (রাযিঃ) বলেন, এর অর্থ হচ্ছেঃ মৃত্যুর পর বিলাপধর্মী ক্রন্দন না করা।

(মুসনাদ, ষষ্ঠ খণ্ড, পৃঃ ৪০৯)

যুদ্ধ ও সাধারণ অবস্থা : হযরত উম্মে আতিয়া (রাযিঃ) মহানবী সাল্লাল্লাহু আলাইহি ওয়াসাল্লাম-এর জীবদ্দশায় সাতটি যুদ্ধে অংশগ্রহণ করেন। এসব যুদ্ধে তিনি রুগীদের জন্যে খাদ্য পাক করতেন। তাদের জিনিসপত্র সংরক্ষণ করতেন, অসুস্থদের সেবা এবং আইতদের সেবা যত্ন করতেন।

(সহীহ মুসলিম, ২য় খণ্ড, পৃঃ ১০৫)

৮ম জিরীতে মহানবী সাল্লাল্লাহু আলাইহি ওয়াসাল্লাম-এর কন্যা হযরত যয়নব (রাযিঃ)-এর ইন্তেকাল হয়। হযরত উম্মে আতিয়া এবং আরো কয়েকজন মহিলা তাঁকে গোসল করান। মহানবী সাল্লাল্লাহু আলাইহি ওয়াসাল্লাম তাদেরকে গোসল করানোর পদ্ধতি দেখিয়ে দেন।

খুলাফায়ে রাশেদীনের সময়ে তাঁর একটি ছেলে কোন এক যুদ্ধে অংশগ্রহণ করেছিল। সে অসুস্থ হয়ে বসরা আগমন করে। হযরত উম্মে আতিয়া তখন মদীনায়ে। খবর পেয়ে দ্রুত বসরা চলে যান তিনি, কিন্তু বসরা পৌঁছানোর দু'দিন আগেই তাঁর ছেলে মারা যায়। বসরা এসে তিনি বনু খলফ-এর প্রাসাদে অবস্থান করেন। তৃতীয় দিন তিনি সুগন্ধি চেয়ে নিয়ে শরীরে লাগান এবং বলেনঃ 'স্বামী ছাড়া আর কারো জন্যে তিন দিনের বেশী শোক পালন করা ঠিক নয়।

(সহীহ বুখারী, ১ম খণ্ড, পৃঃ ১৭০)

তারপর বসরাতেই তিনি আলাদাভাবে বসবাস শুরু করেন। (উসুদুল গাবা, ৫ম খণ্ড, পৃঃ ৬০৩)
মৃত্যু : তাঁর মৃত্যুর সাল ও তারিখ জানা যায়নি, তাঁর সন্তান-সন্ততির সংবাদও ইতিহাসে অনুল্লিখিত।

মর্যাদা ও মহত্ত্ব : তিনি কয়েকটি হাদীছ রেওয়ায়াত করেন। তাঁর হাদীছের বর্ণনাকারীরা হলেনঃ হযরত আনাস (রাযিঃ), বিন সিরীন (রাযিঃ), হযরত হাফসা বিনতে সিরীন (রাযিঃ), ইসমাইল বিন আবদুর রহমান, আলী ইবনুল কমর, উম্মে শারাহিল প্রমুখ।

সাহাবা এবং তাবেয়ীন তাঁর কাছ থেকে মুর্দাদের গোসল করানোর পদ্ধতি শিখে নিতেন। (তাহযীব, ১২তম খণ্ড, পৃঃ ৪৫৫, ইসাবা, ৮ম খণ্ড, পৃঃ ২৫৯)

চরিত্র-বৈশিষ্ট্য : মহানবী সাল্লাল্লাহু আলাইহি ওয়াসাল্লামকে তিনি ভালবাসতেন অসাধারণ; আর মহানবী সাল্লাল্লাহু আলাইহি ওয়াসাল্লামও তাঁকে খুব ভালবাসতেন। একবার মহানবী সাল্লাল্লাহু আলাইহি ওয়াসাল্লাম তাঁর নিকট সদকার একটি ছাগল প্রেরণ করেন, তিনি তাঁর গোশত হযরত আয়েশা (রাযিঃ)-এর কাছে পাঠান; মহানবী সাল্লাল্লাহু আলাইহি ওয়াসাল্লাম ঘরে এসে খাবার চাইলে আয়েশা (রাযিঃ) বললেনঃ ঘরে তো কিছুই নেই, তবে নসীবা (রাযিঃ)-এর কাছে আপনি যে ছাগল পাঠিয়েছিল তার গোশত আছে। মহানবী সাল্লাল্লাহু আলাইহি ওয়াসাল্লাম বললেনঃ ঠিক আছে নিয়ে আস। কারণ তা তো আসল অধিকারীর কাছে পৌঁছে গেছে। (সহীহ মুসলিম, ১ম খণ্ড, পৃঃ ৪০১)

মহানবী সাল্লাল্লাহু আলাইহি ওয়াসাল্লাম তো বটেই, এমনকি তাঁর আত্মীয়-পরিজনের সঙ্গেও তার ঘনিষ্ঠতা ছিল প্রগাঢ় ও গভীর। বিন সাদ বর্ণনা করেন, হযরত আলী (রাযিঃ) তাঁর ঘরে দুপুরে বিশ্রাম নিতেন। (ইসাবা, ৮ম খণ্ড, পৃঃ ২৫৯)

মহানবী সাল্লাল্লাহু আলাইহি ওয়াসাল্লাম-এর নির্দেশাবলী অক্ষরে অক্ষরে অনুসরণ করার অভ্যাস ছিল তাঁর। মহানবী সাল্লাল্লাহু আলাইহি ওয়াসাল্লাম বাইয়তের সময় মৃত্যু-উত্তর ক্রন্দন ও শোকবিলাপ নিষেধ করেছিলেন। সারা জীবন এই নির্দেশ তিনি পালন করেন।

হযরত রুবাই বিনতে মুআওয়ায বিন আফরা (রাযিঃ)

নাম ও বংশ পরিচয় : রুবাই তাঁর নাম; তিনি ছিলেন খায়রজ গোত্রের নজ্জার বংশের মেয়ে। বংশ তালিকা এরকমঃ রুবাই বিনতে মুআওয়ায বিন হারিছ বিন সাওয়াদ বিন মালেক বিন গানম বিন মালেক বিন নজ্জার। তাঁর জননীর নামঃ উম্মে তাযাইয়্যুদ, যিনি ছিলেন কায়েস বিন যাউরার মেয়ে। হযরত রুবাই এবং তাঁর সকল ভাই আফরার সন্তান-সন্ততি বলেই প্রসিদ্ধ ছিল। আফরা ছিলেন তাঁদের দাদী।

(তাহযীবুত তাহযীব, ১২তম খণ্ড, পৃঃ ৪১৮)

ইসলাম গ্রহণ : হিজরতের পূর্বেই ইসলাম ধর্মে দীক্ষিত হন।

বিবাহ : আয়াস বিন বকর লাইসীর সঙ্গে তাঁর বিবাহ হয়। মহানবী সাল্লাল্লাহু আলাইহি ওয়াসাল্লাম সকালেই তাঁর ঘরে যান এবং বিছানায় বসে পড়েন। বালিকারা দফ বাজিয়ে বাজিয়ে বদর-শহীদ মুজাহিদদের বিষয়ে গান গাইছিল। এক পর্যায়ে তারা মহানবী সাল্লাল্লাহু আলাইহি ওয়াসাল্লামকে নিয়েও গীত রচনা গাইতে থাকে। তার একটি পংক্তি এরকম :

‘এবং আমাদের মধ্যে এমন নবী আছেন যিনি আগামীকালের কথা জানেন’ মহানবী সাল্লাল্লাহু আলাইহি ওয়াসাল্লাম এটি শুনে বললেন, এটা বলো না যা বলে যাচ্ছিলে তাই বলে যাও।

(সহীহ বুখারী, ২য় খণ্ড, পৃঃ ৫৭০)

সাধারণ অবস্থা : যুদ্ধ বিগ্রহে অংশগ্রহণ করতেন; আহতদের সেবা ও চিকিৎসা করতেন; লোকদের পানি খাওয়াতেন এবং নিহতদের মদীনা প্রেরণ করতেন এবং সৈন্যদের খিদমত করতেন।

(মুসনাদ, ষষ্ঠ খণ্ড, পৃঃ ৩৫৮)

হুদায়বিয়ার যুদ্ধেও ছিলেন তিনি; বাইয়াতে রিদওয়ানের সময়ে তিনিও অঙ্গীকারবদ্ধ হন। হিজরী ৩৫ সালে তিনি স্বামীর কাছ থেকে আলাদা হয়ে যান। শর্ত ছিল এরকমঃ আমার যা কিছু আছে তা-নিয়ে বিচ্ছিন্ন হয়ে যাও। নিজের সবকিছু তাকে দিয়ে দেন তিনি, কেবল একটি জামা ছাড়া। স্বামীর আবার এটিও সহ্য হল না। তাই হযরত উসমান (রাযিঃ)-এর আদালতে নালিশ করেন, এই বলে যে সবকিছু দিয়ে দেয়ার কথা রুবাইয়ের, কিন্তু একটি জামা রেখে দিলো কেন? তাঁর প্রতিশ্রুতি সে রক্ষা করল না কেন? এই হচ্ছে নালিশ। হযরত উসমান (রাযিঃ) রুবাইকে বললেনঃ প্রতিশ্রুতি পালন কর, জামা দিয়ে দাও। আর স্বামীকে বলেনঃ তুমি তাঁর কাছ থেকে জামার রশি পর্যন্ত নিয়ে নিতে পার।

(ইসাবা, ৮ম খণ্ড, পৃঃ ৮০)

মৃত্যু : হযরত রুবাই (রাযিঃ)-এর মৃত্যুর সাল জানা যায়নি।

সন্তান-সন্ততি : হযরত রুবাই (রাযিঃ)-এর সন্তানদের মধ্যে মুহম্মদ খুবই বিখ্যাত।

মর্যাদা ও মহত্ত্ব : হযরত রুবাই (রাযিঃ)-এর থেকে ২১টি হাদীছ বর্ণিত আছে। জ্ঞানের দিক থেকে স্তর ছিল এই রকম যে, হযরত ইবনে আব্বাস (রাযিঃ), হযরত জয়নুল আবেদীন (রাযিঃ) তাঁর কাছ থেকে মাসআলা বুঝে নিতেন। (মুসনাদ, ষষ্ঠ খণ্ড, পৃঃ ৩৫৮) তাঁর বর্ণনাকারীদের মধ্যে অনেক বুজুর্গ ব্যক্তিবর্গ আছেন; যেমন হযরত আয়েশা বিনতে আনাস বিন মালেক, সুলায়মান বিন ইয়াসার, আবু সালমা বিন আবদুর রহমান, নাফে, উবাদা ইবনুল অলিদ, খালিদ বিন যকওয়ান, আবদুল্লাহ বিন আহমেদ বিন আকিল, আবু উবাদা বিন মুহাম্মদ (হযরত আম্মার বিন ইয়াসের-এর পৌত্র) মুহাম্মদ বিন আবদুর রহমান বিন ছওবান।

চরিত্র-বৈশিষ্ট্য : তাঁর ঈমানের আবেগ এ থেকে আন্দায করা যায় যে, একবার আসমা বিনতে মাখরাবা- যিনি ছিলেন আবু রবীয়ার স্ত্রী এবং আতর ব্যবসায়ী, কয়েকজন মহিলা নিয়ে হযরত রুবাই (রাযিঃ)-এর ঘরে এসে উপস্থিত হন এবং নাম-ধাম

জিজ্ঞেস করেন। যেহেতু রুবাইয়ের পিতা বদর যুদ্ধে আবু জেহেলকে হত্যা করেন— সেই সূত্রে আসমা জিজ্ঞেস করেন: ও আচ্ছা, তুমি তাহলে আমাদের সর্দারের হত্যাকারীর কন্যা?

হযরত রুবাই আবু জেহেল সম্পর্কে সর্দার শব্দটি শুনে বিরক্ত হন, সাথে সাথেই জবাব দেন: সর্দার নয়, গোলামের হত্যাকারীর মেয়ে আমি। আসমা একথা শুনে জ্বলে উঠে বললেন তোমার কাছ থেকে আমারও কিছু ক্রয় করা হারাম, কেননা তোমার আতর আতর নয়, দুর্গন্ধ।

(উসদুল গাবা, ৫ম খণ্ড)

তিনি মহানবী সাল্লাল্লাহু আলাইহি ওয়াসাল্লামকে ভালবাসতেন অসাধারণ। মহানবী সাল্লাল্লাহু আলাইহি ওয়াসাল্লাম প্রায়ই তাঁর গৃহে যেতেন।

(মুসনাদ, ষষ্ঠ খণ্ড, পৃঃ ৩৫৮)

একবার মহানবী সাল্লাল্লাহু আলাইহি ওয়াসাল্লাম তাঁর কাছে গেল এবং অযু করার জন্য পানি চাইলেন।

(আবু দাউদ, ১ম খণ্ড, পৃঃ ১৩)

একবার রুবাই তাঁর জন্যে আগুর নিয়ে যান, মহানবী সাল্লাল্লাহু আলাইহি ওয়াসাল্লামও তাঁকে অলংকার উপহার দেন।

(মুসনাদ, ষষ্ঠ খণ্ড, পৃঃ ৩৫৯)

মহানবী সাল্লাল্লাহু আলাইহি ওয়াসাল্লাম দেখতে কেমন ছিল জিজ্ঞেস করলে তিনি একজনকে বলেছিলেন: কেবল এটুকু বুঝে নাও ‘সূর্য উদিত হচ্ছে।’

(উসদুল গাবা, ৫ম খণ্ড, পৃঃ ৪৫২)

হযরত উম্মে হানি (রাযিঃ)

নাম ও বংশ পরিচয় : তাঁর নাম ছিল ফাখতা; উম্মে হানি উপনাম। রাসূলুল্লাহ সাল্লাল্লাহু আলাইহি ওয়াসাল্লাম-এর চাচা আবু তালেবের কন্যা ছিলেন তিনি। মায়ের নাম: ফাতিমা বিনতে আসাদ। এই হিসেবে হযরত আলী (রাযিঃ), হযরত জাফর (রাযিঃ) এবং উম্মে হানি (রাযিঃ) আপন ভাইবোন।

বিবাহ : হুবাইরা বিন আমরের সঙ্গে তাঁর বিবাহ হয়।

ইসলাম গ্রহণ : ৮ম হিজরীতে মক্কা বিজয়ের সময়কালে তিনি ইসলামে দীক্ষিত হন।

মহানবী সাল্লাল্লাহু আলাইহি ওয়াসাল্লাম সেদিন তাঁর ঘরে গোসল করেন এবং চাশতের নামায পড়েন। তিনি নিজের দুজন প্রিয়জনকে আশ্রয় দিয়েছিলেন— মহানবী সাল্লাল্লাহু আলাইহি ওয়াসাল্লামও তাদেরকে করুণা করেন। তাঁর স্বামী মক্কা বিজয়ের সময় পালিয়ে নজরান চলে যায়।

(মুসনাদ, ষষ্ঠ খণ্ড, পৃঃ ৩৪২)

মৃত্যু : তিরমিযী শরীফে বর্ণিত আছে, হযরত আলী (রাযিঃ)-এর মৃত্যুর পর কিছুকাল জীবিত ছিলেন তিনি। আর তাহযীবুত তাহযীব গ্রন্থে আছে: আমীরে মুয়াবিয়ার শাসনামলে তিনি ইন্তেকাল করেন।

সন্তান-সন্ততি : তার সন্তান-সন্ততি হচ্ছে: আমর, হানি (রাযিঃ), ইউসুফ, জাঅদা।

মর্যাদা ও মহত্ত্ব : হযরত উম্মে হানি (রাযিঃ)-এর সুত্রে ৪৬টি হাদীছ বর্ণিত আছে; তাদের বর্ণনাকারী হলেন: জাঅদা ইয়াহইয়া, হারুন, আবু মুররা, আবু সালেহ, হযরত

আবদুল্লাহ বিন আব্বাস, আবদুল্লাহ বিন হারিছ বিন নৌফল বিন আবি লায়লা, মুজাহিদ, উরওয়া, আবদুল্লাহ বিন আইয়াশ, শুঅবা, আতা, কুরাইব, মুহাম্মদ বিন উকবা প্রমুখ।

মহানবী সাল্লাল্লাহু আলাইহি ওয়াসাল্লাম-এর কাছ থেকে কখনো কখনো তিনি মাসআলা জিজ্ঞেস করতেন যা থেকে তাঁর প্রজ্ঞা এবং জ্ঞানের ইঙ্গিত মেলে। একবার এই আয়াতের ভাষ্য জিজ্ঞেস করেন ‘ওয়াতা’তুনা ফী না-দীকুমুল মুনকার।’

(মুসনাদ, ষষ্ঠ খণ্ড, পৃঃ ৩৪১)

চরিত্র-বৈশিষ্ট্য : মহানবী সাল্লাল্লাহু আলাইহি ওয়াসাল্লাম-এর প্রতি তাঁর যে মমত্ব ছিল, তা এ থেকেও বোঝা যায় যে, মহানবী সাল্লাল্লাহু আলাইহি ওয়াসাল্লাম মক্কা বিজয়ের সময়ে তাঁর ঘরে যান এবং শরবত পান করেন- তারপর তা তাঁকে নেন, তিনি বলেনঃ আমি তো রোযা অথচ আপনার গ্রহণকৃত অবশিষ্ট ফেরত দিতেও চাই না। কোন কোন বর্ণনায় আছে মহানবী সাল্লাল্লাহু আলাইহি ওয়াসাল্লাম-এর দেয়া শরবত তিনি পান করে নেন এবং নিজেই তারপর মহানবী সাল্লাল্লাহু আলাইহি ওয়াসাল্লামকে জিজ্ঞেস করেনঃ আমি তো রোযা রেখেছি- মহানবী সাল্লাল্লাহু আলাইহি ওয়াসাল্লাম বলেনঃ যদি কোন রমযানের কাযা রোযা হয়, তাহলে অন্য দিন পূরণ করে নিও; আর সেরকম না হয়ে যদি নফল রোযা হয়; তাহলে তা কাযা করা না করা তোমার ইচ্ছা।

(প্রাণ্ডক্ত, পৃঃ ৩৪১, ৩৪২, ৩৪৩, ৩৪৪)

মহানবী সাল্লাল্লাহু আলাইহি ওয়াসাল্লামও তাঁকে খুব ভালবাসতেন। একবার তিনি উম্মে হানিকে বলেনঃ উম্মে হানি! ছাগল নিয়ে নাও- এটি খুব কল্যাণ ও বরকতের জিনিস।

(মুসনাদ, ষষ্ঠ খণ্ড, পৃঃ ৩৪৪)

একবার তিনি মহানবী সাল্লাল্লাহু আলাইহি ওয়াসাল্লামকে জিজ্ঞেস করেন, এখন তো আমি বৃদ্ধা হয়ে গেছি- চলাফেরায় দুর্বলতা দেখা দিয়েছে। কাজেই এমন কোন আমলের কথা আমাকে বলে দিন যা বসে বসে করা যায়। মহানবী সাল্লাল্লাহু আলাইহি ওয়াসাল্লাম তাঁকে একটি অযীফা বলেনঃ ‘সুবহানাল্লাহঃ একশবার’ ‘আলহামুদুলিল্লাহঃ একশবার’, ‘আল্লাহু আকবরঃ একশবার এবং ‘লা ইলাহা ইল্লাল্লাহঃ একশবার পড়ো।

(মুসনাদ, ষষ্ঠ খণ্ড, পৃঃ ৩৪৪)

হযরত ফাতিমা বিনতে খাতাব (রাযিঃ)

নাম ও বংশ পরিচয় : তাঁর নাম ছিল ফাতেমা; উম্মে জমিল তাঁর উপনাম। তিনি হযরত উমর (রাযিঃ)-এর সহোদরা ছিল।

বিবাহ : হযরত সায়ীদ বিন যায়েদের সঙ্গে তাঁর বিবাহ হয়।

ইসলাম গ্রহণ : স্বামীর সঙ্গেই তিনি ইসলামে দীক্ষিত হন- এটি ইসলামের প্রথম দিককার ঘটনা। কিছুদিন পর তাঁর ভাই অর্থীৎ হযরত উমর (রাযিঃ) মুসলমান হন

এবং তাঁর কারণেই হন। কাহিনীটি হযরত উমর (রাযিঃ) নিজেই বর্ণনা করেছেনঃ হযরত উমর (রাযিঃ) হযরত হামযা (রাযিঃ)-এর মুসলমান হবার পর মহানবী সাল্লাল্লাহু আলাইহি ওয়াসাল্লাম-এর কাছে যাচ্ছিলেন। রাস্তায় একজন মখযুমী সাহাবীর সঙ্গে তাঁর সাক্ষাৎ হয়। জিজ্ঞেস করলেনঃ তুমি নিজের বাপ-দাদার ধর্ম ত্যাগ করে মুহাম্মদের ধর্ম গ্রহণ করেছ? সাহাবী বললেনঃ হ্যাঁ, কিন্তু আমার আগে তোমার নিজের ঘরের খবর নাও, তোমার বোন ও বোনের স্বামী ইসলাম ধর্ম গ্রহণ করেছে। হযরত উমর (রাযিঃ) সোজা নিজের ঘরে এসে উপস্থিত হন। দরোজা বন্ধ। ভিতরে তার বোনের স্বামী তখন কুরআন পড়ছিল, উমর (রাযিঃ)-এর কানে পৌঁছে গিয়েছিল তার আগেই- জিজ্ঞেস করলেন, কিসের আওয়ায ছিল এটি? তিনি বললঃ না, কিছু না। হযরত উমর (রাযিঃ) বললেনঃ আমি জেনে গেছি তোমরা দু'জন মুরতাদ হয়ে গেছো। এই বলে ভগ্নিপতিকে মারতে শুরু করেন। হযরত ফাতেমা (রাযিঃ) বাঁচাতে এলে তাকেও এমন মারা মারেন যে, তাঁর সারা শরীর রক্তাক্ত হয়ে যায়। সেই অবস্থায় তাঁর মুখ থেকে উচ্চারিত হয়ঃ উমর! যা ইচ্ছে হয় করো কিন্তু ইসলাম এখন আর অন্তর থেকে যাবে না। এই কথাগুলো উমর (রাযিঃ)-এর মনে গভীর প্রভাব সৃষ্টি করে। বোনের দিকে স্নেহের দৃষ্টিতে তাকালেন। তাঁর শরীর থেকে রক্ত গড়িয়ে পড়ছিল তখন। এটি দেখে করুণায় আরো আর্দ্র হয়ে ওঠে বলল, তোমরা যা পড়ছিলে তা আমাকেও শোনাও। হযরত ফাতেমা (রাযিঃ) কুরআনের টুকরোগুলো এনে সামনে রাখলেন। হযরত উমর (রাযিঃ) সেগুলো পড়তে লাগলেন-তাঁর অন্তরে সেগুলো গভীরভাবে বসে যেতে লাগলো। এমনভাবে একটি আয়াতে এসে পৌঁছেই বলে উঠলেন তিনিঃ ‘আশহাদু আন লা ইলাহা ইল্লাল্লাহু ওয়া আশহাদু আন্না মুহাম্মাদার রাসূলুল্লাহ।’

(ইসাবা, চম খণ্ড, পৃঃ ১৬১, উসুদুল গাবা, ৪র্থ খণ্ড, পৃঃ ৫৪)

হিজরত : নিজের স্বামীর সঙ্গে তিনি হিজরত করেন।

মৃত্যু : তাঁর ইত্তিকালের সাল বা তারিখ জানা যায়নি।

সন্তান-সন্ততি : তার একটি সন্তান ছিল, নামঃ আবদুর রহমান।

হযরত আসমা বিনতে উমাইস (রাযিঃ)

নাম ও বংশ পরিচয় : তাঁর নাম আসমা; তিনি ছিল খাসআম গোত্রের। বংশ-তালিকা এরকমঃ আসমা বিনতে উমাইস বিন মাআদ বিন হারেছ বিন তিয়াম বিন কাআব বিন মালেক বিন কুহাফা বিন আমির বিন রবিয়া বিন মুআবিয়া বিন যায়েদ বিন মালেক মালেক বিন বশীর বিন ওহাব বিন শাহবান বিন আফরস বিন খালফ বিন খাসঅম। তাঁর মার নাম ছিল হিন্দ (খাওলা) বিনতে আওফ-তিনি ছিল কেনান গোত্রের। এই হিসেবে হযরত মায়মুনা এবং আসমা (রাযিঃ) আখয়াফি বোন হন।

বিবাহ : হযরত আলী (রাযিঃ)-এর বড় ভাই হযরত জাফর (রাযিঃ)-এর সঙ্গে তাঁর বিবাহ হয়- যিনি হযরত আলী (রাযিঃ)-এর চেয়ে বছর দশেক বড় ছিলেন।

ইসলাম গ্রহণ : মহানবী সাল্লাল্লাহু আলাইহি ওয়াসাল্লাম আরকামের গৃহে অবস্থান করার আগেই তিনি ইসলাম গ্রহণ করেন- হযরত জাফর (রাযিঃ)ও সেই সময়ে মুসলমান হন। (সীরাতে ইবনে হিশাম, ১ম খণ্ড, পৃঃ ১৩৬, ইসাবা, ৮ম খণ্ড, পৃঃ ৯)

সাধারণ অবস্থা : তিনি হাবশার পথে হিজরত করেন এবং বেশ ক'বছর হাবশায় ছিলেন। ৭ম হিজরীতে খায়বর বিজিত হলে মদীনা আসেন তাঁরা। তিনি হযরত হাফসার (রাযিঃ)-এর ঘরে যান, তখন হযরত উমর (রাযিঃ)ও এসে পড়েন। জিজ্ঞেস করলেন ইনি কে?— উত্তর এল 'আসমা'। তিনি বলল ও আচ্ছা, সেই হাবশার, সেই সমুদ্রের! হযরত আসমা (রাযিঃ) বললেন, হ্যাঁ তাই। হযরত উমর (রাযিঃ) বললেন, তোমাদের চেয়ে আমাদের সম্মান বেশী—কারণ আমরা তো মুহাজেরিন। এটি শুনেই আসমা (রাযিঃ) রেগে গেলেন এবং বললেন, কখনোই নয়, তোমরা মহানবী সাল্লাল্লাহু আলাইহি ওয়াসাল্লাম-এর সঙ্গে ছিলেন। মহানবী সাল্লাল্লাহু আলাইহি ওয়াসাল্লাম ক্ষুধার্তদের খাওয়াতেন, মূর্খদের পড়াতেন— কিন্তু আমাদের অবস্থা ছিল একেবারেই আলাদা। আমরা সুদূর একটি এলাকায় কেবল আল্লাহ ও তাঁর রাসূল সাল্লাল্লাহু আলাইহি ওয়াসাল্লাম-এর সন্তোষ বিধানের জন্যে পড়েছিলাম। কতো কষ্ট করেছি। মহানবী সাল্লাল্লাহু আলাইহি ওয়াসাল্লাম ঘরে এলে তিনি সমস্ত ঘটনা বর্ণনা করেন; মহানবী সাল্লাল্লাহু আলাইহি ওয়াসাল্লাম বলেন, তোমরা একটি হিজরত করেছ আর ওরা দু'টি হিজরত করেছে। কাজেই তাদের সম্মান তোমাদের চেয়ে বেশী। এটি শুনে হযরত আসমা (রাযিঃ) এবং অন্যান্য হাবশা-ফেরৎ মুসলমানদের এমন আনন্দ হল যে, দুনিয়ার আর সব সম্মান বা মর্যাদা নেহাৎ তুচ্ছ মনে হল। হাবশার মুহাজেরীনরা একের পর এক আসমার ঘরে আসতো এবং তাঁর কাছ থেকে এই ঘটনা শুনতো।

(সহীহ বুখারী, ২য় খণ্ড, পৃঃ ৬০৭, ৬০৮)

৮ম হিজরীতে মু'তার যুদ্ধে হযরত জাফর (রাযিঃ) শহীদ হন। মহানবী সাল্লাল্লাহু আলাইহি ওয়াসাল্লাম তাঁর শাহাদাতের খবর জানতে পেরে হযরত আসমা (রাযিঃ) বললেন, আমি সে সময় মহানবী সাল্লাল্লাহু আলাইহি ওয়াসাল্লাম-এর কাছে যেতেই দেখলাম তিনি অশ্রুসিক্ত— আমি তাঁকে বললাম, নবীজী! আপনি বিষন্ন কেন? জাফর (রাযিঃ)-এর ব্যাপারে কোন খবর এসেছে নাকি? মহানবী সাল্লাল্লাহু আলাইহি ওয়াসাল্লাম বললেনঃ হ্যাঁ, জাফর শাহাদাত বরণ করেছে। আমার সাথে বাচ্চারা ছিল, গোসল করিয়ে নিয়ে গিয়েছিলাম; মহানবী সাল্লাল্লাহু আলাইহি ওয়াসাল্লাম তাদের কাছে ডেকে নিলেন— আর আমি চীৎকার করে উঠলাম। মহানবী সাল্লাল্লাহু আলাইহি ওয়াসাল্লাম নিজের পরিবারের লোকজনের কাছে গেল এবং বললেনঃ জাফর-এর সন্তানদের জন্যে খাবার পাক কর—তারা দুঃখ ও বেদনায় নিমজ্জিত।

(মুসনাদ, ষষ্ঠ খণ্ড, পৃঃ ২৭০)

এরপর মসজিদে গিয়ে মহানবী সাল্লাল্লাহু আলাইহি ওয়াসাল্লাম বিষন্নভাবে বসলেন এবং হযরত জাফর (রাযিঃ)-এর মৃত্যু সংবাদ ঘোষণা করলেন। ঠিক সে সময়েই একজন

এসে মহানবী সাল্লাল্লাহু আলাইহি ওয়াসাল্লামকে বললেনঃ জাফরের পরিবারের মহিলারা ক্রন্দন-বিলাপ করছে, মহানবী সাল্লাল্লাহু আলাইহি ওয়াসাল্লাম তাকে দিয়ে নিষেধ করে দিলেন। সে গেল এবং নিষেধ করে মহানবী সাল্লাল্লাহু আলাইহি ওয়াসাল্লাম-এর কাছে ফিরে এসে বললেন সে, আমি আপনার কথামত নিষেধ করেছি— কিন্তু তারা নিষেধ শোনে না। মহানবী সাল্লাল্লাহু আলাইহি ওয়াসাল্লাম আবার তাকে পাঠালেন, সেও আবার গেল— এবং সে ফিরে এসে বলল যে, তাদের বিরত করতে পারছি না। মহানবী সাল্লাল্লাহু আলাইহি ওয়াসাল্লাম বললেন, তাহলে তাদের মুখে মাটি ভরে দাও। এই ঘটনা হযরত আয়েশা (রাযিঃ) থেকে সহীহ বুখারীতে বর্ণিত হয়েছে। সহীহ বুখারী শরীফে এও আছে যে, হযরত আয়েশা (রাযিঃ) ঐ লোকটিকে বলেন, আল্লাহর কসম! তুমি এটি যদি না করো (অর্থাৎ মুখে মাটি না দাও) তাহলে মহানবী সাল্লাল্লাহু আলাইহি ওয়াসাল্লাম কষ্ট থেকে মুক্তি পাবেন না। (সহীহ বুখারী, ২য় খণ্ড, পৃঃ ৬১১)

তৃতীয় দিবসে মহানবী সাল্লাল্লাহু আলাইহি ওয়াসাল্লাম হযরত আসমা (রাযিঃ)-এর গৃহে গমন করেন এবং শোক করতে নিষেধ করেন।

(যে রমণীর স্বামী মারা গেছে, তার শোক পালন করা উচিত চার মাস ১০ দিন এটিই বিধান; হযরত আসমার এই ঘটনা থেকে বিভ্রান্ত হওয়া উচিত নয় কারণ এই বর্ণনা সমস্ত সহীহ হাদীছের বর্ণনার বিরোধী এবং শায (বা অপ্রচলিত)। ইজমাও তা বলে না। ইমাম তাহাবী এই হাদীছকে মনসুখ বা বিলুপ্ত বলেছেন। ইমাম বায়হাকী বলেছেন— এটি অশুদ্ধ। (দ্রঃ ফতহুল বারী, ৯ম খণ্ড, পৃঃ ৪২৯/মুসনাদ, ষষ্ঠ খণ্ড, পৃঃ ৩৬৯)

প্রায় ছ'মাস পর ৮ম হিজরীতে হুনাইনের যুদ্ধের সময়ে মহানবী সাল্লাল্লাহু আলাইহি ওয়াসাল্লাম আবু বকর (রাযিঃ)-এর সঙ্গে আসমা (রাযিঃ)-এর বিয়ে পড়িয়ে দেন।

(ইসাবা, ৮ম খণ্ড, পৃঃ ৯)

যার দুই বছর পর ১০ম হিজরীতে মুহাম্মাদ বিন আবু বকর (রাযিঃ)-এর জন্ম হয়। সে সময়ে হযরত আসমা (রাযিঃ) হজ্জ করার জন্য মক্কা এসেছিলেন— যেহেতু মুহাম্মাদ যুলহলায়ফায় জন্মগ্রহণ করেন, আসমা (রাযিঃ) জিজ্ঞেস করলেন, আমি কি করবো? তাঁকে বলা হল মহানবী সাল্লাল্লাহু আলাইহি ওয়াসাল্লাম বললেনঃ গোসল করে ইহরাম বেঁধে নাও। (সহীহ মুসলিম, ১ম খণ্ড, পৃঃ ৩৮৫, ৩৯৪)

মহানবী সাল্লাল্লাহু আলাইহি ওয়াসাল্লাম-এর মৃত্যু অসুখের সময় হযরত উম্মে সালমা (রাযিঃ) এবং হযরত আসমা (রাযিঃ) পরীক্ষা করে (নিউমোনিয়া বলে ধারণা করে) এক ধরনের ঔষধ খাওয়াতে চেয়েছিলেন তাঁকে; কিন্তু মহানবী সাল্লাল্লাহু আলাইহি ওয়াসাল্লাম পছন্দ করেননি এবং নিষেধ করেন। আর তখনি মহানবী সাল্লাল্লাহু আলাইহি ওয়াসাল্লাম সংজ্ঞাহীন হয়ে পড়েন। সেই সংজ্ঞাহীনতার সময় তাঁর মুখ খুলে ঔষধ খাইয়ে দেন। সংজ্ঞা ফেরার পর মহানবী সাল্লাল্লাহু আলাইহি ওয়াসাল্লাম যখন অনুভব করলেন, বললেনঃ এই পরামর্শ আসমারই হবে। সে হাবশা থেকে ফেরার

সময় এই চিকিৎসাবিদ্যা নিয়ে এসেছে। আকাশ ছাড়া সবাইকে ঔষধ খাওয়ানো হোক, অতএব সমস্ত নবী পণ্ডীদের ঔষধ খাওয়ানো হয়। (সহীহ বুখারী, ২য় খণ্ড)

১৩ হিজরীতে হযরত আবু বকর (রাযিঃ) মৃত্যুবরণ করেন। তিনি অসীয়াত করে মান যে, তার মৃত্যুর পর আসমা (রাযিঃ)ই যেন তাঁকে গোসল করান।

(তাবকাত, ২য় খণ্ড, পৃঃ ৩১, ৩২)

এরপর হযরত আলী (রাযিঃ)-এর সঙ্গে তাঁর বিয়ে হয়। একদিন এক মজার ঘটনা ঘটে। মুহাম্মদ বিন জাফর (রাযিঃ) এবং মুহাম্মদ বিন আবু বকর (রাযিঃ) দুজনে একজন আরেকজনকে গর্ব করে বলছেন আমি তোমার চেয়ে ভাল, কারণ আমার বাবা তোমার বাবার চেয়ে ভাল, এরকম একে অপরকে বলছে। হযরত আলী (রাযিঃ) হযরত আসমা (রাযিঃ)কে বললেন, এর মীমাংসা করো। আসমা (রাযিঃ) বললেন, সব যুবকদের মধ্যে জাফরের মর্যাদা বেশী, আর সমস্ত বৃদ্ধদের মধ্যে আবু বকরের। হযরত আলী (রাযিঃ) বললেন (এই-ই যদি হয়) আমাদের জন্যে আর থাকলো কি?

(মুসনাদ, ষষ্ঠ খণ্ড, পৃঃ ৪৩৮)

৩য় হিজরীতে মুহাম্মদ বিন আবু বকর মিসরে নিহত হন এবং গাধার খালের (চামড়ার) ভেতর আবৃত করে তার লাশ পোড়ানো হয়। হযরত আসমা (রাযিঃ)-এর জন্যে এর চেয়ে বেদনাদায়ক মর্মবিদারী ঘটনা আর কি হতে পারে? প্রচণ্ড রাগ হল তার, কিন্তু খুব ধৈর্য ধারণ করলেন এবং নামাযে দাঁড়িয়ে গেলেন। (মুসনাদ, ৬ষ্ঠ খণ্ড, পৃঃ ৪৩৮)

মৃত্যু : ৪০ হিজরীতে হযরত আলী (রাযিঃ) মৃত্যুবরণ করেন এবং তারপর হযরত আসমা (রাযিঃ)ও ইন্তেকাল করেন। (খোলাসাতুত তাহযীব, পৃঃ ৪৮৮)

সন্তান-সন্ততি : আগেই উল্লিখিত হয়েছে, হযরত আসমা (রাযিঃ) তিনটি বিয়ে করেন। হযরত জাফর (রাযিঃ) এর থেকে সন্তান হয়ঃ মুহাম্মদ, আবদুল্লাহ, আওন। হযরত আবু বকর (রাযিঃ)-এর থেকে হয়ঃ মুহাম্মদ এবং হযরত আলী (রাযিঃ) থেকে হয়ঃ ইয়াহইয়া।

(ইসতিয়াব, ২য় খণ্ড, পৃঃ ৭২৫)

‘রিয়ায়ুন নয়রা’ গ্রন্থে উল্লেখ আছে- আসমার গর্ভে হযরত আলী (রাযিঃ)-এর দু’টো সন্তান হয়। একজনের নাম আওন, আরেকজন ইয়াহইয়া। (রিয়ায়ুন নয়রা, ২য় খণ্ড, পৃঃ ৬৪৯) কিন্তু এই তথ্যটি আল্লামা বিন আসির ভুল বলে চিহ্নিত করেছেন। তিনি বলেছেন যে, এটা বিন কলবীর ধারণা। বিন কলবী মিথ্যাবাদী বলে প্রসিদ্ধ ছিল।

মর্যাদা ও মহত্ত্ব : হযরত আসমা (রাযিঃ)-এর থেকে ৬০টি হাদীছ বর্ণিত আছে। এগুলোর বর্ণনাকারীরা হলেনঃ হযরত উমর (রাযিঃ), আবু মুসা আশআরী (রাযিঃ), আবদুল্লাহ বিন জাফর (রাযিঃ), ইবনে আব্বাস, কাসিম বিন মুহাম্মদ, আবদুল্লাহ বিন শাদদাদ; উরওয়া, বিন মুসাইয়েব, উম্মে আওন বিনতে মুহাম্মদ বিন জাফর, ফাতেমা বিনতে আলী, আবু ইয়াজিদ মদনী।

তিনি মহানবী সাল্লাল্লাহু আলাইহি ওয়াসাল্লাম-এর কাছ থেকে সরাসরি ইলম অর্জন করতেন; মহানবী সাল্লাল্লাহু আলাইহি ওয়াসাল্লাম তাঁকে বিপদাপদের সময় পড়বার জন্যে দোয়া শিখিয়ে দেন। (মুসনাদ, ষষ্ঠ খণ্ড, পৃঃ ৩৬৯)

একবার মহানবী সাল্লাল্লাহু আলাইহি ওয়াসাল্লাম হযরত জাফরের সন্তানদেরকে দুর্বল দেখে জিজ্ঞেস করেন এরা এত রোগা হয়ে গেল কেন? আসমা (রাযিঃ) বললেনঃ কারো দৃষ্টি পড়েছে। মহানবী সাল্লাল্লাহু আলাইহি ওয়াসাল্লাম বললেন, ঝাড়-ফুক করো। হযরত আসমা (রাযিঃ) একটি মন্ত্র জানতেন, মহানবী সাল্লাল্লাহু আলাইহি ওয়াসাল্লামকে বলে শুনালেন তা। মহানবী সাল্লাল্লাহু আলাইহি ওয়াসাল্লাম বললেনঃ হ্যাঁ ঠিক আছে। (সহীহ মুসলিম, ২য় খণ্ড, পৃঃ ২২৩)

হযরত আসমা (রাযিঃ) স্বপ্ন ব্যাখ্যাও করতে পারতেন, হযরত উসমান (রাযিঃ) প্রায়ই তাঁর কাছে স্বপ্নের ব্যাখ্যা জিজ্ঞেস করতেন। (ইসাবা, ৮ম খণ্ড, পৃঃ ৯)

হযরত আসমা বিনতে আবি বকর (রাযিঃ)

নাম ও বংশ পরিচয় : তাঁর নাম ছিল আসমা; উপাধি ছিলঃ যাতুন নিতাকাইন। তিনি ছিলেন হযরত আবু বকর (রাযিঃ)-এর কন্যা। মাতার নাম ছিলঃ কাতলা বিনতে আবদুল ওজ্জা। হিজরতের ২৭ বছর পূর্বে মক্কায় জন্ম হয়।

বিবাহ : হযরত জুবাইর ইবনুল আওয়ামের সাথে তাঁর বিয়ে হয়।

ইসলাম গ্রহণ : নিজের স্বামীর মত তিনিও খুব তাড়াতাড়ি ইসলাম গ্রহণ করেন। ইবনে ইসহাকের কথা অনুযায়ী তিনি ইসলাম গ্রহণকারীদের মধ্যে অষ্টাদশ ব্যক্তিত্ব।

সাধারণ অবস্থা : যখন মহানবী সাল্লাল্লাহু আলাইহি ওয়াসাল্লাম মদীনার দিকে হিজরত করেন হযরত আবু বকর (রাযিঃ) ছিলেন তাঁর সফর সঙ্গী। মহানবী সাল্লাল্লাহু আলাইহি ওয়াসাল্লাম দুপুরে হযরত আবু বকরের ঘরে এলেন এবং হিজরতের কথা বললেন। হযরত আসমা (রাযিঃ) সফরের সামগ্রী প্রস্তুত করেন। দু'তিন দিনের খাবার টিফিন-ক্যারিয়ারে রাখেন। মহিলারা কোমরে যে এক ধরনের নিতাক পরতেন, তা ছিড়ে তা দিয়ে টিফিন ক্যারিয়ারের মুখ বন্ধ করেন। এটি এমন একটি মহান সম্মান ছিল তাঁর জন্যে যে, পরবর্তীতে তাঁকে যাতুন নিতাকাইন অভিধায় স্মরণ করা হয়।

(সহীহ বুখারী, ১ম খণ্ড, পৃঃ ৫৫৩, ৫৫৫)

হযরত আবু বকর (রাযিঃ) হিজরতের সময় সমস্ত টাকা সঙ্গে নিয়ে যান। আবু কুহাফা ছিল তাঁর বাবা। তিনি এ খবর জানতে পেরে বললেনঃ জান এবং মাল দু'দিক থেকেই তো কষ্ট দিলো আবু বকর। হযরত আসমা (রাযিঃ) বললেন, না, তা নয়— বহু সম্পদ তিনি রেখে গেছেন। এই বলে তিনি উঠলেন এবং যেখানে হযরত আবু বকর (রাযিঃ)-এর মাল থাকতো—অনেকগুলো পাথরের টুকরো রেখে দিলেন এবং তার উপর কাপড় ঢেকে দেন। এরপর আবু কুহাফাকে নিয়ে যান সেখানে, এবং বললেন— দেখে নিন,

এসব রেখে গেছেন। আবু কুহাফা (রাযিঃ) অন্ধ হয়ে গিয়েছিলেন, ফলে মেনে নেয় এবং বললঃ খাওয়ার জন্যে অনেক আছে। হযরত আসমা (রাযিঃ)-এর বর্ণনা আছে যে, আমি কেবল আবু কুহাফা (রাযিঃ)কে সাজুনা দেয়ার জন্যে এরকম করেছিলাম, না হয় সেখানে একটি গমের দানাও ছিল না। (মুসনাদে আহমদ ইবনে হাম্বল, ষষ্ঠ খণ্ড, পৃঃ ৩৫০) মহানবী সাল্লাল্লাহু আলাইহি ওয়াসাল্লাম মদীনা শরীফে পৌঁছে মহিলাদের আনতে পাঠালেন। হযরত আসমা (রাযিঃ)ও আসেন।

(ইসাবা, ৪র্থ খণ্ড, পৃঃ ২২৯, তাবকাত, ১ম খণ্ড, পৃঃ ১৬১, তাহযীব, ৫ম খণ্ড, পৃঃ ২১৪) তখন তিনি কুবায় অবস্থান করেন। এখানে তার গর্ভে আবদুল্লাহ বিন জুবাইর (রাযিঃ)-এর জন্ম হয়। তাকে নিয়ে মহানবী সাল্লাল্লাহু আলাইহি ওয়াসাল্লাম-এর কাছে গেল। মহানবী সাল্লাল্লাহু আলাইহি ওয়াসাল্লাম তাঁকে কোতো বসালেন, মুখের লোআব নিয়ে বাচ্চার পেটে দিলেন এবং দু'আ করলেন। (সহীহ বুখারী, ১ম খণ্ড, পৃঃ ৫৫৫) আবদুল্লাহ বিন জুবাইর যখন যুবক হলেন, হযরত আসমা (রাযিঃ) তাঁর কাছে থাকতে লাগলেন-কারণ হযরত জুবাইর (রাযিঃ) তাকে তালাক দিয়ে দিরেছিলেন।

(ফতহুল বারী, ষষ্ঠ খণ্ড, পৃঃ ১৬৩, উসুদুল গাবা, ৫ম খণ্ড, পৃঃ ৩৯২) হযরত আবদুল্লাহ বিন জুবাইর মহানবী সাল্লাল্লাহু আলাইহি ওয়াসাল্লাম-এর লুআব পান করেছিল, সেজন্যে যখন তিনি সাবালকত্বে পদার্পণ করেন, তখন উত্তম উত্তম চারিত্রিক গুণাবলীর দৃষ্টান্ত হয়ে দাঁড়ান; আর ওদিকে সালতানাতে বনু উমাইয়্যার সর্বাধিনায়ক এজিদ ছিল চরিত্রহীনতা ও অনৈতিকতায় আপাদমস্তক আবৃত। হযরত আবদুল্লাহ বিন জুবাইর (রাযিঃ) তার বাইয়াতে অস্বীকৃতি জানান। তিনি মক্কায় আশ্রয় গ্রহণ করেন এবং সেখানে থেকেই নিজের খিলাফতের আওয়ায বুলন্দ করেন। যেহেতু আবদুল্লাহর মহত্ব ও উচ্চমর্যাদা সবাই স্বীকার করতো- সেজন্যে ইসলামী পৃথিবী তার কথায় একবাক্যে সাড়া দিয়ে উঠে। দেশের এক বড় অংশ তাঁর পতাকার নীচে সমবেত হয়। কিন্তু যখন আবদুল মালেক বিন মরওয়ান সিংহাসনে আরোহন করেন- নিজের কূটনীতিক বুদ্ধি ব্যবহার করে বিভিন্ন সুবায় তিনি আপন অধিকার বিস্তৃত ও প্রতিষ্ঠিত করেন এবং হযরত আবদুল্লাহ বিন জুবাইর (রাযিঃ)-এর সঙ্গে লড়াইর জন্যে প্রস্তুতি গ্রহণ করেন। সিরিয়ার সেনাবাহিনী কাবাঘর ঘেরাও করলে আবদুল্লাহ বিন জুবাইর (রাযিঃ) আসমা (রাযিঃ)-এর কাছে আসেন তিনি ছিলেন অসুস্থ। জিজ্ঞেস করল, 'কি অবস্থা আপনার? বললেন, অসুস্থ এবং বললেন, মানুষ মৃত্যুর পর আনন্দ পায়। হযরত আসমা (রাযিঃ) বললেনঃ সম্ভবত তুমি আমার মৃত্যু কামনা করছো। কিন্তু আমি এখন মরতে চাই না। আমার একান্ত ইচ্ছে তুমি লড়াই করে শহীদ হবে এবং আমি ধৈর্য ধরবো অথবা লড়াই করে বিজয়ী হবে। আমার চক্ষু শীতল করবো। আবদুল্লাহ বিন জুবাইর (রাযিঃ) হেসে চলে গেল। শাহাদাতের সময় এলে দ্বিতীয়বার মার কাছে এলেন, মা তখন মসজিদে বসা; 'সমঝোতা' করবে কিনা পরামর্শ চাইলেন- হযরত

আসমা (রাযিঃ) বললেনঃ বৎস! মরবার ভয় থেকে লজ্জা মিশ্রিত সন্ধি উত্তম নয়। হুত্ব সম্মানের সঙ্গে তরবারি মারা অসম্মানের সঙ্গে বেত মারার চেয়ে উত্তম। হযরত আবদুল্লাহ বিন জুবাইর (রাযিঃ) মায়ের কথায় আশ্বাস্ত হন এবং লড়াই করে বীরের মত শহীদ হন। হাজ্জাজ বিন ইউসুফ তাঁর লাশ শূলের উপর চড়িয়ে দেয়। তিনদিন পর হযরত আসমা (রাযিঃ) দাসীকে নিয়ে সেই জায়গায় গেলেন, আবদুল্লাহ বিন জুবাইরের লাশ উল্টো করে শূলে চড়িয়ে রাখা হয়েছে। নিজেকে সংবরণ করে দেখলেন দৃশ্যটি, তারপর যথেষ্ট সংযমের সঙ্গে বললেনঃ এই আরোহীর ঘোড়া থেকে অবতরণের সময় এনো আসেনি? (উসদুল গাবা, ৩য় খণ্ড, পৃঃ ১৬৩, ইসতিয়াব, ১ম খণ্ড, পৃঃ ৩৬৬)

হযরত আসমা (রাযিঃ)-এর সঙ্গে গোলমাল করার উদ্দেশ্য ছিল হযরত হাজ্জাজ বিন ইউসুফের। লোক পাঠালো সে হযরত আসমা (রাযিঃ)কে নিয়ে আসার জন্যে। হযরত আসমা (রাযিঃ) যেতে অস্বীকার করেন। সে আবার লোক পাঠিয়ে বলল এখনো ভাল এরপর যে লোক পাঠানো হবে সে চুল ধরে টেনে হিচড়ে নিয়ে আসবে। হযরত আসমা (রাযিঃ) আল্লাহ ছাড়া আর কারো ক্ষমতা স্বীকার করতেন না। তাই জবাব দিলেনঃ আমি যেতে পারবো না। হাজ্জাজ বাধ্য হয়ে নিজেই জুতা পরে হযরত আসমা (রাযিঃ)-এর কাছে এল-এরপর তাদের মধ্যে নিম্নরূপ কথোপকথন হয় :

হাজ্জাজ বলেন, আমি আল্লাহর দুশমন (অর্থাৎ আবদুল্লাহ বিন জুবাইর)-এর সঙ্গে কি ব্যবহার করেছি?

আসমা : তুমি তাঁর পৃথিবী নষ্ট করেছো এবং সে তোমার পরিণাম নষ্ট করে দিয়েছে। আমি শুনেছি, তুমি তাকে উপহাস করে ‘যাতুন নিতাকাইনের’ ছেলে বলতে, আল্লাহর কসম! ‘যাতুন নিতাকাইন’ আমি। আমিই নিতাক দিয়ে মহানবী সাল্লাল্লাহু আলাইহি ওয়াসাল্লাম এবং আবু বকর (রাযিঃ)-এর খাবার বেঁধেছিলাম এবং নিতাকের বাকী অংশ কোমরে লাগিয়ে নিয়েছিলাম। কিন্তু তোমার স্মরণ করা দরকারঃ আমি মহানবী সাল্লাল্লাহু আলাইহি ওয়াসাল্লাম-এর কাছে শুনেছি সর্কীফ গোত্রে এক মিথ্যুক এবং জালিমের আবির্ভাব ঘটবে অতএব মিথ্যুককে তো দেখেছি, আর জালিম হচ্ছে তুমিই।

হাজ্জাজ এই হাদীছ শুনে চমকে উঠে দাঁড়িয়ে গেল। (সহীহ মুসলিম, ২য় খণ্ড, পৃঃ ৩৭৫) কয়েকদিন পর আবদুল মালেক বিন মরওয়ানের নির্দেশ পেয়ে হাজ্জাজ আবদুল্লাহ বিন জুবাইরের লাশ শূল থেকে খুলে নিয়ে ইহুদীদের একটি গোরস্থানে ফেলে দেয়। তারপর হযরত আসমা (রাযিঃ) সেখান থেকে তাঁর লাশ উঠিয়ে নিয়ে আসেন এবং ঘরে এসে লাশের গোসল করান এবং গোসল দিয়ে জানাযার নামায পড়েন। হযরত আবদুল্লাহ বিন জুবাইরের শরীরের প্রতিটি জোড়া বা গ্রন্থি আলাদা করে ফেলা হয়েছিল; কোন একটি অঙ্গ উঠালেই সেটি খুলে চলে আসতো-কিন্তু হযরত আসমা (রাযিঃ) এই অবস্থা দেখেও ধৈর্য ধরেন। কারণ আল্লাহর করুণা সেইসব ছেড়া টুকরো-টুকরো অঙ্গের উপর অবতীর্ণ হয়ে থাকে।

মৃত্যু : হযরত আসমা (রাযিঃ) দু'আ করতেন যতক্ষণ আমি আবদুল্লাহর পাশ না দেখবো, ততক্ষণ যেন আমার মৃত্যু না হয়। (ইসতিয়াব, ১ম খণ্ড, পৃঃ ৩৬৬)

দেখা গেল আবদুল্লাহ বিন জুবাইর (রাযিঃ)-এর মৃত্যুর এক সপ্তাহের মধ্যেই তাঁর ইন্তেকাল হয়। এটি ৭৩ হিজরীর জমাদিউল উলার ঘটনা তখন তার বয়স হয়েছিল একশো বছর।

সন্তান-সন্ততি : তাঁর ছেলেমেয়েরা হলেনঃ আবদুল্লাহ, মানযার, উরউয়া, মুহাজির, খদিজাতুল কুবরা, উম্মুল হাসান।

অবয়ব-কাঠামো : যদিও হযরত আসমা (রাযিঃ) শতবর্ষ জীবিত ছিলেন কিন্তু একটি দাঁতও পড়েনি। আর হৃশ-জ্ঞান তো মৃত্যু অবধি ঠিক ছিল। তাঁর শরীর ছিল মোটাসোটা, লম্বা। শেষ জীবনে তাঁর দৃষ্টিশক্তি নষ্ট হয়ে যাচ্ছিলো।

মর্যাদা ও মহত্ত্ব : মহানবী সাল্লাল্লাহু আলাইহি ওয়াসাল্লাম-এর কাছ থেকে হযরত আসমা (রাযিঃ) ৫৬টি হাদীছ বর্ণনা করেছেন। এগুলো সুনান এবং সহীহাইন-এ উদ্ধৃত আছে। তাঁর হাদীছ বর্ণনাকারীরা হল, আবদুল্লাহ, উরউয়া (পুত্রদ্বয়), উব্বাদ বিন আবদুল্লাহ, আবদুল্লাহ বিন উরওয়া, ফাতিমা বিনতে মানযার, বিন জুবাইর, উবাদা বিন হামযা বিন আবদুল্লাহ বিন জুবাইর, আবদুল্লাহ বিন কায়সান, বিন আব্বাস, সুফিয়া বিনতে শায়রা, বিন আবি মুলাইকা, ওহাব বিন কায়সান, আবু বকর, আমের, মুত্তালিব বিন হিনতাব, মুহাম্মদ বিন মুনকাদর, মুসলিম মুয়াররা, আবু নওফাল বিন আবু আকবর প্রমুখ।

চরিত্র-বৈশিষ্ট্য : হযরত আসমা (রাযিঃ)-এর স্বভাবই ছিল ভালর দিকে। একবার মহানবী সাল্লাল্লাহু আলাইহি ওয়াসাল্লাম কসুফের নামায পড়ছিলেন- নামাযকে অনেক দীর্ঘ করেন তিনি। এতে হযরত আসমা (রাযিঃ) এদিক ওদিক দেখতে শুরু করেন। তার পাশে দু'জন মহিলা দাঁড়ানো ছিল। তাদের একজন খুব মোটা প্রকৃতির, আরেকজন দুর্বল-রোগা; এটি দেখে নিজেকে তিনি এই বলে সান্ত্বনা দিলেন যে, আমার অন্তত এদের চেয়ে বেশী সময় দাঁড়ানো উচিত। কিন্তু নামায যেহেতু দীর্ঘ সময় হচ্ছিলো। আসমা (রাযিঃ) মাথা ঘুরে পড়ে যান এবং তাকে পানি দিয়ে সুস্থ করার প্রয়োজন দেখা দেয়। (মুসনাদ, ষষ্ঠ খণ্ড, পৃঃ ৩৪৯/সহীহ বুখারী, ১ম খণ্ড, পৃঃ ১৪৫)

বিন আবি মুলাইকা বলেছেন, তাঁর মাথায় যদি ব্যথা করতো তখন মাথায় হাত দিয়ে ধরে বলতেনঃ এটি আমার পাপ, আর যে পাপ আল্লাহ মাফ করতে থাকেন সেটি এর চেয়ে অনেক বেশী।

সত্য বলা তাঁর বৈশিষ্ট্য ছিল- তাঁর অনেক উদাহরণ তো ইতিমধ্যেই উল্লিখিত হয়েছে। হাজ্জাজ বিন ইউসুফের মত দুর্ধর্ষ বদমাশ অত্যাচারীর সামনে যে রকম সত্যোচ্চারণ করতেন তার দৃষ্টান্ত বিরল। একদিন সে মিনারের ওপর বসা; হযরত আসমা (রাযিঃ) দাসীকে সঙ্গে করে এলেন এবং বললেন, আমীর কই? জান্নার পর হাজ্জাজের কাছে

হাজ্জাজ তাকে দেখেই বলল তোমার ছেলে আল্লাহর গৃহে নাস্তিকতার বা আল্লাহ দ্রোহীতার বিস্তার ঘটিয়েছিল সেজন্যে আল্লাহ তা'আলা তাকে কঠিন শাস্তি দিয়েছেন। হযরত আসমা (রাযিঃ) সঙ্গে সঙ্গেই তাকে বললেন 'তুমি মিথ্যুক' সে নাস্তিক বা আল্লাহদ্রোহী ছিল না- সে ছিল রোযাদার, পুত-পবিত্র, পরহেযগার এবং রাত্রি জাগরণকারী।

(মুসনাদ, নং ২৩, পৃঃ ৩৫১)

খুবই ধৈর্যশীল ছিলেন তিনি; হযরত আবদুল্লাহ বিন জুবাইয়ের শাহাদাত তো একটি ক্রিয়ামতের মত তাঁর কাছে সেটি মহাপ্রলয়ের রূপে আবির্ভূত হয়। কিন্তু তা সত্ত্বেও তিনি যেরকম সাহস দৃঢ়তা ও সংযমের পরিচয় দিতে সক্ষম হন ইতিহাসে তার নথির মন্ডই আছে।

তিনি খুব স্বাধীনচেতা ছিলেন। হাজ্জাজ বিন ইউসুফের মত একনায়কের গর্ব ও অহমিকা তার নিজস্ব স্বাধীনচিত্ততার পাথরের গায়ে লেগে টুকরো টুকরো হয়ে যেতো। এসব সত্ত্বেও খুবই বিনয়ী এবং আনুগত্যশীল ছিলেন। পরিশ্রম করতে তাঁর লজ্জা ছিলনা একেবারেই। তাঁর যখন বিয়ে হয় হযরত জুবাইর বিন আওয়াম (রাযিঃ)-এর কিছু ছিল না তখন; একটি উট এবং ঘোড়া ছিল কেবল। সেই ঘোড়াকে তিনি খাবার দিতেন, পানি ভরতেন, কুয়ো থেকে পানি তোলার যে পাত্র ছিল তা সেলাই করতেন। রুটি তৈরী করতে জানতেন না। ফলে আটা মেখে রাখতেন। আর আনসারের কোন কোন মেয়ে তা তৈরী করে দিতো। মহানবী সাল্লাল্লাহু আলাইহি ওয়াসাল্লাম হযরত জুবাইর ইবনুল আওয়াম (রাযিঃ)কে যে জমি দান করছিলেন হযরত আসমা (রাযিঃ) সেই জমিতে গিয়ে খেজুরের দানা খুঁজে বের করতেন এবং তিন ক্রোশ দূরে নিয়ে আসতেন মাথায় করে। একদিন এইরকম অবস্থায় মহানবী সাল্লাল্লাহু আলাইহি ওয়াসাল্লাম-এর সঙ্গে তাঁর দেখা হয়ে যায়- মহানবী সাল্লাল্লাহু আলাইহি ওয়াসাল্লাম নিজের উট বসিয়ে তাঁকে উঠে বসতে বললেন। কিন্তু তাঁর লজ্জা হল এবং উটের উপর বসলেন না, ঘরে এসে হযরত জুবাইর (রাযিঃ)-এর কাছে সমস্ত ঘটনা বর্ণনা করলেন। তিনি বললেনঃ কি আশ্চর্য! মাথার উপর বোঝা নিতে লজ্জা করে না? কিছু কাল পরে হযরত আবু বকর (রাযিঃ) তাঁকে একটি গোলাম দান করেন। গোলামটি প্রাকদর হযরত আসমা (রাযিঃ)-এর অসুবিধা কমে যায়। তিনি বলতেনঃ 'আবু বকর (রাযিঃ) যেন আমাকে স্বাধীন করে দিলেন।' (সহীহ বুখারী, ২য় খণ্ড, পৃঃ ৭৫৬)

জুবাইর (রাযিঃ) যেহেতু দরিদ্র ছিলেন তাই তিনি হিসেব করে বুঝে গুনে খরচ করতেন। মহানবী সাল্লাল্লাহু আলাইহি ওয়াসাল্লাম গুনে বলল, অতো হিসেব করানো খোদাও হিসেব করে দেবেন; এই সময় থেকে সে অভ্যাস ত্যাগ করেন এবং এর ফলে দেখা গেল প্রচুর বরকত হচ্ছে এবং এরপর কখনো তিনি দরিদ্র পীড়িত হননি।

(মুসনাদ, নং ২৩, পৃঃ ৩৫২)

তিনি খুবই দানশীল ছিলেন; আবদুল্লাহ বিন জুবাইর (রাযিঃ) বলতেন- আমি তাঁর চেয়ে বেশী দানশীল কাউকে দেখিনি। হযরত আয়েশা (রাযিঃ) নিজের ইন্তেকালের

সময় উত্তরাধিকার সম্পত্তি হিসেবে একটি জঙ্গল রেখে যান। এটি তাঁর অংশে এসেছিল; কিন্তু সেটি তিনি লাখ দিরহাম বিক্রি করে সেই টাকা প্রিয়জনদের মধ্যে বিলি করে দেন।

(সহীহ বুখারী, বাবু হিবাতিল ওয়াহেদ শিগ-জমিই)

অসুস্থ হয়ে গেলে নিজের সব দাসীদের তিনি স্বাধীন করে দিতেন।

(খোলাসাতুত তাহযীব, পৃঃ ৪৮৮)

হযরত জুবাইর (রাযিঃ)-এর মেজাজ ছিল খুব তীক্ষ্ণ বা কড়া সেজন্যে তিনি মহানবী সাল্লাল্লাহু আলাইহি ওয়াসাল্লামকে জিজ্ঞেস করলেন যে, আমি কি তাঁর অনুমতি ছাড়া তাঁর সম্পদ ফকিরদের মধ্যে বিলিয়ে দিতে পারি। মহানবী সাল্লাল্লাহু আলাইহি ওয়াসাল্লাম তাকে অনুমতি দেন।

(মুসনাদ, ষষ্ঠ খণ্ড, পৃঃ ৩৯৩)

একবার তার মাতা মদীনায় এলেন এবং তাঁর কাছ থেকে পয়সা চাইলেন; হযরত আসমা (রাযিঃ) মহানবী সাল্লাল্লাহু আলাইহি ওয়াসাল্লামকে জিজ্ঞেস করল তিনি তো মুশরিক তাকে কি সহযোগিতা করতে পারি। মহানবী সাল্লাল্লাহু আলাইহি ওয়াসাল্লাম বললেনঃ হ্যাঁ নিজের মায়ের সঙ্গে ভাল ব্যবহার করো। (সহীহ বুখারী, ২য় খণ্ড, পৃঃ ৮৮৪) হযরত আসমা (রাযিঃ) কয়েকবার হজ্জু করেন। প্রথম হজ্জু করেছিল তিনি মহানবী সাল্লাল্লাহু আলাইহি ওয়াসাল্লাম-এর সঙ্গে সেখানে যা দেখেছিল তিনি সবই স্মরণে ছিল তার।

(সহীহ মুসলিম, ১ম খণ্ড, পৃঃ ৪৭৯/সহীহ বুখারী, ১ম খণ্ড, পৃঃ ৪২৭)

একবার যখন মহানবী সাল্লাল্লাহু আলাইহি ওয়াসাল্লাম-এর পরে হজ্জু করতে আসেন এবং মুযদালিফায় অবস্থান করেন। রাতে নামায ছিল, তারপর নিজের গোলামকে জিজ্ঞেস করলেন, চাঁদ ডুবে গেছে? সে বললেন না। যখন চাঁদ ডুবে গেল, বললেনঃ এখন রমি করার অর্থাৎ পাথর নিক্ষেপ করার জন্যে চল। পাথর নিক্ষেপের পর ফিরে এল এবং ফজরের নামাযে রত ছিলেন। সে বললেনঃ আপনি তাড়াতাড়ি চলুন, তিনি বললেনঃ মহানবী সাল্লাল্লাহু আলাইহি ওয়াসাল্লাম মহিলাদের এরকম করার অনুমতি দান করেছেন। যখন 'জাহ্ন' নামক জায়গা দিয়ে যেতেন বলতেন, আমি মহানবী সাল্লাল্লাহু আলাইহি ওয়াসাল্লাম-এর সময়ে এই জায়গায় অবস্থান করেছিলাম। সে সময় আমার কাছে খুব কম সামগ্রী ছিল। আমি এবং আয়েশা (রাযিঃ) ও জুবাইর (রাযিঃ) উমরা করেছিলাম এবং তাওয়াফ করে হালাল হয়েছিলাম।

(সহীহ বুখারী, ১ম খণ্ড, পৃঃ ২২৭)

তিনি খুবই বীর প্রকৃতির ছিলেন। তাঁর চারিত্রিক সাহসের কিছু দৃষ্টান্ত উপরে বলা হয়েছে। সায়ীদ বিন আস-এর শাসনকালে যখন ইসলামে অবক্ষয়ের সূচনা ঘটলো এবং অনিরাপত্তা বিস্তৃত হল- তিনি সাথে একটি খঞ্জর রেখেছিলেন, লোকেরা জিজ্ঞেস করলে, এটি কেন রেখেছেন আপনি? তিনি বললেন, যদি কোন চোর আসে তো এই খঞ্জর দিয়ে তার জীবন শেষ করে দেবো।

(তাবারানী, ১৩ খণ্ড, পৃঃ ২৪৬১)

হযরত আসমা (রাযিঃ)কে সবাই সম্মান করতো এবং পূত পবিত্র বলে জানত। লোকেরা তাকে দিয়ে দু'আ করাত; কোন রমণী যদি জুরাক্রান্ত হত এবং দু'আ নেয়ার জন্য আসতো তিনি তার বুকের উপর পানির ছিটা দিতেন এবং বলতেন মহানবী সাল্লাল্লাহু আলাইহি ওয়াসাল্লাম বলেছেনঃ পানি দিয়ে এটি ঠান্ডা করো।

(সহীহ বুখারী, ২য় খণ্ড, পৃঃ ৮৫২)

হযরত বিন উমর (রাযিঃ) এবং হযরত আয়েশা (রাযিঃ) মহানবী সাল্লাল্লাহু আলাইহি ওয়াসাল্লাম-এর কাছ থেকে বর্ণনা করেছেন যে, জ্বর দোজখের আগুনের গরম থেকে জ্বাত, তা পানি দিয়ে ঠান্ডা কর।

(সহীহ বুখারী, বাবুল হমা)

আর ঘরের কেউ যদি অসুস্থ হত, তিনি মহানবী সাল্লাল্লাহু আলাইহি ওয়াসাল্লাম-এর জামা (যা হযরত আয়েশা (রাযিঃ) মহানবী সাল্লাল্লাহু আলাইহি ওয়াসাল্লাম-এর মৃত্যুর পরে তাঁকে দিয়েছিলেন) ধুয়ে তার পানি অসুস্থকে খাওয়াতেন তাতে অসুস্থ ব্যক্তি ভাল হয়ে যেতো।

(মুসনাদ, ষষ্ঠ খণ্ড, পৃঃ ৩৪৮)

হযরত ফাতিমা বিনতে কায়েস (রাযিঃ)

নাম ও বংশ পরিচয় : ফাতিমা ছিল তার নাম। বংশ তালিকা এরকমঃ ফাতিমা বিনতে কায়েস বিন খালেদ বিন ওহাব বিন সা'লাবা বিন ওয়ায়েলা বিন আমর বিন সয়বান বিন মুহাবের বিন ফিহর। তার মাতার নামঃ উমাইয়া বিনতে রবীয়া; তার মা বনু কেনানার মেয়ে ছিলেন।

বিবাহ : আবু আমর বিন হাফস বিন মুগীরার সঙ্গে তাঁর বিয়ে হয়।

ইসলাম গ্রহণ : ইসলামের প্রাথমিক যুগে তিনি ইসলামে দীক্ষিত হন।

হিজরত : তিনি প্রথম দিকেই হিজরত করেন।

সাধারণ অবস্থা : ১০ হিজরীতে হযরত আলী (রাযিঃ) একদল সৈন্য নিয়ে ইয়েমেন গান; আবু আমরও তাঁর সাথে ছিলেন। যাবার সময় আয়্যাশ বিন আবি রবীয়া মারফত নিজের স্ত্রীকে শেষ তালাক দিয়ে দেন (দুই তালাক প্রথমে দিয়ে দিয়েছিলেন) এবং পাঁচ পাঁচ সের করে যব এবং খোরমা খেজুর পাঠিয়ে দেন। হযরত ফাতিমা বিনতে কায়েস (রাযিঃ) খাবার এবং ঘরের দাবী করলে আয়্যাশ বললেন, যা কিছু দেয়া হয়েছে, কেবল এহসান বা করুণা মাত্র, তা না হলে আমার দায়িত্ব এটুকুও নেই। এই উত্তর শুনে ফাতেমা খুব রাগান্বিত হন এবং কাপড় নিয়ে মহানবী সাল্লাল্লাহু আলাইহি ওয়াসাল্লাম-এর কাছে গেলেন, খালেদ বিন অলিদ (রাযিঃ) প্রমুখরাও পৌঁছে গেলেন। মহানবী সাল্লাল্লাহু আলাইহি ওয়াসাল্লাম তাকে জিজ্ঞেস করলেনঃ তোমাকে কয়বার তালাক দিয়েছে তোমার স্বামী? তিনি বললেনঃ তিনবার; মহানবী সাল্লাল্লাহু আলাইহি ওয়াসাল্লাম বললেনঃ এখন তুমি নফকা পাওনা। (ইদ্রতের সময়ে মহিলার খাওয়া-পরাচর দায়িত্ব সেই পুরুষের, যে তালাক দান করেছে। হযরত ফাতেমার (রাযিঃ) এই

হাদীছ সম্পর্কে জানতেন। এ সম্পর্কে অনেক বিস্তারিত আলোচনা ফিকাহ ও উসূলে ফিকাহ বিষয়। এখানে তার বিকাশ বা প্রয়োজন কোনটাই নেই) তুমি উম্মে সুরাইফের বাড়ীতে ইন্দত পালন করে নাও। কিন্তু যেহেতু উম্মে শুরাইফের আত্মীয় স্বজন তার বাড়ীতে গমনাগমন করতো, মহানবী সাল্লাল্লাহু আলাইহি ওয়াসাল্লাম বললেনঃ বিন উম্মে মকতুম অন্ধ এবং তোমার চাচাতো ভাই। কাজেই তোমার তার কাছে থাকাই ভাল হবে। ইন্দতের সময় পূর্ণ হবার পর চারদিক থেকে বিয়ের পয়গাম এল। আমীরে মুআবিয়া, আবু জাহাম এবং উসামা বিন যায়েদ প্রস্তাব প্রেরণ করলেন। মহানবী সাল্লাল্লাহু আলাইহি ওয়াসাল্লাম প্রথম দু'জনের প্রস্তাব নাকচ করে দেন, এই মর্মে যে, প্রথম ব্যক্তি গরীব এবং দ্বিতীয় ব্যক্তি বদমেজাজী ছিল। তারপর ফাতিমা বিনতে কয়েস (রাযিঃ)কে বলেন যে, তুমি উসামাকে বিয়ে করো নাও। কিন্তু যেহেতু ফাতিমা বিনতে কয়েস (রাযিঃ)-এর খেয়াল ছিল মহানবী সাল্লাল্লাহু আলাইহি ওয়াসাল্লামই তাকে বিয়ে করে নেবেন তাই রাজী হলেন না। মহানবী সাল্লাল্লাহু আলাইহি ওয়াসাল্লাম বললেনঃ 'আল্লাহ এবং আল্লাহর রাসূলের আনুগত্যে করো তাতেই তোমার কল্যাণ নিহিত' এটি শুনে ফাতিমা বাধ্য হলেন এবং হযরত উসামা (রাযিঃ)কে বিয়ে করেন। তিনি বলেন, এরপর আমি ঈর্ষণীয় হয়ে গেলাম।

(সহীহ মুসলিম, ১ম খণ্ড, পৃঃ ৫৮৩, ৫৮৪, ৫৮৫, মসনদ, ষষ্ঠ খণ্ড, পৃঃ ৪১১, ৪১২)

২৩ হিজরীতে যখন হযরত উমর (রাযিঃ) ইন্তেকাল করেন, তখন মজলিসে শুরার বৈঠক ফাতেমার ঘরেই বসতো। (উসুদুল গাবা, ৫ম খণ্ড, পৃঃ ৫২৬)

৫৪ হিজরীতে হযরত উসামা (রাযিঃ) ইন্তেকাল করেন। ফাতেমা এতে খুবই মর্মান্বিত হন। পরবর্তীতে তিনি আর বিয়ে করেননি; নিজের ভাই দাহহাক এর সঙ্গে থাকেন। ইয়াজিদ তার শাসনকালে দাহহাককে ইরাকের গভর্ণর নিযুক্ত করলে ফাতিমাও তার সাথে কুফা চলে আসেন এবং কুফাতেই বসবাস শুরু করেন।

মৃত্যু : মৃত্যুবর্ষ জানা যায়নি। তবে তিনি হযরত বিন জুবাইরের খিলাফত সময় পর্যন্ত জীবিত ছিলেন। (সহীহ মুসলিম, ১ম খণ্ড, পৃঃ ৫৮৬)

অবয়ব : তিনি সুন্দরী ছিলেন। (ইসাবা, ৮ম খণ্ড, পৃঃ ১৬৪)

মর্যাদা ও মহত্ত্ব : 'উসুদুল গাবা' গ্রন্থে আছেঃ 'হযরত আসমা (রাযিঃ) খুবই বিদূষী ও গুণবতী মহিলা ছিলেন। (উসুদুল গাবা, ৫ম খণ্ড, পৃঃ ৫২৬)

হযরত সায়ীদ বিন জুবাইরের কন্যা। হযরত আবদুল্লাহ বিন আমরের সঙ্গে বিবাহ সূত্রে সম্পর্কিত ছিলেন। তিনি তাঁকে তিন তালাক দেন; ফাতিমা ছিলেন তার খালা। তিনি তাকে বলে পাঠালেন আমার বাড়িতে চলে আসো। মরওয়ান কাবিছাকে পাঠালেন এই বলে যে, তার কারণ অনুসন্ধান কর। কাবিছা এসে বললঃ আপনি একজন মহিলাকে তার ইন্দতকাল অতিবাহিত হওয়ার পূর্বে ঘর থেকে বের করছেন কেন? তখন হযরত আসমা (রাযিঃ) নিজের ঘটনা বর্ণনা করেন এবং কুরআনের আয়াতের সাক্ষ্য দিয়ে প্রমাণ জ্ঞাপন করেন; কুরআনুল কারীমে আছে :

‘যখন তোমরা মহিলাদেরকে তালাক দেবে— তাদেরকে ইদ্দতের সময় তালাক দেবে এবং গণনা করবে এবং আল্লাহকে ভয় করো এবং তাদেরকে তাদের ঘর থেকে বের করো না এবং তারাও বেরোবে না— কিন্তু যদি প্রকাশ্য লজ্জাহীনতায় জর্জরিত হয়।’

এটি হচ্ছে ‘মুরাজেআত’ বা প্রত্যাবর্তনের অবস্থা; এরপর কুরআনে আছে: ‘তারপর যখন নির্ধারিত সময়ে পৌঁছে যাবে— তখন তাদেরকে ভালভাবেই আগলে রেখো অথবা ভালভাবেই আলাদা করে দাও।’

এরই ভিত্তিতে তিনবারের পর আর কোন রকম সম্ভাবনার সুযোগ নেই। এরপর বললঃ যেহেতু তোমাদের দৃষ্টিতে রমণী যতক্ষণ পর্যন্ত গর্ভবতী না হবে তার ভরণপোষণ দেয়া যাবে না, কাজেই তাকে রুদ্ধ করে রাখা একেবারেই নিরর্থ। মরওয়ান যখন ফাতিমা (রাযিঃ) এর কথাবার্তা অবহিত হলেন তখন তিনি বললেন এটি তো মহিলার কথা; অতঃপর সেই তালাকপ্রাপ্তা মহিলাকে নির্দেশ দিলেন নিজের ঘরে ফিরে আসতে; তিনি ফিরে এল এবং সেখানেই ইদ্দত পালন করলেন।

(সহীহ মুসলিম, ১ম খণ্ড, পৃঃ ৫৯৪, সনদ, ষষ্ঠ খণ্ড, পৃঃ ৪১৫, ৪১৬)

ফাতিমা (রাযিঃ) মহানবী সাল্লাল্লাহু আলাইহি ওয়াসাল্লাম-এর নিকট থেকে কয়েকটি হাদীছ বর্ণনা করেন যেগুলো বেশ কিছু ব্যক্তির মাধ্যমে বর্ণিত আছে; তাদের কয়েকজনের নাম নিম্নরূপ :

কাসেম বিন মুহাম্মদ, আবু বকর বিন আবুল জাহাম, আবু সাদমা, সয়ীদ বিন মুসাইয়াব, উরওয়া, আবুল্লাহ বিন আবদুল্লাহ, আসওয়াদ, সোলায়মান বিন ইয়াসার, আবদুল্লাহ, মুহাম্মদ বিন আবদুর রহমান বিন সওবান, শুআবা, আবদুর রহমান বিন আসেম, তমূম (রাযিঃ)

চরিত্র— বৈশিষ্ট্য : তাঁর আচরণ ও চলাফেরা খুবই ভদ্র ও শালীন ছিল; তাঁর ছাত্র শা‘বী তাঁর সঙ্গে দেখা করতে এলে তিনি তাঁকে খাওয়ান এবং সিততু পরিবেশন করেন।

(সহীহ মুসলিম, ১ম খণ্ড, পৃঃ ৫৮৫)

হযরত শিফা বিনতে আবদুল্লাহ (রাযিঃ)

নাম ও বংশ পরিচয় : শিফা তাঁর নাম; তিনি ছিলেন কুরাইশ গোত্রের আদি বংশের মেয়ে। তাঁর বংশ তালিকা এরকমঃ শিফা বিনতে আবদুল্লাহ বিন আবদে শামস বিন খলফ বিন সাদ্দাদ বিন আবদুল্লাহ বিন কারত বিন জিরাহ বিন আদি বিন কা’ব বিন লুই। মাতার নামঃ ফাতিমা বিনতে ওহাব বিন আমর বিন আয়েজ বিন উমর বিন মহযুম।

বিবাহ : আবু হাশমা বিন হোয়ায়ফা আদদীর সঙ্গে তাঁর বিয়ে হয়।

ইসলাম গ্রহণ : হিজরতের পূর্বে তিনি মুসলমান হন।

(ইসাবা, ৮ম খণ্ড, পৃঃ ২০)

সাধারণ অবস্থা : মহানবী সাল্লাল্লাহু আলাইহি ওয়াসাল্লামকে তিনি খুব ভালবাসতেন।

মহানবী সাল্লাল্লাহু আলাইহি ওয়াসাল্লাম যদি কখনো তাঁর গৃহে যেতেন, আরাম

করতেন। মহানবী সাল্লাল্লাহু আলাইহি ওয়াসাল্লাম-এর জন্যে তিনি একটি বিছানা এবং চাঁদর রেখে দিয়েছিলেন। যেহেতু সেসবের মধ্যে মহানবী সাল্লাল্লাহু আলাইহি ওয়াসাল্লাম-এর ঘাম জমা হতে, সেজন্যে এগুলো খুবই বরকতপূর্ণ ছিল। হযরত শিফা (রাযিঃ)-এর পর তাঁর সন্তানরা এগুলো খুবই যত্ন করে সংরক্ষণ করেন। কিন্তু মারওয়ান এসব জিনিস নিয়ে নেয়। (উসুদুল গাবা, ৫ম খণ্ড, পৃঃ ৪৮৬, ইসাবা, ৮ম খণ্ড, পৃঃ ১২১)

মহানবী সাল্লাল্লাহু আলাইহি ওয়াসাল্লাম তাঁকে একটি ঘরও দিয়েছিল। তিনি তাঁর ছেলেকে নিয়ে সেখানেই থাকতেন। (ইসাবা, ৮ম খণ্ড, পৃঃ ১২১, ইবনে সা'আদ থেকে গৃহীত) হযরত উমর (রাযিঃ) নিজের খিলাফত কালে তার সঙ্গে ভাল ব্যবহার করেন। বিন সা'আদ লিখেছেনঃ হযরত উমর (রাযিঃ) তাঁর বিবেচনাকে প্রাধান্য দিতেন, তাঁর মর্যাদার সম্মান করতেন এবং তাকে বাজার ব্যবস্থাপনার দায়িত্ব দিতেন। (ইসাবা, ৮ম খণ্ড, পৃঃ ১২১)

মৃত্যু : তাঁর মৃত্যুবর্ষ জানা যায়নি।

সন্তান-সন্ততি : সন্তান সন্ততির মধ্যে দু'জনের কথা জানা যায়। একজনের নাম সোলায়মান, আরেকজন মেয়ে ছিলেন-শরহবীল বিন হাসানার সঙ্গে তার বিয়ে হয়।

মর্যাদা ও মহত্ত্ব : অন্ধকার যুগে তিনি দু'টো বিষয়ে বিখ্যাত ছিলেনঃ ঝাড়ফুক আর লেখার কাজ। ঝাড়-ফুকের ক্ষেত্রে মহানবী সাল্লাল্লাহু আলাইহি ওয়াসাল্লাম তাকে গ্রহণযোগ্য সাব্যস্ত করেন এবং মহানবী সাল্লাল্লাহু আলাইহি ওয়াসাল্লাম অনুমতি দান করেন তাকে। মহানবী সাল্লাল্লাহু আলাইহি ওয়াসাল্লাম তাঁকে বলেছিলেন হাফসা (রাযিঃ)কে এটি শিখিয়ে দাও। তাঁর লেখার বিষয়েও মহানবী সাল্লাল্লাহু আলাইহি ওয়াসাল্লাম একই কথা বলেন :

(মুসনাদ, ষষ্ঠ খণ্ড, পৃঃ ৩৭৩)

পিঁপড়ের কামড়ে এই মন্ত্র উচ্চারণ করতেন :

(উসুদুল গাবা, ৫ম খণ্ড, পৃঃ ৪৮৭)

بِسْمِ اللَّهِ صَلُّوا صَلْبَ جَبْرِ تَعُوذًا مِنْ أَفْوَاهِهَا فَلَا تَضُرُّ أَحَدًا اللَّهُمَّ اكْشِفْ

الْبَاسَ رَبَّ النَّاسِ

হযরত শিফা (রাযিঃ) মহানবী সাল্লাল্লাহু আলাইহি ওয়াসাল্লাম এবং হযরত উমর (রাযিঃ)-এর থেকে কতিপয় হাদীছ বর্ণনা করেন। এগুলোর সংখ্যা খোলাসা গ্রন্থকারের মতেঃ ১২। বর্ণনাকারীদের মধ্যে রয়েছেন তাঁর ছেলে এবং দুজন পৌত্র আবু বকর, উসমান এবং আবু সালমা, হযরত হাফসা (রাযিঃ) এবং আবু ইসহাক প্রমুখ।

চরিত্র- বৈশিষ্ট্য : উসুদুল গাবা গ্রন্থে উল্লিখিত আছে : তিনি খুবই বিদূষী এবং গুণবতী ছিলেন।

(উসুদুল গাবা, ৫ম খণ্ড, পৃঃ ৪৮৬)

হযরত উমর (রাযিঃ) একবার তাঁকে ডেকে একটি চাদর দেন এবং আতিকা বিনতে উসাইদকে তাঁর চেয়ে ভাল চাদর দান করেন। তিনি বললেনঃ তোমার হাত ময়লা-যুক্ত হোক। তুমি তাকে আমার চেয়ে উত্তম চাদর দিলে, অথচ আমি তাঁর আগে মুসলমান হয়েছি, তোমার চাচাত বোনও আমি। এছাড়াও তুমি আমাকে ডেকে এনেছো। অথচ

আতিকা নিজে এসেছে। হযরত উমর বললঃ তোমাকেই ভাল চাদরটি দিতাম আমি; কিন্তু ইনি এসে যাওয়ার কারণে সৌজন্য করতে হল, কেননা ইনি মহানবী সাল্লাল্লাহু আলাইহি ওয়াসাল্লাম-এর বংশগত দিক থেকে নিকটবর্তী। (উসুদুল গাবা, ৬ম খণ্ড, পৃঃ ৪৯৭)

হযরত যয়নব বিনতে আবী মুয়াবিয়া (রাযিঃ)

নাম ও বংশ পরিচয় : যয়নব তাঁর নাম; ওরফে রায়েতা। তিনি কবिलाয়ে সাকিফের মেয়ে ছিলেন। বংশক্রম এরকমঃ যয়নব বিনতে আবদুল্লাহ আবী মুয়াবিয়া বিন ইতাব বিন আসআদ বিন গাদিরা বিন হাতিত বিন জশম বিন সাকিফ।

বিবাহ : হযরত আবদুল্লাহ বিন মাসউদ (রাযিঃ)-এর সঙ্গে বিবাহ হয়। যেহেতু আবদুল্লাহ বিন মসউদ (রাযিঃ)-এর কোন জীবিকা-অবলম্বন ছিল না। আর হযরত যয়নব (রাযিঃ) ছিলেন কারিগর, ফলে নিজের স্বামী এবং সন্তানদের নিজেই দায়িত্ব গ্রহণ করেন। একদিন বলতে লাগলেন; তুমি এবং তোমার ছেলেপেলে আমাকে দান-খয়রাত করা থেকে বঞ্চিত রেখেছো-যা কিছু কামাই তা তোমাদের জন্যে চলে যায়। ঠিক আছে, কিন্তু এতে আমার লাভটা কি? হযরত আবদুল্লাহ বিন মাসউদ (রাযিঃ) বললেনঃ তুমি তোমার লাভের ক্ষেত্র বের কর, তোমার ক্ষতি আমি পছন্দ করি না। হযরত যয়নব (রাযিঃ) মহানবী সাল্লাল্লাহু আলাইহি ওয়াসাল্লাম-এর কাছে এসে বললেনঃ আমি কারিগর এবং কারিগরী পেশার মাধ্যমে যা কিছু আয় উপার্জন করি, তা স্বামী এবং ছেলে সন্তানদের জন্যে ব্যয়িত হয়ে যায়। কারণ আমার স্বামীর কোন জীবিকা অবলম্বন নেই, আর এজন্যেই আমি গরীবদেরকে দান-খয়রাত করতে পারি না। এই অবস্থায় আমার কি কোন ছুঁয়াব হচ্ছে? মহানবী সাল্লাল্লাহু আলাইহি ওয়াসাল্লাম বললেনঃ হ্যাঁ তোমার উচিত তাঁদের দেখা শোনা করা। (সহীহ মুসলিম)

সাধারণ অবস্থা : হযরত যয়নব (রাযিঃ)-এর অবস্থা বেশী জানা যায়নি। তার মৃত্যুবর্ষও অজ্ঞাত।

সন্তান-সন্ততি : হযরত যয়নবের সন্তান ছিল আবু উবাইদ (রাযিঃ) যিনি সমসাময়িক কালের বিখ্যাত মুহাদ্দিছ ছিলেন।

মর্যাদা ও মহত্ত্ব : হযরত যয়নব (রাযিঃ) মহানবী সাল্লাল্লাহু আলাইহি ওয়াসাল্লাম, হযরত উমর (রাযিঃ) এবং হযরত আবদুল্লাহ বিন মসউদ (রাযিঃ)-এর নিকট থেকে কিছু হাদীছ বর্ণনা করেন- বর্ণনাকারীরা হলেনঃ আবু উবাইদা (রাযিঃ) আমর বিন হারিছ বিন আবি দরার, বসর বিন সয়ীদ, উবাইদ বিন সিয়াক, কুলসুম, মুহাম্মদ বিন আমর বিন হারিস প্রমুখ।

চরিত্র-বৈশিষ্ট্য : নবীজীর দরবারে তিনি বিশেষ মর্যাদা অর্জন করেন-প্রায়ই মহানবী সাল্লাল্লাহু আলাইহি ওয়াসাল্লাম তাঁর বাড়ীতে আসতেন-যেতেন। একবার তিনি মহানবী সাল্লাল্লাহু আলাইহি ওয়াসাল্লাম-এর মাথায় উকুন দেখেছিলেন-মুহাজেরিনদের

অন্যান্য মহিলারাও ছিল। একটি মাসআলা এলে তিনি উকুন দেখা বাদ দিয়ে বলতে শুরু করলেন; মহানবী সাল্লাল্লাহু আলাইহি ওয়াসাল্লাম বললেনঃ তুমি চক্ষু দিয়ে ভোঁ কথা বলছো না-কাজেই বলো, উকুনও দেখ। (মুসনাদ, ষষ্ঠ খণ্ড, পৃঃ ৩৬৩)

হযরত আসমা বিনতে এজীদ (রাযিঃ)

নাম ও বংশ পরিচয় : ‘আসমা’ ছিল তাঁর নাম। তাঁর উপনামঃ উম্মে সালমা। বংশক্রম এরকমঃ আসমা বিনতে এজীদ বিন আসসাকান বিন রাযি বিন ইমরাউল কায়েস বিন যায়েদ বিন আবদুল আশহল বিন হাইসম বিন হারিস বিন খযরজ বিন আমর বিন মালেক বিন আওস।

ইসলাম গ্রহণ : হিজরতের পর তিনি মুসলমান হন এবং কয়েকজন মহিলাসমেত মহানবী সাল্লাল্লাহু আলাইহি ওয়াসাল্লাম-এর খিদমতে আগমণ করেন বাইয়াত করতে। মহানবী সাল্লাল্লাহু আলাইহি ওয়াসাল্লাম সাহাবীদের সমাবেশে ছিলেন তখন- তিনি বললেনঃ আমি মুসলমান মহিলাদের পক্ষ থেকে একটি পয়গাম নিয়ে এসেছি- আল্লাহ তায়ালা আপনাকে নারী পুরুষ নির্বিশেষে সবার হিদায়েত বা নির্দেশনার জন্যে প্রেরণ করেছেন, আমরা আপনার আনুগত্য করেছি এবং আপনার উপর ঈমান এনেছি। কিন্তু আমাদের অবস্থা পুরুষদের চেয়ে পুরোপুরি পৃথকঃ আমরা অন্দরবাসিনী। এজন্যে আমরা জুমু‘আ এবং জামাতে হাজির হতে পারি না- আর পুরুষরা তাতে হাজির হতে পারে। তারা অসুস্থদের সেবা করে, জানাযার নামায পড়ে এবং সবচেয়ে বড় কথা জিহাদ করে, হজেয যায়। কিন্তু এই সকল অবস্থায় আমরা ঘরে বসে থেকে তাদের ছেলেপেলেদের লালন পালন করি, ঘর সংরক্ষণ করি, কাপড়ের জন্যে চরকা কাটি-তাহলে এসব অবস্থায় আমাদের কি কোন সওয়াব মিলবে? মহানবী সাল্লাল্লাহু আলাইহি ওয়াসাল্লাম এসব কথা শোনার পর সাহাবাদের জিজ্ঞেস করলেনঃ তোমরা কি কোন মহিলার কাছে এ ধরনের কথা শুনেছ। তারা বললেনঃ না, শুনিনি। মহানবী সাল্লাল্লাহু আলাইহি ওয়াসাল্লাম হযরত আসমা (রাযিঃ)কে বললেন স্ত্রীর জন্যে তার স্বামীর সন্তোষবিধান একান্ত কর্তব্য। সে যদি দাম্পত্য- দাবী, স্ত্রীর কর্তব্য এবং স্বামীর সন্তোষ বিধায়ক- পথে চলে তাহলে পুরুষ যে পরিমাণ ছওয়াব পাবে, সেও সে পরিমাণ ছওয়াব পাবে। (উসদুল গাবা, ৫ম খণ্ড, পৃঃ ৩৯৮, ইসতিয়াব, ২য় খণ্ড, পৃঃ ৭২৬)

তিরমিযী শরীফে, বিন সাআদের বর্ণনায় এবং মুসনাদে আহমদ বিন হাম্বল-এ এই বাইয়াতের বিশদ বর্ণনা ও উল্লেখ পাওয়া যায়। মুসনাদে আছে যে, এই বাইয়াতে হযরত আসমা (রাযিঃ)-এর খালাও উপস্থিত ছিলেন- যিনি সোনার কাঁকন এবং স্বর্ণাঙ্গুরী পরিধান করেছিল। মহানবী সাল্লাল্লাহু আলাইহি ওয়াসাল্লাম জিজ্ঞেস করলঃ এগুলোর যাকাত দেয়া হয় তো। তিনি বললেনঃ না। মহানবী সাল্লাল্লাহু আলাইহি ওয়াসাল্লাম বললেনঃ তাহলে কি তোমার পছন্দ হবে আল্লাহ যদি তোমাকে আগুনের

আংটি ও আঙনের কাঁকন পরিয়ে দেয়? হযরত আসমা (রাযিঃ) বললেনঃ খালা ওগুলো খুলে ফেল। সাথে সাথে তিনি সব অলংকার খুলে ছুড়ে ফেলে দেন। আসমা (রাযিঃ) বললেনঃ হে রাসূলে কারীম সাল্লাল্লাহু আলাইহি ওয়াসাল্লাম। আমরা যদি অলংকার না পরি স্বামী একেবারে মামুলী বা মূল্যহীন জ্ঞান করবে। মহানবী সাল্লাল্লাহু আলাইহি ওয়াসাল্লাম বললেনঃ তাহলে রূপোর অলংকার বানাও এবং তার উপর ডাফরানের রং মেখে নাও— স্বর্ণের চমক দেখা দেবে। যাহোক এসব কথাবার্তার পর যখন বাইয়াতের সময় এল মহানবী সাল্লাল্লাহু আলাইহি ওয়াসাল্লাম তাঁদেরকে মৌখিকভাবে কয়েকটি অঙ্গীকার করান। হযরত আসমা (রাযিঃ) বললেনঃ হে রাসূলে কারীম সাল্লাল্লাহু আলাইহি ওয়াসাল্লাম! আমরা আপনার কাছে বাইয়াত করছি এই বলে নিজের হাত প্রসারিত করল। মহানবী সাল্লাল্লাহু আলাইহি ওয়াসাল্লাম বললেনঃ আমি মহিলাদের সঙ্গে করমর্দন করি না। কোন কোন বর্ণনায় আছে কাঁকনের ঘটনা আসমা (রাযিঃ)-এর নিজের।

(মুসনাদ, ৬ষ্ঠ খণ্ড, পৃঃ ৪৫৩, ৪৫৪, ৪৬১)

সাধারণ অবস্থা : প্রথম হিজরীতে হযরত আয়েশা (রাযিঃ) নববধূ হয়ে শ্বশুরালয়ে অর্থাৎ নবীগৃহে গমন করেন এবং তিনি তাঁর আত্মীয় পরিজন নিয়ে মহানবী সাল্লাল্লাহু আলাইহি ওয়াসাল্লাম-এর ঘরে আসেন। তাঁকে যারা সাজিয়েছিলেন তাঁদের একজন হযরত আসমা (রাযিঃ)। হযরত আয়েশা (রাযিঃ)কে পালঙ্কে বসিয়ে মহানবী সাল্লাল্লাহু আলাইহি ওয়াসাল্লামকে ডাকেন। মহানবী সাল্লাল্লাহু আলাইহি ওয়াসাল্লাম এসে তাঁর পাশে বসে যান। কেউ একজন দুধ দিলো। মহানবী সাল্লাল্লাহু আলাইহি ওয়াসাল্লাম কিছু খেয়ে হযরত আয়েশা (রাযিঃ)কে দিয়ে দেন। আয়েশা (রাযিঃ) লজ্জাবোধ করেন এবং মাথা আনত করে নেন। হযরত আসমা (রাযিঃ) একটু ধমক দিয়ে বললেনঃ মহানবী সাল্লাল্লাহু আলাইহি ওয়াসাল্লাম যা দিচ্ছেন তা নিয়ে নাও। হযরত আয়েশা (রাযিঃ) দুধ নিয়ে কিছু পান করেন এবং আবার মহানবী সাল্লাল্লাহু আলাইহি ওয়াসাল্লামকে দিয়ে দেন, মহানবী সাল্লাল্লাহু আলাইহি ওয়াসাল্লাম হযরত আসমা (রাযিঃ)কে দেন। হযরত আসমা (রাযিঃ) দুধের পেয়ালা জানুর উপর রেখে দোলাতে শুরু করেন— দুধ যাতে মহানবী সাল্লাল্লাহু আলাইহি ওয়াসাল্লাম-এর মুখ যেখানে স্পর্শ করেছিল সেখানে নিজের মুখ লাগতে পারে। এরপর মহানবী সাল্লাল্লাহু আলাইহি ওয়াসাল্লাম বললেনঃ অন্যান্য মহিলাদেরও দাও কিন্তু সবাই বললেন আমাদের খাওয়ার ইচ্ছে নেই, মহানবী সাল্লাল্লাহু আলাইহি ওয়াসাল্লাম বললেনঃ ক্ষুধার সঙ্গে আবার মিথ্যাও?

(মুসনাদ, ৬ষ্ঠ খণ্ড, পৃঃ ৪৫৮, ৪২০)

১৩ হিজরীতে ইয়ারমুকের ঘটনা ঘটে। সেবারে তিনি নিজের তাঁবুর খুটি দিয়ে ৯জন রোমীয়কে হত্যা করেন।

(ইসাবা, ৮ম খণ্ড, পৃঃ ১৩)

মৃত্যু : ইয়ারমুকের ঘটনার পর তিনি বেশ কিছুকাল জীবত ছিলেন— তারপর তাঁর ইস্তেকাল-হয়; কিন্তু মৃত্যু-বর্ষ জানা যায়নি।

মর্যাদা ও মহত্ব : হযরত আসমা (রাযিঃ) মহানবী সাল্লাল্লাহু আলাইহি ওয়াসাল্লাম-এর নিকট থেকে কতিপয় হাদীছ বর্ণনা করেন। সেগুলোর বর্ণনাকারীরা হলেনঃ মাতমুদ দিন আমর আনসারী, মুহাজ্জের বিন আব্বি মুসলিম, শাহর বিন হাওশব, মুজাহিদ, ইসহাক বিন রাশেদ; তবে এদের মধ্যে সবার চেয়ে বেশী শাহর বিন হাওশব বর্ণনা করেন।

চরিত্র-বৈশিষ্ট্য : ইসতিয়াব-গ্রন্থে আছেঃ তিনি দ্বীনের দিক থেকে যেমন মেধা মনীবার দিক থেকেও তেমনি বিশিষ্ট ছিলেন। তিনি মহানবী সাল্লাল্লাহু আলাইহি ওয়াসাল্লাম-এর সেবা করতেন (মুসনাদ, ষষ্ঠ খণ্ড, পৃঃ ৪৫৯)

একবার মহানবী সাল্লাল্লাহু আলাইহি ওয়াসাল্লাম-এর উদ্বী 'গজবার' নাকের নকিল ধরেছিল- তখন মহানবী সাল্লাল্লাহু আলাইহি ওয়াসাল্লাম-এর ওপর অহী অবতীর্ণ হচ্ছিলো এবং তিনি ভয় পাচ্ছিলেন না জানি আবার উদ্বীর হাত-পা ভেঙ্গে যায়।

(মুসনাদ, ষষ্ঠ খণ্ড, পৃঃ ৪৫৮, ৪৫৫)

হযরত আসমা (রাযিঃ) অধিকাংশ সময় মহানবীর গৃহে উপস্থিত হতেন; একবার তিনি বসেছিলেন, মহানবী সাল্লাল্লাহু আলাইহি ওয়াসাল্লাম দাজ্জালের কথা তুললেন। ঘরের মধ্যে রোদন আর ক্রন্দনের বাড় উঠলো। মহানবী সাল্লাল্লাহু আলাইহি ওয়াসাল্লাম বাইরে থেকে ফিরে এসেও তাই দেখলেন। জিজ্ঞেস করলেনঃ তুমি কাঁদছো কেন? তিনি বললঃ আমাদের দারিদ্র্য তো এইরকমই যে, দাসী আটা দিয়ে রুটি তৈরী করার আগেই ক্ষুধায় জান বেরিয়ে যেতে চায়। তার উপর দাজ্জালের সময়ে যে দুর্ভিক্ষ দেখা দেবে, তখন কিভাবে সহ্য করবো? (অর্থাৎ তখন তো তার কবলে পড়ে যাবে) মহানবী সাল্লাল্লাহু আলাইহি ওয়াসাল্লাম বললেনঃ সেদিন তসবীহ ও তাকবীর ক্ষুধা থেকে রক্ষা করবে। তারপর বললেনঃ রোদনের দরকার নেই- আমি যদি সেদিন পর্যন্ত জীবিত থাকি নিজেই বুক এগিয়ে দেবো; অন্যথা আমার পর আল্লাহ তা'আলা প্রত্যেক মুসলমানের হেফাজত করবেন।

(মুসনাদ, ষষ্ঠ খণ্ড, পৃঃ ৪৫৩, ৪৫৪)

হযরত আসমা (রাযিঃ) অতিথিপরায়ণ ছিলেন। একবার হযরত শাহর দিন হাওশব এলেন। তিনি তাঁর সামনে খাবার রাখলেন- হযরত শাহর খেতে চাইলেন না। তখন তিনি মহানবী সাল্লাল্লাহু আলাইহি ওয়াসাল্লাম-এর একটি ঘটনা উল্লেখ করেন; যে ঘটনায় এরকম একটি ইঙ্গিত ছিল যে, এরকম অস্বীকার করা উচিত নয়; তিনি বললেনঃ ঠিক আছে, এরপর আর এরূপ ভুল করবো না। (মুসনাদ, ষষ্ঠ খণ্ড, পৃঃ ৪৫৮)

হযরত উম্মে দারদা (রাযিঃ)

নাম ও বংশ পরিচয় : উম্মে দারদা দু'জন ছিলেন; দু'জনেই আবু দারদার স্ত্রী ছিলেন- তবে দু'জনের মধ্যে যিনি ছিলেন বড় তিনিই সাহাবী, অন্যজন মহানবী সাল্লাল্লাহু আলাইহি ওয়াসাল্লাম এর সান্নিধ্য পাননি। ইমাম আহমদ বিন হাম্বল এবং হযরত ইয়াহ'য়্যা বিন মুয়ীনের কথা অনুসারে সাহাবী উম্মে দারদার নাম ছিল খি'রা। তিনি আবু হাদরদ আসলামীর কন্যা ছিলেন।

মৃত্যু : তিনি হযরত আবু দারদা (রাযিঃ)-এর ইন্তেকালের দু'বছর পূর্বে সিরিয়ায় ইন্তেকাল করেন। তখন ছিল উসমান (রাযিঃ)-এর খিলাফতকাল।

মর্যাদা ও মহত্ত্ব : হাফেয বিন আবদুল বার লিখেছেনঃ উম্মে দারদা অত্যন্ত মেধাবী, গুণবতী এবং সুবিবেচক মহিলা ছিলেন। (ইসাবা, ৮ম খণ্ড, পৃঃ ৭৩)

তিনি মহানবী সাল্লাল্লাহু আলাইহি ওয়াসাল্লাম এবং হযরত আবু দারদা (রাযিঃ) থেকে কয়েকটি হাদীছ বর্ণনা করেন। তাঁর শিষ্যের নামঃ মায়মুন বিন মেহরান। তিনি যে হযরত উম্মে দারদা (রাযিঃ) থেকে সরাসরি সুস্পষ্ট হাদীছ গুনেছেন, এ বিষয়ে সবাই একমত। হাফেয বিন আবদুল বার আরো কয়েকজন বর্ণনাকারীর নামও উল্লেখ করেছেন কিন্তু তা ভুল। কারণ সে সব বর্ণনাকারীর কেউই হযরত উম্মে দারদা (রাযিঃ)-এর সমকালীন নন।

চরিত্র-বৈশিষ্ট্য : তিনি অত্যন্ত ইবাদতপরায়ণ ও দুনিয়াবিমুখ ছিল। (ইসাবা, ৮ম খণ্ড, পৃঃ ৭৩)

হযরত উম্মে হাকিম (রাযিঃ)

নাম ও বংশ পরিচয় : উম্মে হাকিম ছিলেন কুরাইশ গোত্রের মখযুম শাখার মেয়ে; পিতার নাম ছিল হারিস বিন হিশাম; মায়ের নাম ছিল ফাতেমা বিনতে অলিদ। তাঁর মামা ছিলেন হযরত খালেদ বিন ওলীদ (রাযিঃ)।

বিবাহ : আপন চাচাত ভাই ইকরামা বিন আবু জেহেলের সঙ্গে তাঁর বিবাহ হয়।

সাধারণ অবস্থা : তিনি ওহাদের যুদ্ধে কাফিরদের সঙ্গে অংশগ্রহণ করেন; কিন্তু ৮ম হিজরীতে মক্কা বিজয়ের সময় ইসলাম ছাড়া উপায় ছিল না। তাঁর স্বশুর আবু জেহেল ছিল ইসলামের সবচেয়ে বড় শত্রু এবং কুফরির মূল উৎস। স্বামী-ইকরামার ধমনীতেও একই রক্ত প্রবাহিত ছিল মামা খালেদও বহুদিন ইসলাম বিরোধী ছিল। কিন্তু এসব সত্ত্বেও নিজের নিষ্কলুষ স্বভাবের কারণে মক্কা বিজয়ের সময়ে দ্রুত ইসলাম গ্রহণ করেন। তাঁর স্বামী ইকরামা (রাযিঃ) জান বাঁচাবার গরজে ইয়েমেন চলে যায়। হযরত উম্মে হাকিম (রাযিঃ) মহানবী সাল্লাল্লাহু আলাইহি ওয়াসাল্লাম-এর কাছে স্বামীর জন্যে আশ্রয় ও অভয় প্রার্থনা করলে দয়ার সাগর মহানবী সাল্লাল্লাহু আলাইহি ওয়াসাল্লাম তাকে করুণা করেন। তারপর ইকরামা ইয়েমেন থেকে এসে শুদ্ধ-হৃদয়ে ইসলাম গ্রহণ করেন। হযরত ইকরামা (রাযিঃ) মুসলমান হয়ে নিজের সমস্ত কৃত পাপের প্রায়শ্চিত্ত করেন। অত্যন্ত জোশ ও আবেগের সঙ্গে যুদ্ধ বিগ্রহে অংশগ্রহণ করেন এবং খুবই দৃঢ়তা ও পৌরুষের সঙ্গে লড়াই করেন। হযরত আবু বকর (রাযিঃ)-এর খিলাফতকালে রোমানদের সঙ্গে যুদ্ধ হয়। হযরত ইকরামা (রাযিঃ) উম্মে হাকিম (রাযিঃ)কে নিয়ে সিরিয়া যান এবং আজনাদিনের যুদ্ধে বীরত্বের সাথে শাহাদাত বরণ করেন। হযরত উম্মে হাকিম (রাযিঃ) ইন্দতের পর খালেদ বিন সয়ীদ বিন আসকে

বিয়ে করেন। চারশো দিনার মোহরানা ঠিক হয় এবং বিবাহ অনুষ্ঠানের আয়োজন হয়। বিয়ে হয়েছিল ‘মারাজুস সফরে’ এটি দামেস্কের নিকটবর্তী অঞ্চল এবং এখানে সর্বমুহূর্তে রোমানদের আক্রমণের আশংকা ছিল। এজন্যে উম্মে হাকিম (রাযিঃ) খালেদ (রাযিঃ)কে বলেন যে, তুমি এখন অপেক্ষা করো বিবাহ অনুষ্ঠান পরে হবে। কিন্তু খালেদ (রাযিঃ) বলেন যে, এই যুদ্ধে আমার শাহাদাত প্রায় নিশ্চিত, কাজেই দেরী করা সঙ্গত ঠেকে না। অতঃপর বিবাহ অনুষ্ঠান পালিত হয়, অলিমার আমন্ত্রণ থেকে লোকেরা বেরুবার আগেই রোমানরা এসে পড়ে এবং তাদের ওপর চড়াও হয়। যুদ্ধ বেঁধে যায়, হযরত খালেদ যুদ্ধাঙ্গনে যান এবং শাহাদাত বরণ করেন। হযরত উম্মে হাকিম (রাযিঃ) যদিও বধু ছিলেন—তবু উঠে দাড়াইলেন এবং কোমরে কষে কাপড় বেঁধে তাঁবুর খুঁটি দিয়ে কাফিরদের সঙ্গে যুদ্ধ করেন। লোকদের বিবরণ অনুযায়ী তিনি তাঁবুর-খুঁটি দিয়ে প্রায় সাতজন কাফিরকে হত্যা করেন। (ইসাবা, ৮ম খণ্ড, পৃঃ ২২৫)

মৃত্যু : হযরত উম্মে হাকিম (রাযিঃ) ঠিক কবে মৃত্যুবরণ করেন জানা নেই; তার সম্ভান-সন্ততি বিষয়েও ইতিহাসে তথ্য পাওয়া যায় না।

হযরত খানসা (রাযিঃ)

নাম ও বংশ পরিচয় : তামাদর ছিল তাঁর নাম, আর উপাধি হচ্ছেঃ খানসা। তিনি ছিলেন কয়েস গোত্রের সুলায়ম শাখার মেয়ে। তাঁর পিতার নাম ছিল আমার ইবনুস সরিদ। তিনি নজদের অধিবাসিনী ছিলেন।

বিবাহ : প্রথমে সুলায়ম গোত্রের এক ব্যক্তি রাওয়াহা বিন আবদুল উজ্জার সঙ্গে তাঁর বিবাহ হয়। তার মৃত্যুর পর মরওয়ান বিন আবু আমেরের সঙ্গে দাম্পত্য-সূত্রে সম্পর্কিত হন। (তাবাকাতুশ শোয়ারা, ইবনে কুতাইবা, পৃঃ ১৯৭)

ইসলাম গ্রহণ : তার যখন বার্ষিক্যের কাল, সে সময় মক্কার দিগন্তে রিসালতের সূর্যোদয় ঘটেছে। যখন খানসা (রাযিঃ) ইসলামের আবির্ভাব সম্পর্কে জ্ঞাত হলেন, তখন তিনি নিজ গোত্রের কয়েকজন নিয়ে মদীনা আসেন এবং ইসলাম গ্রহণ করেন। মহানবী সাল্লাল্লাহু আলাইহি ওয়াসাল্লাম বহুক্ষণ ধরে তার কবিতা শুনতে থাকেন এবং বিস্ময় প্রকাশ করতে থাকেন। এটি হিজরতের পরবর্তী ঘটনা।

(উসদুল গাবা, ৫ম খণ্ড, পৃঃ ৪৪১)

সাধারণ অবস্থা : হযরত উমর (রাযিঃ)-এর সময়ে যখন ইরাকে যুদ্ধ বাঁধে, হযরত খানসা (রাযিঃ) নিজের চারজন ছেলে নিয়ে রণাঙ্গনে অবতীর্ণ হন। তাদেরকে সম্বোধন করে বলেনঃ প্রিয় পুত্রগণ! তোমরা নিজের ইচ্ছায় ইসলাম গ্রহণ করেছো, নিজের মর্জিতে নির্বাসন বরণ করেছো—অন্যথা তোমরা নিজের দেশের জন্যে বোঝা ছিলে না,

আর তোমাদের দুর্ভিক্ষও ঘটেনি। এতদসত্ত্বেও তোমরা তোমাদের বৃদ্ধা জননীকে এখানে এনেছ এবং অশ্বারোহীর সম্মুখে ছুড়ে দিয়েছ। আল্লাহর কসম! তোমরা এক মাতা এবং এক পিতার সন্তান। আমি তোমাদের পিতার সঙ্গেও অসৎ আচরণ করিনি। তোমার মামারাও আমার জন্যে অপমানিত হননি কখনো। তোমরা জানোঃ পৃথিবী নশ্বর এবং কাফিরদের সঙ্গে জিহাদ করা উত্তম। আল্লাহ বলছেনঃ 'ইয়া আইয়ুহাল লায়িনা আমানু। ইসবিরু ওয়াসাবেরু ওয়ারাবেতু।' কাজেই প্রত্যুবে উঠেই যুদ্ধের প্রস্তুতি গ্রহণ করো এবং শেষ পর্যন্ত লড়াই করো। (উসুদুল গাবা, ৫ম খণ্ড, পৃঃ ৪৪২)

ছেলেরা এক সঙ্গে বাগডোর ধরে যুদ্ধাঙ্গনে এগিয়ে যায়। তাঁরা সমর কবিতা পড়তে পড়তে যুদ্ধ করে এবং শহীদ হয়ে যায়। ছেলেদের শাহাদাতের সংবাদ পেয়ে হযরত খানসা (রাযিঃ) আল্লাহর কৃতজ্ঞতা প্রকাশ করেন।

হযরত উমর (রাযিঃ) তার ছেলেদেরকে বার্ষিক দুশো দিরহাম দিতেন ছেলেরা শহীদ হওয়ার পর এ টাকা হযরত খানসা (রাযিঃ)কে দেয়া হত।

মৃত্যু : এই ঘটনার দশ বছর পর হযরত খানসা (রাযিঃ) মৃত্যুবরণ করেন। তাঁর মৃত্যুবর্ষ ২৪ হিজরী।

সন্তান-সম্ভ্রতি : তার চার জন ছেলে। এঁরা সবাই ইরাকের যুদ্ধে শহীদ হন। তাদের নাম হলঃ আবদুল্লাহ, আবু দাজরা (প্রথম স্বামীর) যায়েদ, মুয়াবিয়া (দ্বিতীয় স্বামীর)।

মর্যাদা ও মহত্ত্ব : তিনি কবিতা-রচনার ক্ষেত্রে বিশেষত মর্সিয়া বা শোক কবিতা রচনায় অপ্রতিদ্বন্দ্বী ছিলেন। উসুদুলগাবা-র গ্রন্থকার লিখেছেনঃ কাব্য সমালোচকদের মীমাংসা হচ্ছে যে, খানসা (রাযিঃ)-এর মত কোন মহিলা কবি, তার আগে কিংবা পরে, জন্ম গ্রহণ করেননি।

লায়লা আখিলিয়াকে মহিলা কবিদের শিরোমণি মনে করা হয়। কিন্তু তবুও খানসা (রাযিঃ) ছিলেন অনন্যা। (উসুদুল গাবা, ৫ম খণ্ড, পৃঃ ৪৪২)

উকাযের মেলাটি ছিল আরব কবিদের সবচেয়ে বড় কেন্দ্র। হযরত খানসা (রাযিঃ)-এর জন্যে তাতে এরকম সম্মান দেখানো হত যে, তাঁর তাবুর সমনের দরোজায় একটি পতাকা পুতে দেয়া হত। তাতে লেখা থাকতোঃ 'সর্বশ্রেষ্ঠ আরব শোক কবি।' নাবিগা ছিল আপন সময়ের সময়ের সবচেয়ে বড় কবি। হযরত খানসা (রাযিঃ) তাকে একবার নিজের কবিতা শোনান। নাবিগা শোনার পর বললঃ আমি যদি আবু বুদাইর (আশা)-এর কবিতা আগে শুনতে না পেতাম, তাহলে তোমাকে সারা পৃথিবীর সবচেয়ে বড় কবি হিসেবে মেনে নিতাম। (উসুদুল গাবা, ৫ম খণ্ড, পৃঃ ৪৪১)

হযরত খানসা (রাযিঃ) প্রথমদিকে বেশী কবিতা রচনা করতেন না। কিন্তু ছখরের মৃত্যুর পর তার একটি অস্থিরতা সৃষ্টি হয়। অসম্ভব বেদনাত্ত হন তিনি এবং এরই ফলে অধিক সংখ্যক শোক কবিতা রচনা করতে থাকেন। যেমন তার একটি কবিতার চরণ :

‘ছথরকে সম্মান করতো বড় বড় অনেকেই’

যেন সে একটি পাহাড় ছিল তার চূড়ায় আগুন ছিল।

হযরত খানসার দিওয়ান বা কাব্যসংকলন বেশ বিশাল। ১৮৮৮ সালে বৈরুত থেকে ভাষ্যসমেত প্রকাশিত হয়েছে। এর সঙ্গে হযরত খানসা ছাড়াও আরো ষাটজন মহিলা কবির শোক কবিতা অন্তর্ভুক্ত হয়েছে। ১৮৮৯ সালে ফরাসি ভাষায় এর তরজমা বেরোয় এবং দ্বিতীয়বার মুদ্রিত হয়। (উসুদুল গাবা, ৫ম খণ্ড, পৃঃ ১৯৮)

হযরত উম্মে হারাম (রাযিঃ)

নাম ও বংশ পরিচয় : তার নাম জানা নেই। উপনাম উম্মে হারাম। তিনি খযরজ গোত্রের বনু নজ্জার শাখার মেয়ে ছিল। তাঁর পিতার নাম মিলহান, মাতার নামঃ মুলাইকা। মা ছিল মালিক বিন আদির মেয়ে। সে কারণেই উম্মে হারাম উম্মে সুলাইমের বোন এবং হযরত আনাস (রাযিঃ)-এর খালা হন। মহানবী সাল্লাল্লাহু আলাইহি ওয়াসাল্লাম-এর সঙ্গেও আত্মীয়তার সম্পর্ক ছিল।

বিবাহ : আমর বিন কায়েস আনসারী (রাযিঃ)-এর সঙ্গে তাঁর বিবাহ হয়।

(তাহযীব, ১২তম খণ্ড, পৃঃ ৪৬২)

তিনি উহুদের যুদ্ধে শহীদ হলে হযরত উবাদা বিন সামিতকে বিয়ে করেন, যিনি ছিলেন উচ্চ মর্যাদার একজন সাহাবী।

সাধারণ অবস্থা এবং মৃত্যু : মহানবী সাল্লাল্লাহু আলাইহি ওয়াসাল্লাম যখনি কুবার দিকে যেতেন তখন তিনি হযরত উম্মে হারাম (রাযিঃ)-এর গৃহে আসতেন এবং খাওয়া দাওয়া করতেন। হজ্জাতুল বিদার পর মহানবী সাল্লাল্লাহু আলাইহি ওয়াসাল্লাম এলেন এবং খাওয়া দাওয়া করে বিশ্রাম করলেন। তখন উম্মে হারাম (রাযিঃ) তার উকুন দেখতে লাগলেন। উম্মে হারামের বিলি কাটতে কাটতে মহানবী সাল্লাল্লাহু আলাইহি ওয়াসাল্লাম-এর ঘুম এসে যায় এবং অল্প পরেই আবার তিনি হাসতে হাসতে জেগে উঠেন এবং বললেনঃ আমি একটি স্বপ্ন দেখেছি। স্বপ্নটি এরকমঃ ‘আমার উম্মতের কিছু লোক যুদ্ধের উদ্দেশ্যে সমুদ্রে ভ্রাম্যমান।’ হযরত উম্মে হারাম (রাযিঃ) বললঃ হে রাসূলে কারীম সাল্লাল্লাহু আলাইহি ওয়াসাল্লাম! দু’আ করুন, যাতে আমিও তাদের একজন হতে পারি। মহানবী সাল্লাল্লাহু আলাইহি ওয়াসাল্লাম দু’আ করলেন এবং আবার বিশ্রাম করলেন। কিছুক্ষণ পর হাসতে হাসতে আবার জেগে উঠলেন এবং আবার আগের স্বপ্নের কথা বললেন। হযরত উম্মে হারাম (রাযিঃ) আবার মহানবী সাল্লাল্লাহু আলাইহি ওয়াসাল্লামকে দু’আ করতে বললেন তার অংশগ্রহণের জন্যে। মহানবী সাল্লাল্লাহু আলাইহি ওয়াসাল্লাম বললেন : তুমি প্রথম দলের সঙ্গে আছো। এই স্বপ্ন তাঁর জীবনে ২৮ হিজরীতে বাস্তবায়িত হয়।

(জুরকানী, পৃঃ ৬৬, ইসাবা, ৯৮তম খণ্ড, পৃঃ ২২২, ২২৩)

হযরত আমীরে মুয়াবিয়া (রাযিঃ) হযরত উমর (রাযিঃ)-এর পক্ষ থেকে সিরিয়ার শাসক ছিলেন। বহুবার তিনি আলজিরিয়া আক্রমণ করার ইচ্ছে ব্যক্ত করেন। কিন্তু

হযরত উমর (রাযিঃ) অনুমতি দেননি। হযরত উসমান (রাযিঃ)-এর খেলাফতের সময় তিনি তাঁর ইচ্ছার কথা বলেন-হযরত উসমান (রাযিঃ) অনুমতি দেন। হযরত আমীর মুয়াবিয়া (রাযিঃ) সাইপ্রাসে আক্রমণ চালানোর জন্যে একটি নৌবহর নির্মাণ করেন। এই আক্রমণে অনেক সাহাবী (রাযিঃ) অংশগ্রহণ করেন হযরত আবু যর, হযরত আবু দারদা, হযরত উবাদা বিন সামেত এবং হযরত উম্মে হারামও এতে অংশগ্রহণ করেন। হিমসের কিনারা থেকে নৌবহর রওনা হয় এবং সাইপ্রাস বিজিত হয়।

(উসদুল গাবা, ৫ম খণ্ড, পৃঃ ৫৭৫/জুরকানী, পৃঃ ৬১)

ফেরার সময় হযরত উম্মে হারাম নৌবহরে উঠতে গিয়ে পড়ে যান এবং তখনি তাঁর মৃত্যু হয়। লোকেরা সেখানেই তাঁকে সমাহিত করেন। (সহীহ বুখারী, ২য় খণ্ড, পৃঃ ৯২৯) সন্তান-সন্ততি : হযরত উম্মে হারামের তিনটি ছেলে হয়; প্রথম স্বামী থেকে কায়েস এবং আব্দুল্লাহ; আর হযরত উবাদা (রাযিঃ) থেকে মুহাম্মদ।

মর্যাদা ও মহত্ত্ব : তিনি মহানবী সাল্লাল্লাহু আলাইহি ওয়াসাল্লাম-এর কয়েকটি হাদীস বর্ণনা করেন। বর্ণনাকারীদের মধ্যে আছেন- হযরত উবাদা, হযরত আনাস, আমর বিন আসওয়াদ, আতা বিন ইয়াসার এবং লায়লা বিন শাদ্দাদ বিন আওস প্রমুখ।

হযরত উম্মে ওয়ারকা বিনতে আব্দুল্লাহ (রাযিঃ)

নাম ও বংশ পরিচয় : তাঁর নাম অজ্ঞাত; উম্মে ওয়ারকা তাঁর উপনাম। তিনি আনসারের কোন বংশের মহিলা ছিলেন। বংশ তালিকা এরকমঃ উম্মে ওয়ারকা বিনতে আব্দুল্লাহ বিন হারিছ বিন উয়াইমার বিন নওফেল।

ইসলাম গ্রহণ : হিজরতের পর মুসলমান হন।

যুদ্ধবিগ্রহ : বদরের যুদ্ধ উপস্থিত হলে তিনি মহানবী সাল্লাল্লাহু আলাইহি ওয়াসাল্লাম-এর কাছে আহত ও অসুস্থদের শুশ্রূষার জন্যে যুদ্ধে অংশগ্রহণের অনুমতি চান। সেই সূত্রে শাহাদাতের সুযোগের জন্য। মহানবী সাল্লাল্লাহু আলাইহি ওয়াসাল্লাম বললঃ ‘তুমি ঘরে থাকো, আল্লাহ তোমাকে সেখানেই শাহাদত দান করবেন।’

শাহাদাত : তিনি কুরআন পড়তে পারতেন। মহানবী সাল্লাল্লাহু আলাইহি ওয়াসাল্লাম তাঁকে মহিলাদের ইমাম বানিয়েছিলেন। সেজন্যে তিনি মহানবী সাল্লাল্লাহু আলাইহি ওয়াসাল্লামকে বলেন, একজন মুয়াজ্জিনও নির্ধারণ করে দেবার জন্যে। এরপর মুয়াযযিন আযান দিতো আর তিনি মহিলাদের নামাযের ইমামতি করতেন। রাতে কুরআন পাঠ করতেন। (মহিলাদের ইমামতি বিষয়ে এ গ্রন্থেই পূর্বে একটি আলোচনা করা হয়েছে) তিনি একজন দাস ও দাসীকে ‘মুদাব্বার’ করেছিলেন অর্থাৎ তাঁর মৃত্যুর পর তারা স্বাধীন হয়ে যাবে এরকম ঠিক করে দিয়েছিলেন। দাস-দাসী দু’জনেই ছিল ঐচ্ছিক বদমাশ। উম্মে ওয়ারকার কথাটি থেকে আগাম মুনাফা লাভের জন্যে এক রাতে তারা চাদর পেচিয়ে তাঁকে হত্যা করে। এটি ছিল উমর ফারুক (রাযিঃ)-এর সময়কার

ঘটনা। পরদিন সকালে হযরত উমর (রাযিঃ) লোকদের জিজ্ঞেস করেনঃ আজ খাদ্যর কুরআনের আওয়াজ শুনি কেন? জানো তিনি কেমন আছেন? ঘরে গিয়ে দেখেন একটি চাদরে আবৃত অবস্থায় তাঁর মৃতদেহ বিছানার উপর পড়ে আছে। অত্যন্ত মর্মান্বিত হল হযরত উমর (রাযিঃ) এবং বললেনঃ আল্লাহ এবং আল্লাহর রাসূল (সাল্লাল্লাহু আলাইহি ওয়াসাল্লাম) ঠিক বলেছিল। মহানবী সাল্লাল্লাহু আলাইহি ওয়াসাল্লাম বলতেন শহীদের ঘরে চল। এরপর মিসরে দণ্ডায়মান হয়ে ঘোষণা করল- দাস এবং দাসী দু'জনকেই শ্রেষ্টতার করা হোক। তাদেরকে শ্রেষ্টতার করা হল- হযরত উমর (রাযিঃ) তাদেরকে শূলে চড়িয়ে দিলেন। এ দু'জনই ছিল সেই প্রথম দোষী, মদীনায় যাদেরকে শূলে চড়ানো হয়। (ইসাবা, ৮ম খণ্ড, পৃঃ ২৮৯)

হযরত হিন্দ (রাযিঃ)

নাম ও বংশ পরিচয় : নাম হিন্দ। তিনি কুরাইশ-গোত্রের রমণী ছিল। বংশক্রম এরকমঃ হিন্দ বিনতে উতবা বিন রবীয়া বিন আবদে শামস বিন আবদে মানাফ। হিন্দের পিতা কুরাইশের সবচেয়ে বড় নেতা ছিলেন।

বিবাহ : ফাকা বিন মগীরা মখযুমির সঙ্গে তাঁর বিয়ে হয়। কিন্তু কোন কারণে কলহ হয় এবং এরপর আবু সুফিয়ান বিন হারবের সঙ্গে বিয়ে হয়। আবু সুফিয়ান ছিল উমাইয়া গোত্রের দলপতি।

সাধারণ অবস্থা : উতবা, আবু সুফিয়ান, হিন্দ এরা তিনজনই ইসলামের ঘোর শত্রু ছিল। ইসলামের অপরিমেয় বিজয়ে এরা খুবই ঈর্ষাবোধ করতো। যেভাবে সম্ভব সেখানেই তারা ইসলামের বাধা সৃষ্টি করতো। আবু জেহেল ছিল এদের সবার নেতা। কিন্তু ইসলাম এবং কুফরের প্রথম যুদ্ধ বদরে যখন কুরাইশের বড় বড় সর্দাররা মারা যায় এবং আবু জেহেল এবং উতবাও নিহত হয়, তখন উতবার জামাই আবু সুফিয়ান বিন হারব তার স্থান অধিকার করে এবং মক্কা-নগরীতে আবু জেহেলের মতই তার অধিকার ও প্রভুত্ব প্রতিষ্ঠিত হয়ে যায়। সেজন্যেই বদরের পর যতোগুলো যুদ্ধ সংঘটিত হয় আবু সুফিয়ান সর্বাত্মে নেতৃত্বে দান করে। ওহোদ-যুদ্ধ সেই আক্রমণ আকাংক্ষারই স্বপ্রকাশ, সে যুদ্ধে তার সাথে তার স্ত্রী হিন্দও এসেছিল। ওহোদ যুদ্ধে হিন্দ প্রতিশোধ কামনায় নিজের মৃত পিতার প্রতিশোধ নেবার জন্যে যে পাষণ্ড হৃদয়ের আচরণ করেছিল এবং যে ভয়ঙ্কর কাজ দেখিয়েছিল, তা মনে করলে এখনো শরীর কেঁপে ওঠে। হযরত হামযা (রাযিঃ) ছিলেন মহানবী সাল্লাল্লাহু আলাইহি ওয়াসাল্লাম-এর চাচা। তিনি উতবাকে হত্যা করেছিলেন- হিন্দ তাঁকে লক্ষ্যস্থল করে রাখে। সেজন্যে হিন্দ জুবাইর বিন মুতইমের গোলাম এবং বর্শা নিক্ষেপে পারদর্শী ওয়াহশী-হামযাকে হত্যা করার জন্যে উদ্বুদ্ধ ও প্ররোচিত করে (মনে রাখতে হবে এটি ওয়াহশীর ইসলাম গ্রহণের আগেকার ঘটনা) এবং বলা হয় যে, এই কাজের

পরিশ্রেক্ষিতে তাকে স্বাধীন করে দেয়া হবে। এ কারণেই হযরত হামযা (রাযিঃ) যখন ওয়াহশির কাছে আসেন ওয়াহশি বর্শা নিষ্ক্ষেপ করেন আর তা হযরত হামযার নাভি দিয়ে ঢুকে বিদীর্ণ হয়ে যায়। হযরত হামযা (রাযিঃ) তার উপর হামলা করার চেষ্টা করেন। কিন্তু তার আগেই বেঁকে পড়ে যান এবং তাঁর আত্মা অনন্তে উড়ে যায়।

কুরাইশের রমণীকুল বদরের পরাজয়ের প্রতিশোধের আবেশে ওহোদের মুসলমানদের লাশের উপরও বদলা নেয়। তারা মুসলমানদের লাশগুলোর নাক কান কেটে নেয়—এবং হিন্দ সেই কর্তিত নাক কানগুলো দিয়ে মালা তৈরি করে গলায় পরিধান করে। হিন্দ হযরত হামযা (রাযিঃ)-এর লাশের কাছে যায় এবং তাঁর পেট কেটে কলিজা বের করে নিয়ে চিবিয়ে চিবিয়ে খাওয়ার চেষ্টা করে এবং গিলতে না পেরে উপরে ফেলে দেয় (স্মরণ রাখতে হবে হযরত আবু সুফিয়ান এবং হযরত হিন্দের এসব ঘটনা তাঁদের ইসলাম গ্রহণের আগের)। এসব ঘটনায় মহানবী সাল্লাল্লাহু আলাইহি ওয়াসাল্লাম কী-পরিমাণ দুঃখিত ও মর্মান্বিত হয়েছিলেন তা আমরা অনুমানও করতে পারি না। কিন্তু এত কিছু পরও এগুলো মহানবী সাল্লাল্লাহু আলাইহি ওয়াসাল্লামকে প্রতিশোধ স্পৃহায় উত্তেজিত করেনি।

ইসলাম গ্রহণ : যখন মক্কা বিজিত হল এবং মহানবী সাল্লাল্লাহু আলাইহি ওয়াসাল্লাম মহিলাদের কাছ থেকে বাইয়াত গ্রহণের জন্যে উপবেশন করলেন, তখন রমণীদের মধ্যে হিন্দও এল। সম্ভ্রান্ত রমণীরা সাধারণত: পর্দানশীন হয়, হিন্দও পর্দায় আবৃত হয়ে এল। তবে পর্দার আরেকটি উদ্দেশ্যও ছিল তা হচ্ছে কেউ যেন তাঁকে চিনতে না পারে। বাইয়াতের সময় হিন্দ দীপ্ত দুঃসাহসের সঙ্গে কথাবার্তা বলেন তা নীচে উদ্ধৃত হলঃ

হিন্দ : রাসূলে কারীম সাল্লাল্লাহু আলাইহি ওয়াসাল্লাম! আপনি আমাদের কী কথার অঙ্গীকার করান?

নবীজী : আল্লাহর সঙ্গে আর কাউকে অংশীদার করবে না।

হিন্দঃ এই অঙ্গীকার আপনি পুরুষদের থেকে নেননি; সে যাই হোক আমি মেনে নিচ্ছি।

নবীজী : চুরি করবে না।

নবীজী : সন্তানদের হত্যা করবে না।

হিন্দ : আমি তো আমার ছেলেদের পালন করেছিলাম, বৃদ্ধা হলে বদরে যায়, আর আপনি তাদের মেরে ফেলেন— এখন আপনি আর ওরাই জানে, আমি জানি না।

হিন্দের ঔদ্ধত্য ও দুঃসাহসে মহানবী সাল্লাল্লাহু আলাইহি ওয়াসাল্লাম রাগ করেননি; বরং তাঁকে মার্জনা করে দেন। মহানবী সাল্লাল্লাহু আলাইহি ওয়াসাল্লাম-এর এই ক্ষমা ও করুণা হিন্দকে অভিভূত করে এবং নিজের অন্তরের ভেতরেই অনুভব করেন^১ মহানবী (সাল্লাল্লাহু আলাইহি ওয়াসাল্লাম) সত্যবাদী। তিনি বললঃ হে নবী! আপনার

আস্তানার চেয়ে ঘৃণিত আস্তানা আমার কাছে আর কিছু ছিল না। এখন আমার কাছে এর চেয়ে প্রিয় আস্তানা নেই। (সহীহ বুখারী)

ইসলাম গ্রহণ করে বাড়িতে যাবার পর হিন্দ ছিলেন না তিনি— যেন পুনর্জন্ম গ্রহণ করেছিল। বিন সা'আদ লিখেছেন— 'তিনি ঘরে গিয়ে মূর্তিগুলো ভেঙ্গে ফেলেন এবং বলেন তাদের কারণেই আমি এতদিন ধোঁকার মধ্যে ছিলাম।' (ইসাবা, ৮ম খণ্ড-পৃঃ ২০৬) উসুদুর গাবা গ্রন্থে তাঁর উত্তম ইসলামী দীক্ষা প্রসঙ্গে বলা হয়েছে— হযরত হিন্দ মক্কা বিজয়ের সময় ইসলাম গ্রহণ করেন এবং উত্তম ইসলামী দীক্ষায় অনুপ্রাণিত হন।

(উসুদুল গাবা, ৫ম খণ্ড-পৃঃ ৫৬২)

যুদ্ধ বিগ্রহ : মক্কা বিজয়ের মাধ্যমে ইসলামের সুস্পষ্ট বিজয় সূচিত হয়। সেজন্যে যুদ্ধে অংশগ্রহণের প্রয়োজনীয়তাও অবশিষ্ট ছিল না। তবুও হযরত উমর (রাযিঃ)-এর খিলাফতকালে রোম-পারস্যের ঘটনা ঘটে এবং কোন কোন ক্ষেত্রে সেসব যুদ্ধ-বিগ্রহে পুরুষদের পাশাপাশি মেয়েদেরও অংশগ্রহণের অবস্থা তৈরি হয় এবং তরবারি ও খঞ্জর ব্যবহার করারও প্রয়োজন পড়ে। সিরিয়ার যুদ্ধসমূহের মধ্যে ইয়ারমুক ছিল একটি স্মরণীয় সংঘর্ষের ঘটনা। সে যুদ্ধে হযরত আবু সুফিয়ান (রাযিঃ) এবং হযরত হিন্দ (রাযিঃ) দু'জনেই অংশগ্রহণ করেন এবং বিপুল তেজস্বগরী ভূমিকায় অবতীর্ণ হন।

(উসুদুল গাবা, ৫ম খণ্ড-পৃঃ ৫৬২)

মৃত্যু : হযরত হিন্দ হযরত উমর (রাযিঃ)-এর খিলাফতকালে মৃত্যুবরণ করেন। সেদিনই হযরত আবু বকর (রাযিঃ)-এর পিতা আবু কুহাফা ইন্তেকাল করেন। বিন সা'আদের মত অন্যরকম। বিন সা'আদ বলেন তাঁর মৃত্যু হযরত উমর (রাযিঃ)-এর সময়ে হয়নি, হযরত উসমান (রাযিঃ)-এর সময়ে হয়েছে। 'কিতাবুল আমসাল' গ্রন্থ থেকেও তার স্বীকৃতি পাওয়া যায়। যেমন তাতে আছে, যখন হযরত আবু সুফিয়ান (রাযিঃ) মৃত্যুবরণ করেন। (আবু সুফিয়ান (রাযিঃ) হযরত উসমান (রাযিঃ)-এর সময়ে মৃত্যুবরণ করেন), তখন হযরত মুয়াবিয়া (রাযিঃ)কে কেউ একজন বলে হিন্দ (রাযিঃ)কে তার সঙ্গে বিয়ে করিয়ে দিতে। হযরত মুয়াবিয়া (রাযিঃ) খুব সংযতভাবে বলেনঃ এখন তাঁর আর বিয়ে করার প্রয়োজন নেই।

সন্তান-সন্ততি : সন্তান-সন্ততির মধ্যে হযরত আমীরে মুয়াবিয়া (রাযিঃ) সবচেয়ে বিখ্যাত।

চরিত্র-বৈশিষ্ট্য : হযরত হিন্দ (রাযিঃ)-এর মধ্যে সেই সব বৈশিষ্ট্যগুলো সমবেত হয়েছিল, যা একজন আরব-রমণীর সর্বশ্রেষ্ঠ গুণাবলীর অন্তর্ভুক্ত। উসুদুল গাবা-গ্রন্থকার সেজন্যেই লিখেছেনঃ তার মধ্যে আত্মসম্মান, আত্মচেতনা, বুদ্ধি, প্রজ্ঞা ও উদ্ভাবনী ক্ষমতার সারীভূত ক্ষমতার দেখা মেলে। (উসুদুল গাবা, ৫ম খণ্ড-পৃঃ ৫৬২)

তিনি দানশীল ছিলেন। হযরত আবু সুফিয়ান (রাযিঃ) তাকে যথাযথ খরচপত্র দিতেন না। ইসলাম গ্রহণের সময় মহানবী সাল্লাল্লাহু আলাইহি ওয়াসাল্লাম যখন তাঁর কাছ

থেকে চুরি না করার অঙ্গীকার নেন তখন হিন্দ বলেনঃ আমি তো আবু সুফিয়ান (রাযিঃ)-এর কাছ থেকে পুরো খরচ পাই না। চুপিসারে কিছু নিয়ে নিলে কি বৈধ হবে। মহানবী সাল্লাল্লাহু আলাইহি ওয়াসাল্লাম তাকে অনুমতি দেন। (সহীহ বুখারী)

হযরত উম্মে কুলসুম বিনতে উকবা (রাযিঃ)

নাম, বংশ পরিচয় ও ইসলাম গ্রহণ : উম্মে কুলসুম উপনাম। বংশক্রম এরকমঃ উম্মে কুলসুম (রাযিঃ) বিনতে উকবা বিন আবি মুয়িত বিন আবি আমর বিন উমাইয়া বিন আবদে শামস বিন আবদে মানাফ। মাতার নামঃ আরওয়া বিনতে কুরাইয। এই হিসেবে হযরত উসমান (রাযিঃ) এবং হযরত উম্মে কুলসুম (রাযিঃ) সম্পর্কে ভাইবোন। কারণ তাদের পিতা পৃথক পৃথক হলেও মা অভিন্ন। উম্মে কুলসুম (রাযিঃ) এর পিতা উকবা বিন মুয়িত উমাইয়া গোত্রের খুবই সম্মানিত ব্যক্তি। কিন্তু একই সঙ্গে ইসলামের বড় শত্রু। অথচ আল্লাহর কি আশ্চর্য কুদরত সেই অন্ধকার গুহায় তিনি ঈমানের চেরাগ জ্বালিয়ে দিয়েছেন, তারই কন্যা উম্মে কুলসুম ইসলামে দীক্ষিত হন।

হিজরত : ৭ম হিজরীতে হুদায়াবিয়ার সন্ধির পর হযরত উম্মে কুলসুম (রাযিঃ) মদীনায হিজরত করেন। খাযাআ-গোত্রের এক ব্যক্তির সহায়তায় তিনি পায়ে হেঁটে রওয়ানা হন। যেহেতু তিনি পালিয়ে বেরিয়েছিল, সেজন্য তার ভাই পেছনে পেছনে আসে। উম্মে কুলসুম (রাযিঃ) মদীনা শরীফ পৌঁছে গেলে তার ভাইও পৌঁছে যায়। মহানবী (সাল্লাল্লাহু আলাইহি ওয়াসাল্লাম)কে উম্মে কুলসুম (রাযিঃ) বললেনঃ আমি আমার ঈমানের জন্যে ভয় পাচ্ছি— আমি একজন রমণী এবং রমণীরা দুর্বল। মহানবী (সাল্লাল্লাহু আলাইহি ওয়াসাল্লাম) হুদায়াবিয়ার সন্ধিতে শর্ত করেছিল যে, কুরাইশের কোন ব্যক্তি যদি মদীনায আসে তাহলে তাকে ফিরিয়ে দেয়া হবে। এজন্যেই মহানবী (সাল্লাল্লাহু আলাইহি ওয়াসাল্লাম) হযরত উম্মে কুলসুম বিষয়ে চিন্তিত হয়ে যান। কিন্তু যেহেতু সেই শর্তের ভেতর মহিলা ছিল না, কাজেই তাঁদের বিষয়ে এই আয়াতটি অবতীর্ণ হয় :

‘মুসলমানগণ! যখন তোমাদের কাছে মুসলমান রমণীরা হিজরত করে আসে, তখন তোমরা যাচাই করে নাও। আল্লাহ তাদের ঈমান ভালভাবেই জ্ঞাত আছেন। এখন তোমরা যদি জানো যে সে মুসলমান, তাহলে তাকে কাফিরদের কাছে ফেরৎ পাঠিও না।’ ফলে, মহানবী (সাল্লাল্লাহু আলাইহি ওয়াসাল্লাম)ও এই আয়াত অনুসারে হযরত উম্মে কুলসুমকে (রাযিঃ) ফেরৎ পাঠাতে রাযি হলেন না।

বিবাহ : হযরত উম্মে কুলসুম (রাযিঃ) এখনো পর্যন্ত কুমারী ছিলেন; সেজন্যে উচ্চ মর্যাদার সাহাবী হযরত যায়েদ বিন হারেসার সঙ্গে তাঁর বিয়ে দেয়া হয়। হযরত যায়েদ বিন হারেসা মৃত্যুর যুদ্ধে শহীদ হলে অতঃপর হযরত জুবাইর ইবনুল আওয়ামের সঙ্গে তাঁর দ্বিতীয় বিবাহ হয়। দু’জনের সম্পর্ক বিচ্ছেদ ঘটলে হযরত আবদুর রহমান বিন

আওফ তাঁকে বিয়ে করেন। তাঁর মৃত্যু হলে চতুর্থ এবং শেষ বিবাহ হয় হযরত আমর বিন আসের সঙ্গে।

মৃত্যু : শেষ বিবাহের একমাসের মধ্যে তিনি মৃত্যুবরণ করেন। তখন আমার ইবনুল আস মিসরের গভর্ণর ছিলেন।

সন্তান-সন্ততি : হযরত উম্মে কুলসুমের গর্ভে হযরত আমার ইবনুল আস হযরত যায়েদ বিন হারেসা থেকে কোন সন্তান হয়নি। হযরত জুবাইর থেকে যয়নবের জন্ম হয় এবং হযরত আবদুর রহমান বিন আওফের থেকে ইবরাহীম, হামিদ, মুহাম্মদ এবং ইসমাইলের জন্ম হয়।

মর্যাদা ও মহত্ত্ব : হামিদ এবং ইবরাহীম তাঁর কাছ থেকে কয়েকটি হাদীছ বর্ণনা করেছেন।

হযরত যয়নব বিনতে আবী সালমা (রাযিঃ)

নাম ও বংশ পরিচয় : নাম যয়নব। তিনি মখযুম- গোত্রের মেয়ে ছিলেন। তাঁর বংশক্রম এরকমঃ যয়নব বিনতে আবী সালমা আবদুল্লাহ বিন আবদুল আসাদ বিন আমার বিন মখযুম। হাবশায় হযরত উম্মে সালমার গর্ভে তাঁর জন্ম হয় এবং তাঁরই সাথে কিছুকাল পর মদীনায় হিজরত করেন। হযরত আসমা বিনতে আবী বকর তাকে দুগ্ধপান করান।

(ইসাবা, ৮ম খণ্ড-পৃঃ ৯৬)

প্রথমে তাঁর নাম ছিল বররা। মহানবী (সাল্লাল্লাহু আলাইহি ওয়াসাল্লাম) তা বদলে দিয়ে ‘যয়নব’ নাম রাখেন।

(সহীহ মুসলিম, ২য় খণ্ড-পৃঃ ২৩১)

সাধারণ অবস্থা : ৪র্থ হিজরীতে আবু সালমা (রাযিঃ) মৃত্যুবরণ করলে হযরত উম্মে সালমা (রাযিঃ) মহানবী (সাল্লাল্লাহু আলাইহি ওয়াসাল্লাম)-এর পত্নী হয়ে আসেন। তখন হযরত যয়নব শিশু। মহানবী (সাল্লাল্লাহু আলাইহি ওয়াসাল্লাম) তাঁকে লালন-পালন করেন। মহানবী (সাল্লাল্লাহু আলাইহি ওয়াসাল্লাম) তাকে খুব আদর করতেন। যয়নব যখন হাঁটতে শেখে তখন সে মহানবী (সাল্লাল্লাহু আলাইহি ওয়াসাল্লাম)-এর কাছে আসে। মহানবী (সাল্লাল্লাহু আলাইহি ওয়াসাল্লাম) গোসল করার সময় তার মুখে পানির ছিটা দিতেন। লোকদের কথা মহানবীর (সাল্লাল্লাহু আলাইহি ওয়াসাল্লাম) এই পানি ছিটানোর বরকতে হযরত যয়নব (রাযিঃ)-এর চেহারা বৃদ্ধ বয়স পর্যন্ত যৌবনের দ্যুতি ও বর্ণ অবশিষ্ট ছিল।

বিবাহ : হযরত আবদুল্লাহ বিন যমআ বিন আসওয়াদ আসাদীর সঙ্গে তাঁর বিবাহ হয়। তাঁর দু’জন সন্তান হয় তাদের একজনের নাম ছিল আবু উবাইদ। ৬৩ হিজরীতে হাররার যুদ্ধে দু’জন নিহত হন; দু’জনের লাশ হযরত যয়নবের সামনে এনে রাখা হয়। হযরত যয়নব ইন্নালিল্লাহে ওয়া ইন্না ইলাইহি রাযিউন পড়েন এবং বলেন, আমার উপর

বিরাট বিপদ উপস্থিত হয়েছে। একজন তো ময়দানে লড়াই করে নিহত হয়েছে। কিন্তু আরেকজন গৃহে ছিল, লোকেরা তাকে ঘরে ঢুকে হত্যা করেছে।

মৃত্যু : ছেলের মৃত্যু হওয়ার পর তিনি দশ বছর জীবিত থাকেন এবং ৭৩ হিজরীতে ইন্তেকাল করেন। তখন ছিল তারেকের শাসনামল। (তাহযীব, ২য় খণ্ড-পৃঃ ৪২১)

হযরত আবদুল্লাহ বিন উমর (রাযিঃ) জানানায় অংশগ্রহণ করেন।

মর্যাদা ও মহত্ত্ব : মর্যাদা ও মহত্ত্বের দিক থেকে হযরত যয়নবের বিশেষ খ্যাতি ছিল, কেউ-ই তাঁর সমকক্ষ ছিলনা। উসুদুল গাবা- গ্রন্থকার বলেছেন :

‘তিনি ছিলেন সমকালের সবচেয়ে বড় ইসলামী আইনতত্ত্ববিদ।

(উসুদুল গাবা, ৫ম খণ্ড-পৃঃ ৪৬৯)

তিনি মহানবী (সাল্লাল্লাহু আলাইহি ওয়াসাল্লাম) থেকে কতিপয় হাদীছ বর্ণনা করেন। মহানবী (সাল্লাল্লাহু আলাইহি ওয়াসাল্লাম) ছাড়াও তিনি যাদের থেকে হাদীছ শ্রবণ করেছিলেন তাদের মধ্যে হযরত উম্মে সালমা (রাযিঃ) হযরত আয়েশা (রাযিঃ) হযরত উম্মে হাবিবা (রাযিঃ) এবং হযরত যয়নব বিনতে জাহাশ (রাযিঃ) উল্লেখযোগ্য। যারা এসব বর্ণনা করেছেন, তারা হলেন :

ইমাম যয়নুল আবেদিন (রাযিঃ), আবু উবাইদা, মুহম্মদ বিন আতা, হামিদা বিন নাফে, উরওয়া, আবু সালমা, কুলাইব বিন ওয়ায়েল, আবু কেলাবা হারমি প্রমুখ।

হযরত উম্মে আবী হুরায়রা (রাযিঃ)

নাম ও বংশ পরিচয় : নাম উমাইমা; পিতার নাম সবিহ বা সফিহ বিন হারিস।

ইসলাম গ্রহণ : যদিও তাঁর ছেলে হযরত আবু হুরায়রা (রাযিঃ) মুসলমান হয়ে গিয়েছিলেন তবুও তিনি নিজে অমুসলিম ছিলেন। একদিন তিনি মহানবীর (সাল্লাল্লাহু আলাইহি ওয়াসাল্লাম) সঙ্গে বেয়াদবি করল। তাতে হযরত আবু হুরায়রা (রাযিঃ) এসে বললেন; নবীজী! এখন আপনি আমার আম্মাকে মুসলমান হবার জন্যে দু‘আ করে দিন। মহানবী (সাল্লাল্লাহু আলাইহি ওয়াসাল্লাম) দু‘আ করেন। ওদিকে অত্যন্ত আকস্মিক ও অভাবিতভাবে তার হৃদয়ে একটি বিরাট বিপ্লবের তরঙ্গ সৃষ্টি হয়। গোসল করে কাপড় পাল্টালেন এবং আবু হুরায়রা (রাযিঃ) সামনে কলেমা পাঠ করেন। আনন্দে অভিভূত হয়ে যান। হযরত আবু হুরায়রার (রাযিঃ) এবং মহানবী সাল্লাল্লাহু আলাইহি ওয়াসাল্লামকে সংবাদ দেন। মহানবী সাল্লাল্লাহু আলাইহি ওয়াসাল্লাম আল্লাহর কৃতজ্ঞতা জ্ঞাপন করেন। (সহীহ মুসলিম, ২য় খণ্ড-পৃঃ ৩৫৭)

মৃত্যু : মৃত্যু-তারিখ অজ্ঞাত।

সন্তান-সন্ততি : সন্তান-সন্ততির মধ্যে হযরত আবু হুরায়রা (রাযিঃ) সবচেয়ে খ্যাতিমান।

হযরত খাওলা বিনতে হাকিম (রাযিঃ)

নাম ও বংশ পরিচয় : নাম খাওলা। উম্মে শরীফ উপনাম। তিনি মহানবী সাল্লাল্লাহু আলাইহি ওয়াসাল্লাম-এর খালা ছিলেন। তাঁর পিতার নাম; হাকিম বিনতে উমাইয়া।

(মুসনাদ, ৬ষ্ঠ খণ্ড-পৃঃ ৪০৯)

বিবাহ : বিশিষ্ট সাহাবী হযরত উসমান বিন মাযউনের (রাযিঃ) সঙ্গে তাঁর বিবাহ হয়। সাধারণ অবস্থা : তিনি মুসলমান হয়ে মদীনায হিজরত করেন। দ্বিতীয় হিজরীতে বদর যুদ্ধের পর হযরত উসমান বিন মাযউন (রাযিঃ) মৃত্যুবরণ করেন। এরপর তিনি দ্বিতীয় বিয়ে করেননি। প্রায়ই পেরেশান থাকতেন। সহীহ বুখারীতে আছেঃ নিজেকে তিনি মহানবী সাল্লাল্লাহু আলাইহি ওয়াসাল্লাম বিদমতে সমর্পণ করেছিলেন।

(বুখারী শরীফ, ২য় খণ্ড-পৃঃ ৭৩, তাহযীব, ২য় খণ্ড- পৃঃ ২১৫)

মর্যাদা ও মহত্ত্ব : তিনি মহানবী সাল্লাল্লাহু আলাইহি ওয়াসাল্লাম থেকে ১৫টি হাদীছ বর্ণনা করেন। বর্ণনাকারীদের মধ্যে আছেন; হযরত আসাদ বিন আবি ওক্কাস (রাযিঃ), সায়ীদ বিন মুসাইয়াব, বশীর বিন সায়ীদ, উরওয়া এবং রুবাই বিন মালিক প্রমুখ।

চরিত্র বৈশিষ্ট্য : উসুদুল গাবাতে আছে তিনি ছিলেন পুণ্যবতী নারী। মুসনাদে আছেঃ তিনি দিনে রোযা রাখতেন, রাতে ইবাদত করতেন।

প্রথমদিকে অলংকারের প্রতি তাঁর আসক্তি ছিল প্রবল। মহানবী সাল্লাল্লাহু আলাইহি ওয়াসাল্লামকে বলেনঃ তায়েফ বিজিত হলে আমাকে অমুক রমণীর অলংকার দিয়ে দেবেন। মহানবী সাল্লাল্লাহু আলাইহি ওয়াসাল্লাম বলেন, আল্লাহ যদি অনুমতি দেন, আমি তখন কি করতে পারি।

(ইসাবা, ৮ম খণ্ড- পৃঃ ৭০)

হযরত হামনা জাহাশ (রাযিঃ)

নাম ও বংশ পরিচয় : নাম হামনা। তিনি হযরত যয়নবের বোন ছিলেন। বংশক্রমে আগেই উল্লিখিত হয়েছে (পুনরাবৃত্তি অপ্রয়োজনীয়)

বিবাহ : হযরত মুসআব বিন উমাইর (রাযিঃ)-এর সঙ্গে তাঁর বিয়ে হয়।

ইসলাম গ্রহণ : স্বামীর সঙ্গেই তিনি ইসলামে দীক্ষিত হন।

সাধারণ অবস্থা : তিনি মদীনায হিজরতের সৌভাগ্য অর্জন করেন। যখন মহানবী সাল্লাল্লাহু আলাইহি ওয়াসাল্লাম মুহাজির এবং আনসার মহিলাদের কাছ থেকে বাইয়াত নেন, তাতে তিনিও অংশ নিয়েছিলেন। মুসনাদে আহমদ বিন হাম্বল এবং বিন সা'আদ প্রমুখ ঐতিহাসিক অধিকাংশ রমণীদের ক্ষেত্রে এরকম একটি বাক্য ব্যবহার করেছেনঃ 'কানাত মিনাল মুবায়িয়াত' বাইয়াত বলতে উপরোক্ত বাইয়াতই বোঝানো হয়, যা মহানবী সাল্লাল্লাহু আলাইহি ওয়াসাল্লাম মুহাজির এবং আনসার রমণীদের কাছ থেকে

গ্রহণ করেন। আসমা বিন এজিদের জীবনী অংশে সে কথা পূর্বে আলোচিত হয়েছে। যুদ্ধ বিগ্রহের মধ্যে ওহোদের যুদ্ধে প্রোজ্জল উপস্থিতি ছিল হযরত হামনা (রাযিঃ) এর। তিনি পানি পান করাতেন আহতদের সেবা করতেন। তিনি ছাড়া অন্যান্য রমণীরাও কাজ করেন। যেমন হযরত রফিদা (রাযিঃ) এবং উম্মে কাবশা (রাযিঃ) এ ধরণের কাজ আঞ্জাম দেন।

এই যুদ্ধে হযরত মুসআব বিন উমাইর ইন্তেকাল করেন। এরপর তিনি আশারায়ে মুবশাশারার সমরত তালহা (রাযিঃ)কে বিবাহ করেন।

ইফকের ঘটনায় মুনাফিকদের সঙ্গে ভ্রান্তিবশত: যেসব মুসলমান জড়িয়ে যান। যেমন হযরত হাসসান (রাযিঃ), হযরত মিসতাহ (রাযিঃ) তাদের মধ্যে হযরত হামনাও ছিলেন। সহীহ বুখারীতে হযরত আয়েশা (রাযিঃ) থেকে সে কথার উল্লেখ রয়েছে।

(বুখারী, ২য় খণ্ড-পৃঃ ৫৯৬)

‘হযরত যয়নবের বোন হামনা বরাবর আমার প্রতিপক্ষে ছিল। এমনকি অন্যান্য ইফক ব্যক্তিদের মত তিনিও নষ্ট হন।

ফতহুল বারীতে হযরত হামনার (রাযিঃ) এ ব্যাপারে জড়াবার কারণ উল্লিখিত হয়েছে এরকমঃ যাতে হযরত আয়েশা (রাযিঃ)-এর মর্যাদার হানী ঘটে এবং তার বোন যয়নবের সম্মান মহানবী সাল্লাল্লাহু আলাইহি ওয়াসাল্লাম-এর কাছে বৃদ্ধি পায়। কিন্তু আশ্চর্যের ব্যাপার হচ্ছে; হযরত যয়নব (রাযিঃ) নিজে এ ঘটনা থেকে সুযোগ গ্রহণ করেননি। এ বিষয়ে তাঁর জীবনী অংশে আগেই আলোচনা গেছে।

(ফতহুল বারী, ৮ম খণ্ড-পৃঃ ৩৬৭)

মৃত্যু : তার মৃত্যুর সাল ও তারিখ সঠিকভাবে জানা যায়নি। এটুকু জানা আছে যে, হযরত যয়নবের সময় পর্যন্ত জীবিত ছিলেন। হযরত যয়নব ইন্তেকাল করেন ২০ হিজরীতে।

সন্তান-সন্ততি : হযরত তালহা (রাযিঃ) থেকে তার দুটো সন্তান হয়, মুহাম্মদ এবং ইমরান; মুহাম্মদ ‘সাজ্জাদ’ উপাধিতে প্রসিদ্ধ।

মহিলা সাহাবীগণের জীবনাদর্শ

[হায়াতুস সাহাবিয়্যাত-এর অনুবাদ]

দ্বিতীয় খন্ড

ভূমিকা

স্বভাবের কোমলতা, হৃদয়ের সারল্য ও কারুণ্যধর্মিতা এবং প্রভাব ক্ষমতার মাধ্যমেই চরিত্রের জ্যোতি নির্ণীত হয়। সভ্য-মানুষের এগুলোই সবচেয়ে বড় নির্ণায়ক। এগুলোর মাধ্যমেই মানুষ সকল রকমের নির্দেশনা ও সত্যপথ, জ্ঞান ও আচরণ, মহত্ত্ব ও হিদায়াত গ্রহণ করার ক্ষমতা অর্জন করে। ফুলের নরম পাপড়িমালা প্রত্যুষের বায়ুপ্রবাহের নিঃশব্দ সঞ্চালন বা আন্দোলনেই নড়ে ওঠে। কান্ড বিশিষ্ট বৃক্ষকে তুফানের তীব্র বাতাসও নাড়াতে পারে না। চোখের জ্যোতি দর্পণের ভেতর ভেদ করে যায়। পক্ষান্তরে পাথরের উপর তীক্ষ্ণ তীর কাজ করে না। এরকম অবস্থা মানুষেরও। কোমল স্বভাব ও নরম হৃদয়ের মানুষ সকল সত্য-আহ্বানে সহজে নাড়া দিতে পারে। কিন্তু কঠিন হৃদয় ও পাষণ্ড স্বভাবের লোকেরা বড় বড় মুজিয়া বা অলৌকিক কর্মেও প্রভাবিত হয় না। এই স্তরভেদের বিচ্ছিন্ন দৃষ্টান্ত সকল স্থানেই মেলে। ইসলাম প্রচারের ইতিহাসও প্রথম থেকে শেষ পর্যন্ত এই রকম উদাহরণে আকীর্ণ। কাফিরদের মধ্যে এরকম কঠিন হৃদয় বহু দুভাগের নাম পাই, যারা হাজার চেষ্টার পরও আল্লাহ তা'আলার কাছে মাথা আনত করেনি। কিন্তু সাহাবাদের মধ্যে শত শত এমন আছেন, যারা তৌহিদের ধ্বনি কর্ণগোচর হতেই ইসলামের সারিতে এসে দাড়ান। সাহাবাদের সঙ্গে বিপুল সংখ্যক মহিলা সাহাবীও এই মর্যাদার সমান অংশীদার। কেবল অংশীদারই নন, কখনো কখনো তাদেরও আগে, তাদের চেয়েও অগ্রসর। হযরত খাদীজা (রাযিঃ)-এর কথা স্মরণীয়। এই অসামান্য মহিলা কোনরকম চেষ্টা ছাড়াই ইসলাম গ্রহণ করেন এবং ইসলাম গ্রহণ করার সঙ্গে সঙ্গেই আপন আল্লাহর সামনে মাথা নত করেন। তারিখে ইবনে খমীসে (তারিখে ইবনে খামীস, পৃঃ ২৮৬) হযরত রাযি থেকে বর্ণিত আছেঃ 'মহানবী সাল্লাল্লাহু আলাইহি ওয়াসাল্লাম বলেছেন, আমি সোমবারের দিবসে নবুয়্যত প্রাপ্ত হই এবং খাদীজা (রাযিঃ) সেই দিনের শেষাংশে নামায পড়েন এবং আলী (রাযিঃ) তারপর দিন মঙ্গলবার নামায পড়েন। এরপর যায়েদ বিন হারেসা (রাযিঃ) এবং হযরত আবু বকর (রাযিঃ) নামাযে অংশ গ্রহণ করেন।

এ থেকেই বোঝা যায়, নবুয়্যতের সূর্য থেকে প্রথম দিন যে কিরণগুচ্ছ পৃথিবীর আকাশে বিচ্ছুরিত হয়েছিল, তা এক পবিত্র কোমল হৃদয় রমণীর বুকের আলো অঙ্গীকার করে উন্মিলিত হয়।

ইসলামের ঘোষণা : ইসলামের প্রাথমিক সময়ে ইসলাম গ্রহণের চেয়ে বেশী দরকার ছিল ইসলাম প্রকাশের সাহস, বীরত্ব ও বির্ভীকতা। এক্ষেত্রে কাফিরদের প্রবল বাধা, অত্যাচার ও নির্যাতনের পরও সাহাবাদের সঙ্গে মহিলা সাহাবীরাও অত্যন্ত সাহস ও বেপরোয়াভাবে নিজেদের ইসলামের কথা প্রকাশ করেন। প্রাথমিক সময়ে সাতজন নিজেদের ইসলামের কথা প্রকাশ্যে ঘোষণা করেন, ছ'জন পুরুষ, একজন মহিলা।

ছ'জন পুরুষের মধ্যে মহানবী সাল্লাল্লাহু আলাইহি ওয়াসাল্লাম নিজেতো আছেনই, আর আছেনঃ হযরত আবু বকর (রাযিঃ), হযরত বিলাল (রাযিঃ), হযরত খাব্বাব (রাযিঃ), হযরত সুহাইব (রাযিঃ) হযরত আশ্মার (রাযিঃ) সপ্তম ব্যক্তি হচ্ছেন একজন গরীব মহিলা সাহাবী হযরত আশ্মারের (রাযিঃ) জননী হযরত সুমাইয়া (রাযিঃ)।

(তারিখে খামিস, পৃঃ ২৫৭)

মহিলা সাহাবী উত্তম স্বভাবের মাধ্যমে কেবল ইসলাম গ্রহণ করেই ক্ষান্ত হননি। তারা খুব সহজেই ইসলামের প্রচারের ক্ষেত্রে ভূমিকা রাখেন। সহীহ বুখারীতে কিতাবুত তায়াম্মুমে আছে, সাহাবায়ে কেরাম এক সফরে একজন মহিলাকে ধরে এনে মহানবী সাল্লাল্লাহু আলাইহি ওয়াসাল্লাম-এর সম্মুখে হাজির করেন- তার কাছে পানির একটি মশক ছিল। পানির প্রয়োজনই মূলতঃ তারা তাকে পাকড়াও করেন। মহানবী সাল্লাল্লাহু আলাইহি ওয়াসাল্লাম তার পানি গ্রহণ করেন ঠিকই কিন্তু দাম দিয়ে দেন। মহানবী সাল্লাল্লাহু আলাইহি ওয়াসাল্লাম-এর এই সততা দেখে মহিলার মনে নবীজীর নবুয়্যত বিষয়ে বিশ্বাসের সৃষ্টি হয় এবং তারই প্রভাবে তার পুরো গোত্রই মুসলমান হয়ে যায়।

সংকটে সহিষ্ণুতা : সাহাবাদের মত মহিলা-সাহাবীরাও ইসলামের জন্যে সকল রকম কষ্ট বরদাশত করেন এবং তাদের ঈমান এক তিলও নড়চড় হয়নি তবু। হযরত সুমিয়া যখন ইসলাম গ্রহণ করেন, কাফিররা তার উপর নানারকম নির্যাতন শুরু করে। সবচেয়ে বড় নির্যাতন ছিল এরকম যে, তাকে মক্কার উত্তপ্ত মরু বালুকায় লোহার পোশাক পরিয়ে প্রচণ্ড রৌদ্রের ভেতর দাঁড় করিয়ে রাখতো। কিন্তু তবুও তারা ইসলামের উপর স্থির থাকেন। একদিন কাফিররা অভ্যাস মত তাকে লৌহ পোশাক পরিয়ে রৌদ্রের ভেতর মৃত্তিকায় শুইয়ে দেয়। এ অবস্থায় মহানবী সাল্লাল্লাহু আলাইহি ওয়াসাল্লাম সেদিক দিয়ে যাবার সময় তাকে দেখে বললেন, ধৈর্য ধরো, তুমি বেশেতেই যাবে। কাফিররা কেবল এটুকুতেই তৃপ্ত হয়নি। আবু জেহেল তার উরুতে বর্শা নিক্ষেপ করে তাকে শহীদ করে দেয়। তিনিই ইসলামের প্রথম শহীদ। (উসুদুল গাবা) আর মহিলা সাহাবীদের চেয়েও বড় মর্যাদা এই জায়গায় যে, সবার আগে একজন মহিলাই ইসলামে দীক্ষিত হন এবং সবার আগে একজন মহিলাই শাহাদাত বরণ করেন।

হযরত উমর (রাযিঃ) এর বোন যখন ইসলাম গ্রহণ করেন এবং হযরত উমর (রাযিঃ) সে কথা জানতে পারেন। তখন তিনি বোনকেও এত প্রচণ্ড মেরেছিলেন যে, তার শরীর রক্তাক্ত হয়ে যায়। বোন কেবল এটুকু বলেনঃ যা করার কর, আমি তো ইসলাম গ্রহণ করেছি। লুবাইনা (রাযিঃ)কেও হযরত উমর (রাযিঃ) মারতে মারতে এক সময় থেমে গিয়ে বললেনঃ তোমাকে করুণা করে আমি থামিনি আর পারছি না বলেই ছেড়ে দিচ্ছি। একইভাবে তিনি যিয়াকেও (রাযিঃ) মারতেন; যিনি তার গৃহের দাসী ছিলেন।

আত্মীয়তার সম্পর্ক-ছেদ : সাহাবায়ে কেরাম ঈমান আনার পর তাদের আত্মীয়তার সম্পর্ক ভেঙ্গে যায়। কিন্তু তা সত্ত্বেও তাদের ঈমানের শক্তিতে কোন অস্থিরতা

আসেনি। আর মহিলা সাহাবীদের অবস্থা ক্ষেত্রে সাহাবাদের চেয়ে আরো খারাপ ছিল। মানুষ যদিও নিজের সকল আত্মীয় পরিজনের সহযোগিতার প্রার্থী হয়ে থাকে। কিন্তু মহিলাদের একমাত্র নির্ভর তাদের স্বামী। জীবনের সর্বাংশ তাদের স্বামীর উপরই নির্ভরশীল। কোন অবস্থাতেই তারা এ থেকে বিচ্ছিন্ন হতে পারে না। পিতা পুত্র থেকে, পুত্র পিতা থেকে সম্পর্ক ছিন্ন করে জীবন যাপন করতে পারে। কিন্তু স্ত্রী স্বামী থেকে আলাদা হয়ে একেবারেই অসহায় ও বিপন্ন হয়ে পড়ে।

কিন্তু তা সত্ত্বেও ইসলামের মহিলা সাহাবীরা যারা স্ত্রী ছিলেন, যাদের স্বামী ছিল একরম সম্পর্কও ছিন্ন করেন এবং নিজেদের কাফির স্বামীদের থেকে চিরদিনের জন্য পৃথক হয়ে যান। সাহাবায়ে কেরাম কাফির স্ত্রীদের যেমন ত্যাগ করেন; মহিলা সাহাবীগণও কাফির স্বামীদের ত্যাগ করে হিজরতে বেরিয়ে পড়েন; এবং তাদের একজনও আর নিজেদের স্বামীর কাছে ফিরে যাননি। হযরত আয়েশা (রাযিঃ) বলেনঃ ‘আমি এরকম কোন মুহাজির রমণীর কথা জানি না, যিনি ঈমান গ্রহণ করে আর আগের অধর্মে ফিরে গেছেন।

(বুখারী শরীফ, কিতাবুশ শরুত)

আকাইদ বা প্রত্যাবলী

তওহীদ : কাফিররা মহিলা সাহাবীদের নানা রকম নির্যাতন করেছে। কিন্তু তওহীদের কলেমা ছাড়া আর কোন কলেমা তাদের মুখ থেকে বের করতে পারেনি। হযরত উম্মে শরীক ঈমান আনলে তার আত্মীয়-স্বজনরা তাকে রৌদ্র এনে দাড় করিয়ে দেয় এবং এই সময় তাকে তারা রুটির সঙ্গে মধুর মত গরম জিনিস খাইয়ে দিতো এবং পানি পান করতে দিতো না। যখন এই কষ্টের ভিতর তিন দিন কেটে গেলো অত্যাচারী পাষণ্ডরা বলল, যে ধর্মের উপর তুমি আছো; সেটি ছেড়ে দাও। (বুখারী শরীফ, কিতাবুশ শরুত) উম্মে শরীক এত অনুভূতিহীন হয়ে গিয়েছিলেন যে, এই বাক্যগুলোর অর্থ বুঝতে পারলেন না তিনি। তারা তখন আকাশের দিকে আগুল উঠিয়ে বুঝিয়ে দিলে, তিনি বুঝলেন তওহীদকে অস্বীকার করার কথা বলা হচ্ছে; তখন তিনি বললেনঃ আল্লাহর কসম! আমি তো এখনো একই বিশ্বাসে স্থির আছি। (তবকাত-ই-ইবনে সা‘আদ)

শিরক থেকে দূরে : রমণীরা সাধারণভাবে পুরনো প্রথা-পদ্ধতি ও আচার রেওয়াজের অত্যন্ত অনুগত হয়। তাছাড়া আরবে তো শিরকের ধর্ম দীর্ঘ সময় পর্যন্ত বিস্তৃত থাকার কারণে মানুষের হৃদয় তা একেবারে স্থায়ীভাবে বসে গিয়েছিল। কিন্তু মহিলা সাহাবীরা ইসলাম গ্রহণের সঙ্গে সঙ্গেই কঠোরভাবে পুরনো প্রত্যাবলী ও বিশ্বাস সমূহের অস্বীকৃতি ঘোষণা করেন। আরবদের ধারণা ছিল, যারা মূর্তির গালমন্দ করে তারা অসুস্থ হয়ে যায়। এজন্যে হযরত যিযা (রাযিঃ) তখন ইসলাম গ্রহণের পর প্রতিমা অন্ধ করে দিয়েছেন। কিন্তু তিনি দৃঢ়ভাবে বললেনঃ লাভ ও উজ্জার আপন পূজাকারীদের কি অবস্থা? এসব আল্লাহর তরফ থেকেই।

(উসুদুল গাবা)

অন্ধকার যুগে বাচ্চা হলে আরবরা বাচ্চার বিছানার নীচে কোন লৌহবস্ত্র রেখে দিতো। তাদের বিশ্বাস ছিল এরকম রাখলে বাচ্চাকে জ্বিন-ভূতে পাবে না। হযরত আয়েশা (রাযিঃ) একবার এরকম দেখে নিষেধ করলেন— বললেনঃ মহানবী সাল্লাল্লাহু আলাইহি ওয়াসাল্লাম এ ধরনের টোটকা নিষেধ করেছেন। (সহীহ বুখারী)

আরবে শিরকের মূল কেন্দ্র ছিল মূর্তি। প্রায় সকল ঘরেই এই মূর্তি ছিল। কিন্তু মহিলা সাহাবীগণ সকল ক্ষেত্রেই একে উপেক্ষা ও অবজ্ঞা করেন। হিন্দ বিনতে উতবা ঈমান আনলেন, নিজের ঘরে গিয়ে সমস্ত মূর্তি ভেঙ্গে ফেলেন এবং বলেনঃ আমরা তোমাদের কারণে বড়ো ধোকার ছিলাম। (তবকাত-ই-ইবনে সা'আদ)

হযরত আবু তালহা যখন উম্মে সুলাইম (রাযিঃ)কে বিয়ে করার ইচ্ছা জানান, উম্মে সুলাইম (রাযিঃ) বললেনঃ আবু তালহা! তুমি কি জানো তুমি যে খোদার পূজো করো, তা একটি গাছ মাত্র (অর্থাৎ কাষ্ঠমূর্তি) বা মৃত্তিকা থেকে জন্ম নিয়েছে এবং বা থেকে অতঃপর অমুক হাবশি মূর্তি তৈরী করেছে? আবু তালহা (রাযিঃ) বললেনঃ হ্যাঁ জানি। তারপর বললঃ তাহলে তার ইবাদত করতে তোমার কি লজ্জা হয় না। এরপর যতদিন তিনি মূর্তিপূজা ছেড়ে তওহীদের কলেমা পড়েননি, উম্মে সুলাইম (রাযিঃ)ও তাকে বিয়ে করতে রাজি হননি। (তবকাত-ই-ইবনে সা'আদ)

মহানবী সাল্লাল্লাহু আলাইহি ওয়াসাল্লাম-এর নবুয়্যতে পূর্ণ বিশ্বাস : মহানবী সাল্লাল্লাহু আলাইহি ওয়াসাল্লাম-এর নবুয়্যত সাহাবী রমণীদের বিশ্বাস কেবল পাথরে খোদাই করা শিলালিপির মতই সুদৃঢ় ছিল না, বরং তাঁদের ছোট ছোট মেয়েরাও অন্তরে এই বিশ্বাসকে একান্ত আপন করে নিয়েছিল। একটি ঘটনা— মহানবী সাল্লাল্লাহু আলাইহি ওয়াসাল্লাম একটি বালিকাকে বললেন, তোমার বয়স না বাড়ুক, বালিকার বিশ্বাস মহানবী সাল্লাল্লাহু আলাইহি ওয়াসাল্লাম-এর উপর এত বেশী যে, সে বিশ্বাস করে ফেলো নবীজীর কথা। তারপর কাঁদতে কাঁদতে উম্মে সুলাইম (রাযিঃ)-এর কাছে এসে বললঃ মহানবী সাল্লাল্লাহু আলাইহি ওয়াসাল্লাম আমাকে বদদোয়া করেছেন, এখন আমার আর বয়স বাড়বে না। তিনি বিচলিত হয়ে অতঃপর মহানবী সাল্লাল্লাহু আলাইহি ওয়াসাল্লাম-এর কাছে উপস্থিত হয়ে বললেন, আপনি আমার এতিম মেয়েকে বদ দু'আ দিলেন! মহানবী সাল্লাল্লাহু আলাইহি ওয়াসাল্লাম হেসে দিয়ে বললেন, আশিও তো একজন মানুষ অন্য মানুষের মত আমিও তো খুশি হই, বিষন্ন হই: কাজেই এমন কোন বদ দু'আ যদি কাউকে দেই যার ঔচিত্য নেই, যা ঠিক নয়। তাহলে তা তার জন্যে পবিত্রতা বোঝাবে, ভালত্ব বোঝাবে, মঙ্গল বোঝাবে। (তবকাত-ই-ইবনে সা'আদ)

ইবাদতসমূহ

প্রসঙ্গ নামায : যদিও মহিলাদের ক্ষেত্রে জামাতে নামায পড়া ফরয না এবং কোন কোন আত্মমর্যাদা সম্পন্ন সাহাবাগণ তাঁদের স্ত্রীদের জামাতে আসা পছন্দও করতেন না। তবুও কোন কোন মহিলা সাহাবীর উপর তাঁর বিশেষ প্রভাব পড়তো না এবং তারা উপযুক্ত সময়ে জামাতবদ্ধ হয়ে নামায পড়তেন। হযরত উমর (রাযিঃ) এর স্ত্রী বরাবর ইশা এবং ফজরের নামায জামাতে আদায় করতেন। একবার তাঁকে কেউ বললঃ তুমি কি জানো যে উমর (রাযিঃ) তোমার এরকম জামাতে আসা পছন্দ করেন না? তিনি উত্তরে বলল তাহলে আমাকে আসতে না দিলেই তো হয়, আসতে দেন কেন?

(সহীহ মুসলিম)

জুম'আর নামায : যদিও মহিলাদের জুম'আর নামায ফরয নয় তবুও মহিলা সাহাবীগণ সেই দিবসের বিশেষ কদর করতেন এবং উত্তম পন্থায় জুম'আর বরকতসমূহে অংশগ্রহণ করতেন। একজন মহিলা সাহাবী ছিলেন যিনি ক্ষেত্রে শালগমের মত লাল রং একটি শস্য রোপন করতেন এবং শুক্রবারে তা তুলে এনে পাক করে জুম'আর নামাযের পর সমস্ত সাহাবীদের খাওয়াতেন।

(সহীহ বুখারী)

ইশরাকের নামায : ইশরাকের নামায মহানবী সাল্লাল্লাহু আলাইহি ওয়াসাল্লাম-এর জীবৎকালে একবারই পড়েছিলেন। একথা উম্মে হানি (রাযিঃ) বর্ণনা করেন। কিন্তু তবু কোন কোন মহিলা সাহাবী এই নামাযকে বিশেষ নিষ্ঠার সাথে পড়তেন। হযরত আয়েশা (রাযিঃ) বলেছেনঃ আমি যদিও মহানবী সাল্লাল্লাহু আলাইহি ওয়াসাল্লামকে কখনো ইশরাকের নামায পড়তে দেখিনি, তবু আমি নিজে এ নামায পড়তাম। কেননা নবীজী সাল্লাল্লাহু আলাইহি ওয়াসাল্লাম নিজে বহু জিনিস পছন্দ করতেন। কিন্তু নিজে তা করতেন না। কারণ তাতে তাঁর উম্মত তা ফরয মনে করে বসতে পারে।

(সহীহ মুসলিম, কিতাবুস সালাত)

তাহাজ্জুদের নামায : সাহাবায়ে কেরাম তাহাজ্জুদের নামায পড়তেন। মহিলা সাহাবীগণ তাতে অংশগ্রহণ করতেন। হযরত উমর (রাযিঃ) তাহাজ্জুদের নামায পড়তে নিজের পরিবার পরিজনকে জাগিয়ে তুলতেন এবং এই আয়াতটি পড়তেন ওয়া'মুর বিস্‌সালাত ওয়াসতাবরে আলাইহা....।

(মুয়াত্তা, ইমাম মালেক)

হযরত আবু হুরায়রা (রাযিঃ) রজনীকে তিন ভাগে ভাগ করে নিয়েছিলেন। একাংশে নিজে, দ্বিতীয়াংশে তাঁর স্ত্রী এবং তৃতীয়াংশে তাঁর খিদমতকারী তাহাজ্জুদের নামায পড়তেন এবং একজন আরেকজনকে জাগিয়ে দিতেন। (সহীহ বুখারী, কিতাবুল আতইমা)

যাকাত সদকার অধ্যায়

অলংকার রমণীদের সবচেয়ে প্রিয় বস্তু, কিন্তু আল্লাহর সন্তোষ তার চেয়ে বেশি প্রিয় ছিল মহিলা সাহাবীগণ-এর নিকট। একবার নবীজী সাল্লাল্লাহু আলাইহি ওয়াসাল্লাম-এর কাছে একজন মহিলা সাহাবী তাঁর মেয়েকে নিয়ে হাজির হল। মেয়ের হাতে মোটা মোটা সোনার কাঁকন। মহানবী সাল্লাল্লাহু আলাইহি ওয়াসাল্লাম তা দেখেই বললেনঃ তুমি কি এগুলোর যাকাত দাও? তিনি বলল না। মহানবী সাল্লাল্লাহু আলাইহি ওয়াসাল্লাম বললেন, তোমার কি পছন্দ হবে- কিয়ামতের দিন আল্লাহ তা'আলা তোমার মেয়ের হাতে যখন আঙনের কাঁকন পরিয়ে দেবেন? সঙ্গে সঙ্গেই তিনি সেই কাঁকন খুলে সামনে রেখে দিয়ে বলল, এগুলো আল্লাহ এবং আল্লাহর রাসুলের।

একবার ঈদের খুতবায় মহানবী সাল্লাল্লাহু আলাইহি ওয়াসাল্লাম দান-খয়রাতের উৎসাহ দেন। মহিলা সাহাবীরা উপস্থিত ছিলেন। হযরত বিলাল (রাযিঃ) হাত ছড়িয়ে রেখেছিলেন, আর মহিলারা একে একে তাদের সকল অলংকার, গলার হার, কানের দুল, অঙ্গুরী সবই তার উপর ছুড়তে লাগলেন। হযরত আসমার (রাযিঃ) কাছে ছিল একটি দাসী মাত্র। তিনি তাকে বিক্রি করে দিয়ে টাকাটা কোলে তুলে বসলেন। এ সময় হযরত জুবাইর (রাযিঃ) এলেন এবং বললেন, টাকাটা আমাকে দিয়ে দাও, তিনি বললেন, আমি তো তা সদকা করে দিয়েছি। আব্দুল্লাহ বিন মাসউদ (রাযিঃ)-এর স্ত্রী হযরত যয়নব তাঁকে দান খয়রাত বিষয়ে বললেন। আবদুল্লাহ বিন মাসউদকে তিনি বললেন যে, তুমি তো গরীব মানুষ এখন রাসূলে কারীম সাল্লাল্লাহু আলাইহি ওয়াসাল্লাম-এর কাছে গিয়ে জেনে আসো তোমার উপর সদকা করার অনুমতি আছে কিনা; তিনি যদি অনুমতি দেন আমি যা সদকা করতে চাই, তা তোমাকে দিয়ে দেবো। হযরত আবদুল্লাহ বিন মাসউদ (রাযিঃ) বললেনঃ আমি না, তুমিই যাও। অতঃপর হযরত যয়নব মহানবী (সাল্লাল্লাহু আলাইহি ওয়াসাল্লাম)-এর আগ্নিনায় এলেন। তখন আরেকজন মহিলা সাহাবীও একই উদ্দেশ্যে মহানবী সাল্লাল্লাহু আলাইহি ওয়াসাল্লাম-এর কাছে এসেছিল। দু'জনেই হযরত বিলাল (রাযিঃ)-এর মাধ্যমেই মহানবী সাল্লাল্লাহু আলাইহি ওয়াসাল্লামকে জিজ্ঞেস করল যে, দু'জন মহিলা তাদের স্বামী এবং কতিপয় এতিমকে যারা তাদের দায়িত্ব আছে সদকা করতে চায়, এটি বৈধ হবে কি না? মহানবী সাল্লাল্লাহু আলাইহি ওয়াসাল্লাম বললেনঃ ওদের দ্বিগুণ সওয়াব মিলবে- একটি আত্মীয়তার কারণে, আরেকটি সদকার।

একবার হযরত উম্মে সালমা (রাযিঃ) জিজ্ঞেস করলেনঃ ইয়া রাসূলুল্লাহ সাল্লাল্লাহু আলাইহি ওয়াসাল্লাম! যদি আমি আবু সালমার বাচ্চাদেরকে সদকা করি, তাহলে কি আমার সওয়াব মিলবে? আমি তাদের ছেড়ে দিতে পারি না, কারণ তারা আমার ছেলে। মহানবী সাল্লাল্লাহু আলাইহি ওয়াসাল্লাম বললেনঃ হ্যাঁ, সওয়াব পাবে।

একটি মহিলা সাহাবী তার মাকে একটি দাসী সদকা হিসেবে দেন। মায়ের মৃত্যুর পর মহানবী সাল্লাল্লাহু আলাইহি ওয়াসাল্লামকে তার বিষয়ে জিজ্ঞেস করা হল। মহানবী সাল্লাল্লাহু আলাইহি ওয়াসাল্লাম বলেনঃ সদকার সওয়াব তুমি পেয়ে গেছে। এবং এখন সে দাসী তোমার উত্তরাধিকারের অন্তর্ভুক্ত হয়ে গেছে। (আবু দাউদ, কিতাবুয যাকাত)

দরিদ্রের প্রয়োজনানুগ সাহায্য : মহিলা-সাহাবীগণ জীবন ও মৃত্যু দু'টো অবস্থাতেই দরিদ্রের সাহায্য সহযোগিতা করতেন। উহোদ যুদ্ধে হযরত সুফিয়া (রাযিঃ) এলেন এবং আপন ভাই শহীদশ্রেষ্ঠ হযরত হামযা (রাযিঃ)-এর কাফনের জন্যে দুটো কাপড় আনেন, কিন্তু তার লাশের কাছে অন্য এক আনসারীরও লাশ ছিল ওরকম উলঙ্গ পড়ে ছিল। এই দৃশ্য দেখে তাঁর মনে চিন্তা এল যে, হামযার জন্যে দুটো কাপড়ের কাফন হবে অথচ এর জন্যে একটি কাপড়ও হবে না, এটাতো হয় না। তারপর তিনি মেপে দেখলেন দু'জনের শরীর, একজনের শরীর মনে হল বড়, তারপর কাপড়ের ওপর লটারী করল, যার ভাগে যে কাপড় উঠলো তাকে সেই কাপড় দিয়েই কাফন দেয়া হল।

(মুসনাদে আহমদ বিন হাম্বল, ১ম খণ্ড-পৃঃ ১৬৫)

রোযার অধ্যায়

সারাক্ষণ রোযা : আজকাল মুসলিম মেয়েরা ফরয রোযা রাখায়ই অভ্যস্ত নয়। অথচ কোন কোন মহিলা-সাহাবী প্রায় সবসময় রোযায় অতিবাহিত করতেন। হযরত আবু উসামা (রাযিঃ) বারবার শাহাদাতের জন্যে দোয়া প্রার্থনা করেন মহানবী সাল্লাল্লাহু আলাইহি ওয়াসাল্লাম-এর কাছে। কিন্তু মহানবী সাল্লাল্লাহু আলাইহি ওয়াসাল্লাম তাঁর জন্যে দু'আ করলেন শান্তি ও স্বস্তির। শেষে বললেন যে, এমন কোনো কাজের নির্দেশনা দিন, যা থেকে আল্লাহ আমাকে সৌভাগ্য দান করবেন। মহানবী সাল্লাল্লাহু আলাইহি ওয়াসাল্লাম তখন তাকে রোযা পালন করার নির্দেশ দিলেন। তা শুনে তিনি ধারাবাহিক ও অবিচ্ছিন্ন রোযা করার সিদ্ধান্ত নিয়ে নেন-তাঁর এই কাজে তার খাদেম এবং তার স্ত্রীও অংশগ্রহণ করেন এবং রোযা তাঁর পরিবারে একটি বৈশিষ্ট্যমূলক কর্ম হয়ে দাঁড়ায়। কোনো দিন যদি তার গৃহে ধোয়া উঠতো, তখন লোকজন মনে করতো আজ নিশ্চই তাদের ঘরে কোন অতিথি এসেছে, অন্যথায় তাদের ঘরে কি করে রান্না হতে পারে।

(মুসনাদে আহমদ বিন হাম্বল, ৫ম খণ্ড-পৃঃ ২৫৫)

নফল রোযা : কোন কোন মহিলা-সাহাবী নফল রোযা রাখতেন। সে কারণে তাদের স্বামীদের কষ্ট হত। তারা যখন তার বিরোধিতা করল মহিলারা খুব অসন্তুষ্ট হল এবং মহানবী (সাল্লাল্লাহু আলাইহি ওয়াসাল্লাম)-এর কাছে নালিশ করেন। মহানবী (সাল্লাল্লাহু আলাইহি ওয়াসাল্লাম) বললঃ স্ত্রীরা স্বামীদের অনুমতি ছাড়া নফল রোযা রাখতে পারে না।

(আবু দাউদ, কিতাবুস সিয়াম)

মৃতদের জন্যেও রোযা : মহিলা-সাহাবীগণ কেবল নিজেদের জন্যেই নয়, মৃতদের পক্ষেও তাঁরা রোযা রাখতেন। একজন মহিলা সাহাবী মহানবী সাল্লাল্লাহু আলাইহি

ওয়াসাল্লামকে বললেনঃ আমার মা মারা গেছেন এবং তার উপর রোযা ফরয ছিল আমি কি তা পূরণ করে দেবো। মহানবী সাল্লাল্লাহু আলাইহি ওয়াসাল্লাম অনুমতি দেন।

(সহীহ বুখারী, কিতাবুস সওম)

ই‘তেকাফ : মহিলা সাহাবীগণ ই‘তেকাফে এত উৎসাহী ছিলেন যে, একবার মহানবী সাল্লাল্লাহু আলাইহি ওয়াসাল্লাম নিজের জন্যে ই‘তেকাফের তাবু টানাতে বললে হযরত আয়েশা (রাযিঃ) নিজের জন্যেও আলাদাভাবে তাবু টানিয়ে নেন। তখন তাঁর দেখাদেখি সকল পবিত্র নবীপত্নী ই‘তেকাফের জন্যে তাবু টাঙ্গিয়ে ফেলেন।

(আবু দাউদ, কিতাবুস সিয়াম)

হজ্জ প্রসঙ্গ

হজ্জ : হজ্জ যদিও জীবনে একবার মাত্র ফরয, তবুও একবারের হজ্জে মহিলা সাহাবীদের স্বস্তি ছিল না। এজন্যে প্রায় সব বছরই তাঁরা হজ্জ করতেন। একবার হযরত আয়েশা (রাযিঃ) মহানবী সাল্লাল্লাহু আলাইহি ওয়াসাল্লাম-এর কাছ থেকে জিহাদের অনুমতি চাইলে মহানবী সাল্লাল্লাহু আলাইহি ওয়াসাল্লাম বললেনঃ সবচেয়ে উৎকৃষ্ট জিহাদ হচ্ছে মকবুল হজ্জ। এরপর থেকে তার কোন বছর হজ্জ খালি যেত না।

(সহীহ বুখারী, কিতাবুল হজ্জ)

মহিলা সাহাবীগণ যে আগ্রহ ও উৎসাহের সঙ্গে হজ্জে অংশগ্রহণ করেন তার প্রভাবসঞ্চারী দৃশ্য বিদায় হজ্জে এই পৃথিবী অবলোকন করেছে। মহানবী সাল্লাল্লাহু আলাইহি ওয়াসাল্লাম হজ্জের ঘোষণা দিলেন। হযরত আসমা বিনতে উমাইস গর্ভবতী হয়েও হজ্জে রওয়ানা হয়ে যান।

অনেক সাহাবা বিদায় হজ্জে যোগ দেয়ার জন্যে যাচ্ছিলেন। রাস্তায় মহানবী সাল্লাল্লাহু আলাইহি ওয়াসাল্লাম-এর সঙ্গে দেখা হয়। তখন একজন মহিলা সাহাবী ঝট করে মহানবী সাল্লাল্লাহু আলাইহি ওয়াসাল্লাম-এর কাছে আসেন এবং উটের আসন ছাড়নির ভেতর থেকে নিজের বাচ্চাকে বের করে জিজ্ঞেস করলেনঃ এর হজ্জ হতে পারে কি? তিনি বলল, হ্যাঁ, তুমি তার ছওয়াব পাবে।

(আবু দাউদ, কিতাবুল মানাসিক)

মহিলা সাহাবীগণ হজ্জ আদায় করতে গিয়ে এমন কিছু কাজ নিজের জন্যে অনিবার্য করে নিতেন যেগুলো ওয়াজিবই নয়। একজন মহিলা সাহাবী এরকম নিয়ত করে বসলেন যে, কাবাঘর পর্যন্ত হেঁটেই যাব। মহানবী সাল্লাল্লাহু আলাইহি ওয়াসাল্লামকে জিজ্ঞেস করলে মহানবী সাল্লাল্লাহু আলাইহি ওয়াসাল্লাম বলেন যে, হেঁটেও যাও এবং আরোহণও কর।

(সহীহ বুখারী, কিতাবুল হজ্জ)

কোন অপরাগতার কারণে যদি হজ্জ নষ্ট হয়ে যাবার আশংকা হয়ে যেতো, তখন মহিলা সাহাবীগণ খুব ব্যথিত হত। বিদায় হজ্জে হযরত আয়েশা (রাযিঃ)-এর নারীসূলভ চাহিদার কারণে অপরাগতা সৃষ্টি হয়। তখন মহানবী সাল্লাল্লাহু আলাইহি ওয়াসাল্লাম

জিজ্ঞেস করলেন, ব্যাপার কি। তিনি বলাধেন, আমি তো এখনো হজ্জ করিনি। মহানবী সাল্লাল্লাহু আলাইহি ওয়াসাল্লাম বললেন সুবহানাল্লাহ! এটা তো প্রকৃতির স্বাভাবিক ব্যাপার। হজ্জের অন্যসব কর্মগুলো সম্পন্ন করে নাও। কেবল কাবা ঘরের শুওয়াফ করো না।

(আবু দাউদ, কিতাবুল মানাসিক)

মাতা-পিতার পক্ষে হজ্জ : মহিলা সাহাবীগণ (রাযিঃ) কেবল নিজেদেরই নয় মাতা-পিতার পক্ষেও তাঁরা হজ্জ করতেন। বিদায় হজ্জে একজন মহিলা সাহাবী মহানবী সাল্লাল্লাহু আলাইহি ওয়াসাল্লাম-এর কাছে উপস্থিত হন এবং বললেন যে, আমার পিতার ওপর হজ্জ ফরয হয়ে গেছে। কিন্তু তিনি তো বুড়ো, কোথাও আরোহণ করা তাঁর সাধ্যের বাইরে এখন আমি কি তাঁর পক্ষে হজ্জ করতে পারি? মহানবী সাল্লাল্লাহু আলাইহি ওয়াসাল্লাম তাঁকে অনুমতি দেন।

(সহীহ বুখারী, কিতাবুল হজ্জ)

একজন মহিলা সাহাবীর মাতার মৃত্যু হয়। তিনি মহানবী সাল্লাল্লাহু আলাইহি ওয়াসাল্লাম-এর কাছে আসেন এবং বলেনঃ আমার আত্মা কখনো হজ্জ করেননি, এখন আমি কি তাঁর পক্ষে হজ্জ আদায় করতে পারি? মহানবী সাল্লাল্লাহু আলাইহি ওয়াসাল্লাম অনুমতি দান করেন।

(সহীহ বুখারী, কিতাবুল হজ্জ)

ওমরা করা : ওমরা ফরয হোক অথবা না হোক মহিলা সাহাবীগণ অত্যন্ত নিয়মানুবর্তিতার সঙ্গে ওমরা আদায় করতেন এবং কোন কারণে যদি ওমরা নষ্ট হয়ে যেত, তাহলে তাঁরা খুব কষ্ট পেতেন। বিদায় হজ্জে যখন মহানবী সাল্লাল্লাহু আলাইহি ওয়াসাল্লাম নির্দেশ দিলেন যে, যাদের কাছে কুরবানীর জন্তু নেই তারা ওমরা আদায় করতে পারে। কিন্তু তাঁবুতে ফিরে হযরত আয়েশা (রাযিঃ)কে কাঁদতে দেখলেন। কারণ জিজ্ঞেস করলে হযরত আয়েশা (রাযিঃ) বললেনঃ আমি বিশেষ কারণে অপারগ হয়ে গেছি। অথচ লোকজন হজ্জ এবং ওমরা দু'টোরই সওয়াব নিয়ে যাচ্ছে, অথচ আমি সওয়াব পাচ্ছি একটার। মহানবী সাল্লাল্লাহু আলাইহি ওয়াসাল্লাম বললেন, কোন ক্ষতি নেই আল্লাহ তা'আলা তোমাকে ওমরার ছওয়াবও দান করবেন। তখন মহানবী সাল্লাল্লাহু আলাইহি ওয়াসাল্লাম হযরত আবদুর রহমান বিন আবু বকরকে সঙ্গে করে দেন— তনয়ীম নামক স্থান থেকে হযরত আয়েশা (রাযিঃ) ওমরার এহরাম বাঁধেন এবং মধ্যরাতে সবকিছু সেরে আসেন।

(সহীহ মুসলিম, কিতাবুস সওম)

জিহাদ প্রসঙ্গে

শাহাদাতবরণের আগ্রহ : নবীজী সাল্লাল্লাহু আলাইহি ওয়াসাল্লাম-এর কালে শাহাদাতবরণকে একটি চিরন্তন জীবন মনে করা হত। এজন্যে সকলেই এ আবহায়াতের জন্যে তৃষ্ণার্ত থাকত। হযরত উম্মে ওয়ারাকা বিনতে নওফল (রাযিঃ) ছিল একজন সাহাবী। যখন বদরের যুদ্ধ হল মহানবী সাল্লাল্লাহু আলাইহি ওয়াসাল্লামকে তিনি বললেন : আমাকে যুদ্ধে অংশগ্রহণের অনুমতি দিন: আমি

অসুস্থদের শুশ্রূষা করবো এবং হতে পারে আমিও শহীদের মর্যাদা অর্জন করব। মহানবী সাল্লাল্লাহু আলাইহি ওয়াসাল্লাম বললেন ঘরেই থাক, আল্লাহ তোমাকে সেখানেই শাহাদাতের সৌভাগ্য দান করবেন। এই মোযেজা ও ভবিষ্যৎবাণী কিভাবে মিথ্যে হতে পারে? তাঁর দু'জন মুদাক্কার দাস ছিল, তারাই তাঁকে শহীদ করে দেয়।

কুরআনুল কারীমের প্রতি আমল

কুরআনুল কারীমের অনন্য প্রভাব ছিল মহিলা সাহাবীগণের জীবনে। একবার হযরত আয়েশা (রাযিঃ) মহানবী সাল্লাল্লাহু আলাইহি ওয়াসাল্লামকে বললেনঃ কুরআনের এই আয়াতটি 'যে ব্যক্তি কোন একটি খারাপ কাজ করবে তাকে তার বদলা দেয়া হবে' একটু রুতু ও কঠোর। মহানবী সাল্লাল্লাহু আলাইহি ওয়াসাল্লাম বললেনঃ তুমি কি জানো না মুসলমানের পায়ে যদি একটি কাঁটা বিদ্ধ হয়, তাহলে তা তার খারাপ কাজের ক্ষতিপূরণ হয়ে যায়। আয়েশা (রাযিঃ) বললেনঃ কিন্তু আল্লাহ তো বলেছেন আল্লাহ ক্ষুদ্র ক্ষুদ্র খারাপ কাজেরও হিসেব নেবেন। মহানবী সাল্লাল্লাহু আলাইহি ওয়াসাল্লাম বললেনঃ তার অর্থটি হচ্ছে 'আমল' আল্লাহর কাছে পেশ করা হবে আযাব তাকেই দেয়া হবে যারা হিসেবের বেলায় জিজ্ঞাসাবাদ হবে। (আবু দাউদ, কিতাবুল জানায়েয)

এর ফলাফল দাঁড়ালো এই যে, মহিলা সাহাবীগণ অতীব একাগ্রতার সঙ্গে কুরআনের ওপর আমল করতে প্রস্তুত হয়ে যেতেন। হযরত আবু হুযাইফা বিন উতবা হযরত সালেম (রাযিঃ)কে নিজের ডাকপুত্র হিসেবে গ্রহণ করেছিলেন। এজন্যে জাহেলী যুগের প্রথা অনুযায়ী তিনি প্রকৃত ছেলের অধিকার অর্জন করেছিলেন। কিন্তু যখন কুরআনুল কারীমের এই আয়াত 'তাদেরকে তাদের প্রকৃত পিতার ছেলে বলে ডাকো' অবতীর্ণ হল, তখন তার স্ত্রী মহানবী সাল্লাল্লাহু আলাইহি ওয়াসাল্লাম-এর কাছে এলেন এবং বললেনঃ সালেম আগে আমাদের ঘরে থাকত এবং তার সাথে কোন পর্দা ছিল না। এখন এ বিষয়ে আপনার নির্দেশ কি? মহানবী সাল্লাল্লাহু আলাইহি ওয়াসাল্লাম বললেনঃ দুধ পান করিয়ে দাও, সে তোমার দুধ ছেলে হয়ে যাবে। (আবু দাউদ, কিতাবুন নিকাহ) অন্ধকার যুগে আরব রমণীরা অত্যন্ত বেপরোয়াভাবে দোপাট্টা পরতো আর বুক এবং মাথা সেজন্যে অনাবৃত থাকত। এ বিষয়ে অবতীর্ণ হল এই আয়াত :

'মহিলাদের উচিত নিজেদের দোপাট্টা নিজেদের বুকের উপর রাখা।'

এই আয়াতের এমন প্রভাব সৃষ্টি হল যে, মহিলাগণ নিজেদের নানারকম কাপড়কে দোপাট্টা বানিয়ে নিলো এবং নিজেদেরকে কালো চাদর দিয়ে এমন আবৃত ও আচ্ছাদিত করে নিত হযরত আয়েশা (রাযিঃ)-এর কথামত তাদের মস্তকে কূপের মত অন্ধকার বিরাজ করতো।

(আবু দাউদ, কিতাবুল লিবাস)

শরীয়ত নিষিদ্ধ কাজ থেকে বিরত থাকা

বাদ্যযন্ত্র থেকে বিরত থাকা : গান-বাজনা তো বড় জিনিষ হযরত আয়েশা (রাযিঃ)-এর অবস্থা ছিল এই যে, তিনি উটের ঘন্টা ধ্বনি পর্যন্ত শোনা পছন্দ করতেন না। যদি সামনে থেকে সে ঘন্টা ধ্বনি আসত, তাহলে উষ্ট্র চালককে বলতেন, থেমে যাও, যাতে এ শব্দ না শুনি; আর যদি শুনে যেতেন, তাহলে বলতেন তাড়াতাড়ি নিয়ে চল যাতে এ শব্দ না শুনে পাই।

(মুসনাদে আহমদ বিন হাম্বল, ৬ষ্ঠ বঃ-পৃঃ ১৫২)

একবার এক বালিকা হযরত আয়েশা (রাযিঃ)-এর ঘরে ঘুঙ্গুর পরে প্রবেশ করে। ঘুঙ্গুরের শব্দ শুনেই তিনি বললঃ ঘুঙ্গুর পরে সে যেন আমার কাছে না আসতে পারে। মহানবী সাল্লাল্লাহু আলাইহি ওয়াসাল্লাম বলছেন, যে ঘরে এ ধরনের শব্দ হয় সে ঘরে ফেরেশতা আসেন না।

(মুসনাদে আহমদ বিন হাম্বল, পৃঃ ২৪২)

সন্দেহমূলক কর্ম থেকে দূরে থাকা : হাদীছ শরীফে এসেছে, যা সন্দেহমূলক, তা ছেড়ে এমন বিষয় অবলম্বন করো যা সন্দেহমুক্ত। হালালও সুপ্রত্যক্ষ, হারামও সুপ্রত্যক্ষ কিন্তু তাদের মাঝামাঝি সন্দেহমূলক অনেক জিনিস আছে। কাজেই যে ব্যক্তি সন্দেহমূলক পাপগুলো ছেড়ে দেবে, সে স্বাভাবিকভাবে সুস্পষ্ট পাপগুলো ছেড়ে দিতে পারবে সর্বাত্মে। আর যে সন্দেহমূলক পাপের সঙ্গে জড়িত হবে স্পষ্ট পাপকাজে তার জড়িয়ে যাবার খুবই সম্ভাবনা আছে। পাপ হচ্ছে আল্লাহর চারণভূমির মত। যে ব্যক্তি সে চারণভূমির আশেপাশে নিজের জন্তু চরাবে তার জন্তু ঐ চারণভূমিতে ঢুকে পড়ার সম্ভাবনা আছে। মহিলা সাহাবীগণ এ হাদীছকে গভীরভাবে অনুসরণ করতেন ও আমল করতেন।

একজন মহিলা সাহাবী নিজের দাসীকে নিজের মার জন্যে সদকা করে দেন। মা মারা গেল। তখন দাসীর বিষয়ে একটি সন্দেহ সৃষ্টি হল। সদকা করে ফেলেছিল আর সদকার মাল তো ফেরৎ নেয়া যায় না। মা হয়ে গিয়েছিলেন দাসীর মালিক, আর তাঁর মারা যাবার পর এই দাসী তাঁর উত্তরাধিকারে পরিণত হয়েছিল। এজন্যে এই দাসীকে উক্ত মহিলা সাহাবী উত্তরাধিকার হিসেবে পেতে পারেন। এই যে, একটি সন্দেহের সৃষ্টি হল, এজন্যে তিনি মহানবী সাল্লাল্লাহু আলাইহি ওয়াসাল্লামকে জিজ্ঞেস করলেন মহানবী সাল্লাল্লাহু আলাইহি ওয়াসাল্লাম বললেন, সদকার সওয়াব তুমি পেয়ে গেছো। এখন দাসী উত্তরাধিকার হিসেবে তোমার মালিকানায় এসে গেছে।

(আবু দাউদ, কিতাবুল ওসায়ী)

হযরত আসমা (রাযিঃ)-এর মাতা 'কতিলা' কাফির ছিলেন। হযরত আবু বকর (রাযিঃ) অন্ধকার যুগেই তাকে তালাক দিয়েছিলেন। একবার তিনি হযরত আসমা (রাযিঃ)-এর কাছে বেশ কিছু উপটোকন সমেত আসেন যেহেতু তা ছিল এক কাফির রমণীর উপটোকন, এজন্যে হযরত আসমা (রাযিঃ) তা নিতে অস্বীকৃতি জানান এবং হযরত আয়েশা (রাযিঃ)-এর মাধ্যমে মহানবী সাল্লাল্লাহু আলাইহি ওয়াসাল্লাম-এর কাছে উক্ত

বিষয়ে জিজ্ঞাসা করেন; মহানবী সাল্লাল্লাহু আলাইহি ওয়াসাল্লাম তা গ্রহণ করাপ্র
অনুমতি দেন। (তবকাত-ই-ইবনে সা'আদ)

ধর্মীয় জীবনের বিভিন্নরূপ

তসবীহ তাহলীল পবিত্র ধর্মীয় জীবনের বিশেষ লক্ষণ ও নিদর্শন। মহিলা সাহাবীগণের মধ্যে এ নিদর্শন সাধারণভাবেই পাওয়া যেত। একজন মহিলা সাহাবী সম্মুখে কান্না অথবা কোন পুটলি রেখে তসবীহ পড়ছিলেন। মহানবী সাল্লাল্লাহু আলাইহি ওয়াসাল্লাম তা দেখে বললেনঃ এর দরকার কি? আমি এর থেকে সহজ পদ্ধতি বলে দিচ্ছি। এরপর মহানবী সাল্লাল্লাহু আলাইহি ওয়াসাল্লাম তাঁকে একটি দু'আ শিখিয়ে দেন।

(আবু দাউদ, কিতাবুল ওসায়)

পবিত্র স্থানসমূহের দর্শন : সৌভাগ্য অর্জনের কৌতুহল ও আগ্রহ মহিলা সাহাবীদের নিয়ে যেত পবিত্র স্থানসমূহের নিকটে। একবার এক মহিলা সাহাবী অসুস্থ হয়ে মানত মানলেন যে, আল্লাহ যদি সুস্থতা দান করেন, তাহলে বায়তুল মুকাদ্দাস গিয়ে নামায পড়ব। সুস্থ হলে তিনি সফরের আয়োজন করলেন। বিদায় নেবার জন্যে হযরত মায়মুনা (রাযিঃ)-এর কাছে এলেন, হযরত মায়মুনা (রাযিঃ) কাছে এলে, হযরত মায়মুনা (রাযিঃ) বলেনঃ মসজিদে নববীতে নামায পড়ে নাও রাসূলুল্লাহ সাল্লাল্লাহু আলাইহি ওয়াসাল্লাম বলেছেনঃ আমার মসজিদে একবার নামায পড়া, অন্য মসজিদসমূহের হাজার নামায পড়ার চেয়ে উত্তম। (তবকাত-ই-ইবনে সা'আদ)

একজন মহিলা সাহাবী কুবা মসজিদ পর্যন্ত পায়ে হেঁটে যাবার মানত করেন, মানত পূরণ করার আগেই তার ইন্তেকাল হয়ে যায়। হযরত আব্দুল্লাহ বিন আব্বাস (রাযিঃ) ফতোয়া দেন যে, তাঁর কন্যা মানত পূরণ করবে। (আবু দাউদ)

ইবাদতের আগ্রহ সকল শারীরিক কষ্টকে সহজ করে দেয়। মহিলা সাহাবীদের মধ্যে আগ্রহ বরাবরই প্রবল ছিল। এজন্যে তাঁরা সকল কষ্ট সহ্য করতেন এবং ইসলামের ফারায়েযসমূহ আনন্দের সঙ্গে আদায় করতেন। হযরত হামনা বিনতে জাহাশ (রাযিঃ) ছিলেন একজন সাহাবী। তাঁর অভ্যাস ছিল সবসময় নামাযে নিমগ্ন থাকা। যখন ক্লান্ত হয়ে যেতেন মসজিদের পিলারের সঙ্গে সংযুক্ত রশিতে ঝুলতে থাকতেন। রশিটি তিনি নিজেই ওভাবে বেঁধে রেখেছিলেন। মহানবী সাল্লাল্লাহু আলাইহি ওয়াসাল্লাম এই রশি দেখে বললেনঃ তাঁর তো ততটুকু নামায পড়া উচিত যতটুকু তার সাধ্য, যতটুকুর শক্তি তাঁর আছে। যদি অক্লান্ত হয়ে পড়ে, তাহলে বসে যাওয়া উচিত। এরপর মহানবী সাল্লাল্লাহু আলাইহি ওয়াসাল্লাম সেই রশি খুলিয়ে বাইরে ফেলে দেন। (সহীহ মুসলিম)

শপথ পূরণে সততা : আমরা কথায় কথায় কসম খাই এবং আমাদের মনেও হয় না কসম করলে কোন দায়িত্ব থাকে কি না। কিন্তু মহিলা সাহাবীগণ খুব কম কসম করতেন এবং যে বিষয়ে কসম করতেন তা পূরণ করতেন।

একবার হযরত আয়েশা (রাযিঃ) হযরত আব্দুল্লাহ বিন জুবাইর (রাযিঃ)-এর ওপর অসন্তুষ্ট হন এবং শপথ করেন যে, এখন তাঁর সঙ্গে কথাবার্তা বলবেন না। কিন্তু আব্দুল্লাহ বিন জুবাইর (রাযিঃ) মাফ চাইলেন এবং অন্যান্য সাহাবীরাও তাঁর জন্যে সুপারিশ করলেন। হযরত আয়েশা (রাযিঃ) কেঁদে কেঁদে বলতে লাগলেন। ‘আমি মানত করে ফেলেছি, আর মানত করা কঠিন কাজ।’ শেষমেষ সবার সুপারিশ এবং অনুরোধে তিনি তাঁর ক্রটি ক্ষমা করেছেন এবং কসমের কাফফারা দিতে গিয়ে চল্লিশজন দাস স্বাধীন করে দেন।

(সহীহ বুখারী, কিতাবুল আদব)

নবীপ্রেম

মহিলা সাহাবীগণ সবসময় মহানবী সাল্লাল্লাহু আলাইহি ওয়াসাল্লাম-এর সত্তা থেকে বরকত অর্জনের জন্যে উন্মুখ থাকতেন। যখনি কোন বাচ্চার জন্ম হত, সবার আগে তাকে মহানবী সাল্লাল্লাহু আলাইহি ওয়াসাল্লাম-এর কাছে হাজির করতেন। নবীজী সাল্লাল্লাহু আলাইহি ওয়াসাল্লাম বাচ্চার গায়ে হাত বুলিয়ে দিতেন। নিজের মুখে খেজুর নিয়ে তারপর তা বাচ্চার মুখে দিতেন এবং তার জন্যে বরকতের দু’আ করতেন।

(সহীহ মুসলিম, কিতাবুল ফাজায়েল)

মহানবীর (সাঃ) স্মৃতি সংরক্ষণ : মহিলা সাহাবীরা নবীজীর স্মৃতিসমূহকে প্রাণাধিক ভালবাসতেন। হযরত আয়েশা (রাযিঃ) এর কাছে মহানবী সাল্লাল্লাহু আলাইহি ওয়াসাল্লাম-এর একটি জোকা ছিল। হযরত আয়েশা (রাযিঃ)-এর ইন্তেকালের পর হযরত আসমা (রাযিঃ) সে জামা নিয়ে নেন এবং সংরক্ষণ করেন। যে কেউ তাঁর পরিবারে অসুস্থ হত, তিনি জামা ধুইয়ে পানি খাইয়ে দিলে সে ভাল হয়ে যেতো।

(মুসনাদে আহমদ বিন হাম্বল, ৬ষ্ঠ খন্ড)

যে কাপড়সমূহে মহানবী সাল্লাল্লাহু আলাইহি ওয়াসাল্লাম-এর ইন্তেকাল হয়েছিল, হযরত আয়েশা (রাযিঃ) তা সংরক্ষণ করেছিল। যেমন একদিন তিনি এক সাহাবীকে এক ইয়েমেনী পাজামা এবং একটি কম্বল দেখিয়ে বললেন যে, আল্লাহর কসম! মহানবী সাল্লাল্লাহু আলাইহি ওয়াসাল্লাম এই সব কাপড়সমূহে ইন্তেকাল করেছেন।

(আবু দাউদ, কিতাবুল লিবাস)

একবার এক মহিলা সাহাবী মহানবী সাল্লাল্লাহু আলাইহি ওয়াসাল্লামকে আমন্ত্রণ করেন। মহানবী সাল্লাল্লাহু আলাইহি ওয়াসাল্লাম খাওয়ার পর যে মশক থেকে পানি পান করেন তিনি তা সংরক্ষণ করেন। যখন কোন ব্যক্তি অসুস্থ হত কিংবা বরকত গ্রহণের সুযোগ আসতো, তখন তিনি সেখান থেকে পানি দিতেন, পান করাতেন।

(তবকাত-ই-ইবনে সা’আদ)

যখন মহানবী সাল্লাল্লাহু আলাইহি ওয়াসাল্লাম হযরত আনাস (রাযিঃ)-এর ঘরে আসতেন তখন হযরত আনাস (রাযিঃ)-এর মাতা মহানবী সাল্লাল্লাহু আলাইহি

ওয়াসাল্লাম-এর ঘাম নিংড়ে নিয়ে একটি শিশিতে ভরে নিতেন এবং তা সংরক্ষণ করে রাখতেন। (সহীহ বুখারী)

খায়বরের যুদ্ধে মহানবী সাল্লাল্লাহু আলাইহি ওয়াসাল্লাম এক মহিলা সাহাবীকে আপন হাতে একটি হার পরিয়ে দিয়েছিলেন। তিনি তার এত কদর করেছিলেন যে, সারাজীবন তা আপন গলা থেকে আলাদা করেননি। যখন মারা যান এই অসীয়াত করেন যে, হারটি যেন তারই সঙ্গে দাফন করে দেয়া হয়।

(মুসনাদে আহমদ বিন হাম্বল, ৬ষ্ঠ খণ্ড-পৃঃ ৩৮০)

একদিন মহানবী সাল্লাল্লাহু আলাইহি ওয়াসাল্লাম হযরত উম্মে সুলাইম (রাযিঃ)-এর গৃহে এলেন। ঘরে একটি মশক বুলছিল। মহানবী সাল্লাল্লাহু আলাইহি ওয়াসাল্লাম নিজের মুখে লাগিয়ে তা থেকে পানি পান করেন। হযরত উম্মে সুলাইম (রাযিঃ) সেই অংশটুকু কেটে মধুর স্মৃতির নির্দশন হিসেবে তা রেখে দিয়েছিলেন।

(আবু দাউদ, কিতাবুল লিবাস)

মহানবী সাল্লাল্লাহু আলাইহি ওয়াসাল্লাম হযরত শিফা বিনতে আবদুল্লাহর (রাযিঃ) ঘরে কখনো কখনো দুপুরে বিশ্রাম করতেন। এজন্যে তিনি মহানবী সাল্লাল্লাহু আলাইহি ওয়াসাল্লাম-এর জন্যে একটি বিছানা এবং বিশেষ একটি পরিধেয় বস্ত্র বানিয়ে নিয়েছিল। সেই কাপড় পরে মহানবী সাল্লাল্লাহু আলাইহি ওয়াসাল্লাম আরাম করতেন। বহুদিন পর্যন্ত মহানবী সাল্লাল্লাহু আলাইহি ওয়াসাল্লাম-এর এই নির্দশন তার ঘরে সংরক্ষিত ছিল। পরবর্তীতে মারওয়ান তা নিয়ে নেয়। (তবকাত-ই-ইবনে সা'আদ)

মহানবী সাল্লাহু আলাইহি ওয়াসাল্লাম এর সম্মান : মহিলা সাহাবীগণ মহানবী সাল্লাল্লাহু আলাইহি ওয়াসাল্লামকে পরিপূর্ণ সম্মান প্রদর্শনের জন্যে যাবতীয় কাপড়-চোপড় পরে নিতেন। একজন মহিলা সাহাবী বলেন :

আমি সকল কাপড় পরে নিলাম এবং মহানবী সাল্লাল্লাহু আলাইহি ওয়াসাল্লাম-এর কাছে এলাম। (আবু দাউদ, কিতাবুত তালাক, উসুদুল গাবা)

যদি অনিচ্ছাকৃতভাবে কোন কথা অশোভনভাবে মহানবী সাল্লাল্লাহু আলাইহি ওয়াসাল্লাম-এর সামনে বেরিয়ে যেত, তাহলে সঙ্গে সঙ্গেই মাফ চেয়ে নিতেন। একজন মহিলা সাহাবীর বাচ্চা মরে গিয়েছিল এবং সেজন্যে তিনি কাঁদছিলেন। মহানবী সাল্লাল্লাহু আলাইহি ওয়াসাল্লাম তখন সেদিক দিয়ে যাচ্ছিলেন। এ অবস্থা দেখে তাকে বললঃ আল্লাহকে ভয় কর এবং ধৈর্য ধর। মহিলা ঠিক বোঝেননি কে বলছেন এই কথা; ফলে মহিলা বললেনঃ তুমি আমার বিপদের কথা কি বুঝবে? মহানবী সাল্লাল্লাহু আলাইহি ওয়াসাল্লাম চলে যাবার পর লোকেরা তাকে বললেন; উনিতো ছিলেন মহানবী সাল্লাল্লাহু আলাইহি ওয়াসাল্লাম। দৌড়ে এলেন মহিলা এবং বললেনঃ নবীজী সাল্লাল্লাহু আলাইহি ওয়াসাল্লাম আপনাকে আমি চিনতে পারিনি।

(আবু দুউদ, কিতাবুল জানায়েয)

মহানবী সাল্লাল্লাহু আলাইহি ওয়াসাল্লাম-এর সহযোগিতা

মহিলা সাহাবীগণ অত্যন্ত আগ্রহের সঙ্গে মহানবী সাল্লাল্লাহু আলাইহি ওয়াসাল্লামকে সাহায্য করার আন্তরিক উৎসাহ পোষণ করতেন। হযরত তুলাইব বিন উমাইর (রাযিঃ) ইসলাম গ্রহণের পর যখন তার মাতা আরওয়া তা জানতে পারলেন বললেনঃ তুমি যে ব্যক্তির সহযোগিতা করলে, সে ব্যক্তিই তাঁর সর্বাধিক অধিকারী ছিলেন। গুরুষদের মত আমরাও যদি ক্ষমতা রাখতাম, তাহলে আমরাও তার হিফায়ত করতাম, তার জন্যে লড়াই করতাম।

(ইসতিযাব)

মহানবী সাল্লাল্লাহু আলাইহি ওয়াসাল্লাম-এর সেবা : মহিলা সাহাবীগণ নবীজীর সেবাকে শিরোধার্য করে নিয়েছিল। হযরত সালমা (রাযিঃ) এমন একজন সাহাবিয়া, যিনি এত নিষ্ঠা ও একাগ্রতার সঙ্গে মহানবী সাল্লাল্লাহু আলাইহি ওয়াসাল্লাম-এর সেবা করেন যে, তাকে ‘মহানবী সাল্লাল্লাহু আলাইহি ওয়াসাল্লাম সেবিকা’ উপাধি দেয়া হয়।

(আবু দাউদ, কিতাবুত তিব)

সফিনা ছিলেন হযরত সালমা (রাযিঃ)-এর মাতার দাসী। তিনি তাকে এই শর্তে মুক্তি দিয়েছিল যে, যাতে তিনি সারাজীবন মহানবী সাল্লাল্লাহু আলাইহি ওয়াসাল্লাম-এর সেবায় নিবেদন করেন। তিনি বলেনঃ ‘যদি আপনি এই শর্ত নাও করতেন তবু আমি মৃত্যু অবধি মহানবী সাল্লাল্লাহু আলাইহি ওয়াসাল্লাম-এর সেবা থেকে নিজেকে বিযুক্ত করতাম না।

(আবু দাউদ, কিতাবুত তিব)

মহানবী সাল্লাল্লাহু আলাইহি ওয়াসাল্লাম-এর মহান আধ্যাত্মিক রূপদর্শনে মহিলা সাহাবীগণ অভিভূত ও বিচলিত হয়ে যেতেন। কাঁপুনি ধরতো তাদের শরীরে। একবার মসজিদে মহানবী সাল্লাল্লাহু আলাইহি ওয়াসাল্লামকে পায়ের উপর ভর দ্বিষ্ট বসে থাকতে দেখে হযরত খাদীজা (রাযিঃ)-এর অন্তরে এমন ভয় ও ভীতি সঞ্চারিত হয় যে, তাঁর সারা অঙ্গে কাঁপন ধরে যায়।

(শামায়েলে তিরমিযী)

নাতে রাসূল সাল্লাল্লাহু আলাইহি ওয়াসাল্লাম : মহিলা সাহাবীগণের ছোট ছোট বাচ্চা বালিকারাও মহানবী সাল্লাল্লাহু আলাইহি ওয়াসাল্লাম-এর প্রশংসায় মুখর থাকতেন। মহানবী সাল্লাল্লাহু আলাইহি ওয়াসাল্লাম হিজরত করে মদীনা এলে বালিকারা দফ বাজিয়ে গাইতে লাগলো :

‘আমরা বনু নজ্জার গোত্রের বালিকা

নবীজী আমাদের কত উত্তম পড়শী’

আর অন্তরালবাসিনী মহিলারা গাইতে লাগলেন :

‘সনিয়াতুল বিদা থেকে আমাদের জন্যে উদ্ভিত হয়েছে পূর্ণিমার চাঁদ;

প্রার্থনাকারী প্রার্থনা করবেন, আর আমরা আল্লাহর কৃতজ্ঞতা জানিয়ে যাব।

হযরত আয়েশা (রাযিঃ) যখন পিতা-মাতা থেকে বিদায় নিয়ে মহানবী সাল্লাল্লাহু আলাইহি ওয়াসাল্লাম-এর গৃহে আগমন করলেন বালিকারা দফ বাজিয়ে বদরের গীত ধরলো তার ভেতর বলে উঠল :

‘আমাদের এমন নবী আছে, যিনি জানেন আগামীর কথা’

এ কথা মহানবী সাল্লাল্লাহু আলাইহি ওয়াসাল্লাম পছন্দ করেননি। এটি বলতে নিষেধ করে তাদের তিনি বললেন, তোমরা আগে যা গাইছিলে, তা-ই গেয়ে যাও।

(সহীহ বুখারী, কিতাবুন নিকাহ)

মহানবী সাল্লাল্লাহু আলাইহি ওয়াসাল্লাম-এর নির্দেশাবলীর আনুগত্য

মহিলা সাহাবীরা মহানবী সাল্লাল্লাহু আলাইহি ওয়াসাল্লাম-এর নির্দেশাবলী গভীরভাবে অনুসরণ করার চেষ্টা করতেন। মহানবী সাল্লাল্লাহু আলাইহি ওয়াসাল্লাম মহিলাদের ক্ষেত্রে স্বামী ছাড়া অন্যদের জন্যে শোক পালনের সময়সীমা তিন দিন পর্যন্ত ঠিক করেছিলেন। মহিলারা এই নির্দেশ এত অক্ষরে অক্ষরে অনুসরণ করতেন যে, যখন হযরত যয়নব বিনতে জাহাশের (রাযিঃ) ভাইয়ের মৃত্যু হল তখন চতুর্থ দিন কোন কোন মহিলা যয়নবের (রাযিঃ) সঙ্গে দেখা করতে এল। তাদের সবার সামনে তিনি সুগন্ধি মাখলেন এবং বললেনঃ সুগন্ধির দরকার ছিল না আমার। কিন্তু আমি মহানবী সাল্লাল্লাহু আলাইহি ওয়াসাল্লাম-এর কাছ থেকে শুনেছি যে, কোন মুসলমান মহিলার উচিত নয় তার স্বামী ছাড়া অন্য কারো জন্যে তিন দিনের বেশী শোকপালন করা এজন্যেই আমি এটা করলাম।

(আবু দাউদ, কিতাবুত তালাক)

যখন হযরত উম্মে হাবিবা (রাযিঃ)-এর পিতা মারা গেল তখন তিনি তিন দিন পর তেল লাগালেন এবং সুগন্ধি মাখলেন এবং বললেন আমার এটি দরকার ছিল না, কেবল মহানবী সাল্লাল্লাহু আলাইহি ওয়াসাল্লাম-এর নির্দেশ পালনের জন্যে করলাম। একবার হযরত আয়েশা (রাযিঃ)-এর কাছে এক ভিখারি এল; তিনি এক টুকরো রুটি দিয়ে দিলেন। এরপর একজন ভাল পোশাকধারী লোক এলে তিনি তাকে খুব করে খাওয়ালেন। লোকেরা এই গুরুত্বভেদের কারণ জিজ্ঞেস করলে, তিনি বললেনঃ মহানবী সাল্লাল্লাহু আলাইহি ওয়াসাল্লাম বলেছেন :

লোকদেরকে তাদের নিজ নিজ মর্যাদার বিবেচনা করো।

একবার মহানবী সাল্লাল্লাহু আলাইহি ওয়াসাল্লাম মসজিদ থেকে বের হচ্ছিলেন। দেখলেন রাস্তায় পুরুষ মেয়ে এক সাথে হাঁটছে। তিনি মহিলার উদ্দেশ্য করে বললেনঃ পেছনে থাক, তোমরা মাঝপথ দিয়ে হাঁটতে পারো না। এরপর থেকে মহিলাদের অবস্থা হয়ে দাঁড়িয়েছিল এমন— গলির কিনারা ধরে এমনভাবে চলাচল করতেন যে, দেয়ালের গায়ে তাদের কাপড় লেগে যেতো।

(আবু দাউদ, কিতাবুল আদব)

মহানবী সাল্লাল্লাহু আলাইহি ওয়াসাল্লাম-এর সন্তোষ : মহানবী সাল্লাল্লাহু আলাইহি ওয়াসাল্লামকে সন্তুষ্ট করার চিন্তা মহিলা সাহাবীগণের মনে সব সময় সক্রিয় থাকতো। যদি কখনো অসন্তুষ্ট হতেন, তাহলে প্রায় সকল সম্ভাব্য পদ্ধতিতেই তাঁরা মহানবী সাল্লাল্লাহু আলাইহি ওয়াসাল্লামকে সন্তুষ্ট করার চেষ্টা করতেন।

মহানবী সাল্লাল্লাহু আলাইহি ওয়াসাল্লাম যখন বিদায় হজ্জের জন্যে গেলেন তখন সকল স্ত্রীগণ তাঁর সঙ্গে ছিলেন।

দুর্ভাগ্যক্রমে হযরত সুফিয়া (রাযিঃ)-এর উট রাস্তায় হঠাৎ থেমে গিয়ে বসে গেল। তিনি কাঁদতে লাগলেন। মহানবী সাল্লাল্লাহু আলাইহি ওয়াসাল্লাম জানতে পেরে নিজেই চলে এলেন এবং আপন হাত দিয়ে তাঁর অশ্রু মুছে দিলেন। মহানবী সাল্লাল্লাহু আলাইহি ওয়াসাল্লাম যতোই তাকে না কাঁদতে বলেন, তিনি ততই কাঁদতে লাগলেন। যখন তিনি কোন অবস্থাতেই চুপ হচ্ছেন না, তখন মহানবী সাল্লাল্লাহু আলাইহি ওয়াসাল্লাম খুব রাগ করলেন। তিনি সবাইকে সেখানে থেমে যেতে বলল এবং নিজেও তাবু খাটিয়ে নিলেন। হযরত সুফিয়া (রাযিঃ) তখন বুঝতে পারলেন যে, মহানবী সাল্লাল্লাহু আলাইহি ওয়াসাল্লাম রাগ করেছেন এবং অসন্তুষ্ট হয়েছেন। সেজন্যে মহানবী সাল্লাল্লাহু আলাইহি ওয়াসাল্লামকে খুশি করার পন্থা খুঁজতে লাগলেন। তিনি হযরত আয়েশা (রাযিঃ)-এর কাছে গেলেন এবং বললেন, আপনি তো জানেন আমি মহানবী সাল্লাল্লাহু আলাইহি ওয়াসাল্লাম-এর সঙ্গে নির্ধারিত মিলন দিবসটি কোন কিছুর বিনিময়ে দিতে পারি না। কিন্তু আপনি যদি নবীজী সাল্লাল্লাহু আলাইহি ওয়াসাল্লামকে আমার উপর সন্তুষ্ট করে দিতে পারেন, তাহলে আমি আমার মিলন দিবসটি আপনাকে দিয়ে দিচ্ছি। হযরত আয়েশা (রাযিঃ) সম্মতি জানানলেন এবং একটি জাফরানী রঙ্গের দোপট্রা পরে সুগন্ধি ভরপুর হয়ে মহানবী সাল্লাল্লাহু আলাইহি ওয়াসাল্লাম-এর তাঁবুর পর্দা তুললেন- তখন মহানবী সাল্লাল্লাহু আলাইহি ওয়াসাল্লাম বললেনঃ আয়েশা (রাযিঃ) আজ তো তোমার আসার কথা নয়। তিনি বললেন- এটি আল্লাহর অনুগ্রহ; যাকে ইচ্ছে হয় তাকে তিনি তা দান করেন। (মুসনাদে আহমাদ বিন হাম্বল, ৬ষ্ঠ খণ্ড-পৃঃ ৩৩৮)

নবীজী সাল্লাল্লাহু আলাইহি ওয়াসাল্লাম-এর কাছে নিজেদের সমর্পণঃ মহিলাদের জন্যে বিবাহ সবচেয়ে বড় বিষয়। কিন্তু মহিলা সাহাবীগণ নিজেদেরকে সম্পূর্ণ মহানবী সাল্লাল্লাহু আলাইহি ওয়াসাল্লাম-এর কাছে সমর্পণ করে দিতেন। মহানবী সাল্লাল্লাহু আলাইহি ওয়াসাল্লামও তাদেরকে যাঁর সঙ্গে ইচ্ছে হত বিয়ে দিতেন। তারাও মহানবী সাল্লাল্লাহু আলাইহি ওয়াসাল্লাম-এর সিদ্ধান্ত মাথা পেতে মেনে নিতেন।

হযরত ফাতেমা বিনতে কায়েস একজন মহিলা সাহাবী ছিলেন তাঁকে বিয়ে করতে চেয়েছিলেন হযরত আবদুর রহমান বিন আওফ (রাযিঃ)। তিনি ছিলেন খুবই ঐশ্বর্যবান, ধনী ও সম্পদশালী। মহানবী সাল্লাল্লাহু আলাইহি ওয়াসাল্লাম তাঁকে বিয়ে দিতে চেয়েছিল হযরত উসামা বিন যায়েদের (রাযিঃ) সঙ্গে। হযরত ফাতেমা বিনতে কায়েস (রাযিঃ) নিজেকে মহানবী সাল্লাল্লাহু আলাইহি ওয়াসাল্লাম-এর কাছে সমর্পণ করে দিলেন এবং বললেন, আমার সবকিছু আপনার জন্যে নিবেদিত, যেখানে ইচ্ছে বিয়ে দেন আমাকে।

(নাসায়ী কিতাবুন নিকাহ)

হযরত হুবাইব (রাযিঃ) ছিলেন অত্যন্ত খোশমেযাজ রসিক প্রকৃতির ব্যক্তি। রাস্তাঘাটে চলবার পথেও তিনি যথারীতি রসিকতায় মেতে উঠতেন। এজন্যে সাহাবীগণ তাঁকে

পছন্দ করতেন না। একবার মহানবী সাল্লাল্লাহু আলাইহি ওয়াসাল্লাম তাঁর জন্যে এক আনসারী বালিকার বিয়ের পয়গাম পাঠান। ঐ মেয়ের মা প্রস্তাব শুনে হযরত হুবাইব (রাযিঃ)-এর সঙ্গে বিয়ে দিতে অস্বীকৃতি জানান। কিন্তু তাঁর মেয়ে বললেন, দেখো মা, মহানবী সাল্লাল্লাহু আলাইহি ওয়াসাল্লাম-এর প্রস্তাব অগ্রাহ্য করা যায় না। আমাকে মহানবী সাল্লাল্লাহু আলাইহি ওয়াসাল্লাম-এর হাতে ছেড়ে দাও, আল্লাহ আমাকে ক্ষতিগ্রস্ত করবেন না।

মহানবী সাল্লাল্লাহু আলাইহি ওয়াসাল্লামকে আমন্ত্রণ : যদি সৌভাগ্যবশত মহিলা সাহাবীগণ মহানবী সাল্লাল্লাহু আলাইহি ওয়াসাল্লামকে নিমন্ত্রণের সুযোগ পেতেন তাহলে অত্যন্ত সম্মান, গুরুত্ব এবং অনুরাগের সঙ্গে তাঁরা তা করতেন। একবার মহানবী সাল্লাল্লাহু আলাইহি ওয়াসাল্লাম হযরত উম্মে হারাম (রাযিঃ)-এর গৃহে আগমন করেন। তিনি মহানবী সাল্লাল্লাহু আলাইহি ওয়াসাল্লামকে দাওয়াত করেন, মহানবী সাল্লাল্লাহু আলাইহি ওয়াসাল্লাম দাওয়াত গ্রহণ করেন এবং তাঁর ঘরেই দ্বিপ্রহরের বিশ্রাম করেন।

একবার একজন সাহাবী মহানবী সাল্লাল্লাহু আলাইহি ওয়াসাল্লামকে দাওয়াত করেন; দাওয়াত সেরে মহানবী সাল্লাল্লাহু আলাইহি ওয়াসাল্লাম রওয়ানা হবার সময় ঐ সাহাবীর স্ত্রী পর্দা থেকে মাথা বের করে মহানবী সাল্লাল্লাহু আলাইহি ওয়াসাল্লাম-এর উদ্দেশ্যে বললেনঃ হে রাসূলে কারীম সাল্লাল্লাহু আলাইহি ওয়াসাল্লাম! আমার ওপর এবং আমার স্বামীর ওপর রহমতের দু'আ করুন। মহানবী সাল্লাল্লাহু আলাইহি ওয়াসাল্লামও বললেন আল্লাহ তোমার উপর এবং তোমার স্বামীর ওপর রহমত বর্ষণ করুন।

কোন কোন মহিলা সাহাবী নিজে কোন ভাল খাবার পাক করে মহানবী সাল্লাল্লাহু আলাইহি ওয়াসাল্লাম-এর কাছে পাঠিয়ে দিতেন। একবার হযরত উম্মে আইমন (রাযিঃ) আটা দিয়ে রুটি বানিয়ে মহানবী সাল্লাল্লাহু আলাইহি ওয়াসাল্লাম-এর কাছে পাঠিয়ে দেন। মহানবী সাল্লাল্লাহু আলাইহি ওয়াসাল্লাম বললেনঃ এটা কি? তিনি বললেন 'আমাদের দেশে এর প্রচলন আছে; আমি ভাবলাম আপনার জন্যেও এ ধরনের রুটি বানাই। কিন্তু মহানবী সাল্লাল্লাহু আলাইহি ওয়াসাল্লাম যথেষ্ট সৌজন্যে ও ভদ্রতা সহকারে বললেন, তুমি যেভাবে রুটি করেছো সেভাবে নয়, বরং আটার ভূষি আলাদা করে তা থেকে কাই তৈরী করে তারপর তৈরি কর।

মহানবী সাল্লাল্লাহু আলাইহি ওয়াসাল্লাম-এর প্রতি অনুরাগ

মহিলা সাহাবীগণের অন্তরলোক মহানবী সাল্লাল্লাহু আলাইহি ওয়াসাল্লাম-এর প্রতি অনুরাগে আপ্ত ছিল এবং তাঁরা তা প্রকাশ ঘটাতেন নানাভাবে। হযরত উম্মে আতিয়া (রাযিঃ) ছিলেন একজন সাহাবিনী, তিনি যখন মহানবী সাল্লাল্লাহু আলাইহি ওয়াসাল্লাম-এর উল্লেখ করতেন, অনুরাগে উচ্ছ্বসিত হয়ে বলে উঠতেন, নবীজী! আমি তার ওপর কুরবান।

চরিত্র বৈশিষ্ট্য

করণাশীল স্বভাবধর্ম : মহানবী সাল্লাল্লাহু আলাইহি ওয়াসাল্লাম-এর প্রশিক্ষণের মধ্য দিয়ে মহিলা সাহাবীগণ একেকজন হয়ে উঠছিলঃ আত্মমর্যাদা সম্পন্ন, স্বাধীনচেতা এবং অহংনিষ্ঠ। এজন্যে তাঁরা কারো কাছে হাত পাততেন না। মা বাবার কাছেও থেকে কোন কিছু চাইতে তো লজ্জা হবার কথা নয়, কারো হয় না। তবু তারা তাদের কাছে এমন সময়ে কোন কিছু চাইতেন না, যখন মা-বাবা কোন বৈঠকে বসে আছেন। যেমন একবার হযরত ফাতেমা (রাযিঃ) কাজকর্ম করতে করতে বেশ ক্লান্ত হয়ে যান। তখন মহানবী সাল্লাল্লাহু আলাইহি ওয়াসাল্লাম-এর কাছে কিছু দাসী আসে। মহানবী সাল্লাল্লাহু আলাইহি ওয়াসাল্লাম-এর কাছে কোন একজন দাসী চাওয়ার জন্যে তিনি হামির হন, কিন্তু যখন দেখলেন মহানবী সাল্লাল্লাহু আলাইহি ওয়াসাল্লাম-এর সঙ্গে কয়েকজন কথা বলছেন তখনি লজ্জায় সে প্রসঙ্গ না তুলে ফিরে এলেন। (আবু দাউদ, কিতাবুল আদব)

ত্যাগ : ঔদার্য চরিত্রের একটি বৈশিষ্ট্য। কিন্তু ত্যাগ ঔদার্যেরই সবচেয়ে বড় জিনিস। আর এটা মহিলা সাহাবীগণের মধ্যে বরাবরই মিলতো। হযরত আয়েশা (রাযিঃ) মহানবী সাল্লাল্লাহু আলাইহি ওয়াসাল্লাম-এর এবং হযরত আবু বকর (রাযিঃ)-এর কবরের মধ্যবর্তী স্থানে নিজের কবরস্থান ঠিক করেছিলেন; কিন্তু সেই জায়গায়টিই যখন হযরত উমর (রাযিঃ) চাইলেন, তখন জান্নাতের এই মাটির টুকরো হযরত উমর (রাযিঃ)কে দিয়ে তিনি এবং বললেন :

‘আমি আমার নিজের জন্যে এটিকে সংরক্ষণ করেছিলাম, কিন্তু আজ আমার ওপর আপনাকে অগ্রাধিকার দিচ্ছি।’ (বুখারী কিতাবুল মানাকিব)

একদিন রোযা ছিলেন তিনি, ঘরে একটি রুটি ছাড়া আর কিছু ছিল না। একজন ভিখারী রমণী আসে তখন তিনি দাসীকে বললেন, রুটি তাকে দিয়ে দিতে। দাসী বললঃ ইফতার কি দিয়ে করবেন? তিনি বললেনঃ দিয়ে দাও তো! সন্ধ্যায় কেউ একজন ছাগলের গোশ্ত পাঠিয়ে দেয়। দাসীকে ডেকে বললেনঃ এটি তোমার রুটির চেয়ে ভাল।

(মুয়াত্তা, ইমাম মালেক)

বদান্যতা : পুরুষ সাহাবীদের ন্যায় মহিলা সাহাবীগণের বদান্যতার কারণেও ইসলামের সুদৃঢ়তা সহজ হয়েছিল। হযরত উম্মে সুলাইম (রাযিঃ) নিজের খেজুর বাগান মহানবী সাল্লাল্লাহু আলাইহি ওয়াসাল্লাম-এর জন্যে ওয়াকফ করে দিয়েছিল।

(সহীহ বুখারী)

হযরত আয়েশা (রাযিঃ) এত বেশী দানশীল ছিলেন যে, যা কিছু হাতে আসত তা দান করে দিতেন। হযরত আবদুল্লাহ বিন জুবাইর (রাযিঃ) তাঁকে এই দানশীলতা থেকে রুখতে চাইলেন, তাতে তিনি এত রাগান্বিত হন যে, তাঁর সঙ্গে কথা না বলার শপথ করে নেন।

(সহীহ বুখারী, কিতাবুল মানাকিব)

হযরত আসমা (রাযিঃ) তার চেয়ে বেশী দানশীল ছিলেন। হযরত আয়েশা (রাযিঃ)-এর অভ্যাস ছিল এমন যে, জমা করে যেতেন বেশী জামে গেলে অতঃপর তা দান করে দিতেন। কিন্তু হযরত আসমা (রাযিঃ) তাও করতেন না, দিনে দিনে দিয়ে দিতেন।

(সহীহ বুখারী, কিতাবুল মান্যকিন)

একবার হযরত মুনকাদর বিন আবদুল্লাহ হযরত আয়েশা (রাযিঃ)-এর কাছে এলেন। হযরত আয়েশা (রাযিঃ) বললেনঃ তোমার কোন ছেলে আছে? তিনি বলল, না হযরত আয়েশা (রাযিঃ) বললেনঃ যদি আমার কাছে দশ হাজার দিরহাম থাকতো, আমি তোমাকে দিয়ে দিতাম। সৌভাগ্যবশতঃ সেদিনই সন্ধ্যা হযরত আমীরে মুয়াবিয়া (রাযিঃ) তাঁর কাছে টাকা পাঠালেন। হযরত আয়েশা (রাযিঃ) বললেনঃ কত দ্রুত পূর্ণ হল আমার আকাংক্ষা। তাড়াতাড়ি লোক পাঠালেন তাঁকে ডেকে নিয়ে আসতে; তিনি এলে তাঁকে দশ হাজার দিরহাম দিয়ে দেন। সেই টাকা থেকে তিনি একটি দাসী কেনেন, সেই দাসী থেকে অনেক বাচ্চা হয় তাঁর।

(আদাবুল মুফদাদ)

নবীপত্নীদের মধ্যে হযরত যয়নব বিনতে জাহাশ অত্যন্ত দানশীল ছিলেন। তিনি নিজের হাতে চামড়া দাবাগত (সংস্কার) করতেন এবং যা কিছু আয় করতেন, তা থেকে তা ফকিরদের মধ্যে বিতরণ করতেন। একবার মহানবী সাল্লাল্লাহু আলাইহি ওয়াসাল্লাম বললেনঃ তোমাদের মধ্যে যার হাত সবচেয়ে দীর্ঘ, সেই সবার আগে আমার মৃত্যুর পর আমার সঙ্গে মিলিত হবে। এটি শুনেই নবীপত্নীরা নিজের হাত মাপা শুরু করলেন। এদিকে হযরত যয়নব (রাযিঃ)-এর হাত ছিল সবচেয়ে ক্ষুদ্র; কিন্তু যখন সবার আগে তারই মৃত্যু হল, তখন নবীপত্নীরা বুঝলেন যে হাত লম্বা হওয়ার অর্থ হচ্ছে দানশীলতা।

(তবকাত-ই-ইবনে সা'আদ)

প্রতিপক্ষ থেকে প্রতিশোধ না নেয়া : যদি প্রতিপক্ষ কোন অসুবিধা বা বিপদে পড়ে যায়, তাহলে সেটিই তার থেকে প্রতিশোধ নেয়ার সবচেয়ে বড় সুযোগ। কিন্তু মহিলা সাহাবীগণ আপন অন্তরে আল্লাহ ও আল্লাহর রাসূলের অনুরাগ ধারণ করেছিল বলে সমস্ত প্রতিশোধ স্পৃহা ও প্রতিহিংসা তাঁদের অন্তর থেকে দূরীভূত হয়ে যায়। হযরত আয়েশা (রাযিঃ) এবং হযরত যয়নব (রাযিঃ) পরস্পর মান-অভিমান খুনসুটি করতেন। কিন্তু একবার হযরত আয়েশা (রাযিঃ)-এর চরিত্র বিষয়ে কেউ কেউ মিথ্যা অভিযোগ তোলে। তখন হযরত যয়নব (রাযিঃ)কে মহানবী সাল্লাল্লাহু আলাইহি ওয়াসাল্লাম আয়েশা (রাযিঃ) চরিত্র সম্পর্কে জিজ্ঞেস করেন। তখন কোনো রকম দ্বৈধ-বিদ্বেষের বশবর্তী না হয়ে তিনি বলেন, আমি আমার চক্ষুকে বিশ্বাস করি এবং আমার কানকে বিশ্বাস করি— আমি আয়েশা (রাযিঃ) সম্পর্কে ভাল ছাড়া আর কিছু জানি না হযরত আয়েশা (রাযিঃ) নিজেই বলেছেন :

‘সে যদিও আমার প্রতিপক্ষ ছিল; কিন্তু তার আল্লাহভীতি তাঁকে মিথ্যা বলতে দেয়নি।’

(সহীহ বুখারী, কিতাবুশ শাহাদাত)

প্রতিশোধ নেয়া তো দূরের কথা মহিলা সাহাবীগণ একে অপরের প্রতি হিংসা পোষণ করাও পছন্দ করতেন না। মুয়াবিয়া বিন খদীজ হযরত আয়েশা (রাযিঃ)-এর ভাইকে হত্যা করে ফেলেন। একবার সে সেনাধ্যক্ষ ছিল, একজনকে হযরত আয়েশা (রাযিঃ) জিজ্ঞেস করেন যে, এই যুদ্ধে মুয়াবিয়ার আচরণ কি রকম ছিল? তিনি উত্তরে বলেনঃ তার আচরণে অশোভন কিছু ছিল না, সকল ব্যক্তিই তাঁর প্রশংসা করেছে। যদি কোন উট বিকল হয়ে যেত, তাহলে তার জায়গায় আরেকটি উট দিয়ে দিতেন। যদি কোন ঘোড়া মরে যেত, তাহলে তার জায়গায় আরেকটি ঘোড়া দিয়ে দিতেন; যদি কোন দাস পালিয়ে যেত, তাহলে তার জায়গায় আরেকটি দাস দিয়ে দিতেন। হযরত আয়েশা (রাযিঃ) এসব শুনে বললেন, আল্লাহর কাছ থেকে ক্ষমা চাচ্ছি। আমি তার উপর অহেতুক বিদ্বেষ পোষণ করব কেন? কেবল এজন্যেই কি বিদ্বেষী হবো যে, সে আমার ভাইকে হত্যা করেছে। আমি তো মহানবী সাল্লাল্লাহু আলাইহি ওয়াসাল্লাম-এর চোখে এই প্রার্থনা করতে শুনেছিঃ যে ব্যক্তি আমার উম্মতের সঙ্গে কোমল আচরণ করবে, তুমিও তার সঙ্গে কোমল আচরণ কর, যে ব্যক্তি আমার উম্মতের সঙ্গে কঠোর আচরণ করবে, তুমিও তার সঙ্গে কঠোর হও। (উসুদুল গাবা)

অতিথি আপ্যায়ন : হযরত উম্মে শরীক (রাযিঃ) খুবই ঐশ্বর্যশালী এবং দানশীল সাহাবী ছিলেন। তিনি নিজের ঘরকে প্রায় ‘অতিথি ঘর’ বানিয়ে নিয়েছিলেন; এজন্যে মহানবী সাল্লাল্লাহু আলাইহি ওয়াসাল্লাম-এর কাছে বাইরে থেকে যেসব অতিথিরা আসত, তাঁরা প্রায়ই তাঁর ঘরে অবস্থান করতেন। (নাসায়ী কিতাবুন নিকাহ)

মহিলা সাহাবীগণ আত্মসম্মানবোধের চূড়ান্ত প্রতীক ছিল। হযরত আবদুল্লাহ বিন জুবাইর (রাযিঃ) যেদিন শহীদ হন, সেদিন তিনি তাঁর মা হযরত আসমা (রাযিঃ)-এর কাছে উপস্থিত হন। হযরত আসমা (রাযিঃ) তাঁকে বলেনঃ বৎস! হত্যার ভয়ে কখনোই এরকম কোন শর্তে রাজি হবে না, যা তোমার অপমাণ এবং সম্মানের কারণ হবে। আল্লাহর কসম! সম্মানের সঙ্গে তরবারীর আঘাতে মৃত্যুবরণ করা, অপমানের সঙ্গে চাবুকের মার খাওয়ার চেয়ে অনেক ভাল।

ধৈর্য ও স্থিরতা : মৃত্যুর জন্যে ক্রন্দন করা, মাতম করা বা বিলাপ করা, শোকের উন্মাদনায় চুল টানাটানি করা, কাপড় ছিড়ে ফেলা, বহু দিন ধরে শোক যাপন করা আরবের জাতিগত চরিত্র ছিল। কিন্তু মহানবী সাল্লাল্লাহু আলাইহি ওয়াসাল্লাম-এর সান্নিধ্য ও সাহচর্যে মহিলা সাহাবীগণ হয়ে ওঠেন ধৈর্যশীল, সহিষ্ণু ও সুস্থির। হযরত আবু তালহা (রাযিঃ) আনসারীর ছেলে অসুস্থ হয়, অসুস্থ অবস্থায় তাকে রেখে আবু তালহা (রাযিঃ) কাজে বেরিয়ে পড়েন, তিনি না থাকা অবস্থায় এদিকে তাঁর ছেলের মৃত্যু হয়ে যায়, কিন্তু তাঁর স্ত্রী লোকদের বলে দেন যে, আবু তালহা (রাযিঃ)কে যেন না বলা হয়। আবু তালহা (রাযিঃ) রাতে এসে স্ত্রীকে জিজ্ঞেস করেন, বাচ্চা কেমন আছে? স্ত্রী বলেনঃ আগের চেয়ে অনেক সুশান্ত অবস্থায় আছে। এটি বলে খাবার আনেন এবং

তিনি খাবার খেলেন। সকাল হলে স্ত্রী বলেনঃ আচ্ছা কেউ যদি কাউকে কোন জিনিস ধার দেয় এবং তা আবার নিতে চায়, তাহলে তা রুখে রাখার বা না দেয়ার অধিকার কি থাকে? তিনি বললেনঃ না নেই। স্ত্রী বললেনঃ তাহলে ছেলে বিষয়েও ধৈর্য ধরো।

(সহীহ মুসলিম, কিতাবুল আদব)

মহানবী সাল্লাল্লাহু আলাইহি ওয়াসাল্লাম ওহাদের যুদ্ধ থেকে ফিরে এলে সকল মহিলা সাহাবীরা নিজেদের আত্মীয় পরিজনের খবরাখবর জিজ্ঞেস করেন তাঁর কাছে। তাদের মধ্যে হযরত হামনা বিনতে জাহাশও ছিলেন। মহানবী সাল্লাল্লাহু আলাইহি ওয়াসাল্লাম-এর কাছে এলে মহানবী সাল্লাল্লাহু আলাইহি ওয়াসাল্লাম তাঁকে বলেনঃ নিজের ভাই আব্দুল্লাহ বিন জাহাশের জন্যে ধৈর্য ধরো। তিনি 'ইন্না লিল্লাহি ওয়া ইন্না ইলাইহি রাজিউন' বলেন এবং আল্লাহর কাছে মার্জনা কামনা করে নিঃশব্দ হয়ে যান।

(তবকাত-ই-ইবনে সা'আদ)

হযরত আব্দুল্লাহ বিন জুবাইর (রাযিঃ) যখন হাজ্জাজ বিন ইউসুফের সঙ্গে সখর্ষে অবতীর্ণ হন। হযরত আব্দুল্লাহ বিন জুবাইর (রাযিঃ)-এর মাতা তখন অসুস্থ ছিলেন; হযরত আব্দুল্লাহ মাকে জিজ্ঞেস করলেন (অবস্থা জিজ্ঞেস করার পর) বললেন মৃত্যুর মধ্যে আরাম আছে। তিনি বললেনঃ সম্ভবতঃ তুমি আমার মৃত্যুর কামনা করছো। কিন্তু দু'টোর একটি না হওয়ার আগে আমি মরতে চাই না। হয় তুমি শহীদ হয়ে যাবে এবং আমি ধৈর্য ধারণ করবো; অথবা তুমি বিজয়ী হবে এবং আমার চক্ষু শীতল হবে। যখন তিনি শহীদ হয়ে গেলেন তখন হাজ্জাজ তাঁকে শূলে জড়িয়ে দিলেন। হযরত আসমা (রাযিঃ) কান্নাকাটি না করে হাজ্জাজের দিকে তাকিয়ে বললেনঃ এই অশ্বারোহীর কি এখনো ঘোড়া থেকে নেমে আসার সময় আসেনি?

(ইসতিয়াব)

বীরত্ব : যুদ্ধ বিগ্রহে সাহাবীরা যে বীরত্বের পরাকাষ্ঠা প্রদর্শন করেন মহিলা সাহাবীগণের বীর্যব্যঞ্জন কৃতিত্ব তার চেয়েও বেশি। হোনাইনের যুদ্ধে কাফিররা এত তীব্র হামলা করেছিল যে যুদ্ধাঙ্গন প্রায় কেঁপে ওঠে। কিন্তু এরই মধ্যে হযরত উম্মে সুলাইম (রাযিঃ)-এর বীরত্বের দৃষ্টান্ত ছিল এই যে, হাতে খঞ্জর নিয়ে তিনি প্রতীক্ষামান ছিলেন কাফির সামনে এলে শেষ করে দেয়ার জন্যে; হযরত আবু তালহা (রাযিঃ) তাকে খঞ্জর হাতে দেখে জিজ্ঞেস করেন কি ব্যাপার? বললেনঃ চাচ্ছি কোনো কাফির সামনে আসুক, আর এটি তার পেটে সোজা প্রবেশ করিয়ে দিই। (আবু দাউদ, কিতাবুল জিহাদ)

খন্দকের যুদ্ধে মহানবী সাল্লাল্লাহু আলাইহি ওয়াসাল্লাম সকল মহিলাদেরকে একটি কেল্লায় একত্রিত করে দিয়েছিলেন। একজন ইহুদী এসে কেল্লার চারদিকে ঘুরতে থাকে। হযরত সুফিয়া (রাযিঃ) যখন দেখলেন হযরত হাসসান বিন সাবিতকে বললেনঃ গুপ্তচর মনে হচ্ছে লোকটাকে, মেরে ফেল তাকে। তিনি বললেন, দেখুন, আপনি তো জানেন আমি ঐ কাজের লোক নই। তখন হযরত সুফিয়া (রাযিঃ) নিজে উঠলেন এবং তাঁবুর একটি খুঁটি দিয়ে এত জোরে আঘাত করেন যে, সে নিঃসাড় হয়ে যায়। (উসুদুল গাবা)

মহিলা সাহাবীগণ অত্যন্ত খোদাভীতিপূর্ণ নিরাভরণ জীবনযাপন করতেন। একবার এক ব্যক্তি আয়েশা (রাযিঃ)-এর কাছে উপস্থিত হল; বললঃ যারা পুরনো কাপড় পরতো না, তারা আখেরাতে নতুন কাপড় পরার জন্যে পাবে না। (আদাবুল মুফরিদ)

হৃদয়ের সজীবতা : মহিলা সাহাবীগণের আবেগকে ইসলাম সজীব ও প্রাণবন্ত করে দিয়েছিল। এজন্যে তাঁদের মধ্যে একটি জীবনশক্তি পাওয়া যেতো। ঈদের দিনে সাধারণত বালক-বালিকারা মহানবী সাল্লাল্লাহু আলাইহি ওয়াসাল্লাম-এর কাছে জমায়েত হয়ে গান গাইতো এবং আনন্দের গীত ধরতো। (সহীহ বুখারীঃ কিতাবুল ঈদাইন)

মহিলা সাহাবীগণের বক্ষ রহস্যের আধার ছিলেন; কারো কোন গোপন বিষয় মরবার আগে পর্যন্ত প্রকাশ করতেন না। একদিন মহানবী সাল্লাল্লাহু আলাইহি ওয়াসাল্লাম-এর কাছে সকল পত্নী উপস্থিত ছিলেন হযরত ফাতেমা (রাযিঃ)ও সেই অবস্থায় এসে উপস্থিত হল। মহানবী মারহাবা বললেন এবং নিজের ডান পাশে বসালেন এবং আন্তে করে তাঁর কানে একটি কথা বললেন, তিনি চীৎকার করে কেঁদে উঠলেন। তারপর তিনি তাঁর কানে আন্তে করে আরেকটি কথা বললেন, তাতে হেসে উঠলেন। অতঃপর মহানবী সাল্লাল্লাহু আলাইহি ওয়াসাল্লাম চলে গেলেন; সকল পত্নী তাঁকে জিজ্ঞেস করলেন কাঁদার, হাসার অর্থ? হযরত ফাতেমা (রাযিঃ) বললেনঃ জীবনে সেই গোপন কথা আমি ফাঁস করতে পারবো না।

পবিত্রতা ও শুদ্ধতা : ইসলামের চারিত্রিক শুদ্ধতা সম্পর্কিত শিক্ষা মহিলা সাহাবীদেরকে পবিত্রতা ও শুদ্ধতার প্রতীক করে দেয়। একজন মহিলা সাহাবী যাঁর চরিত্র অন্ধকার যুগে ভাল ছিল না ইসলামে দীক্ষিত হবার পরে এজন্য কেউ তাঁর দিকে অগ্রসর হতে চাইলে তিনি বললেনঃ সরে যাও, সেই যুগ এখন অতিক্রান্ত; এখন ইসলামের কাল।

(মুসনাদে আহমাদ ইবনে হাম্বল, ৪র্থ খণ্ড-পৃঃ ১৮৭)

ইসলামের শিক্ষার ফল ছিল এইরকম যে, দাসীরাও খারাপকর্ম থেকে সরে আসে। মেসিকা ছিল একজন দাসী; মহানবী সাল্লাল্লাহু আলাইহি ওয়াসাল্লাম-এর কাছে এসে বলে যে, আমার মালিক আমাকে খারাপ কাজে জোর করে। তখন এই আয়াত অবতীর্ণ হয়ঃ ‘নিজেদের দাসীগুলোকে খারাপ কাজে বাধ্য করো না।

(আবু দাউদ, কিতাবুল ভালাক)

এ ধরনের কাজ তো অনেক দূরবর্তী ব্যাপার মহিলা সাহাবীগণের ক্ষেত্রে; তাঁরা এমনকি কোন অপরিচিতের দৃষ্টি পর্যন্ত এড়িয়ে চলতেন। একবার হযরত মুগীরা বিন ও'বা বিয়ে করতে চাইলেন এবং মহানবী সাল্লাল্লাহু আলাইহি ওয়াসাল্লাম-এর কাছে পরামর্শ কামনা করল। মহানবী সাল্লাল্লাহু আলাইহি ওয়াসাল্লাম বললেনঃ প্রথমে মেয়ে দেখে নাও। সেই উদ্দেশ্যে তিনি উদ্দিষ্ট মেয়ের কাছে যান। মহিলা পর্দার অন্তরাল থেকে বললেনঃ ‘যদি মহানবী সাল্লাল্লাহু আলাইহি ওয়াসাল্লাম-এর আদেশে তুমি এসে থাক তো ভাল, না হয় আল্লাহর কসম তোমাকে..। (সুনানে ইবনে মাজা, কিতাবুন নিকাহ)

এই ধরনের পাপের সঙ্গে লিপ্ত হওয়া অনেক বড় ব্যাপার; যদি আল্লাহ না করুক এ ধরনের বিষয়ে কোন মিথ্যা অভিযোগ উত্থাপিত হত তাহলে তাঁদের চিন্তা ও বিবেচনায় বজ্রপাত হয়ে যেত। ইফকের ঘটনায় হযরত আয়েশা (রাযিঃ)-এর জ্বর এসে যায় শরীরে এবং অশ্রুর নহর বইতে থাকে। (সহীহ বুখারী)

সামাজিক সদাচার

স্বভাবধর্ম অনুসারে মহিলা সাহাবীগণ কখনো যদি কারো প্রতি রুষ্টও হয়ে যেতেন তাহলেও এই বিরক্তির জন্যেও অসন্তোষের জন্যে খুব আফসোস হত তাঁদের। একবার হযরত আয়েশা (রাযিঃ) এক ব্যাপারে হযরত আব্দুল্লাহ বিন জুবাইর (রাযিঃ)-এর প্রতি অসন্তুষ্ট হন এবং কথাবর্তা না বলার শপথ করে নেন; কিন্তু মার্জনা করে দেবার পর যখনই এই কসমের কথা তাঁর মনে পড়তো তিনি এত ক্রন্দন করতেন যে, তাঁর জামা ভিজে যেতো। (সহীহ বুখারী, কিতাবুল আদব)

মহৎ আচরণ : হযরত যয়নব (রাযিঃ) নিজের আত্মীয়-পরিজনের সঙ্গে খুব ভাল ব্যবহার করতেন, হযরত আয়েশা (রাযিঃ) বলেনঃ ‘আমি যয়নবের চেয়ে অধিক দ্বীনদার, অধিক পরহেযগার, অধিক সত্যবাদী এবং অধিক মমত্বময়ী ও ভাল আচরণকারী মহিলা দেখিনি। (সহীহ মুসলিম, কিতাবুল ফাজায়েল)

হযরত আসমা (রাযিঃ) একটি জমি উত্তরাধিকার সূত্রে পেয়েছিল এবং তাঁকে একলাখ টাকা আমীরে মুয়াবিয়া (রাযিঃ) দিয়ে দেন; কিন্তু তিনি এই সম্পদ এবং জমি হযরত কাসিম বিন মুহাম্মদ এবং তাঁর আত্মীয় হযরত বিন আবি আতিককে দান করেন।

(সহীহ বুখারী, কিতাবুল হিব্ব)

মহিলা সাহাবীগণের মহৎ ব্যবহার কেবল মুসলমান আত্মীয়দের ক্ষেত্রে সীমাবদ্ধ ছিল না, বরং তাঁরা কাফির আত্মীয় স্বজনদের আত্মীয়তারও বিশেষ গুরুত্ব দিতেন। হযরত আসমা (রাযিঃ) হিজরত করে মদীনাতে আসেন। তখন তাঁর কাফির মাতা তাঁর কাছে আসেন এবং আর্থিক সহযোগিতা কামনা করেন। হযরত আসমা (রাযিঃ) মহানবী সাল্লাল্লাহু আলাইহি ওয়াসাল্লামকে জিজ্ঞেস করলেন যে, তাঁর মাতার সাথে ভাল আচরণ করা যাবে কিনা। মহানবী সাল্লাল্লাহু আলাইহি ওয়াসাল্লাম বললেনঃ করা যাবে। (সহীহ মুসলিম, কিতাবুয যাকাত)

অতঃপর তিনি তাঁকে প্রার্থিত সহযোগিতা করেন। হযরত সুফিয়া (রাযিঃ) তাঁর এক ইহুদী আত্মীয়ের জন্যে সম্পত্তি উত্তরাধিকারের অসীমত করে যান। (মুসনাদে দারেমী)

উপটোকন দান : হাদীছ শরীফে এসেছে উপহার দেয়া হৃদয়তা ও অনুরাগ বাড়ানোর একটি মাধ্যম। এজন্যে মহিলা সাহাবীগণ একে অপরের মধ্যে উপহার বিনিময় করতেন। হযরত নসীবা আনসারীয়া (রাযিঃ) এত বেশি দরিদ্র ছিলেন যে, তাঁর জন্যে সদকা গ্রহণ বৈধ ছিল; তবু তিনি উপহার সামগ্রী পাঠাতেন নবী পত্নীদের কাছে। একবার

তাঁর কাছে সদকার ছাগল এলে তিনি তার গোশত হযরত আয়েশা (রাযিঃ)-এর কাছে উপহার হিসেবে প্রেরণ করেন। (সহীহ বুখারী)

হযরত বুরায়রার (রাযিঃ) কাছেও যা কিছু সদকা আসতো, তিনি তা নবী পত্নীদের উপহার পাঠাতেন। (সহীহ মুসলিম, কিতাবুয যাকাত)

ভৃত্যদের সঙ্গে ব্যবহার : মহিলা সাহাবীগণ ভৃত্যদের সঙ্গে কি রকম ব্যবহার করতেন, তা এই ঘটনা থেকে বুঝা যাবে। একবার রাত্রিবেলায় আব্দুল মালেক উঠেন এবং ভৃত্যকে ডাক দেন; সে আসতে দেরী করলে তাকে অভিশাপ দেন। হযরত উম্মে দারদা (রাযিঃ) তাঁর গৃহে ছিলেন, সকাল হলে তিনি তাকে বললেনঃ তুমি রাতে ভৃত্যকে অভিশাপ দিয়েছো, অথচ মহানবী সাল্লাল্লাহু আলাইহি ওয়াসাল্লাম বলেছেনঃ অভিশাপ দানকারীরা মহাপ্রলয়ের (কিয়ামতের) দিবসে শাফায়াতপ্রাপ্ত কিংবা শাহাদাত প্রাপ্তদের অন্তর্ভুক্ত হবে না। (কিতাবুল বিররে ওয়াস সিলাতে)

পারস্পরিক সহযোগিতা : মহিলা সাহাবীগণ বিপদের সময় অন্যদের সহযোগিতা করতেন এবং তাঁরা সকল রকম সাহায্য পেতেন। হযরত আসমা (রাযিঃ) রুটি তৈরি করতে জানতেন না তবে তাঁর প্রতিবেশীরা তাঁর রুটি পাকিয়ে দিতেন।

(সহীহ মুসলিম, কিতাবুল আদব)

যদি স্বামীদের বিরুদ্ধে মহিলাদের কোন নালিশ থাকতো তাহলে তাঁরা হযরত আয়েশা (রাযিঃ)-এর কাছে হাজির হতেন এবং নিজেদের দুঃখ বেদনার কথা ব্যক্ত করতেন। আর এদিকে হযরত আয়েশা (রাযিঃ) মহানবী সাল্লাল্লাহু আলাইহি ওয়াসাল্লাম-এর কাছে এদের জন্যে জোরদার সুপারিশ করতেন। একবার একজন মহিলা তাঁর কাছে সবুজ জামা পরে এলেন এবং জামা খুলে দেখালেন তাঁর স্বামী তাঁকে কিভাবে মেরেছে। মহানবী সাল্লাল্লাহু আলাইহি ওয়াসাল্লাম যখন ঘরে ঢুকলেন হযরত আয়েশা (রাযিঃ) বললেনঃ মুসলিম নারীরা যে রকম কষ্ট সহ্য করছে, সেরকম আমি দেখিনি। দেখুন না এর শরীরের চামড়া মার খেয়ে তার সবুজ জামার চেয়েও সবুজ হয়ে গেছে। সহীহ বুখারীতে এই বর্ণনার শেষে মহিলাদের বিষয়ে ব্যক্ত হয়েছেঃ ‘মহিলাদের স্বভাবই হচ্ছে একজন আরেকজনের সহযোগিতা করা। (সহীহ বুখারী, কিতাবুল লিবাস) একজনের স্ত্রী অসুস্থ ছিল। সে হযরত উম্মে দারদা (রাযিঃ)-এর কাছে এল। তিনি অবস্থা জিজ্ঞেস করলে লোকটি বললঃ অসুস্থ। তারপর তিনি তাকে বসিয়ে খাওয়ালেন এবং যতদিন পর্যন্ত তার স্ত্রী অসুস্থ ছিল- অবস্থা জিজ্ঞেস করতেন এবং খাওয়াতেন।

(আদাবুল মারদে)

গুশ্ফা : মহিলা সাহাবাগণ অত্যন্ত আন্তরিকভাবে অসুস্থদের গুশ্ফা করতেন। হযরত আব্দুল্লাহ বিন মযউন (রাযিঃ) অসুস্থ হলেন- তখন হযরত উম্মুল হাসলা (রাযিঃ) এবং তাঁর সমস্ত পরিবার তাঁর গুশ্ফা করেন। যখন তাঁর মৃত্যু হয়ে যায়- তখন তাঁকে কাফন

দেয়া হলে হযরত উম্মুল হাসলা অনুরাগ-কম্পিত কণ্ঠে বলেন, তোমার উপর আল্লাহর করুণা নেমে আসুক; আমি সাক্ষ্য দিচ্ছি আল্লাহ তা'আলা তোমাকে সম্মান দিয়েছেন।

(সহীহ বুখারী, কিতাবুল শাহাদাত)

হযরত যয়নব (রাযিঃ) যখন মৃত্যু অসুখে শয্যাশায়ী হন-তখন হযরত উমর (রাযিঃ) নবী পত্নীদের জিজ্ঞেস করলেন কে তাঁর গুশ্ফা করবে। সকল স্ত্রী বললেন, আমরা করবো। তাঁর মৃত্যু হলে হযরত উমর (রাযিঃ) এবার জিজ্ঞেস করলেন, কে তাঁর গোসল করাবে, কাফন দেবে? সকলেই বলে উঠলেন আমরা দেবো। (তাবকাত-ই-ইবনে সা'আদ) শোক পালন ও সান্ত্বনা দান : মহিলা সাহাবীগণ কোন মৃত্যু শোকাভিভূত পরিবারের লোকদেরকে সান্ত্বনাদান একাত্মতাকে একটি অবশ্যম্ভাবী কর্তব্য বলে মনে করতেন। একবার মহানবী সাল্লাল্লাহু আলাইহি ওয়াসাল্লাম একজন সাহাবীকে দাফন করে আসছিলেন- রাস্তায় দেখলেন হযরত ফাতেমা (রাযিঃ) যাচ্ছেন। জিজ্ঞেস করলেন, ঘর থেকে বেরিয়েছ কেন? বললেনঃ ওই ঘরে শোক সান্ত্বনা দানের জন্যে গিয়েছিলাম।

(আবু দাউদ, কিতাবুল জানায়েয)

অন্ধকার যুগের শোক পালনের পদ্ধতি ছিল এরকম যে, মহিলারা গিয়ে মৃতের উপর বিলাপ করত, কিন্তু ইসলাম অন্ধকার যুগের এই রেওয়াজটি ভেঙ্গে দেয়। সেজন্যেই মহিলারা যখন ইসলাম গ্রহণ করত, তাদের থেকে মাতম বা বিলাপ না করার প্রতিশ্রুতি এবং অঙ্গীকার গ্রহণ করা হতেন একবার মহানবী সাল্লাল্লাহু আলাইহি ওয়াসাল্লাম উম্মে আতিয়া (রাযিঃ)-এর কাছ থেকে এই অঙ্গীকার নিতে চাইলে, তিনি বললেনঃ ঐ পরিবার অন্ধকার যুগে আমাদের মৃতদের ওপর বিলাপ করেছে, কাজেই তার বদলা দেয়া আমার কর্তব্য- মহানবী সাল্লাল্লাহু আলাইহি ওয়াসাল্লাম তার অনুমতি দিয়ে দেন।

(সহীহ মুসলিম কিতাবুল জানায়েয)

বাৎসল্যবোধ ও সন্তানের প্রতি মমত্ব : মহিলা সাহাবীগণ শিশুদের প্রতি অসাধারণ মমত্ব পোষণ করতেন। একবার এক সাহাবী স্ত্রীকে তালাক দেন এবং তার কাছ থেকে বাচ্চাকে নিতে চাইলেন। তিনি মহানবী (রাযিঃ)-এর কাছে উপস্থিত হয়ে আরয় করেনঃ আমার পেট হচ্ছে তার পাত্র, আমার বুক হচ্ছে তার তৃষ্ণা-নিবারণের কেন্দ্র, আর আমার কোল হচ্ছে তার থাকার গর্ত। এখন তার বাবা আমাকে তালাক দিয়ে দিয়েছে এবং তাকে ছিনিয়ে নিতে চায় আমার কাছ থেকে- মহানবী সাল্লাল্লাহু আলাইহি ওয়াসাল্লাম বললেন, যতদিন তুমি দ্বিতীয় বিবাহ করবে না, তুমি তোমার বাচ্চার সবচেয়ে বেশি অধিকার রাখবে।

(আবু দাউদ, কিতাবুল তালাক)

এই গুণটি যদিও সকল মহিলা সাহাবীগণের মধ্যে পাওয়া যায় তবু এই ক্ষেত্রে কুরাইশের মহিলাগণ ছিলেন সর্বাধিক বিশিষ্ট। স্বয়ং মহানবী সাল্লাল্লাহু আলাইহি ওয়াসাল্লাম তাঁদের এই বৈশিষ্ট্যের বিষয়ে প্রশংসা করেছেন, 'কুরাইশের মহিলারা কতো ভালো- বাচ্চাদের ভালবাসে তারা এবং স্বামীদের ধন-সম্পদ দেখাশোনা করে।

(সহীহ বুখারী, কিতাবুল নিকাহ)

ভাই-বোনের প্রতি ভালবাসা : মহিলা সাহাবীগণ নিজেদের ভাইবোনদের খুব ভালবাসতেন। হুবুশী নামক স্থানে হযরত আব্দুল্লাহ বিন আবি বকর (রাযিঃ) এর ইন্তেকাল হয় এবং লাশ দাফন করা হয় মক্কায়। তখন হযরত আয়েশা (রাযিঃ) ভাইয়ের অনুরাগে কম্পিত হয়ে কবরে আসেন এবং পাঠ করেন কয়েকটি কবিতার পংক্তি :

‘আর আমরা তো জাযীমার সভাসদ যুগলের মত,

বিশ্বাস ছিল সবার পৃথক হবো না একবারো

কিন্তু যখন আলাদা হলাম আমরা এমন আলাদা

যে যুগ যুগ একত্রে থেকেও যেন একরাত্র একত্রে কাটাইনি।’

হযরত হামযা (রাযিঃ) যখন উহোদের যুদ্ধে শহীদ হলেন, তাঁর বোন হযরত সুফিয়া (রাযিঃ) নিহতের লাশ সনাক্ত করার জন্য এলেন, কিন্তু লোকেরা তিনি ব্যথিত হবেন বলে জানালেন না। শেষে মহানবী সাল্লাল্লাহু আলাইহি ওয়াসাল্লাম-এর কাছে এলে মহানবী সাল্লাল্লাহু আলাইহি ওয়াসাল্লাম খুব ভয় পেয়ে গেলেন যে, না জানি এই ঘটনা শুনে সে অজ্ঞান হয়ে না যায়। সেজন্যে তাঁর বুকের ওপর হাত রাখলেন এবং তিনি ইন্নালিল্লাহ বলে কাঁদতে লাগলেন। (তিরমিযী, কিতাবুল জানায়েয)

হযরত রোকেয়া (রাযিঃ)-এর মৃত্যু হলে সকল মহিলা কাঁদতে লাগলেন; হযরত ফাতেমা (রাযিঃ) তার কবরের পাশে কাঁদতেন, তখন মহানবী সাল্লাল্লাহু আলাইহি ওয়াসাল্লাম তাঁর অশ্রু মুছে দিতেন। (তাবকাত-ই-ইবনে সা‘আদ)

মাতা-পিতার সহযোগিতা : মহিলা সাহাবীগণ মা-বাবার সাহায্য করতেন সবসময়। কঠিন মুহূর্তেও তা করতেন। একবার কাফিররা নামাযরত অবস্থায় মহানবী সাল্লাল্লাহু আলাইহি ওয়াসাল্লাম-এর স্কন্ধের উপর উটের নাড়ি-ভুড়ি ঢেলে দেয়, তখন দৌড়ে আসেন হযরত ফাতেমা (রাযিঃ) এবং সেই নাড়ি-ভুড়ি মহানবী সাল্লাল্লাহু আলাইহি ওয়াসাল্লাম-এর স্কন্ধ থেকে তুলে নিয়ে অন্যত্র নিক্ষেপ করেন এবং কাফিরদের গালমন্দ করেন। (মুসনাদ-ই-আবু দাউদ তায়ালাস, পৃ: ৩১৫)

এতিমদের লালন-পালন : এতিমদের লালন-পালন অনেক বড় ও মহান কাজ; অনেক ভাল কাজ, হাদীছ শরীফে এসেছে: আমি এবং এতিমরা জান্নাতে এত নিকটবর্তী হবো যেমন এই দুটো আঙ্গুল লেগে লেগে আছে।

এজন্যে মহিলা সাহাবীগণ এতিমদের প্রতিপালন নিজেদের ফরয মনে করতেন। হযরত যয়নব (রাযিঃ) অসংখ্য এতিমের প্রতিপালন করতেন। একবার তিনি মহানবী সাল্লাল্লাহু আলাইহি ওয়াসাল্লাম খিদমতে এলেন এবং জিজ্ঞেস করলেন: ‘আমার স্বামীর উপর এবং এই এতিমদের উপর সদকা করা বৈধ হবে তো। আরেকজন মহিলা সাহাবীও এই উদ্দেশ্যে মহানবী সাল্লাল্লাহু আলাইহি ওয়াসাল্লাম-এর দরজায় অপেক্ষা করছিলেন। হযরত বেলাল (রাযিঃ) মহানবী সাল্লাল্লাহু আলাইহি ওয়াসাল্লামকে এটি

জানালাে নবীজী বললঃ সে দ্বিগুণ সওয়াব পাবে। একটি আত্মীয়তার জন্যে আরেকটি সদকার জন্যে। (সহীহ বুখারী, কিতাবুয যাকাত)

হযরত আয়েশা (রাযিঃ)-এর ভাই মুহাম্মদ বিন আবি বকর (রাযিঃ)-এর বাচ্চা এতিম হয়ে যায়। হযরত আয়েশা (রাযিঃ) তার প্রতিপালন করেন। (মুয়াত্তা, ইমাম মালেক) এতিমদের মালামাল সংরক্ষণ : আল্লাহ তা'আলা কুরআনে করীমে এতিমদের মালামাল সংরক্ষণ সম্পর্কে একটি বিস্তৃত আয়াত অবতীর্ণ করেছেন। সেই আয়াত অনুসারে তারা কেবল এতিমদের মাল-সম্পদ সংরক্ষণ বা দেখাশোনাই করতেন না, বরং সেই সম্পদ যাতে বৈধ ব্যবসার মধ্যে দিয়ে বৃদ্ধি পায় তার ব্যবস্থাও করতেন। হযরত আয়েশা (রাযিঃ) এতিমদের মালামাল লোকদের দিয়ে দিতেন, যাতে ব্যবসার মধ্য দিয়ে সেই মাল বৃদ্ধি পায়। (মুয়াত্তা, ইমাম মালেক)

বাচ্চাদের প্রতিপালন : বাচ্চাদের লালন-পালন করতে গিয়ে মহিলা সাহাবীগণ ঘুম-বিশ্রামও ভুলে যেতেন। হযরত উম্মে সুলাইম (রাযিঃ) যখন বিধবা হলেন, তখন হযরত আনাস ছিল ছোট্ট বালক। এজন্যে তিনি দৃঢ় প্রতিজ্ঞা করে ফেলেন যে, যতদিন তার পরিপূর্ণ বয়োপ্রাপ্তি ঘটবে না— তিনি দ্বিতীয় বিবাহ করবেন না। সেজন্যে হযরত আনাস (রাযিঃ) নিজেই স্বীকার করেছেনঃ আল্লাহ আমার আম্মাকে উত্তম বিনিময় দান করুন তিনি আমার প্রতিপালনের সকল প্রাপ্য মিটিয়ে দিয়েছেন।

(তাবকাত-ই-ইবনে সা'আদ)

পৃথিবী সবকিছু থেকে মহিলা সাহাবীগণ ভালবাসতেন মহানবী সাল্লাল্লাহু আলাইহি ওয়াসাল্লামকে। কিন্তু তা সত্ত্বেও মহানবী সাল্লাল্লাহু আলাইহি ওয়াসাল্লাম যখন উম্মে হানি (রাযিঃ)কে বিয়ের প্রস্তাব দিলেন, তিনি মার্জনা চাইল এবং বললঃ আপনি আমার নয়নের চেয়েও অনেক প্রিয়; কিন্তু স্বামীর অধিকার তো অনেক বেশী। আর সেজন্যে আমার ভয় হচ্ছে যে, যদি আমি স্বামীর অধিকার ভালভাবে পালন করি, তাহলে বাচ্চাদের উপযুক্ত লালন-পালন সম্ভব হবে না। আর যদি কেবল বাচ্চাদের লালন-পালনে ব্যস্ত তই, তাহলে স্বামীর অধিকার ভালভাবে পালন করতে পারবো না।

(তাবকাত-ই-ইবনে সা'আদ)

স্বামীর ধন-সম্পদ সংরক্ষণ : স্বামী-স্ত্রীর দাম্পত্য জীবনে তখনি ভাল প্রভাব পড়ে, যখন স্ত্রী অত্যন্ত বিশ্বস্ততার সঙ্গে স্বামীর সকল সম্পদ এবং ঘর-গৃহস্থালি দেখাশোনা করে, সংরক্ষণ করে। এই বিশ্বস্ততা মহিলা সাহাবীদের ভেতর ছিল একটি নৈমিত্তিক ঘটনা। হযরত জুবাইরের (রাযিঃ) সঙ্গে হযরত আসমা বিনতে আবি বকরের বিয়ে হয়েছিল; তিনি ঘরে আছেন এমন সময় একজন দরিদ্র সওদাগর এলেন এবং বললেনঃ দেয়ালের ছায়ায় আমাকে সওদা করতে দিন। এটি শুনে হযরত আসমা (রাযিঃ) দ্বিধাদ্বন্দ্বে আবর্তিত হন; তাঁর ঔদার্য ছিল দানশীলতা ছিল তিনি ফলে অনুমতি দিতে চাচ্ছিলেন; আবার স্বামীর সম্মতি ছাড়া তো তিনি একক অনুমতি দিতে পারেন না।

তখন তাকে বললেন যদি আমি অনুমতি দিয়ে দিই এবং জুবাইর রাজি না হয়, তাহলে অসুবিধা হবে তুমি বরং জুবাইরের (রাযিঃ) উপস্থিতিতে এসো এবং আমাকে তখন তোমার প্রত্যাশার কথা জানাও। তখন সে সেভাবেই একদিন আসে এবং বলেঃ আমি একজন গরীব মানুষ, আপনার দেয়ালের ছায়ায় বেচাকেনা করতে চাই। হযরত আসমা (রাযিঃ) (পরিকল্পিতভাবে) অসমর্থনমূলক কথা বলার সঙ্গে সঙ্গেই হযরত জুবাইর (রাযিঃ) আসমাকে বললেনঃ তোমার কি অসুবিধা একজন গরীব মানুষকে বিক্রয়ের সুযোগ দিতে। হযরত আসমা (রাযিঃ) একশো একবার রাজী ছিলেন। জুবাইর (রাযিঃ) সম্মতি দেখে অনুমতি দিয়ে দেন। (সহীহ মুসলিম, কিতাবুল আদাব)

হযরত আসমা (রাযিঃ) ছিল অত্যন্ত দানশীল। এজন্যে দান-খয়রাত পছন্দ করতেন। স্বামীর সম্পদ ছাড়া তার কাছে আর কিছু ছিল না। আবার স্বামীর সম্পদও অনুমতি ছাড়া খরচ করতে পারতেন না। বাধ্য হয়ে মহানবী সাল্লাল্লাহু আলাইহি ওয়াসাল্লামকে জিজ্ঞেস করলঃ আমি জুবাইরের (রাযিঃ) অর্জন থেকে কিছু দান করলে পাপ হবে কি। মহানবী সাল্লাল্লাহু আলাইহি ওয়াসাল্লাম বললঃ যতদূর সম্ভব হয় কর।

(সহীহ মুসলিম, কিতাবুয যাকাত)

একবার মহানবী সাল্লাল্লাহু আলাইহি ওয়াসাল্লাম মহিলাদের থেকে অঙ্গীকার গ্রহণ করেন। সে সময় তাদের ভেতর থেকে এক মহিলা দাড়িয়ে বললেনঃ আমরা আমাদের পিতা, পুত্র এবং স্বামীর মুখাপেক্ষী তাদের সম্পদ থেকে কতটুকু পর্যন্ত আমাদের নেয়া বৈধ হবে? মহানবী সাল্লাল্লাহু আলাইহি ওয়াসাল্লাম বললেনঃ এতটুকু যে, খাওয়া-দাওয়া করতে পারবে এবং উপহার দিতে পারবে। (আবু দাউদ, কিতাবুয যাকাত)

যদিও এই বৈশিষ্ট্য সাধারণভাবে সকল মহিলা সাহাবীদের ভেতর পাওয়া যেতো, তবে এ ক্ষেত্রে কুরাইশ রমণীরা অধিক অগ্রসর। সেজন্যেই মহানবী সাল্লাল্লাহু আলাইহি ওয়াসাল্লাম নিজেই তাদের প্রশংসা করতে গিয়ে বলেছেন :

‘কুরাইশ মরণীরা এত উত্তম যে তারা বাচ্চাদের অনুরাগী এবং স্বামীর ধন-সম্পদ সংরক্ষণকারী।’

স্বামীর সন্তোষবিধান : মহিলা সাহাবীরা নিজেদের স্বামীর সন্তোষবিধান এবং আনন্দদানে খুব যত্নশীল থাকতেন। হযরত হাওলা (রাযিঃ) ছিলেন আতর বিক্রেতা; একবার তিনি হযরত আয়েশা (রাযিঃ)-এর কাছে এসে বললেনঃ প্রতিরাতে আমি সুগন্ধি গায়ে মাখি এবং নববধূ হয়ে যাই। তারপর আল্লাহর উদ্দেশ্যে নিজের স্বামীর পাশ দিয়ে শুয়ে পড়ি— কিন্তু তবু আমার স্বামী আমার দিকে দৃষ্টিপাত করে না, বরং মুখ ফিরিয়ে নেয়। আমি তার মুখ আমার দিকে ফেরাই এবং সে তবুও উল্টো দিকে ফিরে যায়। মহানবী সাল্লাল্লাহু আলাইহি ওয়াসাল্লাম এলেন তখন। তাকেও বললেন একথা। মহানবী সাল্লাল্লাহু আলাইহি ওয়াসাল্লাম বললেন, ‘আপন স্বামীর আনুগত্য করো।

(উসুদুল গাবা)

একবার মহানবী সাল্লাল্লাহু আলাইহি ওয়াসাল্লাম হযরত আয়েশা (রাযিঃ)-এর হাতে রূপোর পাত দেখে জিজ্ঞেস করলেন এগুলো কি? হযরত আয়েশা (রাযিঃ) বললেনঃ আপনার উদ্দেশ্যে সাজবো বলেই এগুলো। (আবু দাউদ, কিতাবুয যাকাত)

একজন মহিলা সাহাবী মহানবী সাল্লাল্লাহু আলাইহি ওয়াসাল্লাম-এর কাছে এলেন; তার হাতে ছিল সোনার কাঁকন। মহানবী সাল্লাল্লাহু আলাইহি ওয়াসাল্লাম তাকে তা পরতে নিষেধ করলেন; তখন উনি বললেনঃ মহিলারা যদি না সাজে স্বামীর জন্যে তাহলে স্বামীরা তাদের দিকে আর তাকাবে না। (নাসায়ী শরীফ, কিতাবুয জিহাদ)

স্বামীর প্রতি ভালবাসা : মহিলা সাহাবীগণ স্বামীদের ভীষণ ভালবাসতেন। হযরত যয়নবের (রাযিঃ) বিয়ে হয় আবুল আসের সঙ্গে। আবুল আস তখন অমুসলমান, ইতিমধ্যে বদরের যুদ্ধ সংঘটিত হয়; সে যুদ্ধ আবুল আস কাফিরদের পক্ষে অংশগ্রহণ করে এবং মুসলমানদের হাতে শ্রেফতার হয়। মহানবী সাল্লাল্লাহু আলাইহি ওয়াসাল্লাম বদরের যুদ্ধবন্দীদের পণের বিনিময়ে ছেড়ে দেয়ার সিদ্ধান্ত নিলে হযরত যয়নব (রাযিঃ) নিজের একটি স্মৃতিময় হার যা হযরত খাদীজা (রাযিঃ) তাকে শ্বশুরালয়ে যাবার সময় দিয়েছিল- আবুল আসের পণ হিসেবে পাঠান। (আবু দাউদ, কিতাবুয জিহাদ) হযরত হামনা (রাযিঃ) নিজের স্বামীর শাহাদাতের কথা শুনলে ব্যাকুলভাবে চিৎকার করে ওঠেন। (সুনানে ইবনে মাজা)

হযরত উমর (রাযিঃ) নিজের পরিবারবর্গের সঙ্গে গাঢ় সম্পৃক্তি রাখতেন না তবু তার স্ত্রী আতেকা (রাযিঃ) রোযার সময়েও অনুরাগের চপলতায় হযরত উমর (রাযিঃ)-এর মস্তকে চুমো দিতেন। (মুয়াত্তা, কিতাবুস সিয়াম)

হযরত আতেকা (রাযিঃ) নিজের প্রথম স্বামীকে খুবই ভালবাসতেন; যখন তিনি তায়েফে শহীদ হল, হযরত আতেকা (রাযিঃ) তাকে উদ্দেশ্য করে এক দরদী মর্সিয়া বা শোকগাথা রচনা করেন যার একটি পংক্তির মর্মার্থ এমনঃ

‘তোমার জন্যে আমার নয়নযুগল অশ্রুময় থাকবে,
আর আমার শরীর হয়ে থাকবে মলিন ও বিবর্ণ-
এই রকম শপথ করে ফেলছি আমি’

এরপর হযরত উমরের (রাযিঃ) সঙ্গে বিয়ে হল তার; অলিমার নিমন্ত্রণে হযরত আলী (রাযিঃ) তাকে এই মর্সিয়ার কথা স্মরণ করিয়ে দিলে কেঁদে ওঠেন তিনি। হযরত উমর (রাযিঃ)ও শহীদ হলেন। তিনি আবার এক মর্মস্পর্শী মর্সিয়া লেখেন। তারপর হযরত জুবাইর (রাযিঃ) বিয়ে করেন তাকে। তিনিও শহীদ হন একদিন, তার উদ্দেশ্যও আতেকা (রাযিঃ) মর্সিয়া রচনা করেছেন। (উসুদুল গাবা)

স্বামীর সেবা : অত্যন্ত আন্তরিকতার সঙ্গে মহিলা সাহাবীরা স্বামীর সেবা করতেন। মহানবী সাল্লাল্লাহু আলাইহি ওয়াসাল্লাম ছিলেন অসাধারণ পরিচ্ছন্ন মানুষ সেজন্যে তিনি বারবার মিসওয়াক ধুইয়ে নিতেন, আর এই মহৎ কাজটি করতেন হযরত

আয়েশা (রাযিঃ)। (আবু দাউদ, কিতাবুত তাহরাত) একবার মহানবী সাল্লাল্লাহু আলাইহি ওয়াসাল্লাম কম্বল পরে মসজিদে এলেন। একজন সাহাবী (রাযিঃ) বলল, রাসূলে কারীম সাল্লাল্লাহু আলাইহি ওয়াসাল্লাম আপনার কম্বলে দাগ দেখা। যাচ্ছে মহানবী সাল্লাল্লাহু আলাইহি ওয়াসাল্লাম তখন কম্বলটি একজন গোলামকে দিয়ে হযরত আয়েশা (রাযিঃ)-এর কাছে পাঠান।

হযরত আয়েশা (রাযিঃ) পানি আনলেন এবং নিজের হাতে কম্বলটি ধুয়ে নেন তারপর শুকোতে দেন এবং তারপর মহানবী সাল্লাল্লাহু আলাইহি ওয়াসাল্লাম-এর কাছে পাঠিয়ে দেন।

(আবু দাউদ, কিতাবুত তাহরাত)

মহানবী সাল্লাল্লাহু আলাইহি ওয়াসাল্লাম যখন এহরাম বাঁধতেন অথবা এহরাম খুলতেন তখন হযরত আয়েশা (রাযিঃ) তার শরীরে সুগন্ধি মেখে দিতেন। (আবু দাউদ)

সাহাবাগণ যখন পৃথিবীর সহযোগিতা ও স্বাচ্ছন্দ্য থেকে বিচ্ছিন্ন হয়ে যেতেন, তখন একমাত্র তাদের স্ত্রীগণই তাদের সঙ্গী ও শুভাকাংক্ষী হতেন। তবুক যুদ্ধে না যাবার কারণে মহানবী সাল্লাল্লাহু আলাইহি ওয়াসাল্লাম রুগ্ন হন হযরত হিলাল বিন উমাইয়ার (রাযিঃ) উপর এবং শেষে সকল মুসলমানদের মত তাঁর স্ত্রীকেও তাঁর থেকে সম্পর্ক বিচ্ছিন্ন করে নিতে বলেন— তিনি তখন মহানবী সাল্লাল্লাহু আলাইহি ওয়াসাল্লাম-এর কাছে উপস্থিত হন এবং বলেনঃ আমার স্বামী মানুষ চাকরকে দিয়ে সেবা না করিয়ে আমি যদি তার সেবা করি, তাহলে কি নারাজ হবেন আপনি? মহানবী সাল্লাল্লাহু আলাইহি ওয়াসাল্লাম বললঃ না।

(সহীহ বুখারী, কিতাবুল মাগাযী)

মহিলা যতোই আনুগত্যশীল ও বিনয়ী হোক না কেন যদি তার থেকে সম্পর্ক বিচ্ছিন্ন করে নেয়া হয়, তাহলে সে স্বামীর দিকে আর ফিরতে পারে না। কিন্তু মহিলা সাহাবীগণ এই নিয়মও ভেঙ্গে ফেলেছিলেন। একজন তাঁর স্ত্রীর সঙ্গে যিহার করে অর্থাৎ (একটি নির্দিষ্ট সময় পর্যন্ত স্ত্রীকে নিজের জন্যে হারাম করে নেয়) কিন্তু তবু সেই অবস্থাতেও তাঁর স্ত্রী তার সেবায় নিবেদিত থাকতো।

সামাজিক জীবন পদ্ধতি

দারিদ্র্য : প্রাথমিক ইসলামের সময় মহিলা সাহাবীগণ অত্যন্ত দারিদ্র্য ও অভাবের মধ্যে জীবন যাপন করতেন— সেই অভাব ও দারিদ্র্যের ছাপ ছড়িয়ে থাকতো তাদের পোষাকে, ঘরের ভেতর, ঘরের আসবাবপত্রের ভেতর এবং গৃহসামগ্রীর ভেতর।

পোশাক : মহিলা সাহাবীগণের কাপড়ের খুব অভাব ছিল। নবীজীর কলিজার টুকরো হযরত ফাতেমার (রাযিঃ) চাদর এত ছোট ও সংকীর্ণ ছিল যে, একবার তিনি মহানবী সাল্লাল্লাহু আলাইহি ওয়াসাল্লাম-এর সামনে লজ্জা-সংকোচের কারণে শরীরের সর্বাংশ ঢাকতে চাইলেন কিন্তু পারলেন না; মাথা ঢাকতে গেলে পা বেরিয়ে আসে, পা ঢাকতে গেলে মাথা।

(আবু দাউদ, কিতাবুল লিবাস)

অনেক মহিলা সাহাবীর তো চাদরও ছিল না; মহানবী সাল্লাল্লাহু আলাইহি ওয়াসাল্লাম মহিলাদের ঈদগাহে যাবার অনুমতি দিলে একজন মহিলা বললেন, যদি কোন মহিলার কাছে চাদর না থাকে, কি করবে? মহানবী সাল্লাল্লাহু আলাইহি ওয়াসাল্লাম বললেন: তাহলে অন্য মহিলা নিজের চাদরের ভিতর নিয়ে নেবে তাকে। (সুনানে ইবনে মাজা) বিয়েতে বধূর জন্যে নেহাৎ গরীব লোকও সুন্দর পোশাক বানিয়ে নেয়— কিন্তু মহিলা সাহাবীদের সেসময়ও ভাল কাপড় হত না। হযরত আয়েশা (রাযিঃ) বলেনঃ আমার কাছে মোটা ধরনের একটি জামা ছিল— বিয়েতে যখন কোনো মেয়েকে সাজানোর দরকার পড়তো, আমার কাছ থেকে সে জামা ধার নিয়ে যেতো।

(সহীহ বুখারী, কিতাবুল হিবা)

দারিদ্র্যর কারণে মহিলা সাহাবীদের ঘর খুবই ক্ষুদ্র, সংকীর্ণ এবং নিরাভরণ হত। ঘরে প্রয়োজনীয় স্থান সংকুলান হত না।

(সহীহ বুখারী, ইফকের ঘটনা)

এজন্যে রাতে মাঠে যেতে হত, দরোজায় পর্দা ছিল না। (আবু দাউদ, কিতাবুল আদাব) রাতে জ্বালাবার জন্যে বাতি পর্যন্ত ছিল না।

(আবু দাউদ, কিতাবুত তাহরাত)

অল্প-সল্প সামগ্রী ছিল মহিলা সাহাবীদের ঘরে, এমনকি একটি মাত্র বিছানা ছিল স্বামী-স্ত্রীর জন্যে এবং সেটাও খেজুর পাতা দিয়ে তৈরী।

(আবু দাউদ, কিতাবুত তাহরাত)

হযরত আসমা (রাযিঃ) নিজে বাগানে গিয়ে ঘোড়ার জন্যে ঘাস আনতেন। হযরত আবু বকর (রাযিঃ) তার জন্যে একজন গোলাম দিলে তিনি এই কাজ থেকে অব্যাহতি পান। রাসূলে কারীম সাল্লাল্লাহু আলাইহি ওয়াসাল্লাম জায়গীর হিসেবে এক টুকরা জমি দিয়েছিল জুবাইর (রাযিঃ)কে। মদীনা থেকে তিন মাইল দূরে ছিল সে জমি। হযরত আসমা (রাযিঃ) রোজই সে জমিতে যেতেন এবং সেখান থেকে খেজুরের গোটা মাথায় করে নিয়ে এসে পানি বহনকারী উষ্ট্রীদের খাওয়াতেন।

ঘরের কিছু কাজ ছাড়া সবই তারা করতেন; নিজে পানি বহন করতেন; পানি বহন করতে করতে মশক ফেটে গেলে সেই মশক সেলাই করে নিতেন; আটা তৈরি করতেন, রুটি বানাতেন। গার্হস্থ্য কর্ম ছাড়াও তারা আরো কিছু কারিগরী কাজও করতেন।

(সহীহ মুসলিম, কিতাবুল আদাব)

হযরত সওদা (রাযিঃ) তায়েফের চামড়া তৈরি করতেন। সেজন্যে তার আর্থিক অবস্থা সকল নবীপত্নীর চেয়ে ভাল ছিল।

(উসুদুল গাবা)

কোন কোন মহিলা সাহাবী কাপড় বুনতেন।

(সহীহ বুখারী, কিতাবুল বুয)

পর্দা : মহানবী সাল্লাল্লাহু আলাইহি ওয়াসাল্লাম-এর জীবৎকালে যদিও বর্তমান সময়ের মত কঠোর পর্দার প্রচলন ছিল না, তবুও মহিলারা একেবারে পর্দাহীন এবং অবাধও ছিলেন না। সফর করতেন তবে পর্দাহীন নয়।

(আবু দাউদ, কিতাবুল মানাসিক)

পর্দাশীলা ছিলেন তারা। যাদের সাথে দেখা দেয়া হারাম ছিল, তাদের থেকে পর্দা করতেন।

(আবু দাউদ, কিতাবুল মানাসিক)

হযরত আয়েশা (রাযিঃ) বলেন, বিদায় হজ্জের সময় যখন লোকেরা আমাদের সামনে যাতায়াত করতো আমরা মুখের উপর চাদর তুলে নিতাম, তারা চলে গেলে আবার খুলে নিতাম মুখ।

(আবু দাউদ, কিতাবুল মানাসিক)

একবার হযরত আফলাহ বিন আবিল কায়িস (রাযিঃ) হযরত আয়েশা (রাযিঃ)-এর সঙ্গে সাক্ষাৎ করতে আসেন। হযরত আয়েশা (রাযিঃ) পর্দাপোশ হয়ে যান। তিনি বললেনঃ তুমি আমার থেকে পর্দা করছো কেন, আমি তো তোমার চাচা হই। তিনি বললেনঃ কিভাবে চাচা? বললেনঃ আমার ভাইয়ের স্ত্রীকে তুমি দুধ খাইয়েছো। বললেনঃ পুরুষ তো দুধ খাওয়ায় নাই।

(আবু দাউদ, কিতাবুন নিকাহ)

এক মহিলা সাহাবীর ছেলে শহীদ হয়; তিনি পর্দাপোশ হয়ে মহানবী সাল্লাল্লাহু আলাইহি ওয়াসাল্লাম-এর কাছে এলেন সাহাবাগণ তাকে দেখে বললেনঃ

ছেলের অবস্থা জানতে এসেছো এবং তাও পর্দাপোশ হয়ে? তিনি বললেনঃ আমি আমার ছেলেকে হারিয়েছি। তবে লজ্জা-শরম তো হারাইনি।

(আবু দাউদ, কিতাবুল জিহাদ)

আমাদের কালে পর্দা একটি রেওয়াজ; যেমন একজন মহিলা কোন পরপুরুষ থেকে রেওয়াজ মত পর্দা করে থাকলে শেষ পর্যন্ত পর্দা করে যায়। তবে কারো কাছে পর্দাহীন আসার সুযোগ হয়ে গেলে আর পর্দা করা হয় না। কিন্তু মহিলা সাহাবীগণ এ ধরনের রেওয়াজী পর্দা করতেন না। তারা শরীয়ত অনুযায়ী পর্দা করতেন। শরীয়তের যদি অনুমোদন থাকে তাহলেই আসতেন কেবল কারো সামনে, আর যদি শরীয়তের অনুমোদন না থাকতো- তাহলে পর্দা করে যেতেন। হযরত আয়েশা (রাযিঃ)-এর মত ছিল গোলামদের কাছ থেকে পর্দা করার দরকার নেই। এজন্যে দীনদার দাস হযরত আবু আবদুল্লাহ সালেমের (রাযিঃ) কাছে তিনি পর্দাহীন আসতেন এবং নিঃসংকোচ আলাপ করতেন তার সাথে। একদিন তিনি এলেন এবং বললেনঃ আজ আল্লাহ আমাকে মুক্ত করে দিয়েছেন। হযরত আয়েশা (রাযিঃ) তখন পর্দা করে নিলেন- কেননা আজ সে দাস নেই। আর আজীবন তার সামনে আসেননি।

(নাসায়ী, কিতাবুত তাহরাত)

ব্যবহারিক লেন-দেন

কর্জ আদায়ের ধারণা : হযরত আয়েশা (রাযিঃ) প্রায়ই ঋণ করতেন। তাকে এই ধরনের ঋণ নেয়ার কারণ জিজ্ঞেস করা হলে, তিনি বলেনঃ ‘মহানবী সাল্লাল্লাহু আলাইহি ওয়াসাল্লাম বলেছেন, যে বান্দা ঋণ পরিশোধের ইচ্ছে পোষণ করে। আল্লাহ তা‘আলা তার জন্যে নিজের তরফ থেকে সাহায্যকারী ঠিক করে দেন আর আমি সেই সাহায্যকারীর সন্ধান করি।

(মুসনাদে আহমাদ বিন হাম্বল, ৬ষ্ঠ খণ্ড-পৃঃ ৯৯)

হযরত উম্মে সালমা (রাযিঃ) একজন গোলামের শর্ত সাপেক্ষ মুক্তিতে প্রতিশ্রুতি হন (মুক্তিবা সেই গোলাম যখন শর্ত পূরণের টাকা দিতে উদ্যোগী হয়) তখন সে-ই তাকে শর্তে কিছু কমিয়ে দিতে বলে। আর হযরত উম্মে সালমা (রাযিঃ)ও কমিয়ে দেন।

(তাবকাত-ই-ইবনে সা‘অদ)

উত্তরাধিকার বন্টনে সততা : হযরত আবু বকর (রাযিঃ) হযরত আয়েশার (রাযিঃ) জন্যে কয়েকটি খেজুর বৃক্ষ উপঢৌকন স্বরূপ দান করেন কিন্তু এখনো তার দখল সম্ভব হয়ে উঠেনি সে জন্যে তার দান অসম্পূর্ণ থেকে গিয়েছিল। হযরত আবু বকর (রাযিঃ) এর যখন মৃত্যু সময় উপস্থিত হল তিনি আয়েশা (রাযিঃ)কে ডেকে বললেনঃ আমি তোমাকে যে খেজুর বৃক্ষসমূহ দান করেছিলাম— তার উপর তোমার যদি অধিকার প্রতিষ্ঠিত হত, তাহলে তা তোমার মালিকানায় চলে যেতো; এখন তো আমার উত্তরাধিকার-সম্পদে পরিণত হয়েছে, যার অধিকারী তুমি এবং তোমার ভাই। কাজেই আল্লাহর বিধান অনুসারে তা তোমরা দু'জনের মধ্যে ভাগ বন্টন করে নাও। আয়েশা (রাযিঃ) বললঃ যদি তার চেয়ে বেশি সম্পদ হতঃ আমি ছেড়ে দিতাম।

(মুয়াত্তা, ইমাম মালেক)

রাজনৈতিক ক্ষেত্রে মহিলা সাহাবীগণের তেমন উল্লেখযোগ্য অবদান নেই। শুধু ইসাবা-এহ্ছে শেফা বিনতে আদবিয়ার (রাযিঃ) জীবনী অংশে উল্লিখিত হয়েছে যে, হযরত উমর (রাযিঃ) তার বিবেচনাকে অগ্রগণ্য মনে করতেন, তার সম্মান করতেন এবং বাজার-ব্যবস্থাপনার কিছু কিছু বিষয়ও তার সঙ্গে সংযুক্ত ছিল।

রাজনৈতিক ক্ষেত্রে ছাড়া অন্যান্য বহুক্ষেত্রে মহিলা সাহাবীগণ ইসলামের সকলসম্ভাব্য সেবা করেছেন। যার বিবরণ নীচে আসছে।

ধর্মীয় অবদান

ইসলাম প্রচার : ধর্মীয় ভূমিকা ও অবদানের ক্ষেত্রে ইসলাম প্রচারই সবচেয়ে গুরুত্বপূর্ণ। আর সেই ক্ষেত্রে ইসলামের প্রারম্ভিকাল থেকে মহিলা সাহাবীদের উজ্জ্বল প্রচেষ্টা লক্ষণীয়। উম্মে শুরাইক (রাযিঃ) ছিলেন একজন মহিলা সাহাবী; ইসলামের শুরুতে যিনি গোপনে মহিলা সাহাবীগণের ইসলামের দাওয়াত দিতেন। কুরাইশরা যখন সেই সংবাদ জানতে পারলো তাকে তারা মক্কা থেকে বের করে দেয়।

(উসুদুল গাবা)

একটি যুদ্ধে সাহাবাগণ তৃষ্ণায় ও পিপাসায় কাতর হয়ে পানির সন্ধানে বেরুলেন; সৌভাগ্যক্রমে একজন রমণী মিলে যায় যার হাতে পানির একটি মশক ছিল। সাহাবাগণ তাকে মহানবী সাল্লাল্লাহু আলাইহি ওয়াসাল্লাম-এর কাছে নিয়ে আসেন এবং মহানবী সাল্লাল্লাহু আলাইহি ওয়াসাল্লাম-এর অনুমতিক্রমে পানি ব্যবহার করেন। যদিও মহানবী সাল্লাল্লাহু আলাইহি ওয়াসাল্লাম সে সময় পানির দাম দিয়ে দেন। তবু সাহাবাদের উপর মহিলার এই সহযোগিতা এত প্রভাব সৃষ্টি করে যে, যখনি এই মহিলার গ্রামের আশেপাশে হামলা করতেন বিশেষ করে এই মহিলার পরিজনকে ছেড়ে দিতেন। সাহাবাগণ এই আনুকূল্য মহিলাকে অসম্ভব প্রভাবিত করে তোলে এবং তারা সবাই মুসলমান হয়ে যায়।

(সহীহ বুখারী, কিতাবুন নসল)

ইকরামা বিন আবু জেহেলের সঙ্গে বিবাহ হয় হযরত উম্মে হাকিম (রাযিঃ)-এর। তিনি নিজে (হযরত উম্মে হাকিম) মক্কা বিজয়ের সময় মুসলমান হন। কিন্তু ইকরামা পালিয়ে ইয়েমেনে চলে যায়। হযরত উম্মে হাকিম (রাযিঃ) নিজেই ইয়েমেনে চলে যান এবং ইকরামাকে ইসলামের দাওয়াত দেন। ইকরামা মুসলমান হয়ে মহানবী সাল্লাল্লাহু আলাইহি ওয়াসাল্লাম-এর কাছে আসেন মহানবী সাল্লাল্লাহু আলাইহি ওয়াসাল্লাম আনন্দে উদ্বেলিত হয়ে যান।

(মুয়াত্তা, ইমাম মালেক)

হযরত আবু তালহা (রাযিঃ) কাফির থাকাকালীন উম্মে সুলাইম (রাযিঃ)-এর সঙ্গে বিবাহ করার ইচ্ছা প্রকাশ করেন। কিন্তু তিনি বললেনঃ তুমি তো অমুসলিম আর আমি মুসলমান বিয়ে কি করে হয়। যদি ইসলাম গ্রহণ করো, তাহলে তা-ই আমার মোহর হবে; তাছাড়া আর কিছু আমি চাইবো না। অতঃপর তিনি মুসলমান হন এবং ইসলামই তার মোহর হিসাবে নির্ধারিত হয়।

(উসদুল গাবা)

নও মুসলিমদের লালন-পালন : ইসলামের গুরুতে যারা ইসলাম গ্রহণ করতো তাদেরকে বাধ্য হয়ে ত্যাগ করতে হত নিজের ঘরবাড়ি; পরিবার, পরিজন, সহায় সম্পত্তি সবকিছু; কাজেই সে সময় ইসলাম প্রচারের সঙ্গে সঙ্গে সবচেয়ে বড় কাজ ছিল ঐ সকল নতুন দীক্ষিত মুসলমানদের প্রতিপালন। আর মহিলা সাহাবীগণ এতে উল্লেখযোগ্য ভূমিকা গ্রহণ করতেন।

যেমন হযরত উম্মে শুরাইকের (রাযিঃ) ঘর নও মুসলিমে ভরে গিয়েছিল- তাদের অতিথি শালা হয়ে গিয়েছিল যেন। আর এজন্যেই মহানবী সাল্লাল্লাহু আলাইহি ওয়াসাল্লাম হযরত ফাতেমা বিনতে কায়েস (রাযিঃ)কে তার ঘর কেবল একারণে ইদ্দত-পালনের অনুমতি দেননি যে, তার ওখানে অতিথিসমাগম বিপুল হওয়ায় পর্দার ব্যবস্থা হত না।

(সহীহ মুসলিম, কিতাবুত তলাক)

হযরত দররা বিনতে লাহব (রাযিঃ)ও খুবই উদার ও দানশীল ছিলেন এবং মুসলমানদের খাওয়াতেন।

(ইসাবা, ইবনে হাজার আসকালানী)

মুজাহিদদের সেবা : যে রকম সাহাবাগণ আত্মহ ও উৎসাহের সঙ্গে যুদ্ধে অংশগ্রহণ করতেন। একইভাবে মহিলা সাহাবীগণ আল্লাহর পথে তাদের থেকে পিছিয়ে থাকতেন না। তাদের জন্যে সবচেয়ে উপযুক্ত কাজ ছিল আহতদের ব্যান্ডেজ বাধা এবং মুজাহিদদের আরাম-আয়েশের সামগ্রী যোগান দেয়া এবং মহিলা সাহাবীরাও অত্যন্ত সততা এবং নিষ্ঠার সঙ্গে এবং প্রবল আন্তরিকতার সঙ্গে এই কাজ করতেন। খায়বরের যুদ্ধে অনেক মহিলা সাহাবী অংশগ্রহণ করেন; মহানবী সাল্লাল্লাহু আলাইহি ওয়াসাল্লাম জানতে পেরে একটু নারাজ ভঙ্গিতে তাদের জিজ্ঞেস করেন তোমরা কার সঙ্গে এবং তার অনুমতিতে এসেছো? তারা বললঃ আমরা চর্কায় পশম বুনি এবং আল্লাহর রাস্তায় সাহায্য করি। আমাদের কাছে আহতদের গুশ্রা ও সেবার জন্যে সামগ্রী আছে, মুজাহিদদের তীর তুলে তুলে দিই আমরা এবং সিততু ঘুলিয়ে তাদের খাইয়ে দেই।

(আবু দাউদ, কিতাবুল জিহাদ)

হযরত উম্মে আতিয়া (রাযিঃ) ছিলেন একজন মহিলা সাহাবী, যিনি মহানবী সাল্লাল্লাহু আলাইহি ওয়াসাল্লাম-এর সঙ্গে যুদ্ধে অংশগ্রহণ করেন। তিনি মুজাহিদদের মালামাল তত্ত্বাবধান করতেন, খাবার পাকাতেন এবং আহতদের ব্যাডেজ বেঁধে দিতেন।

(সহীহ মুসলিম, কিতাবুল জিহাদ)

ওহোদের যুদ্ধে হযরত আয়েশা (রাযিঃ) স্বয়ং অংশগ্রহণ করেন, তিনি এবং হযরত উম্মে সুলাইম (রাযিঃ) পিঠে করে মশক তুলে নিতেন এবং লোকদের পানি পান করাতেন।

(সহীহ মুসলিম, কিতাবুল জিহাদ)

হযরত রুবাই বিনতে মাসউদ (রাযিঃ)-এর বর্ণনা : আমরা সবাই যুদ্ধে যেতাম; পানি খাওয়াতাম। মুজাহিদদের সেবা করতাম এবং মদীনা পর্যন্ত আহতদের এবং যুদ্ধে নিহত ও শাহাদাতপ্রাপ্ত লাশসমূহ নিয়ে যেতাম।

(সহীহ বুখারী, কিতাবুল জিহাদ)

হযরত রাফিদা (রাযিঃ) মসজিদে নববীতে তাবু টাঙ্গিয়ে রেখেছিলেন আহত হয়ে যারা সেখানে আসতো তিনি সেই তাবুতে গুশ্ফা করতেন তাদের। খন্দক যুদ্ধে গুরুতর আহত হযরত সা'আদ বিন মাআখের (রাযিঃ)-এর গুশ্ফা এই তাবুতেই হয়েছিল।

(ইসাবা, ইবনে হাজার আসকালানী)

মহিলা সাহাবীদের এই সেবাকার্য সাহাবাদের এই সেবাকার্য সাহাবাদের সময়কালেও অত্যন্ত প্রশংসনীয় ও তাৎপর্যবহু মনে করা হত— খুলাফায়ে রাশেদীনও এসবের বিশেষ খেয়াল রাখতেন। একবার হযরত উমর (রাযিঃ) মদীনার মহিলাদেরকে চাদর বিতরণ করেন। একটি ভাল চাদর থেকে গেলে কেউ একজন তাকে বললেনঃ এটি নিজের স্ত্রী উম্মে কুলসুম (রাযিঃ)কে দিয়ে দিন। তিনি বললেনঃ উম্মে সাবিত (রাযিঃ)-এর অধিকতর হকদার কেননা ওহোদ যুদ্ধে তিনি মশক ভরে ভরে পানি আনতেন এবং আমাদের দিতেন।

(সহীহ বুখারী, কিতাবুল জিহাদ)

মসজিদের কাজ : মহিলা সাহাবীগণ মসজিদ পরিষ্কারের কাজ করতেন বেশ গুরুত্ব সহকারে। একবার কেউ মসজিদে নববীতে থুথু ফেললে— মহানবী সাল্লাল্লাহু আলাইহি ওয়াসাল্লাম দেখে এত ক্রুদ্ধ হয়ে ওঠেন যে, তার চেহারা-মুবারক রক্তিমবর্ণ হয়ে যায়। একজন মহিলা সাহাবী উঠে তা ফেলে দেন এবং সে জায়গায় সুগন্ধ ছিটিয়ে দেন। মহানবী সাল্লাল্লাহু আলাইহি ওয়াসাল্লাম এতে ভীষণ খুশী হন এবং বলেনঃ বেশ ভাল কাজ করেছো।

(নাসায়ী, কিতাবুস সালাত)

একজন মহিলা সাহাবী প্রায়ই মসজিদে নববীতে ঝাড়ু দিতেন, এটি এত উত্তম কাজ ছিল যে, মহানবী সাল্লাল্লাহু আলাইহি ওয়াসাল্লাম তাঁর খুব কদর করেন। একদিন তার মৃত্যু হয় এবং সাহাবীগণ তাকে রাতেই দাফন করেন। মহানবী সাল্লাল্লাহু আলাইহি ওয়াসাল্লাম পরে জানতে পেরে জিজ্ঞেস করলেনঃ আমাকে খবর দিলে না কেন? তারা বললেনঃ খবর দিতাম, কিন্তু আপনি ঘুমুচ্ছিলেন তখন আপনার নিদ্রা ভাঙতে চাইনি আমরা।

(সুনানে ইবনে মাজা, কিতাবুল জানায়েয)

বিদআতের নিরাকরণ : ধর্মের ক্ষেত্রে বিদআত আসলে ঘুণের মত; এজন্যে প্রভাবশালী সাহাবী মহিলাগণ সবসময় এই চেষ্টা করতেন যে, যাতে ইসলামের বৃক্ষে এই ঘুন না ধরতে পারে। যেমন মুসলমানদের মধ্যে কাবার গিলাফের একটি মর্যাদা আছে পূর্বাপার এবং তার পরিণাম এমন যে, যখনি নতুন গিলাফ চড়ানো হয় তখন পুরনো গিলাফ খাদেমদের কিছু দিয়ে টিয়ে চুপিসারে নিয়ে নেয়া হয় এবং তাকে তবররুক মনে করা হয় এবং তবররুক মনে করে ঘরে রাখা হয় এবং বন্ধু-বান্ধবদের উপটোকন হিসেবে দান করা হয়। তার উপর কুরআন রাখেন তারা, মসজিদে টাঙ্গানো এবং অসুস্থদের তা দিয়ে বাতাস করেন। কিন্তু প্রথম শতাব্দীতে এই অবস্থা ছিল না। কাবা শরীফের যিনি দায়িত্বশীল অর্থাৎ মুতাওয়াললি হত তিনি কাবার গিলাফটি পুতে দিতেন মৃত্তিকার নিচে; যাতে তা মানুষের ব্যবহারে না যায়। শায়বা বিন উসমান (রাযিঃ) যখন হযরত আয়েশা (রাযিঃ)কে কাবা শরীফের গিলাফ নিয়ে কি হয় সে বিষয়ে বললেন, তখন হযরত আয়েশা (রাযিঃ) মুহূর্তেই বুঝে গেলেন যে, এই ধরনের সম্মান-প্রদর্শন শরীয়ত বিরোধী, আল্লাহ এবং আল্লাহর রাসূল সাল্লাল্লাহু আলাইহি ওয়াসাল্লাম তো এর নির্দেশ দেননি এবং খুবই সম্ভাবনা আছে একে কেন্দ্র করে পরবর্তীকালে বিদআতের বহুমুখী উত্থানের সূচনা ঘটা। তাই শায়বাকে (রাযিঃ) তিনি বললেনঃ এটি তো ভাল কথা নয়, তোমরা খারাপ করছো। কাবার পুরনো চাদর যদি সরিয়ে নেয়া হয় তাহলে তার আর কোনো গুরুত্বই নেই, তা যদি কেউ অপবিত্র অবস্থায় ব্যবহারও করে অসুবিধা নেই। তোমাদের উচিত তা বিক্রি করে দেয়া এবং তার টাকা গরীব মিসকিনদের মধ্যে বিলিয়ে দেয়া।

(সুনানে বায়হাকী)

আত্মসমীক্ষা : যে জিনিস ধর্মকে এবং চরিত্রকে সঠিক নিয়মের উপর পতিষ্ঠিত রাখে শরীয়তের দৃষ্টিতে তার নাম ইহতিসাব না আত্মসমীক্ষা। মহানবী সাল্লাল্লাহু আলাইহি ওয়াসাল্লাম স্বয়ং এর তিনটি স্তর বর্ণনা করেছেনঃ

‘তোমাদের মধ্যে যে ব্যক্তি কোন খারাপ জিনিস দেখবে-তা নিজের হাত দিয়ে মিটিয়ে দেয়া উচিত; যদি সেভাবে করার শক্তি না থাকে, তাহলে মুখ দিয়ে তা অসমর্থন করা উচিত এবং এও যদি সম্ভব না হয় তাহলে অন্তর দিয়ে তাকে অস্বীকার করা উচিত এবং এটি ঈমানের দুর্বলতম স্তর।’

প্রভাবশালী মহিলা সাহাবীগণ প্রথম দু’টি পদ্ধতিতেই ঈমানের পরীক্ষা দেন এবং বিকশিত ঈমানের অধিকারী হন। একবার হযরত আয়েশা (রাযিঃ) একটি ঘরে অতিথি

হয়ে এলেন এসে দেখেন অতিথির তরুণী প্রায় দুই মেয়ে চাদর আবৃত না হয়ে নামায পড়ছে, তিনি বললেনঃ ভবিষ্যতে এভাবে চাদর না জড়িয়ে নামায পড়বে না— মহানবী সাল্লাল্লাহু আলাইহি ওয়াসাল্লাম এরকমই বলেছেন।

(মুসনাদে আহমাদ বিন হাম্বল, ৬ষ্ঠ খণ্ড— পৃঃ ৯৬)

একবার তার ভাই আবদুর রহমান বিন আবি বকর (রাযিঃ) তার কাছে এলেন এবং মামুলি ধরনের তড়িঘড়ি ওয়ূ সেরে চললেনঃ হযরত আয়েশা (রাযিঃ) বললেনঃ আবদুর রহমান। ভাল করে অয়ূ কর, মহানবী সাল্লাল্লাহু আলাইহি ওয়াসাল্লামকে আমি বলতে শুনেছি ওয়ূতে যে অংশ ধৌত হবে না, তাতে জাহান্নামের আগুন লেগে যাক।

(মুসনাদে আহমাদ ইবনে হাম্বল, পৃঃ ৩৮৫)

একবার তিনি এক মহিলাকে দেখলেন যে, তার চাদরে খ্রিশূলের মূর্তি আকা। দেখতেই চটে গেলেন এবং বললেনঃ এই চাদর খুলে ফেলো মহানবী সাল্লাল্লাহু আলাইহি ওয়াসাল্লাম যদি এরকম কাপড় দেখতেন, তাহলে ছিড়ে ফেলতেন।

(মুসনাদে আহমাদ, ৬ষ্ঠ খণ্ড—পৃঃ ১৪০)

একবার তাঁর ভাইঝি হাফসা বিনতে আবদুর রহমান খুবই পাতলা ধরনের চাদর পরে সামনে এলেন; দেখতেই চটে গিয়ে ছিড়ে ফেললেন সে চাদর, তারপর বললেনঃ তোমরা জানো না সূরা নূর এ আল্লাহ তা'আলা কি নির্দেশ দিয়েছেন; তারপর শালীন একটি চাদর আনিয়ে দেন তাঁকে। (মুয়াত্তা, ইমাম মালিক, মসনদে আহমাদ, ৬ষ্ঠ খণ্ড—পৃঃ ১৪০)

মানব চরিত্র-নির্মাণে ভূমিকা

বাজিখেলা নিরোধ : বিশ্বের বিস্তীর্ণ অঞ্চল মুসলমানদের হাতে বিজিত হওয়ার পর আরবে নানারকম বাজি খেলার প্রচলন ঘটে, মহিলা সাহাবীগণ এর রোধকল্পে কঠোর ভূমিকা গ্রহণ করেন। হযরত আয়েশা (রাযিঃ)-এর ঘরে কিছু ভাড়াটিয়া থাকতো। আয়েশা (রাযিঃ) জানতে পারলেন যে ওরা বাজি খেলে— শুনেই ক্রুদ্ধ হয়ে উঠলেন তিনি এবং বলে পাঠালেন ওরা যদি বাজি খেলার গুটি বাইরে ফেলে না দেয়, তাহলে আমি তাদেরকে ঘর থেকে বের করে দেবো। (মুসনাদে আহমাদ, ৬ষ্ঠ খণ্ড—পৃঃ ১৪০)

মদ্যপানের বিরুদ্ধতায় : অনারব-অঞ্চল দখলের পরও মুসলমান কর্তৃক প্রশাসন-প্রতিষ্ঠার পর আরবরা হঠাৎ নতুন ধরণের নানা নামের মদে আসক্ত হয়ে উঠলো। যেমন-এষিক নামক মদ, যেহেতু আরবরা জানতো যে আগুরের তৈরি মদ, কাজেই তাদের ভেতর একটি সংশয় থাকলো এই মদকে ইসলাম নিষিদ্ধ মনে করে কিনা অথবা এ বিষয়ে ইসলামের নির্দেশ কি? কিন্তু হযরত আয়েশা (রাযিঃ) নিজের মজলিসে পরিষ্কার বলে দেন যে, বাসনের মধ্যে শুকনো খেজুরও ভিজাবে না কখনো, তোমাদের মশকের পানির মধ্যেও যদি নেশা দেখা যায় তাহলে তা-ও হারাম।

তোমাদের জন্যে মহানবী সাল্লাল্লাহু আলাইহি ওয়াসাল্লাম সকল নেশাকর দ্রব্য নিষিদ্ধ করেছেন।

(মুয়াত্তা, ইমাম মালেক)

কৃত্রিম চুলের ব্যবহারে নিষেধারোপ : প্রাচীন কালে ইহুদী রমণীদের মধ্যে যে চরিত্রহীনতা সংক্রমিত হয়েছিল, তার বহু দৃষ্টান্তের ভেতর একটি ছিল এরকম যে, সব রমণীর চুল পড়ে যেতো, তারা কৃত্রিম চুল পরে নিতো মাথায়, কিন্তু মহানবী সাল্লাল্লাহু আলাইহি ওয়াসাল্লাম মুসলিম রমণীদেরকে এটি নিষেধ করে দেন। মহানবী সাল্লাল্লাহু আলাইহি ওয়াসাল্লাম-এর পর মুসলমান রমণীরা এই কাজ শুরু করলে মহিলা সাহাবীগণ কঠোরভাবে এটির বিরুদ্ধতা করেন। একবার কোন এক মহিলা এসে হযরত আয়েশা (রাযিঃ)কে জিজ্ঞেস করলঃ আমার মেয়ে নব বধু হয়েছে- তার চুলগুলো পড়ে গেছে অসুস্থতায়, এখন কৃত্রিম চুল দিতে পারি কিনা? তিনি বললেনঃ মহানবী সাল্লাল্লাহু আলাইহি ওয়াসাল্লাম সে ধরনের রমণীর উপর অভিশাপ দিয়েছেন, যারা কৃত্রিম চুল লাগায়।

(আদাবুল মুফরিদ)

জ্ঞান চর্চার ক্ষেত্রে ভূমিকা ও অবদান

কুরআন মজীদ এমন পবিত্র ও মর্যাদান্বিত মহাগ্রন্থ যে, যদি তার একটি আয়াতও কারো সম্পর্কে অবতীর্ণ হয়ে যেতো, তাহলে তা ছিল তার মর্যাদার জন্যে যথেষ্ট। হযরত যয়নব (রাযিঃ)-এর বিবাহ বিষয়ে কুরআনে যে আয়াত অবতীর্ণ হয়েছিল তা জন্যে তিনি শূধা বা আত্মগৌরববোধ করতেন।

(সহীহ বুখারী, কিতাবুন নিকাহ)

একটি ভ্রমণে হযরত আয়েশা (রাযিঃ)-এর একটি হার খোয়া যায়; মহানবী সাল্লাল্লাহু আলাইহি ওয়াসাল্লাম তার খোঁজে কয়েকজন সাহাবা পাঠান; তারা হারের সন্ধানে বেরুলে রাস্তাপথে নামাযের সময় হয়ে যায় এবং লোকেরা ওযু না করেই নামায পড়ে নেয়। ফিরে এসে তারা এ বিষয়ে মহানবী সাল্লাল্লাহু আলাইহি ওয়াসাল্লামকে নালিশ করে, আর তখনি অবতীর্ণ হয়; তয়স্মুমের আয়াত। হযরত উসাইদ বিন হুযাইর এটিকে হযরত আয়েশা (রাযিঃ)-এর সম্মান ও মহত্ত্বের নির্ণয়ক মনে করেছিলেন এবং সেজন্যে তাঁকে সম্বোধন করে বলে ওঠেনঃ আল্লাহ তা'আলা তোমাকে উত্তম বিনিময় দান করুন; তোমার উপর এমন কোন ঘটনা ঘটেনি যা থেকে উদ্ধারের পথ আল্লাহ তা'আলা দেখিয়ে দেননি; আর মুসলমানদের জন্যে সেটিই একটি সৌভাগ্য হিসেবে চিহ্নিত হয়েছে।

(মুসনাদে আহমাদ, ৬ষ্ঠ খণ্ড-পৃঃ ১১১)

হযরত উবাদা বিন সামিতের স্ত্রী হযরত খাওলা (রাযিঃ) সম্পর্কে এই আয়াতটি অবতীর্ণ হয়ঃ ‘আল্লাহ তা'আলা সেই মহিলার কথা শুনে নিয়েছেন- যে তোমার সঙ্গে তর্ক করছিল।’ আর এই আয়াত তার মর্যাদা এত বৃদ্ধি করেছিল যে, একটি ঘটনার কথা উল্লেখ করা যাক। হযরত উমর (রাযিঃ) একবার মসজিদ থেকে আসছিলেন রাস্তায় তাঁর সঙ্গে দেখা এবং তিনি তাঁকে সালাম করলেন; অন্তঃপর বললেন; উমর!

আমি তোমার সেই সময় দেখেছি, যখন উকাযের বাজারে লোকেরা তোমাকে উমর বলতো; আর এখন তুমি আমীরুল মু'মেনীন উপাধি অর্জন করেছো। কাজেই প্রজা বিষয়ে আল্লাহকে ভয় করো এবং বিশ্বাস রেখো যে ব্যক্তি আল্লাহর আযাবকে ভয় করবে দূর নিকট হয়ে যাবে তার কাছে এবং যে মৃত্যুকে ভয় করবে, সে বিলীন হয়ে যাবার ভয়ে ভীত থাকবে।

একজন লোক তার সঙ্গে ছিলেন, তিনি তাঁকে বললেনঃ তুমি তো আমীরুল মু'মেনীনকে অনেক কথা বলে ফেলেছো। কিন্তু হযরত উমর (রাযিঃ) বললেনঃ বলতে দাও, ইনি হযরত খাওলা বিনতে হাকিম (রাযিঃ) হযরত উবাদা বিন সামিতের স্ত্রী; আল্লাহ তা'আলা সাত আসমানের উপর থেকে শুনে নিয়েছিলেন এর কথা। কাজেই উমর (রাযিঃ)-এর তো আরো শুনা উচিত। (সীরাতে আয়েশা রাযিঃ)

যে গ্রন্থের একটি আয়াতই কারো মহত্ত্ব ও মর্যাদা নির্দেশের জন্যে যথেষ্ট; সেখানে সে গ্রন্থের পুরো একটি অংশই অবতীর্ণ হয় মহিলা সাহাবীগণের উদ্দেশ্যে 'সূরা নিসা' বিশেষভাবে মহিলা সাহাবীগণের বিভিন্ন নির্দেশ ও ব্যবহারিক বিষয় সম্পর্কে অবতীর্ণ হয়। সূরা নূর-এর আয়াতসমূহও তাদের সঙ্গে সম্পর্কিত। তা ছাড়াও আরো অসংখ্য আয়াত তাঁদের বিষয়ে অবতীর্ণ হয়। এই সূত্রে যদিও সেসব আয়াত এবং আয়াতের শানে নুযুল ও অবতরণ উৎস এবং সেসবের তফসীর তাদের সঙ্গে সংযুক্ত; তবু সাধারণভাবে তফসীর বলতে যা বুঝায় এবং সে বিশিষ্ট একজনকে 'মুফাসসির' (বা কুরআন ভাষ্যকার) বলা যেতে পারে সেদিক থেকে সকল মহিলা সাহাবীগণের মধ্যে কেবল হযরত আয়েশাই (রাযিঃ) তফসীরের ক্ষেত্রে বিশিষ্ট সাহাবীগণের সমকক্ষতা অর্জন করেছিল। হযরত আয়েশা (রাযিঃ) অত্যন্ত কঠিন আয়াতসমূহের তফসীর করেছিলেন; হাদীছের গ্রন্থসমূহে তাঁর নিকট থেকে যেসব তফসীরের বর্ণনা বিবৃত আছে তা দু'রকম। (১) সেসব আয়াত যেগুলো সম্পর্কে তাঁর হৃদয়ে কোন কথা জেগেছে এবং সঙ্গে সঙ্গে মহানবী সাল্লাল্লাহু আলাইহি ওয়াসাল্লামকে তিনি তা জিজ্ঞেস করেছেন এবং (২) ব্যাখ্যা জেনে নিয়েছেন যেমন একটি আয়াত আছে 'যার হিসেব হল, তার আযাব হয়ে গেল' মহানবী সাল্লাল্লাহু আলাইহি ওয়াসাল্লামকে হযরত আয়েশা (রাযিঃ) জিজ্ঞেস করলেন, আল্লাহ তো বলেছেনঃ 'এবং তার থেকে সহজ হিসেব নেয়া হবে' মহানবী সাল্লাল্লাহু আলাইহি ওয়াসাল্লাম বললেনঃ 'এটি কর্মসমূহের অগ্রগামিতা; কিন্তু যার কাজে তর্ক-সমালোচনা শুরু হয়েছে, সে তো নষ্টই হল। একবার হযরত আয়েশা (রাযিঃ) তাঁকে জিজ্ঞেস করলেনঃ হে রাসূলে কারীম সাল্লাল্লাহু আলাইহি ওয়াসাল্লাম! আল্লাহ তা'আলা বলছেনঃ 'যেদিন জমিন অন্য জমিন দিয়ে বদলে দেয়া হবে এবং বদলে যাবে অসমানও এবং তামাম সৃষ্টিকুল মহান আল্লাহর মুখোমুখি হয়ে যাবে (অন্য একটি বর্ণনা অনুযায়ী আয়েশা (রাযিঃ) নবী কারীম সাল্লাল্লাহু আলাইহি ওয়াসাল্লামকে এই আয়াতের কথা বলেন 'সকল জমিন তাঁর মুঠিতে হবে এবং

আসমান তাঁর হাতের উপর উবুড় হয়ে থাকেব') কিন্তু হযরত আয়েশা (রাযিঃ বলছেন, যখন জমিন এবং আসমান কিছুই হবে না- তখন কোথায় থাকবে লোকেরা? মহানবী সাল্লাল্লাহু আলাইহি ওয়াসাল্লাম বললেনঃ তখন লোকেরা থাকবে সীরাতে'র উপর'।

কুরআন মজীদে'র একটি আয়াতে আছে 'যেসব লোক কাজ করে ভীত অন্তরে তারা আল্লাহর দিকে ফিরে যাবে।' হযরত আয়েশা (রাযিঃ)-এর একটি সন্দেহ ছিল যারা চোর, বদমাশ, মাতাল অথচ আল্লাহকে ভয় করে, এই আয়াত কী তাদেরই নির্দেশ করছে? মহানবী সাল্লাল্লাহু আলাইহি ওয়াসাল্লাম বললেনঃ না, আয়েশা তা নয় বরং আয়াতের অর্থাৎ তারা যারা নামাযী, রোযাদার, যাকাত দানকারী এবং আল্লাহর ভয়ে ভীত।

আরেক ধরনের তফসীর হচ্ছে যেমন কোনো আয়াতের অর্থ ও অর্থাৎ বিষয়ে কারো মনে সংশয় তৈরী হল কিংবা অস্পষ্টতা তখন সে-ই এসে তাঁকে জিজ্ঞেস করল; আর হযরত আয়েশা (রাযিঃ) সে সংশয়ের অত্যন্ত প্রাঞ্জল উত্তর দিলেন।

এক. হজ্জের বিভিন্ন কাজ ও কর্তব্যের মধ্যে সাফা ও মারওয়ার ভেতর দৌড়ান একটি। আল্লাহ তা'আলা এ বিষয়ে বলেছেনঃ 'সাফা এবং মারওয়ার পাহাড়সমূহ আল্লাহর নিদর্শনাবলীর অন্তর্ভুক্ত; কাজেই যে কাবা ঘরের হজ্জ করবে অথবা উমরা, তাহলে তার পাশাপাশি সাফা ও মারওয়ার তওয়াফও ক্ষতি নেই কোন।'।

ওরওয়া (রাযিঃ) তাঁকে বললেনঃ খালা! এর তো অর্থ এই যে, কেউ যদি তওয়াফ না করে কোনো ক্ষতি নেই; আয়েশা (রাযিঃ) বললেনঃ না তুমি ঠিক বলোনি। যদি আয়াতের অর্থ তা-ই হয়, যা তুমি বুঝেছো, তাহলে তো আল্লাহ এরকমই বলতেন 'যদি তার তওয়াফ না কর তাহলে কোনো ক্ষতি নেই'- আসলে তো এই আয়াত আনসারদের সম্পর্কে অবতীর্ণ হয়েছে। ইসলামের পূর্বে এই দু'টি গোত্র পূজো করতো মানাতের- আর মানাতের মূর্তি শালাতে স্থাপিত ছিল, এজন্যে সাফা মারওয়ার তওয়াফকে তারা খারাপ মনে করতো। ইসলাম গ্রহণের পর মহানবী সাল্লাল্লাহু আলাইহি ওয়াসাল্লামকে তারা জিজ্ঞেস করল আমরা প্রথমে এরকম করতাম এখন এর হুকুম কী? এর সম্পর্কে আল্লাহ তা'আলা বললেনঃ 'সাফা এবং মারওয়ার তওয়াফ করো। তাতে লজ্জার কিছু নেই।'।

আবু বকর বিন আবদুর রহমান একজন মুহাদ্দিছ ব্যক্তি ছিলেন। তিনি হযরত আয়েশা (রাযিঃ)-এর এই বক্তব্য শুনে মন্তব্য বলেন, 'জ্ঞান বলতে এই জিনিসই বোঝানো হয়।'।

দুই. কুরআনের একটি আয়াত হচ্ছেঃ 'এমনকি পয়গম্বর নিরাশ হয়ে গেলেন এবং তাঁর মনে হল তাঁকে মিথ্যা বলা হয়েছে তখন আমার সাহায্য এসে গেল।' হযরত

আয়েশা (রাযিঃ)কে হযরত উরওয়া (রাযিঃ) জিজ্ঞেস করল এর অর্থ কি? ‘মিথ্যা বলা হয়েছে— অর্থাৎ মিথ্যা অঙ্গীকার করা হয়েছে? হযরত আয়েশা (রাযিঃ) বললেনঃ এর অর্থ ঐ নবীকে ‘মিথ্যা’ অপবাদ দেয়া হয়েছে। তখন উরওয়া বললেনঃ তাঁর জাতি যে তাঁকে মিথ্যা বলে অপবাদ দিয়েছে সে তো তিনি নিশ্চিতভাবেই জানেন— এটি তো কোন অনুমান বা ধারণা নয়, কাজেই তাঁকে মিথ্যা অঙ্গীকার করা হয়েছে’ এই কথাই তো অর্থ হিসেবে ঠিক। তাইনা? হযরত আয়েশা (রাযিঃ) বললেনঃ মাআযাল্লাহ! আল্লাহর নবীরা আল্লাহ সম্পর্কে কখনোই এধরণের ধারণা পোষণ করতে পারেন না যে, আল্লাহ তাঁদের সম্পর্কে মিথ্যা অঙ্গীকার করেছেন সাহায্য বিষয়ে। উরওয়া বললেন তা-ই যদি হয়, তাহলে আয়াতের অর্থ— দাঁড়াবে কি? তখন আয়েশা (রাযিঃ) বললেনঃ এটি নবীদের অনুসারী অনুগামীদের বিষয়ে বলা হয়েছে যে, যখন তাঁরা ঈমান গ্রহণ করল এবং নবুয়্যতের সত্যতা স্বীকার করল এবং তাঁদের জাতি তাঁকে কষ্ট দিলো এবং আল্লাহর সাহায্য এসে পৌঁছতে বিলম্ব হতে লাগলো এবং এমনকি নবী নিজ সম্প্রদায়ের লোকদের অবিশ্বাস ও বিরোধিতায় চূড়ান্ত নিরাশ হয়ে গেলেন, তখন তাঁর মনেঃহল যে, না-জানি এই অবস্থায় যারা ইতোপূর্বে ঈমান এনেছে তারাও অবিশ্বাসী না হয়ে যায়— ঠিক এ সময়ই আল্লাহর সহযোগিতা এসে পৌঁছায়।

তিন. যে আয়াতে চারজন পর্যন্ত স্ত্রী গ্রহণের অনুমতি দেয়া হয়, সেই আয়াতটি এরকমঃ ‘যদি তোমাদের ভয় হয় যে, এতিমদের বিষয়ে তোমরা ন্যায্যপরায়ণ থাকতে পারবে না, তখন স্ত্রী হিসেবে দু’জন, তিনজন, চারজন পর্যন্ত গ্রহণ করতে পারো।’ আপাতদৃষ্টিতে আয়াতের প্রথমাংশে এতিমদের অধিকার সম্পর্কিত কথাবার্তার সঙ্গে দ্বিতীয়াংশ একাধিক স্ত্রী-গ্রহণ সম্পর্কিত আলোচনার সংগতি নেই মনে হয়। এই সংশয় জেগেছিল এক শিষ্যের। হযরত আয়েশা (রাযিঃ)কে তিনি জিজ্ঞেস করলেন বিষয়টি। হযরত আয়েশা (রাযিঃ) বললেন, আয়াতের শানে নযুল আছে এবং তা এইঃ কিছু কিছু লোক এতিম বালিকাদের মুরুব্বী হয়ে যায়, তাদের সঙ্গে উত্তরাধিকার সম্পৃক্ত আত্মীয়তা হয়ে যায়; তাঁরা চান যে, মুরুব্বীয়ানার ঠেলায় তাঁদের বিয়ে করে তাদের সম্পত্তি দখল করতে। আর যেহেতু ঐ বালিকাদের পক্ষে বলার কেউ থাকে না, এজন্যে বাধ্য ও নিরীহ ভেবে তাদের উপর নানারকম চাপ সৃষ্টি করা হয়; এই আয়াতে আল্লাহ তা’আলা তাদেরই উদ্দেশ্যে বলেছেন যদি তোমরা ঐ বালিকাদের সঙ্গে বিবেকসম্মত আচরণ করতে না পার, তাহলে তাদের বিয়ে করতে যেওনা বরং তাদের ছাড়া

অন্য রমণীদের দুই, তিন, চারজন বিয়ে করে নিতে পারো— তাদেরকে বিয়ে করে
আয়ত্তে আনতে যেও না।

চার. এই সুরাতেই আরেকটি আয়াতে আছেঃ ‘সেই বালিকাদের সম্পর্কে লোকেরা
জিজ্ঞেস করে তোমাকে; বলে দাও আল্লাহ তাদের অধিকার বিষয়ে মীমাংসা
করেছেন— এই কুরআনের মধ্যেই আছে, যা তোমাদের পড়ে শোনানো হয়েছে।
সেই এতিম বালিকাদের সম্পর্কে যাদেরকে তোমরা তাদের নির্ধারিত অধিকার
দাওনা এবং তাদেরকে বিয়ে করার ইচ্ছেও নেই তোমাদের।’

এই আয়াত বিষয়েও জিজ্ঞেস করা হলে হযরত আয়েশা (রাযিঃ) বলেন,
কুরআনের প্রথমে যা কিছু পড়ে শোনানো হয়েছে বলতে প্রথম আয়াতের কথা
ইঙ্গিত করা হয়েছে, যা উল্লিখিত হয়েছে একটু আগে। এই নির্দেশ সেসব
মুরুব্বীদের সম্পর্কে বলা হয়েছে যারা এতিম বালিকাদের বিয়েও করে না
সুন্দরী না হওয়ার কারণে; আবার অন্যদের সঙ্গে বিয়ে দিতেও ইচ্ছুক নয়
সম্পত্তি হাতছাড়া হয়ে যাবার আতঙ্কে।

পাঁচ. আরেকটি আয়াত, এতে বিতর্ক আছেঃ আল্লাহ বলেছেনঃ ‘যে ধনী ও সম্পদশালী
তার উচিত তা থেকে সরে থাকা এবং যে গরীব তার উচিত নিয়মত তার থেকে
নিয়ে নেয়া। এই আয়াতটি এতিমদের মুরুব্বীদের সম্পর্কে অবতীর্ণ। তারা যদি
দরিদ্র হয়, তাহলে এতিমদের সম্পদ থেকে নিয়ে খেতে পারে। কিন্তু হযরত
আবদুল্লাহ বিন আব্বাস (রাযিঃ)-এর মতে আয়াতটি নিম্নোক্ত আয়াতের কারণে
রহিত বলা হয়েছেঃ যারা জুলুম করে এতিমদের মাল ভোগ করে তারা আসলে
আপন উদরে আগুন ভক্ষণ করে। কিন্তু এ আয়াতে তো এই শাস্তি তাদের
সম্পর্কে উচ্চারিত হয়েছে। যারা জুলুম করে এতিমদের সম্পদ ভোগ করে।
হযরত আয়েশা (রাযিঃ) বলেনঃ যে আয়াতে খাওয়ার ভোগ করার অনুমতি
আছে, সেটি তাদের জন্যে প্রযোজ্য যারা এতিমদের সম্পদ দেখাশোনা ও
তত্ত্বাবধান করে। যদি মুরুব্বী সক্ষম ও সমর্থ হয় তাহলে এতিমদের
নিয়ম-অনুসারে প্রয়োজন মত নিতে পারে। এই রকম ব্যাখ্যা করলে
দু’আয়াতের মাঝে অর্থগত সংঘর্ষ ও অসংগতি দেখা দেয় না।

ছয়. স্ত্রীর যদি স্বামী সম্পর্কে অভিযোগ থাকে সে নিয়ে অসন্তোষ ও উপেক্ষার আশংকা
তৈরী হয় তাহলে তা পরস্পর আলোচনা করে সন্ধি করে নিতে ক্ষতি নেই— আর
সন্ধি সবসময়েই ভাল কিন্তু অসন্তোষ দূর করার জন্যে সন্ধি মীমাংসা তো একটি
সাধারণ কথা; তার জন্যে আল্লাহর এই বিশেষ নির্দেশ পাঠানোর প্রয়োজন কি?
হযরত আয়েশা (রাযিঃ) বলেন, এই আয়াত অবতীর্ণ হয়েছে সেই রমণী সম্পর্কে

যার কাছে স্বামী বেশী আসা যাওয়া করে না কিংবা হয়তো রমণী বয়োত্তীর্ণ এবং সে কারণে স্বামীর সেবার জন্যে অনুপযুক্ত। দাম্পত্য জীবনের পারস্পরিক কর্তব্য পালন এক দ্বিনি দায়িত্ব। কিন্তু এই বিশেষ অবস্থায় স্ত্রী যদি তালাক না নিয়ে নিজের সাধারণ সকল অধিকার থেকে স্বামীকে মুক্তি দিয়ে দেয়, তাহলে এই সমঝোতা খারাপ নয় বরং চূড়ান্ত বিচ্ছেদের চেয়ে অনেক ভাল।

এই আয়াত ছাড়াও হযরত আয়েশা (রাযিঃ) থেকে আরো অনেক আয়াতের তফসীর বর্ণিত আছে; কিন্তু আমরা যেসব আয়াতের তফসীর উল্লেখ করলাম, তা থেকে তাঁর তীক্ষ্ণ মেধা ও মনীষা ছাড়াও একটি জিনিস বোঝা যায় যে, যে সব আয়াত মহিলাদের বিয়ে ও তালাক সম্পর্কিত, সেগুলোর অর্থ ও মর্মার্থ তিনি কতো ভালভাবেই অনুধাবন করেছিলেন এবং কতো ভালভাবে তা স্মরণ রেখেছিলেন। আর সত্য তো এই যে, যদি মহিলারা নিজেদের অধিকার সংরক্ষণ করতে চায়, তাহলে কুরআন ও হাদীছের সঠিক শিক্ষার দিকে তাদের দৃষ্টিপাত করা উচিত বিশেষভাবে।

দ্বীনের রহস্য সম্পর্কিত জ্ঞান

দ্বীনের রহস্য-সম্পর্কিত জ্ঞান বলতে সেই জ্ঞানকে বুঝানো হয়, যেখানে শরীয়তের আহকামের কারণ ও উপাদান এবং রহস্য ও উপযোগিতা সম্পর্কে আলোচনা করা হয়। আর এই জ্ঞান এত সূক্ষ্মতার উপর নির্ভরশীল যে, কেবল কয়েকজন ফকীহ সাহাবী যেমনঃ হযরত উমর (রাযিঃ), হযরত আলী (রাযিঃ), হযরত য়ায়েদ (রাযিঃ) এবং হযরত আবদুল্লাহ বিন আব্বাস (রাযিঃ)-এর কানুন এবং পদ্ধতি বিন্যাস করেছেন, স্থাপন করেছেন। অন্য সাহাবীগণ এতে বিশেষ ভূমিকা রাখেননি। বিশেষত এই বিষয়ে মহিলা সাহাবীগণের ভূমিকা তো দৃষ্টিতেই পড়ে না। কিন্তু হযরত আয়েশা (রাযিঃ) একাকী এ বিষয়ে শরীয়তের যেসব রহস্য ও সংশয়ের সমাধান করে গেছেন- তা বাকী মহিলাদের ভূমিকাহীনতা ঢেকে দেয়। বরং এক্ষেত্রে হযরত আয়েশা (রাযিঃ) সাহাবীগণের চেয়েও অগ্রগামী। অন্য সাহাবীগণের এ বিষয়ে যা বর্ণনা করেছেন তা হাদীছ গ্রন্থসমূহ উল্লিখিত আছে; কিন্তু হযরত আয়েশা (রাযিঃ)-এর এই সম্পর্কে যে বক্তব্য আছে বহু সমস্যার যে উন্মোচন এবং ব্যাখ্যা ও সমাধান আছে তা অনেক অনেক বেশী। হযরত আয়েশা (রাযিঃ) উপরোক্ত সাহাবীগণের চেয়ে অনেক বেশী শরীয়তের বিভিন্ন বিষয়ের রহস্য নির্ণয় করেছেন এবং বিপুলভাবে বিভিন্ন বিষয়ের কারণ ও উপাদান উপস্থাপন করেছেন। (সীরাতে আয়েশা) যেমন নবুয়্যতের সময় যেহেতু মহিলাদের চারিত্রিক অবস্থা উৎকৃষ্ট ছিল, ফলে তাদের জামাতে নামায পড়ার অনুমতি হয়, হযরত আয়েশা (রাযিঃ) পরিস্কার ঘোষণা করেন :

‘মহিলারা নিজেদের অবস্থায় যেসব পরিবর্তন নিয়ে এসেছে, যদি নবীজী তা দেখতেন মসজিদে আসতে নিষেধ করতেন তাদের, যেরকম ইহুদী রমণীদের নিষেধ করে দেয়া হয়েছিল।

(আবু দাউদ)

কুরআন মজীদের মক্কী সূরাগুলোর মধ্যে এবং মাদানী সূরাসমূহের মধ্যে বিভিন্ন পার্থক্য আছে, বিভিন্ন বিশিষ্টতা আছে। যেমন যেসব সূরা মক্কায় অবতীর্ণ হয়েছে সেগুলোতে বেশীরভাগ আকায়েদ, বিশ্বাস এবং ঘটনার কথা; আর মাদানী সূরাসমূহে ধারাবাহিক বিভিন্ন নির্দেশ ও নিষেধের বাণী উচ্চারিত হয়েছে। কারণ ইসলাম এসেছিল এক মূর্খ জাতির কাছে- সেজন্যে তাদেরকে বক্তৃতার ঢং-এ জান্নাত এবং দোযখের কথা শোনানো হয়েছে। তারপর তাতে লোকেরা প্রভাবিত হল যখন তখন ইসলামের বিভিন্ন কানুন, জীবনপদ্ধতি, নির্দেশ ও নিষেধের বাণী অবতীর্ণ হয়। তা না করে যদি প্রথমেই ব্যাভিচার করো না, মদ খেয়ো না, বলা হত কে শুনতো সেই অপ্রিয় কথা? এই ধরনের বিশিষ্টতা এবং পার্থক্য অনুধাবন করে ইউরোপের বিদ্বানরা বেশ উল্লাসিত; কিন্তু হযরত আয়েশা (রাযিঃ) প্রথমদিনেই ফাঁস করে দিলেন এর রহস্য শরীফে এসেছে।

(সহীহ বুখারী, তা'লীফে কুরআন)

‘কুরআনের সবচেয়ে পথমে যে সূরাটি অবতীর্ণ হয়েছে সেটি দীর্ঘায়তন সূরা সমূহের অন্তর্ভুক্ত। যেখানে জান্নাত এবং দোযখের কথা আছে; তারপর লোকেরা যখন ইসলামে আগ্রহী হল তখন অবতীর্ণ হল হারাম হালালের বাণী। যদি এরকম না হয়ে প্রথমে কুরআন বলতো ‘মদ খেয়ো না’ তখন লোকেরা বলতো; আমরা মদ ছাড়বোনা কখনো। যদি বলতো নিষিদ্ধ সংগম করো না তখন তারা বলতোঃ আমরা তা ছাড়বো না কখনো। মক্কায় যখন আমি খেলাধুলো করছি তখন অবতীর্ণ হল তাঁর অঙ্গীকারের দিবস কিয়ামত এবং কিয়ামত হচ্ছে খুবই কঠিন ও ভয়ংকর মহাদিবস। সূরা নিসা এবং সূরা বাকারা যখন অবতীর্ণ হল তখন আমি মাহানবী সাল্লাল্লাহু আলাইহি ওয়াসাল্লাম-এর গৃহবধু।

ইসলাম আবির্ভূত হওয়ার আগে মদীনার বিভিন্ন গোত্র পারস্পরিক নানারকম ঝগড়া কলহ ও রক্তারক্তিতে লিপ্ত থাকতো। আর এসবের আহ্বানকারীরা যারা নিজের মর্যাদা ও প্রতিপত্তির জন্যে সকল নতুন আন্দোলনে বিঘ্ন সৃষ্টি করতো-মারা পড়ে। এই সকল যুদ্ধে আনসাররা এত বিপর্যস্ত হয়ে যায় যে, ইসলাম এলে তাদের সবসঙ্গেই তাকে একটি রহমত ও করুণাধারা মনে করে। যেহেতু আগের যুদ্ধ আহ্বানকারীরা বিলুপ্ত হয়ে গিয়েছিলাম ফলে এজন্যে তাদের পথে কেউ আর বাধা হয়ে দাঁড়ায়নি। এইভাবে হিজরতের পূর্বেই আল্লাহ তা‘আলা মদীনায় ইসলামের উন্নতির অনুকূল রাস্তা পরিষ্কার করে দিয়েছিলেন। ইউরোপের ইতিহাস দর্শন বর্তমানে এই সত্যই বিশ্লেষণ করে দেখিয়েছে; আর হযরত আয়েশা (রাযিঃ) তার আগেই আমাদের বলেছিলেন।

(সহীহ বুখারী, বাবুল কসামা)

‘বুআ‘স-যুদ্ধ সেই ঘটনা ছিল, যা আল্লাহ তা‘আলা নিজের রাসূলের জন্যে আগে থেকেই সৃষ্টি করে দিয়েছিল। মাহানবী সাল্লাল্লাহু আলাইহি ওয়াসাল্লাম মদীনায় এলে আনসারের দল বিচ্ছিন্ন হয়ে গিয়েছিল এবং তাদের সর্দার মারা গিয়েছিল; আর এজন্যেই আল্লাহ তা‘আলা তাঁর রাসূলের জন্যে তাদের ইসলামে আসবার পথ এই ঘটনার মধ্য দিয়ে আগে থেকেই তৈরী করে রেখেছিলেন। যেগুলো চার রাকাতের নামায কসর এর সময় সেগুলো দু‘রাকাত কমিয়া দেয়া হয়েছে, কিন্তু হযরত আয়েশা (রাযিঃ) তাঁর কারণ বর্ণনা করেছেন এরকম।

(সহীহ বুখারী, বাবু হিজরত)

‘মক্কায় দু‘রাকাত নামায ফরয ছিল; যখন মাহানবী সাল্লাল্লাহু আলাইহি ওয়াসাল্লাম হিজরত করলেন তখন নামায হয়ে গেল চার রাকাত এবং সফরের নামায (অর্থাৎ কসর-এর) সেই প্রাচীন দু‘রাকাতের অবস্থায় ছেড়ে দেয়া হয়।

সকল সময় ইবাদতের নির্দেশ আল্লাহ তা‘আলা দিয়েছেন; কিন্তু হাদীছে হযরত উমর (রাযিঃ)-এর থেকে বর্ণিত আছে যে, আসরের নামায এবং ফজরের নামাযের পর কোন নফল এবং সুন্নত বৈধ নয়। আপাত দৃষ্টিতে এই নিষেধের অর্থ অধিগম্য হয় না। কিন্তু হযরত আয়েশা (রাযিঃ)-এর কারণ হিসেবে বলেছেন।

‘উমর (রাযিঃ)-এর একটু ভ্রম ঘটে গেছে, আসলে মহানবী সাল্লাল্লাহু আলাইহি ওয়াসাল্লাম শুধুমাত্র নিষেধ করেছেন এই রকম যে, কেউ যেন সূর্যের উদয় এবং অস্তের সময়কে লক্ষ্য রেখে নামায না পড়ে। (মুসনাদে আহমাদ, ৬ষ্ঠ খণ্ড-পৃঃ ১৪৪)

অর্থাৎ যাতে সূর্য-পূজার সন্দেহের অবকাশ তৈরি না হয় এবং সূর্যপূজকদের আরাধনা সময়ের সঙ্গে মিলে না যায়।

হাদীছে আছে মহানবী সাল্লাল্লাহু আলাইহি ওয়াসাল্লাম বসে নফল নামায পড়তেন; এই সূত্রে লোকেরা কোনো রকম ওয়র অজুহাত ছাড়া বসে নামায পড়াকে ভাল মনে করতে থাকে। একজন হযরত আয়েশা (রাযিঃ)কে মহানবী সাল্লাল্লাহু আলাইহি ওয়াসাল্লাম-এর বসে নামায পড়ার কারণ জিজ্ঞেস করলে তিনি উত্তরে উচ্চারণ করেনঃ এটি সেই সময়ের কথা যখন মহানবী সাল্লাল্লাহু আলাইহি ওয়াসাল্লাম দুর্বল হয়ে গিয়েছিলেন।

(আবু দাউদ)

আবু দাউদ এবং সহীহ মুসলিম শরীফে এ ধরনের আরো অনেক বর্ণনা ও ভাষ্য মেলে; যা থেকে বোঝা যায় যে মহানবী সাল্লাল্লাহু আলাইহি ওয়াসাল্লাম দুর্বলতার এবং শারীরিক অক্ষমতার কারণে বসে নামায পড়তেন।

হিজরতের পর যখন নামায, দু’রাকাতের জায়গায় চাররাকাত হয়ে যায়, তখন কেবল মাগরিবে কেন তা চার রাকাত হল না এ নিয়ে আয়েশা (রাযিঃ) বললেনঃ ‘হল না এ কারণে যে, তা মূলতঃ দিনের বিতির’ অর্থাৎ যেকোনো রাতের নামায তিন রাকাত বিতিরের আছে, একইভাবে মাগরিবের নামায তিন রাকাতের দিনের বিতিরের মত। ফজরের নামাযে তো স্বৈর্য ও স্বস্তি বেশী, কাজেই তাতে রাকাত বৃদ্ধির অবকাশ ছিল; অথচ তাতেই বরং অন্য নামাযের তুলনায় রাকাত সংখ্যা অল্প।

(মুসনাদে আহমাদ, ৬ষ্ঠ খণ্ড-পৃঃ ২৪১)

হযরত আয়েশা (রাযিঃ) বলেনঃ ফজরের নামাযে রাকাতের সংখ্যা বাড়ানো হয়নি একারণে যে, তাতে দীর্ঘ সূরা পাঠ করা হয়। অর্থাৎ রাকাতের অল্পতা মিটিয়ে দিয়েছে কিরাতের দীর্ঘতা।

(মুসনাদে আহমাদ, ৬ষ্ঠ খণ্ড)

অন্ধকার যুগের আরবরা আশুরার রোযা রাখতো; আর রোযা ফরয হবার পূর্বে সেটি ইসলামেও ওয়াজিব হিসেবে প্রচলিত ছিল। হযরত আবদুল্লাহ বিন উমর (রাযিঃ)-এর কাছ থেকে এ ধরনের বর্ণনা পাওয়া যায়। কিন্তু তিনি বর্ণনা করেননি কেননা অন্ধকার যুগের আরবরা সেদিন রোযা রাখতো, আয়েশা (রাযিঃ)ই এর কারণ উল্লেখ করতে গিয়ে বলেছেনঃ ‘আরবরা সে সময় রোযা রাখত ঐদিন এজন্যে যে, সেদিন কাবার ওপর গিলাফ চড়ানো হত।

(মুসনাদে আহমাদ, ৬ষ্ঠ খণ্ড-পৃঃ ২৪৪)

মহানবী সাল্লাল্লাহু আলাইহি ওয়াসাল্লাম তাহাজ্জুদ পড়তেন অথচ রমযানের পুরো মাসে তিনি তারাবীহ পড়েননি একদিনও। হযরত আয়েশা (রাযিঃ) বলেন, মহানবী সাল্লাল্লাহু আলাইহি ওয়াসাল্লাম পড়েননি এজন্যে যে, প্রথম দিন যখন মহানবী সাল্লাল্লাহু

আলাইহি ওয়াসাল্লাম মসজিদে তারাবীহ ছিল তখন আরো কিছু লোক তাতে এসে উপস্থিত হয়, দ্বিতীয় দিন আরো বেশী, তৃতীয় দিন আরো বেশী ভিড়। আর চতুর্থ দিন এত বেড়ে গেল মুসল্লির সংখ্যা যে, মসজিদে আর জায়গা থাকলো না কোনো। কিন্তু পঞ্চম দিন মহানবী সাল্লাল্লাহু আলাইহি ওয়াসাল্লাম বেরোলেন না। লোকেরা হতাশ হয়ে ফিরে যায়। সকালে মহানবী সাল্লাল্লাহু আলাইহি ওয়াসাল্লাম লোকদের বললেনঃ ‘রাতে তোমাদের অবস্থা আমার অজ্ঞাত ছিল না, তবে আমার ভয় হচ্ছিলো না জানি তারাবীহ আবার তোমাদের উপর ফরয না হয়ে যায় এবং তোমরা তা আদায় করতে ব্যর্থ হও।

হজ্জের কতিপয় অঙ্গ যেমন- তওয়াফ করা, কোনো কোনো জায়গায় দৌড়ানো, কোথাও দাড়ানো, কোথাও কাকর ছেড়ে দেয়া আপাত-দৃষ্টিতে মনে হয় অর্থহীন, কিন্তু হযরত আয়েশা (রাযিঃ) বলেন :

‘কাবাগৃহ’ সাফা মারওয়ার তাওয়াফ, কাকর ছুড়ে মারার সবাই কেবল আল্লাহকে স্মরণ করার জন্যে।

(মুসনাদে আহমাদ, ৬ষ্ঠ খণ্ড-পৃঃ ৬৪)

কুরআনে কারীমে যেসব ইঙ্গিত পাই, তাতেও দেখি যে, হযরত ইব্রাহীমের (আঃ) সময়ে এটিও এক ধরনের ইবাদত ছিল; আর যেহেতু হজ্জ মূলতঃ ইব্রাহীমের (আঃ) স্মৃতি, সেজন্যে সেই আগের ইবাদত পদ্ধতি বহাল রাখা হয়।

মক্কা নগরীর নিকটে মুহাসসব নামক একটি জায়গা আছে যেখানে মহানবী সাল্লাল্লাহু আলাইহি ওয়াসাল্লাম অবস্থান করেছিলেন এবং তারপরে খুলাফায়ে রাশেদীনও সেখানে অবস্থান করেছেন। সেজন্যে হযরত আবদুল্লাহ বিন উমর (রাযিঃ) সেটিকে হজ্জের সুনুতের অন্তর্ভুক্ত মনে করতেন। কিন্তু আয়েশা (রাযিঃ) সেই জায়গা অবস্থানকে সুনুত মনে করতেন না। মহানবী সাল্লাল্লাহু আলাইহি ওয়াসাল্লাম-এর সে স্থানে অবস্থান সম্পর্কে তিনি বলেনঃ ‘মহানবী সাল্লাল্লাহু আলাইহি ওয়াসাল্লাম সেখানে অবস্থান করেছিল এজন্যে যে, সেখান থেকে চলবার একটি সহজতা আছে।

হযরত আবদুল্লাহ বিন আব্বাস এবং হযরত আবু রাযিও একই রকম মত পোষণ করেন।

(সহীহ মুসলিম)

একবার মহানবী সাল্লাল্লাহু আলাইহি ওয়াসাল্লাম নির্দেশ দিলেন যে, কুরবানীর মাংস তিন দিনের বেশী না রাখা হয়; অনেক সাহাবা এই নির্দেশকে স্থায়ী মনে করতেন; কিন্তু অনেক সাহাবীর দৃষ্টিতে এটি ছিল সাময়িক নির্দেশ; হযরত আয়েশা (রাযিঃ)ও একে সাময়িক অস্থায়ী নির্দেশ মনে করতেন এবং তার কারণ হিসেবে তিনি বলেনঃ

‘এরকম নয় যে, কুরবানীর গোশ্ত তিন দিনের পর হারাম হয়ে যায় বরং এরকম বলার কারণ এই যে, সেই সময়ে কম লোকই কুরবানী করতে পারতো; আর এই জন্যে মহানবী সাল্লাল্লাহু আলাইহি ওয়াসাল্লাম বললেন যে, যারা কুরবানী করেছে তাদের উচিত কুরবানী যারা করেনি তাদের খাওয়ানো।

(মুসনাদে আহমাদ, ৬ষ্ঠ খণ্ড-পৃঃ ১০২)

ইমাম মুসলিম হযরত আয়েশা (রাযিঃ)-এর সূত্রে উল্লেখ করেছেন, একবার মদীনার আশেপাশের গ্রামে দুর্ভিক্ষ দেখা দেয়; মহানবী সাল্লাল্লাহু আলাইহি ওয়াসাল্লাম তখন এই নির্দেশ দেন। আবার পরের বছর যখন সেখানে দুর্ভিক্ষ হল না তিনি আগের নির্দেশকে বিলুপ্ত ঘোষণা করেন। হযরত সালমা বিন আকওয়ার (রাযিঃ) এর থেকেও এরকম বর্ণনা উল্লিখিত।

(সহীহ মুসলিম)

কাবার দেয়ালের একপাশে কিছু জায়গা তাওয়াফের অন্তর্ভুক্ত; যাকে হাতিমে কাবা বলা হয়। মানুষের জিজ্ঞাসা ছিল, যে জায়গা কাবার অন্তর্ভুক্ত নয় তাকে তাওয়াফের অন্তর্ভুক্ত করার মানে কি। হযরত আয়েশা (রাযিঃ)-এর মনেও এই জিজ্ঞাসা জাগে। তিনি মহানবী সাল্লাল্লাহু আলাইহি ওয়াসাল্লামকে এই বিষয়ে জিজ্ঞেস করলেনঃ হে মহানবী সাল্লাল্লাহু আলাইহি ওয়াসাল্লাম এই জায়গাও কি কাবার অন্তর্ভুক্ত? তিনি বললেনঃ হ্যাঁ তবে কাবাঘর নির্মাণের সময় তা অন্তর্ভুক্ত করা হয়নি কেন? মহানবী সাল্লাল্লাহু আলাইহি ওয়াসাল্লাম বললেনঃ তোমার জাতির কাছে টাকা ছিল না সেজন্যে কমিয়ে দেয়। তারপর বললেন দরোজা এত বড় করে রাখার দরকার কি? মহানবী সাল্লাল্লাহু আলাইহি ওয়াসাল্লাম বললেনঃ সেটা এজন্যে যে, ‘কাবা যাকে ইচ্ছে ভেতরে যেতে দেবে যাকে ইচ্ছে বাধা দেবে।

হযরত আবদুল্লাহ বিন উমর (রাযিঃ) বলেনঃ যদি আয়েশা (রাযিঃ)-এর এই বর্ণনা সঠিক হয়, তাহলে মনে হচ্ছে মহানবী সাল্লাল্লাহু আলাইহি ওয়াসাল্লাম এজন্যেই এদিকের দু’টো স্তম্ভে চুমো দেননি। কিন্তু প্রশ্ন হচ্ছে যখন মহানবী সাল্লাল্লাহু আলাইহি ওয়াসাল্লাম জানতেন ‘কাবাঘর’ তার আগের আসল অবস্থানে স্থিত নেই। তখন শরীয়তে ইবরাহিমীর পুনঃ প্রতিষ্ঠাতা হিসেবে তার উচিত ছিল তা ভেঙ্গে নতুন করে নির্মাণ করা। তবে মহানবী সাল্লাল্লাহু আলাইহি ওয়াসাল্লাম হযরত আয়েশা (রাযিঃ) এই কারণটি বর্ণনা করেছেন যে, যদি তোমার জাতি কুফরের এত নিকটবর্তী না হত, তাহলে কাবাঘর ঢেলে আমি আবার ইবরাহীমের মত ভিত্তিতে পুনঃ নির্মাণ করতাম।

আজকাল তো হিজরতের অর্থ মনে করা হয় এরকমঃ মদীনা চলে যাওয়া মক্কা ছেড়ে এবং মদীনায় বসত নির্মাণ করা, যদিও মক্কায তারা যতো ভালই থেকে থাক না কেন, কিন্তু হযরত আয়েশা (রাযিঃ) হিজরতের এই তাৎপর্য বর্ণনা করেছেনঃ এখন হিজরত নেই, হিজরত তো সেই জিনিস ছিল যখন মুসলমানরা নিজের দ্বীনধর্ম নিয়ে ভয়ে দৌড়ে এসেছিল আল্লাহর কাছে, তার রাসুলের কাছে যেতে তাকে ধর্ম পরিবর্তনের জন্যে নির্যাতন না করা হয়। কিন্তু এখন আল্লাহ তা‘আলা ইসলামকে বিজয়ী করে দিয়েছেন, এখন মুসলমান যেখানে ইচ্ছে আল্লাহর আরাধনা করতে পারে তবে জিহাদের এবং নিয়তের সওয়াব বাকি আছে।

(সহীহ বুখারী, বাবুল হিজরত)

মহানবী সাল্লাল্লাহু আলাইহি ওয়াসাল্লাম ইন্তেকালের পর সাহাবাদের ভেতর বিতর্ক তৈরি হল যে, কোথায় দাফন করা হবে তাকে। একটি বর্ণনা আছেঃ হযরত আবু বকর

(রাযিঃ) বলল, নবীর মৃত্যু যেখানে হয় তাকে সেখানেই দাফন করতে হয়। কিন্তু এর আসল কারণ বর্ণনা করেছেন হযরত আয়েশা (রাযিঃ)ঃ ‘মহানবী সাল্লাল্লাহু আলাইহি ওয়াসাল্লাম মৃত্যু শয্যায় বলেছিলেনঃ আল্লাহ তা‘আলা ইহুদীদের এবং নাসারাদের উপর অভিশাপ দিয়েছেন কারণ তারা নবীর কবরসমূহকে সিজদার স্থান বানিয়ে ফেলেছিল; হযরত আয়েশা (রাযিঃ) বলেন যদি এটি না হত, তাহলে তার কবর হত খোলা প্রান্তরে, যেহেতু ভয় ছিল ইহুদীরা-নাসারারা যে রকম কবরকে পূজাগার বানিয়ে নিয়েছিল সেরকম তার কবর নিয়ে হতে পারে সেজন্যে তিনি তার বাসস্থানেই সমাহিত হন।

(মুসনাদে আহমাদ, ৬ষ্ঠ খণ্ড-পৃঃ ১২১)

হাদীছ শাস্ত্র : হাদীছ বিশারদগণ হাদীছ বর্ণনার দিক থেকে সাহাবীগণের পাঁচটি স্তর নির্ধারণ করেন এবং প্রায় সব স্তরেই পুরুষদের সঙ্গে সঙ্গে মহিলা সাহাবীগণও অন্তর্ভুক্ত আছেন :

এক. প্রথম স্তরে সেই সাহাবীগণ আছেন, যাদের বর্ণনা {রিওয়াযত} হাজার অথবা তার চেয়ে বেশী। হযরত আয়েশা (রাযিঃ) এদের অন্তর্গত।

দুই. দ্বিতীয় স্তরঃ যাদের বর্ণিত হাদীছ সংখ্যা পাঁচশো অথবা পাঁচশোর বেশী; এদের মধ্যে কোন মহিলা সাহাবী নেই।

তিন. যাদের বর্ণিত হাদীছ সংখ্যা একশো বা একশোর অধিক, কিন্তু পাঁচশোর কম এদের মধ্যে হযরত উম্মে সালমা (রাযিঃ) আছেন।

চার. চতুর্থ স্তরে তাঁরা- যাদের বর্ণিত হাদীছ সংখ্যা চল্লিশ থেকে একশোর ভেতর; এদের মধ্যে অনেক মহিলা সাহাবী আছেন; যেমন উম্মুল মু‘মেনিন উম্মে হাবিবা (রাযিঃ) উম্মে হানি (রাযিঃ)।

পাঁচ. যাদের বর্ণিত হাদীছ সংখ্যা চল্লিশ অথবা চল্লিশের কম; এদের মধ্যেও অনেক মহিলা সাহাবী আছেন; যেমন উম্মে কায়েস (রাযিঃ), হযরত ফাতেমা বিনতে কায়েস (রাযিঃ) হযরত রুবাই বিনতে মাসউদ (রাযিঃ) হযরত কুলসুম বিনতে আরেকটি হাসিন গিফারী (রাযিঃ) হযরত জদা বিনতে ওহাব (রাযিঃ)।

এতো গেল হাদীছের বর্ণনার দিক, আরেকটি শাস্ত্র আছে হাদীছ বিবেচনার বৈজ্ঞানিক সূত্রে সম্পর্কিত জ্ঞান যাকে ‘দিরায়েত’ বলা হয়।

এই দিরায়েত-এর সূচনাও কোন কোন মহিলা সাহাবীর হাতে ঘটে এবং পরে আরো অনেক হাদীছ বিজ্ঞানী এতে বিস্তৃতি আনেন এবং সম্পূর্ণতা ও বিজ্ঞানভিত্তিক দান করেন। হযরত আয়েশা (রাযিঃ) কোন কোন হাদীছ বিষয়ে এই দিরায়েতের সূত্রে সমালোচনা করেন এবং তা থেকে দিরায়েতের বিশেষ বিশেষ পদ্ধতি প্রতিষ্ঠিত হয়। যেমন হযরত আয়েশা (রাযিঃ)-এর সামনে এই হাদীছ বর্ণনা করা হয় যে, মৃত ব্যক্তির উপর তার পরিবার পরিজন ক্রন্দন করলে আযাব হয়- তখন হযরত আয়েশা (রাযিঃ) নিজের দিরায়েত সম্পর্কিত জ্ঞান ও বিবেচনার সূত্রে তা গ্রহণ করতে অস্বীকৃতি জানান

এবং বলেন কুরআনুল কারীমে আছে একজনের পাপের বোঝা আরেকজন বহন করতে পারে না। ‘কাজেই ফ্রন্দন করা পরিবার পরিজনের পাপ, তার আযাব মৃত মানুষের বহন করতে হবে কেন? তার আযাবই বা কেন হবে? এই থেকে দিরায়েতের এই সমালোচনা ও পরিগ্রহণ পদ্ধতি প্রতিষ্ঠিত হল যে, হাদীছের যে বর্ণনা কুরআনের আয়াতের পরিপন্থি বা বিরোধী হবে তা গ্রহণ করা যাবে না। আর এই পদ্ধতি অনুসারে হযরত আয়েশা (রাযিঃ) অনেক হাদীছের সমালোচনা করেছেন। যেমন- সাহাবীগণের কালে এই ধারণা ছড়িয়ে গিয়েছিল যে, রাসূলে কারীম সাল্লাল্লাহু আলাইহি ওয়াসাল্লাম মিরাজের রাতে আল্লাহকে দর্শন করেছিলেন- কিন্তু হযরত আয়েশা (রাযিঃ)-এর সামনে যখন এই ধরনের বর্ণনা করা হয় তিনি বলেন, যে ব্যক্তি এ ধরনের বর্ণনা করবে সে মিথ্যাবাদী। তারপর এই আয়াত ছিলঃ কোন চক্ষু তাকে দেখার ক্ষমতা রাখে না। তিনিই বরং অধিকার করেন সকলের দৃষ্টি, তিনিই পবিত্র ও সর্বজ্ঞাত।

(আইনুল ইসাবা, পৃঃ ৮, ১৭, ১৮)

হযরত আয়েশা (রাযিঃ)-এর সামনে যখন এধরনের একটি হাদীছ বর্ণনা করা হল যে, ‘রমণীর মধ্যে ঘোড়ার মধ্যে এবং ঘরের মধ্যে অকল্যাণ নিহিত’ আয়েশা (রাযিঃ) সেটি অস্বীকার করলেন এবং বললেনঃ কুরআনুল কারীমে আছেঃ ‘পৃথিবীর মধ্যে এবং তোমাদের নিজেদের ভেতর যেসব অসুবিধা এবং বিপদ উপস্থিত হয় তা আগে থেকেই লিখিত।’

বদর যুদ্ধে যেসব কাফির মারা যায়, মহানবী সাল্লাল্লাহু আলাইহি ওয়াসাল্লাম তাদের কবরে দাড়িয়ে বলেন, ‘আল্লাহ যে অঙ্গীকার করেছিলেন, তা কি এবার সত্য হতে দেখেছো।’

একটি বর্ণনায় আছে, সে সময় হযরত উমর (রাযিঃ) মহানবী সাল্লাল্লাহু আলাইহি ওয়াসাল্লামকে বললেনঃ আপনি কি মৃতদের সঙ্গে কথা বলেছেনঃ তোমরা তাদের চেয়ে বেশী শুনতে পাওনা তবে তারা জবাব দিতে পারে না। এই যা।’

হযরত আয়েশা (রাযিঃ)-এর সামনে যখন এই বর্ণনা করা হয়, তখন হযরত আয়েশা (রাযিঃ) বললেন, নবীজী সেরকম নয় এরকম বলেছেনঃ ‘তারা নিশ্চিত জানে যে, আমি যা বলছিলাম তাদেরকে, সত্য বলছিলাম।’

এরপর হযরত আয়েশা (রাযিঃ) কুরআনের এই আয়াতটি পাঠ করেনঃ ‘হে নবী সাল্লাল্লাহু আলাইহি ওয়াসাল্লাম তুমি মৃতদের নিজের কথা শোনাতে পার না এবং তাদেরও শোনাতে পারো না, যারা কবরে শায়িত আছে। অর্থাৎ এই আয়াতের দিক থেকে কাফিররা তার কথা শুনতে পারে না।

(সহীহ বুখারী, বদর যুদ্ধ অধ্যায়)

সাধারণভাবে লোকেরা মৃতার বিরুদ্ধে অর্থাৎ মৃত বিবাহ হারাম হওয়া সম্পর্কে বিভিন্ন হাদীছ উপস্থিত করে থাকেন; কিন্তু হযরত আয়েশা (রাযিঃ)-এর এক শিষ্য যখন তাকে মৃত বিবাহ সম্পর্কে জিজ্ঞেস করেন, তখন তিনি হাদীছ থেকে এর জবাব না

দিয়ে বললেন ভোমার ও আমার মাঝে আল্লাহর মহাখব্রু আছে। আল-কুরআন। তার একটি আয়াত ছিল— ‘যারা নিজেদের যৌনাঙ্গ-কেবল স্ত্রী ও দাসীদের ছাড়া বাচিয়ে রাখে, তাদের উপর কোনো নিন্দা নেই। কাজেই এই দুই অবস্থা ছাড়া অন্য কোন অবস্থায় শরীরী সম্পর্কে গ্রাহ্য হতে পারে না। (ইসাবা, সুযুতী, হাকেম থেকে উদ্ধৃত)

হযরত আবু হুরায়রা (রাযিঃ) থেকে একটি বর্ণনা আছে যে, জারজ সন্তানের মা-বাবা-বাচ্চা তিনটিই নষ্ট। হযরত আয়েশা (রাযিঃ) বললেন, এ কথা ঠিক নয়। ঘটনা এই যে, একজন মুনাফিক ছিল, সে নবীজীকে গালমন্দ করতো, লোকেরা বলল, তাছাড়াও সে একজন জারজ সন্তানও বটে; নবীজী সাল্লাল্লাহু আলাইহি ওয়াসাল্লাম বললেনঃ সে তিনজনের চেয়ে নষ্ট। অর্থাৎ বাবা-মা দু’জনের চেয়ে সে বেশী খারাপ। এটি ছিল একটি বিশেষ ঘটনা এটি সাধারণ ঘটনা বলে চালালে যাবে না! আল্লাহ তা’আলা নিজেই তো বলেছেনঃ ‘একজনের পাপের বোঝা অন্যজন বহন করে না।

অর্থাৎ দোষ তো মা-এর বাচ্চার তো কোনো পাপ নেই। কাজেই কেনই বা তাকে তাদের চেয়ে খারাপ বলা যাবে। (ইসাবা, সুযুতী, হাকেম থেকে উদ্ধৃত)

ইসলামী আইন শাস্ত্র

মহানবী সাল্লাল্লাহু আলাইহি ওয়াসাল্লাম-এর সময়ে ইলমে ফিকাহ কোন সংকলিত সম্পাদিত অর্থাৎ সুগ্রন্থিত জ্ঞান বা শাস্ত্র ছিল না যে সাহাবীগণ তা বিধিপদ্ধতি অনুসারে শিখতেন। প্রশ্ন করে, ভাষ্য ও ব্যাখ্যা চেয়ে মহানবী সাল্লাল্লাহু আলাইহি ওয়াসাল্লাম-এর কাছ থেকে নিশ্চয়ই অসংখ্য মাসআলা জানা যেতো। কিন্তু সাহাবাগণ সৌজন্য বশতঃ এত প্রশ্ন করতে যেতেন না; আরো একটা কারণ ছিল যে, কুরআন অতিরিক্ত প্রশ্ন করতে নিষেধ করেছিল বলে, তারা তা করতেন না। কমই জিজ্ঞেস করতেন। মুসনাদে দারেমীতে হযরত আবদুল্লাহ বিন আব্বাস (রাযিঃ) থেকে বর্ণিত আছে যে, সাহাবারা মহানবী সাল্লাল্লাহু আলাইহি ওয়াসাল্লাম-এর কাছে থেকে মোটামুট তেরটি মাসআলা জিজ্ঞেস করেছিল। বেগুলোর প্রায় সবই কুরআনুল কারীমে উল্লিখিত আছে।

(মুসনাদে দারেমী, পৃঃ ২৯)

এজন্য মহানবী সাল্লাল্লাহু আলাইহি ওয়াসাল্লাম-এর কাছ থেকে ফিকাহ সম্পাদিত জ্ঞানার্জনের একটি পদ্ধতিই ছিল মহানবী সাল্লাল্লাহু আলাইহি ওয়াসাল্লাম-এর কাজকর্মের নামায, রোযা, হজ্জ্ব, যাকাতের গভীর অনুসরণ এবং অনুধাবন করতেন এবং অনুমান ও কারণ নির্ণয় করে তারা সেসব কাজের শর্তসমূহকে বৈধ ওয়াজিব এবং বিলুপ্ত বলে নির্ধারণ করতেন। (হুজ্জাতুল্লা-হুল-বালিগা, মিশর, পৃঃ ১১২)

কিন্তু মহিলা সাহাবীগণ এই পদ্ধতিতে কমই উপকৃত হবার সুযোগ পেতেন। তাছাড়াও যে সব ফিকাহর মাসায়িল মহিলাদের সঙ্গে সম্পৃক্ত সেগুলো সাধারণভাবে বর্ণনা করাও যেতেনা। সেজন্য মহিলা সাহাবীগণ প্রায়ই মহানবী সাল্লাল্লাহু আলাইহি ওয়াসাল্লামকে

বিভিন্ন বিষয়ে জিজ্ঞেস করতেন, ব্যাখ্যা জানতে চাইতেন। হযরত আয়েশা (রাযিঃ) নিজেই বলেছেনঃ ‘আনসারী মহিলারা কতো উৎকৃষ্ট দ্বীন সম্পর্কিত জ্ঞান অর্জনের জন্যে তারা লজ্জা-শরমের বাধা মানতো না। (সহীহ মুসলিম, কিতাবুত তাহারাতি)

এই ধরনের জানার্জন ও শিক্ষাগ্রহণ পদ্ধতি থেকে মহিলা সাহাবীগণ নানাভাবে উপকৃত হন এবং এভাবে তাদের তিনটি স্তর নির্ধারিত হয়ঃ

এক. অধিক বিষয় বর্ণনাকারীঃ এরা তারাই যাদের থেকে অনেক বিষয় সংকলিত হয়েছে।

দুই. স্বল্প বিষয় বর্ণনাকারীঃ তারা যাদের থেকে কম সংখ্যক বিষয় বর্ণিত আছে।

তিন. মধ্যবর্তী স্তরঃ যাদের থেকে এই দুই শ্রেণীর মাঝামাঝি বিষয় বর্ণিত ও সংকলিত।

আর এই তিনটি পর্যায়ের সাহাবীগণের পাশাপাশি যেসব মহিলা সাহাবী আছেন, তাদের উল্লেখ আসছে। আল্লামা বিন হাজম প্রথম স্তরের মহিলা সাহাবীগণের সম্পর্ক বলেছেন যে, তাদের বর্ণিত বিষয় ও মাসআলা যদি একত্র করা হয় তাহলে বৃহৎ আয়তনের পুস্তক তৈরি করা যাবে। এদের মধ্যে হযরত আয়েশা (রাযিঃ) রয়েছেন।

তৃতীয় স্তরের মহিলা সাহাবীগণের মাসআলা এবং মীমাংসা নিয়ে পুস্তিকা তৈরি হতে পারে, যেমন হযরত উম্মে সালমা (রাযিঃ)।

দ্বিতীয় স্তরের ব্যক্তিদের থেকে কিছু সংখ্যক মাসায়িল বর্ণিত আছে। এদের ভেতর অনেক মহিলা সাহাবী আছেন; যেমন হযরত উম্মে আতিয়া (রাযিঃ), হযরত সুফিয়া (রাযিঃ), হযরত হাফসা (রাযিঃ), হযরত উম্মে হাবিবা (রাযিঃ), হযরত আসমা (রাযিঃ), হযরত উম্মে গুরাইক (রাযিঃ), হযরত খাওলা (রাযিঃ), হযরত আতেফা বিনতে যায়েদ (রাযিঃ), হযরত সালহা (রাযিঃ), হযরত জুআইরা (রাযিঃ), হযরত মায়মুনা (রাযিঃ), হযরত ফাতেমা বিনতে কায়েস (রাযিঃ)।

উপসংহার

মহিলা-সাহাবীগণের কৃতিত্ব

সাহাবায়ে কেরামগণের ভেতর সবচেয়ে ভাল কে তা নিয়ে বিতর্ক আছে। আহলে সুন্নাত ওয়াল জামাতের অভিমত হচ্ছেঃ খোলাফায়ে রাশেদীন সকল সাহাবাদের মধ্যে উৎকৃষ্ট। আর খলীফাদের মধ্যে প্রাধান্যের ভিত্তি খিলাফতের হিসেবে নির্দিষ্ট হয়ে থাকে। কিন্তু আল্লামা বিন হাজমের অভিমত হচ্ছেঃ মহানবী সাল্লাল্লাহু আলাইহি ওয়াসাল্লাম-এর পবিত্র পত্নীগণ সকল সাহাবীদের চেয়ে উৎকৃষ্ট। আর এ বিষয়টি তিনি তার গ্রন্থ ‘আল মিলাল ওয়ান্নেহালে’ উল্লেখ করেছেন বিস্তারিতভাবে; আর সেই সূত্রে সেই সব আয়াত এবং হাদীছের জবাবও উপস্থিত করেছেন, যেগুলো থেকে আপাতভাবে অনুমিত হয় যে, মহিলাদের স্থান সাধারণত পুরুষদের নীচে। তবে এখন আমরা এই সব আলোচনা জটিলতায় প্রবেশ বাঞ্ছনীয় মনে করি না। তবে ধর্মের এবং চরিত্রের দৃষ্টিকোণ থেকে বিশিষ্টতার যেসব প্রাপ্তসমূহ প্রতিষ্ঠা করা যায়, তা দৃষ্টিতে রেখে আমরা মহিলা সাহাবীদের জীবনের কৃতিত্বাংশে সঠিক হাদীছসমূহ উৎকলন করে দিচ্ছি; যেগুলো থেকে প্রমাণিত হবে যে, তাতে তাদের পাশাপাশি উপস্থিত আছেন মহিলা-সাহাবীরাও।

ইসলামের মধ্যে সবচেয়ে বড় কৃতিত্ব ইসলাম-গ্রহণ ও ঈমান আনয়নের ক্ষেত্রে অগ্রগামিতা; হযরত আবু বকর (রাযিঃ)-এর মর্যাদার মধ্যে পাশাপাশি দুজন মহিলা সাহাবীও আছেনঃ হযরত খাদীজা (রাযিঃ) এবং হযরত উম্মে আইমন (রাযিঃ); সহীহ বুখারীতে হযরত আম্মার (রাযিঃ)-এর কাছ থেকে ‘মানাকিবে আবু বকর’-এ বর্ণিত হয়েছেঃ আমি মহানবী সাল্লাল্লাহু আলাইহি ওয়াসাল্লামকে সেই অবস্থায় দেখেছি, যখন তাঁর সঙ্গে পাঁচজন গোলাম, দু’জন মহিলা এবং হযরত আবু বকর (রাযিঃ) ছিলেন।

ঈমান আনয়নের অগ্রগামিতার পর, সবচেয়ে বড় সম্মান হিজরতের ক্ষেত্রে অগ্রগামিতা। আর এক্ষেত্রে সকল সাহাবাদের পত্নী অংশগ্রহণ করেছেন এবং প্রাথমিক হিজরত কারীদের পূন্য অর্জন করেছেন। আল্লামা বিন হাজম (রাযিঃ) তাঁর ‘আলমিলাল ওয়ান্নেহালে’ উল্লেখ করেছেনঃ আমাদের এই বিষয়ে সন্দেহ নেই যে, সাহাবাগণের মর্যাদার অন্তর্ভুক্ত। তাদের ভেতর কারো চেয়ে কারো সম্মান বেশী বা কম নয়। সবাই অভিন্ন ছওয়াব পুরুষদের মধ্যে অনেকেই অনেক মহিলার চেয়ে বিশিষ্ট ও মর্যাদাশ্রিত। আল্লাহ তা‘আলা এমন কোনো স্তরের কথা বলেন যেখানে তিনি পুরুষদের পাশাপাশি মহিলাদের অন্তর্ভুক্ত করেননি। যেমন আল্লাহ বলেছেন মুসলমান রমণীরা এবং পুরুষরা। ইসলামে সর্বপ্রথম হিজরত হচ্ছে হাবশার হিজরত বা আবিসিনিয়ার হিজরত। সেই হিজরতে একজন মহিলা সাহাবী এমন এক সম্মান অর্জন করেছিলেন, যার জন্যে

সকল আবিসিনিয়ার হিজরতকারী সাহাবাগণ গৌরব বোধ করেছেন। হযরত আবু মূসা (রাযিঃ) বর্ণনা করেন যখন আমরা মদীনার দিকে মহানবী সাল্লাল্লাহু আলাইহি ওয়াসাল্লাম-এর হিজরতের সংবাদ অবহিত হলাম, তখন আমরাও নিজেদের ৫৩ অথবা ৫২ জন মানুষের সঙ্গে হিজরতের ইচ্ছে করলাম এবং এ উদ্দেশ্যে আমরা নৌকা আবিসিনিয়ায় এসে উপনীত হয় এবং সেখানে দেখা হয় হযরত জাফর বিন তালেব ও তাঁর বান্ধবদের সঙ্গে। হযরত জাফর (রাযিঃ) বললেনঃ আমাদেরকে মহানবী সাল্লাল্লাহু আলাইহি ওয়াসাল্লাম এখানে পাঠিয়েছেন এবং এখানেই অবস্থান করার নির্দেশ দিয়েছেন, কাজেই তোমরাও আমার সঙ্গে এখানে অবস্থান কর। আমরা অতএব সেখানেই বসবাস করতে লাগলাম; যখন খায়বরের যুদ্ধে মুসলমানরা বিজয়ী হল, সবাই মিলে এল সেখানে এবং মহানবী সাল্লাল্লাহু আলাইহি ওয়াসাল্লাম-এর সঙ্গে সেখানে সাক্ষাৎ হয়। এখানে তাদের মর্যাদার আরেকটি কারণ এই যে, খায়বরের যুদ্ধে যারা অংশগ্রহণ করেনি, তারা গণীমতের সম্পদ পায়নি; কিন্তু আবিসিনিয়ার এই হিজরতকারী দল তার ব্যতিক্রম— তারা সেখানকার অংশ পায়। এঁদেরকে কোনো কোনো সাহাবা এসে বললেন, তোমাদের চেয়ে আমরা আগে হিজরত করেছি। হযরত আসমা বিনতে উমাইস (রাযিঃ)-এর সঙ্গে দেখা করতে তখন হযরত উমর (রাযিঃ)ও এসে গেল এবং তাঁকে দেখে জিজ্ঞেস করল ইনি কে? হযরত হাফসা (রাযিঃ) বললঃ আসমা বিনতে উমাইস (রাযিঃ)। তাঁর নাম শুনে হযরত আসমা বিনতে উমাইস (রাযিঃ) বললঃ হ্যাঁ আমি। তখন হযরত উমর (রাযিঃ) বলল, আমরা তোমার আগে হিজরত করেছি কাজেই আমরা তোমাদের বেয়ে বেশী মহানবী সাল্লাল্লাহু আলাইহি ওয়াসাল্লাম-এর অধিকারী। এটি শুনে হযরত আসমা (রাযিঃ) খুব রাগান্বিত হলেন এবং উমর (রাযিঃ) বললেনঃ দেখো উমর (রাযিঃ)! তুমি ভুল বলছো; আল্লাহর কসম! তোমরা মহানবী সাল্লাল্লাহু আলাইহি ওয়াসাল্লাম-এর সঙ্গে ছিলে আর মহানবী সাল্লাল্লাহু আলাইহি ওয়াসাল্লাম তোমাদের মধ্যে যারা ক্ষুধার্ত তাদের খাওয়াতেন, তোমাদের ভেতর যারা মূর্থ তাদের উপদেশ দিতেন। আর আমরা আবিসিনিয়ার সেই দূরতম দুর্গম এলাকায় থাকতাম আমাদেরকে অত্যাচার করা হত, ভীত সন্ত্রস্ত থাকতাম আমরা। আর এ সবকিছুই ছিল আল্লাহ এবং তার রাসুলের জন্য আল্লাহর শপথ তুমি যা কিছু বলেছো— তা যদি আমি মহানবী সাল্লাল্লাহু আলাইহি ওয়াসাল্লাম না বলি তাহলে আমি কিছু খাবো না। মহানবী সাল্লাল্লাহু আলাইহি ওয়াসাল্লাম এলে হযরত আসমা (রাযিঃ) তাঁকে এই ঘটনা বর্ণনা করেন; মহানবী সাল্লাল্লাহু আলাইহি ওয়াসাল্লাম বললেনঃ সে তোমার চেয়ে বেশী অধিকারী আমার; উমর এবং তাঁর সঙ্গীদের কেবল একটি হিজরত হয়েছে, আর তোমার এবং তোমার নৌকো সঙ্গীদের দুই হিজরত হয়েছে। হযরত আসমা (রাযিঃ) বলেনঃ আবু মূসা আশয়ারী (রাযিঃ) এবং তাঁর সঙ্গীরা দলে দলে আমার কাছে আসতেন এবং এই হাদীছ জিজ্ঞেস করতেন। তাঁর জন্যে এই

পৃথিবীতে এর অধিক আর কোনো আনন্দজনক ও সম্মান বোধক জিনিস ছিল না। হযরত আবু মূসা (রাযিঃ) বার বার এই হাদীছ জিজ্ঞেস করতেন আমার কাছে।

(সহীহ মুসলিম, পৃঃ ৬০)

মর্যাদার একটি বড় কারণ নবীপ্রেম। আর এই নবী প্রেমের মধ্য দিয়ে কোন কোন মহিলা সাহাবী সেই স্তরে উন্নীত হয়েছিলেন, যা কেবল কতিপয় বিশিষ্ট সাহাবীর সৌভাগ্যে বর্তেছে। সহীহ মুসলিমে বর্ণনা আছে যে, মহানবী সাল্লাল্লাহু আলাইহি ওয়াসাল্লাম হযরত সুলাইম (রাযিঃ) ছাড়া (হযরত আনাস (রাযিঃ) এর জননী) আর কোনো মহিলার ঘরে যেতেন না। এর কারণ জিজ্ঞেস করা হলে মহানবী সাল্লাল্লাহু আলাইহি ওয়াসাল্লাম বলেনঃ এর কারণ হচ্ছে তাঁর উপর আমার করুণা হয়, কারণ তাঁর ভাই আমার সঙ্গে গিয়ে শহীদ হয়েছিলেন। (সহীহ মুসলিম) করুণার সঙ্গে তিনি তাঁর ঘরে যেতেন, তিনিও তেমনি একই প্রেম ও অনুরাগের সঙ্গে তাঁর সেবা করতেন। বুখারী শরীফের অনুমতি অধ্যায়ে আছেঃ যখন মহানবী সাল্লাল্লাহু আলাইহি ওয়াসাল্লাম তাঁর ঘরে যেতেন তিনি তাঁর জন্যে বিছানা বিছিয়ে দিতেন, মহানবী সাল্লাল্লাহু আলাইহি ওয়াসাল্লাম বিশ্রাম করতেন সেখানে। যখন বিশ্রামের পর উঠতেন তিনি মহানবী সাল্লাল্লাহু আলাইহি ওয়াসাল্লাম-এর শরীর নিঃসৃত ঘাম একটি শিশির ভেতর তুলে রাখতেন। মৃত্যুর সময় অসীয়াত করে গিয়েছিলেন যে, কাফনের কর্ফুর সুগন্ধির সঙ্গে যেন এই সঞ্চিত ঘামও দিয়ে দেয়া হয়।

হযরত আনাস (রাযিঃ)-এর খালা হযরত সাল্লাল্লাহু আলাইহি ওয়াসাল্লাম-এর অভ্যাস ছিল এই, যখন তিনি কুবায়ে যেতেন- অবশ্যই তাঁর ওখানে যেতেন। এবং খাওয়া দাওয়া করতেন এবং তারপর বিশ্রাম করতেন। বিশ্রাম করলে হযরত উম্মে হারাম (রাযিঃ) মহানবী সাল্লাল্লাহু আলাইহি ওয়াসাল্লাম-এর কেশগুলো বিনুন কাটতেন।

(সহীহ বুখারী, কিতাবুল জিহাদ)

বিশেষ বিশেষ মহিলা সাহাবী ছাড়াও কতিপয় মহিলা সাহাবী জাতিগত দিক থেকে কিছু মহিলা সাহাবী সামাজিক সম্মান অর্জন করেছিলেন এবং এই সম্মানে সেই গোত্রের সকল মহিলা অন্তর্ভুক্ত। যেমন একবার মহানবী সাল্লাল্লাহু আলাইহি ওয়াসাল্লাম হযরত উম্মে হানি (রাযিঃ)কে বিয়ের আগ্রহ প্রকাশ করেন। উম্মে হানি (রাযিঃ) এই ওজর প্রকাশ পেশ করেন যে, আমি বয়স্ক হয়ে গেছি এবং আমার সন্তান আছে (যাদের লালন-পালন আমার কর্তব্য) এই সূত্রে মহানবী সাল্লাল্লাহু আলাইহি ওয়াসাল্লাম সমস্ত কুরাইশ রমণীদের সম্পর্কে প্রশংসা করতে গিয়ে বলেনঃ

‘উস্তুরোহী রমণীদের মধ্যে সবচেয়ে ভাল কুরাইশ রমণীরা; তারা বাল্যকালে এতিম আপন বাচ্চাদের প্রতি ভালবাসা লালন করে এবং নিজের স্বামীর সম্পত্তি ভালভাবে সংরক্ষণ করে।

আনসারদের গোত্র ইসলামে বিশেষ মর্যাদার অধিকারী এবং এই গোত্রের পুরুষ-রমণী সবাই মহানবী সাল্লাল্লাহু আলাইহি ওয়াসাল্লাম-এর সমান প্রিয় ছিল। হযরত আনাস বিন মালেক (রাযিঃ) বলেছেন, একবার আনসারের রমণীরা এবং আনসারের ছেলেরা একটি বিয়ের অনুষ্ঠান থেকে ফিরে আসছিল; মহানবী সাল্লাল্লাহু আলাইহি ওয়াসাল্লাম তাদের দেখে দাড়িয়ে গেলেন এবং তিনবার বললেন, ‘তোমরা আমার কাছে সকলের চেয়ে বেশী প্রিয়।

আরেকটি বর্ণনায় আছে এক আনসারী মহিলা সাহাবী নিজের বাচ্চা সাথে করে মহানবী সাল্লাল্লাহু আলাইহি ওয়াসাল্লাম-এর কাছে এলেন এবং মহানবী সাল্লাল্লাহু আলাইহি ওয়াসাল্লাম তার সঙ্গে কথা বললেন এবং এই সূত্রে দ্বিতীয়বারে উচ্চারণ করেন সেই সত্তার শপথ যার হাতে জীবন আমার! তোমরা আমার কাছে সকলের চেয়ে বেশী প্রিয়। এই সব মর্যাদার ভিত্তিতে মহানবী সাল্লাল্লাহু আলাইহি ওয়াসাল্লাম মৃত্যুর পর খোলাফায়ে রাশেদীন ও মহিলা সাহাবীগণের ইজ্জত-সম্মান ও মর্যাদা অক্ষুন্ন রাখেন। সহীহ মুসলিমে আছে মহানবী সাল্লাল্লাহু আলাইহি ওয়াসাল্লাম হযরত উম্মে আইমনের (রাযিঃ) হযরত উমর (রাযিঃ)কে বললেন— চলুন, মহানবী সাল্লাল্লাহু আলাইহি ওয়াসাল্লাম যে রকম তার সঙ্গে দেখা করতে যেতেন, আমরাও যাই। তারা যখন তার কাছে গেলে তিনি কেঁদে ফেললেন। তারা বললেন; কাদছেন কেন আপনি? আল্লাহর কাছে মহানবী সাল্লাল্লাহু আলাইহি ওয়াসাল্লাম-এর যে সম্মান আছে, সে অনেক বড়, তিনি বললঃ এজন্যে কাদছি না যে, আমি তা জানি না; বরং কাদছি এজন্যে যে, আসমানী অহীর চলাচল বন্ধ হয়ে গেল। এটি শুনে দু’জন বয়ুর্গও কাঁদতে লাগলেন।

(সহীহ মুসলিম)

অন্যান্য মহিলা সাহাবীগণ ছাড়া নবী পত্নীদের যে সম্মান ছিল, মহিলাদের ইতিহাসে তার দৃষ্টান্ত নেই। মহানবী সাল্লাল্লাহু আলাইহি ওয়াসাল্লাম-এর একজন পবিত্র পত্নী মারা গেলে হযরত আবদুল্লাহ বিন আব্বাস (রাযিঃ) সিজদায় পড়ে গেলেন। লোকেরা জিজ্ঞেস করল, এই সময় আপনি সিজদা করছেন কেন? তিনি বললেনঃ যখন কিয়ামতের বড় নিদর্শন দেখবো সিজদা করে নেবো, নবী পত্নীর মৃত্যুর চেয়ে কিয়ামতের বড় নিদর্শন আর কি হতে পারে?

(আবু দাউদ, কিতাবুল সালাত)

সরফ-নামক স্থানে হযরত মায়মুনা (রাযিঃ) ইন্তেকাল করেন— হযরত আবদুল্লাহ বিন আব্বাস (রাযিঃ) সঙ্গে ছিলেন; বললেনঃ দেখ! ইনি হযরত মায়মুনা (রাযিঃ) তাঁর জানাযা উঠাও— কিন্তু কোন নাড়াচাড়া যেন না হয়।

(নাসায়ী, কিতাবুন নিকাহ)

কোন কোন সাহাবা (রাযিঃ) সম্মান এবং অনুরাগের প্রেরণায় নবী পত্নীদের নিজেদের সম্পত্তি ওয়াক্ফ করে দিতেন। হযরত আবদুর রহমান বিন আওফ (রাযিঃ) পবিত্র পত্নীদের জন্যে বাগান অসীয়াত করে যান— যেটি চার হাজার টাকায় বিক্রি করা হয়।

(তিরমিহী, কিতাবুল মানাকিব)

খলীফাগণ পবিত্র পত্নীদের অত্যন্ত সম্মান করতেন, মর্যাদা দিতেন। হযরত উমর (রাযিঃ) নিজের শাসনামলে নবীপত্নীদের সংখ্যা হিসেবে ন'টি পেয়ালা তৈরী করেছিলেন, যখন তাঁর কাছে কোন ফল অথবা খাওয়ার কোনো ভাল দ্রব্য আসতো তা সেই পেয়ালাসমূহে করে মহানবী সাল্লাল্লাহু আলাইহি ওয়াসাল্লাম-এর পবিত্র পত্নীবর্গের কাছে পাঠিয়ে দিতেন। (মুয়াত্তা, ইমাম মালেক)

২৩ হিজরীতে হযরত উমর (রাযিঃ) যখন হজ্জের নেতা হিসাবে হজ্জ করতে গেলেন- নবী পত্নীদেরও সঙ্গে নিয়ে যান তিনি। হযরত উমর (রাযিঃ) এবং হযরত আবদুর রহমান বিন আওফ (রাযিঃ)কে সওয়ারীসমূহের সঙ্গে করে দেন- এঁরা সম্মুখে-পশ্চাতে চলতেন এবং কাউকে সেই সব সওয়ারীর কাছে আসতে দিতেন না; নবীপত্নীরা যদি কোন জায়গায় অবতরণ করতেন- তাহলে হযরত উসমান (রাযিঃ) এবং হযরত অন্য কাউকে আসতে দিতেন না। (তবকাত-ই-ইবনে সা'আদ)

সাধারণ মুসলমান নবীপত্নীদের সঙ্গে যে রকম উত্তম অনুরাগ পোষণ করতেন, তা এ থেকেও বোঝা যায় যে, লোকেরা প্রায়ই হযরত আয়েশা (রাযিঃ) কাছে ছোট ছোট বাচ্চাদের নিয়ে আসত এবং তিনি তাদের জন্যে বরকতের দু'আ করতেন।

(আদাবুল মুফরিদ)

হযরত আয়েশা বিনতে তালহা (রাযিঃ) উম্মুল মু'মেনীন হযরত আয়েশা (রাযিঃ)-এর হাতে প্রতিপালিত হন। তাঁর বর্ণনা আছে। লোকেরা অনেক দূর থেকে আমার কাছে আসতো এবং যেহেতু হযরত আয়েশা (রাযিঃ) আমাকে প্রতিপালন করেছিলেন এবং সে কারণে তাঁর নৈকট্য আমার অর্জনে ছিল ফলে বুড়ো বুড়ো লোকেরা আমার কাছে আসতো; যুবকেরা আমার সঙ্গে ভাইবোন সম্পর্ক করতো এবং আমাকে উপটোকন দিতো এবং প্রত্যন্ত দেশাঞ্চল থেকে চিঠি লিখতো। (আদাবুল মুফরিদ)

এইসব ঘটনা থেকে প্রমাণিত হয় যে ইসলাম পুরুষ এবং রমণী উভয়ের স্তর সমান উঁচুতে স্থাপন করেছে এবং খোলাফায়ে রাশেদীন ও সাধারণ মুসলমানরা এটি রক্ষা করেছেন। আর মহিলা সাহাবীগণ সেই স্তর এবং সম্মান কেবল দ্বীন, চরিত্র এবং উত্তম সামাজিকতার মাধ্যমে অর্জন করেছিলেন এবং আজো মহিলারা সেগুলো অর্জনের মাধ্যমে নিজের স্তর এবং মর্যাদাকে উজ্জল করতে পারেন।

সমাপ্ত

https://t.me/islaMic_fdf

আমাদের প্রকাশিত কিছু বই



নাদিয়াতুল কুরআন প্রকাশনী

চকবাজার, বাংলাবাজার, ঢাকা

Cover: Abul Fatah I 01914783567